

甘肅全省新通志

卷首式

甘肅新通志進呈表

尚書銜都察院都御史總督陝甘等處地方軍務糧餉兼理茶馬管巡撫事臣長庚

爲纂修甘肅通志告成恭呈

御覽事竊照接管卷內前督臣升允於光緒三十四年二月十九日
奏奉

勅旨重修甘肅通志遵卽開局督辦迄宣統元年十月臣長庚蒞任時
已次第成書尙未付梓今剞劂告竣共裝訂十函謹奉

表上

進者臣長庚誠惶誠恐稽首頓首

上言伏以區分九有皇古卽傳邱索之書位配八方卦爻早應河
圖之瑞則三壤而成賦夏書曾禹貢名篇辨五戎以宜民周禮
亦職方有掌晉楚而外列邦之紀載紛如惟春秋記月編年義

甘肅新通志

進呈表

一

嚴筆削漢唐以來歷史之矯誣甚矣自綱目辨名定分言炳丹
青顧計書有列郡之登而雜錄多私家之著崔鴻紀十六國當
山河分裂誰知東晉封圻闕駟志十三州卽風土臚陳想見西
陲文獻他若太平寰宇之記視元和郡縣而加詳迄乎方輿勝
覽有書舉志乘體裁而盡失惟

大清一統志稟

廟謨而繩墨誠陳奈甘肅百餘年歷兵燹而圖書久佚將欲網羅放失
備人官物曲之詳兼期刪訂繁蕪挈綱舉目張之要非三長之
夙具恐一得之難言霧裏看花未免郢書燕說風前掃葉諸多
亥豕魯魚是宜各專責成冀以仰副

盛典欽惟

皇帝陛下

聖明天縱

學問日新

閩澤覃敷洽龍馬授圖之域

宏恩怙冒徧鳥鼠同穴之方

緯武經文萬化仰

照臨日月

繼

志

述

事

重熙際交泰地天凡金匱石室之藏早備西探於

四庫卽野史稗官之說亦邀

甘肅新通志

進呈表

一一

乙覽於

萬幾矧甘疆寄重邊防而通志事關政治臣升允祇受

先朝成命恭率在公諸列勤事編摩臣長庚渥承

逾格慈恩謹從退食之餘逐加校勘竊維星分井鬼地屬雍涼御天

而運應乘龍成紀實羲皇故里錫土而疆開牧馬秦亭乃非子

初封積石流沙溯大禹隨刊之績鮮原皇澗是公劉廬旅之墟

金城郡勢控河湟允矣險稱天塹玉門關令嚴鎖鑰自然算握

戎機在昔三秦五涼割據競負嶠之虎卽今番部回族安居馴

比戶之鳩山峙崆峒想仙蹤之縹緲川環涇渭含元氣之渾淪

每思袍澤同仇用副關西出將猶幸衣冠古處不隨江左流風

悃悞無華繭絲致多循吏堅貞著節巾幗亦是丈夫望秋水一

方尙有伊人恥終南之捷徑傳夏聲千載惟知率土懍

正朔於

當陽俎豆莘莘沐

熙朝教育之恩興歌棫樸閭閻皞皞荷

盛世生成之德樂話桑麻守惟正之供而球琳琅玕不復偕織皮作

貢

賜偏灾之賑而布帛菽粟均仰給

帑項周施在

堯天光被之中正漢塞風清之際是以

扇巍顯翼共欽

咸五登三所當頌

德歌

功竊附韓碑柳雅者也臣學慚茅塞才愧藻鋪惟緣雕鏤之既成謹

甘肅新通志

進呈表

三

以緬函而恭

進伏願

文光奎照

大度海涵

矜載筆之臣工未克識窺六籍經

重瞳之

御覽行將價重三都洵合省之光榮備當官之掌故矣謹案卷首

綸音

天章五冊其次天文志二冊輿地志八冊建置志七冊祠祀志五冊學

校志三冊兵防志五冊職官志十三冊人物志二十三冊藝文

志八冊志餘二冊刊刻告成臣曷任瞻

天仰

聖激切屏營之至謹奉

表隨

進以

聞

宣統 年 月 日

尙書銜都察院都御史總督陝甘等處地方軍務糧餉兼理茶馬管巡撫事 臣長 庚

謹上

表

甘肅新通志



進呈表

四

甘肅修志銜名

監修

前任陸軍部尚書兼都察院都御史總督陝甘等處地方軍務糧餉兼理茶馬管巡撫事

升允

尚書銜兼都察院都御史總督陝甘等處地方軍務糧餉兼理茶馬管巡撫事

長庚

總辦

二品銜甘肅等處承宣布政使司布政使

陳燦

前署理甘肅提學使司提學使

陳曾佑

花翎二品銜甘肅勸業道前署按察使

彭英甲

花翎布政使銜前任甘肅甘涼兵備道署按察使

白遇道

花翎二品頂戴三品銜甘肅補用道署甘涼道

霍勤燁

三品銜甘肅候補道前署提學使

王新楨

花翎三品銜甘肅候補道署甯夏道

孫庭壽

甘肅新通志

銜名

一

總纂

禮學館顧問官內閣侍讀前福建道監察御史

安維峻

前提調

道員用甘肅候補知府前署平涼府知府

同鎮牲

前總纂

陝西候補直隸州知州前任藍田縣知縣

丁禧翰

幫總纂

甘肅華亭縣知縣

陳良均

分纂

度支部主事

王烜

大理院七品小京官

劉繩武

前禮部七品小京官

王運乾

甘肅候補直隸州知州前署階州直隸州知州

臣 王福鴻

甘肅平羅縣知縣前禮部主事

臣 雷光甸

甘肅大挑知縣署甯遠縣知縣

臣 袁承澤

甘肅卽用知縣前署安定縣知縣

臣 劉春堂

四川補用知縣

臣 孫雲錦

甘肅揀選直隸州州同

臣 趙維恭

賞換五品銜甘肅截取直隸州州同

臣 魏日誠

甘肅試用直隸州州判

臣 陳龍鼎

分省試用知縣

臣 張炳焱

分省試用知縣

臣 馬元春

花翎知府銜前四川大竹縣知縣

臣 宋萬選

甘肅補用縣丞

臣 朱元鴻

甘肅新通志



銜名

二

候選教諭前任正甯縣訓導

臣 羅世俊

文案

甘肅候補直隸州知州前署階州直隸州知州

臣 王福鴻

甘肅大挑知縣署甯遠縣知縣

臣 袁承澤

賞換五品銜甘肅截取直隸州州同

臣 魏日誠

總校

內閣中書銜候選知縣前陝西同州府教授

臣 曹良模

幫總校

分省試用知縣

臣 張炳焱

分校

知州銜署蘭州府地方檢察廳檢察官前新疆試用直隸州州同

臣 王之佐

甘肅試用直隸州州判

臣 崔步霄

六品銜甘肅試用府經歷

臣 李翼鵬

甘肅試用縣丞

臣 袁世楨

甘肅試用縣丞

臣 張守信

甘肅試用典史

臣 張致中

舉人

臣 蔡繩仲

孝廉方正

臣 楊廷俊

州判職銜增貢生

臣 李書田

生員

臣 劉 豐

生員

臣 段聚五

貢生

臣 張聯奎

新疆補用巡檢

臣 段程遠

繕寫

甘肅新通志



銜名

三

陝西試用知縣

臣 罕 札

拔貢生

臣 梁廷棟

圖繪

生員

臣 潘天定

生員

臣 楊夢齡

貢生

臣 張聯奎

監生

臣 吳德生

收發

甘肅試用府經歷

臣 韓鴻瑞

甘肅補用縣丞

臣 朱元鴻

西甯府經歷

臣 談瑞章

甘肅試用縣丞

臣 袁世楨

監刊

知州銜署蘭州府地方檢察廳檢察官前新疆試用直隸州州同

臣

王之佐

甘肅試用典史

臣

張致中

生員

臣

劉豐

貢生

臣

張聯奎

督工

甘肅揀選直隸州州同

臣

趙維恭

甘肅新通志



銜名

四

甘肅新通志

凡例

一甘肅舊通志修於雍正六年成於乾隆元年其書分三十六類各自爲目時事日積今昔攸殊若依舊志目錄續修闕漏必多今仍從開闢修起訖於宣統元年凡爲總目十曰天文曰輿地曰建置曰祠祀曰學校曰兵防曰職官曰人物曰藝文曰志餘依類相從共爲子目六十條分件繫期於綱舉目張而以

綸音

天章敬謹冠諸卷首亦春秋首書天王之義不敢列入目錄懼褻也
一總目統子目旣於總目之首各用弁言復於子目加以小引間或爲論說跋尾此亦班書提綱索隱述贊之義其志內向來沿訛襲謬之處隨卽更正或加按語以明之卷首

甘肅新通志

凡例

一

綸音

天章後惟恭紀數語以合奉揚之體

一周禮保章氏以星土辨九州分野以察災祥甘肅雍州之西境天文東井輿鬼分野爲鶉首之次而晉書天文志以營室東壁度分當之夫安定天水等郡本屬雍州而列於并州之下其誤不待智者而知之今刪除舊說訛謬參酌天算等書列爲圖表務衷諸是附以祥異蓋有取於日變修德月變省刑星變結和之義藉資儆戒一概不著事應以免傳會穿鑿於保章氏辨分野察災祥之說庶有合焉

一輿地首列圖考視舊志加詳圖爲輿地設卽入輿地門不用通冠卷首沿革表亦各附有說令閱者便於檢查餘如疆域山川形勝關梁水利均煞有關繫者風俗物產古蹟悉與地方相附

麗故亦列輿地中其新疆既設行省另有專志無庸牽涉惟選舉向歸合榜亦得備錄焉

一建置凡創制立法一切造作皆是不止城池衙署建築設置已也歷代封爵又皆有實地可指大約本省人居多故不入職官而入建置

一國之大事在祀與戎故建置後卽列祠祀然文事先於武備故又以兵防次學校後蘭州府爲省會新增

文廟禮數以及祭器樂舞封贊特備登焉外府廳州縣但紀廟址所在餘不覲贅其祭器樂舞並繪有圖另爲卷列後學署入建置故學校志不復及選舉表舊志止載文科舉人進士今益以副拔優三貢

制科孝廉方正亦附焉又增列武科鄉會諸人其無可考者姑從略

甘肅新通志

凡例

二

兵防志附蒙土番回亦止詳其部族不妄加藩封名目歷代戎事做通鑑綱目體據事直書用小字分注期於覈實不謬

一舊志於文職自督撫下至直隸州武職自將軍提鎮下至遊擊俱列名志內餘俱止列官制而不及姓名今職官表文職仍如故武職兼列都司守備又自將軍督撫以及各道凡勳業昭著者爲大吏傳若入祀某府廳州縣名宦則於名宦門仍列姓名但注傳見大吏不再立傳以省重複知府以下入祀名宦者卽列傳名宦門此外循卓傳亦祇論政績不論官階武職中應列傳者統入將才門以歸簡該

一人物多設名目過爲區別迹近方人且如儒林文苑等稱僭擬國史非志乘所宜今刪煩就簡核實標名曰聖賢曰鄉賢曰羣材曰忠節曰孝義曰隱逸鄭重分明中亦各還其本量而止王化

起於閨門故於列女特致意焉流寓與仕途有別附諸人物之末亦卽楚材晉用者歟

一忠節傳間有採之甘肅忠義錄者若忠義錄見遺而此次採訪所及卽悉數備登其忠義錄無事實但列表者志書不再列名以人數過多不能悉載且忠義錄已刻有成書可以互見正無容多贅也

一採訪公諸眾論生前容有標榜之誣至蓋棺論乃定矣凡入職官人物傳者皆係沒世之人其生存者一概不立傳以符志例惟列女中守節過三十年者雖尙存亦得備書其不及三十年而身故者例在旌表之列無論已旌未旌俱入志

一職官人物中惟名宦鄉賢旣統以某府某直隸州復依縣分先後自前代及

甘肅新通志

凡例

三

國朝次第纂入用小字注明某府廳州縣名宦鄉賢其餘各門明代以前第按年排列不依縣分先後入

國朝始分縣書之各自以年爲經無容小字再注各門名色但開首仍統以某府某直隸州以清眉目

一藝文除散注各門外其收入藝文志者仍分類編次以篇章過富爰倣河南通志及五涼志體例題目居中大寫文皆雙行小寫每一篇訖卽接寫題目惟遇易代之處另行提寫

國朝字擡出一格寫文中遇擡頭處無論雙單及三擡俱敬謹止空一格寫各門俱準此

一藝文中有文字流傳而石刻不存者入碑記若碑碣尙存卽文字不全但的知爲前代石刻者統以金石名之鐘鼎古器今存者亦然以金石附碑記後無須另立專門

一志餘如僭竊割據實係不能入正志者非正志見遺姑補輯於此也前事者後事之鑑治亂得失略可識也軼事則近雜記矣然亦有鑒戒存焉仙釋方伎紀載家所不廢姑仍之考異略舉易誤者辨正不能悉及志體有褻無貶然如梁氏家世及張俊安丙汪世顯事以綱常名義所關不能不一秉直筆發爲論斷爲臣子示戒也

一作志自有體裁雖義主紀事而文宜雅馴一切時尚新語未敢
驛入

一通志務期簡該然應有者亦須盡有事實既多則卷數較舊志
自倍其文獻無徵者祇得從史闕文之例

甘肅新通志目錄

卷首

綸音

天章

卷之一

天文志
圖說表

卷之二

天文志
附祥異

卷之三

輿地志
圖考

卷之四

輿地志
沿革表

甘肅新通志



目錄

一

卷之五

輿地志
疆域

卷之六

輿地志
山川上

卷之七

輿地志
山川下

卷之八

輿地志
形勝

卷之九

輿地志
關梁

卷之十

輿地志
水利

卷之十一

輿地志

風俗附方言

卷之十二

輿地志

物產

卷之十三

輿地志

古蹟附陵墓

卷之十四

建置志

城池

卷之十五

建置志

官廨

卷之十六

建置志

貢賦上

甘肅新通志



目錄

一一

卷之十七

建置志

貢賦下附戶口

卷之十八

建置志

倉儲

卷之十九

建置志

驛遞附電政郵政

卷之二十

建置志

鹽法

卷之二十一

建置志

錢法

卷之二十二

建置志

茶法

卷之二十三

建置志

釐稅

卷之二十四

建置志

實業

卷之二十五

建置志

歷代封爵

卷之二十六

祠祀志

壇廟

卷之二十七

祠祀志

祭器樂舞圖

卷之二十八

祠祀志

祠宇上

甘肅新通志



目錄

三

卷之二十九

祠祀志

祠宇下

卷之三十

祠祀志

寺觀

卷之三十一

學校志

學額

卷之三十二

學校志

學田

卷之三十三

學校志

貢院

卷之三十四

學校志

試院

卷之三十五

學校志

書院

卷之三十六

學校志

義學

卷之三十七

學校志

社學

卷之三十八

學校志

學堂

卷之三十九

學校志

選舉表上

卷之四十

學校志

選舉表下

甘肅新通志

目錄

四

卷之四十一

兵防志

兵制

卷之四十二

兵防志

塞防附蒙土番回部族

卷之四十三

兵防志

巡警附保甲

卷之四十四

兵防志

交涉

卷之四十五

兵防志

戎事上

卷之四十六

兵防志

戎事中

卷之四十七

兵防志 戎事下

卷之四十八

職官志 歷代官制

卷之四十九

職官志 歷代職官表

卷之五十

職官志 明文職官表

卷之五十一

職官志 明武職官表

卷之五十二

職官志 國朝舊制文職官表 國朝文職官表

甘肅新通志



目錄

五

卷之五十三

職官志 國朝舊制武職官表 國朝武職官表

卷之五十四

職官志 國朝武職官表

卷之五十五

職官志 大吏傳上

卷之五十六

職官志 大吏

卷之五十七

職官志 名宦上

卷之五十八

職官志 名宦下

卷之五十九

職官志 循卓上

卷之六十

職官志 循卓中

卷之六十一

職官志 循卓下

卷之六十二

職官志 將才

卷之六十三

人物志 聖賢

卷之六十四

人物志 鄉賢上

甘肅新通志

目錄

六

卷之六十五

人物志 鄉賢下

卷之六十六

人物志 羣材一

卷之六十七

人物志 羣材二

卷之六十八

人物志 羣材三

卷之六十九

人物志 羣材四

卷之七十

人物志 忠節一

卷之七十一

人物志 忠節二

卷之七十二

人物志 忠節三

卷之七十三

人物志 孝義上

卷之七十四

人物志 孝義下

卷之七十五

人物志 隱逸

卷之七十六

人物志 列女一

甘肅新通志

目錄

七

卷之七十七

人物志 列女二

卷之七十八

人物志 列女三

卷之七十九

人物志 列女四

卷之八十

人物志 列女五

卷之八十一

人物志 列女六

卷之八十二

人物志 列女七

卷之八十三

人物志 列女八

卷之八十四

人物志 列女九

卷之八十五

人物志 流寓

卷之八十六

藝文志 詔敕 令 檄 奏疏上

卷之八十七

藝文志 奏疏下

卷之八十八

藝文志 議 論 書

甘肅新通志



目錄

八

卷之八十九

藝文志 傳 序 說

卷之九十

藝文志 箴 銘 附神道碑墓誌銘 贊 頌 題跋

卷之九十一

藝文志 碑記

卷之九十二

藝文志 金石

卷之九十三

藝文志 文 賦 詩 詞

卷之九十四

藝文志 著書目錄

卷之九十五

志餘 僭竊

卷之九十六

志餘 割據

卷之九十七

志餘 軼事

卷之九十八

志餘 仙釋

卷之九十九

志餘 方伎

甘肅新通志

卷之一百

志餘 考異



目錄

九

甘肅新通志卷首之一

綸音

天章

順治十五年十二月乙丑

敕諭厄魯特車臣台吉等曰帝王撫有四海畫土分疆謹防關隘所以嚴中外安遠人也朕素以懷柔爲心欲與爾等共享昇平凡屬小過絕不苛求乃邇年以來該督撫按屢奏爾等侵犯內地攘奪牛馬抗拒官軍迫脅番人故特遣兵部右侍郎石圖理藩院啟心郎鼐格等勘明其事據奏云爾等入邊因向番人取貢並無他故然擅行內地輒肆攘奪爾等之咎在所難辭朕茲以寬大貸爾前愆所奪之物仍令賠補外但朕撫綏中外本無異視而疆圉出入自有大防不容踰犯今後邊內番人原係納貢於爾者仍聽爾屬爾等向番取貢當酌定人數路由正口先委頭目稟明守口各官方行入邊取貢毋得不委頭目不由正口零星闖入至貿易處所原有酌定市口著從西甯地方鎮海堡北川二口洪水一口出入不得任意往來取道他處爾其恪遵約束慎守邊圉副朕懷柔至意如或不悛仍前妄行闖入是爾有負寬恩自取罪戾國憲具在朕不能私爾其慎之

康熙十四年春正月丁丑先是

諭議政王大臣等蘭州近邊要地應速遣兵駐守今保甯大兵已回西安達禮善巴圖魯兵亦將至西安其將西安現在兵每佐領下撥四五名以上將軍阿密達副都統鄂克濟哈夸代率赴蘭州剿禦逆賊併防階州文縣諸處尋大將軍貝勒董額奏蘭州固宜防守但保甯還卒鎧甲未備達禮善巴圖魯兵兼程而來恐難驟遣西安所恃以禦賊者賴有調來汝甯河南兵今將此兵發往儻王輔臣

甘肅新通志

卷首之一

一

由陳倉諸路斷我棧道自秦州平涼來偏深爲可虞

上復諭曰今據報逆賊已逼蘭州若不遣兵速援賊將猖獗臨鞏被陷三邊一搖勢難猝定蘭州距秦州不遠我兵若往蘭州則秦州便可襲取而平涼諸賊亦可首尾夾攻阿密達等以文到之日即速赴蘭州保固三邊儻逆賊中道阻截即攻取平涼或奪路前赴蘭州其相機以行貝勒等速備馬匹器械給保寧回兵其達禮善巴圖魯之兵亦給與馬匹以備剿禦 三月丁丑

諭兵部三邊經調缺額官兵及標員宜更置者聽提督張勇募補河西兵餉著總督哈占巡撫杭愛俟道稍通速行撥解其奏報由邊外鄂爾多斯地方設站傳遞今大將軍貝勒董額等已圍秦州將軍阿密達已進取平涼其令提督張勇巡撫花善總兵官王進寶等速取蘭州會貝勒等協力夾剿以定臨鞏等處

甘肅新通志

卷首之一

一一

授甘肅提督張勇爲靖逆將軍加甘肅總兵官孫思克左都督西甯總兵官王進寶都督同知事平之日俱以提督先用

逆賊王輔臣遣賊陷定邊

上諭兵部定邊係三邊咽喉要地其令總督哈占總兵官許占魁速發官兵赴甯夏同總兵官陳福併力進取 是日

諭兵部甯夏總兵官陳福効力巖疆勞績素著屢次舉首逆劄克篤忠貞且其妻子家屬現在川中逆賊挾此招誘全無顧戀矢志不移深爲可嘉著以現兼職銜升補陝西提督仍暫駐甯夏管總兵官事俟平涼底定之後即赴該管地方料理提督事務陳福之弟守備陳奇妻子家口亦陷賊中深爲可憫著從優以參將陞用爾部即遵諭行

七月甲辰

諭定西大將軍多羅貝勒董額等曰國家仰荷

天眷秦州鞏昌蘭州等處以次恢復朕甚嘉悅此係保寧旋旆之兵閒關跋涉戮力効命所致須不時軫念恤其勞苦且爾等將兵在外事情經練須協和持平方克有濟朕亦知爾等斷不徇一己之利但慮所及不得不爲告誡將軍張勇勞績甚多慎勿狎侮致滋嫌怨爾等務期殫心爲國運籌制勝一德同心早奏蕩平以慰朕望

十五年丙辰二月癸酉

諭大學士索額圖日近發內帑銀十萬與提督趙良棟賞給兵民今在平涼大兵及綠旗兵俱勤勞報効大將軍圖海前往亦可酌議發帑賞給川中撤回之兵前攻取朝天七盤等處後又圖取秦州効力甚多凡失事皆在主將非關軍士可寫諭旨一道與大將軍圖海令申飭諸將其總督巡撫亦有失事之責宜嚴行曉諭 乙亥

諭平涼諸軍士曰爾等年來各處征剿爲國効力之處朕悉聞知今圍

甘肅新通志

卷首之一

三

攻平涼屢次衝鋒陷陣奮勇殺賊嚴冬掘壕遠道樵採備歷艱苦朕心深爲憫惻茲命撫遠大將軍都統大學士圖海統率禁旅往討逆賊雖目前國用殷繁念爾等戮力行間勤勞已久特發帑金五萬賚至軍前普加恩賜以昭朕優恤之意爾等同心協力益勵忠義速翦賊寇朕且更加優賞爾等勉之 八月丙子

諭吏部兵部撫遠大將軍都統大學士圖海器識老成才猷練達贊襄機務宣力累朝以文武之長才兼忠愛之至性勞績懋著倚毗良殷前察哈爾布爾尼背恩反叛命圖海爲副將軍率兵征剿運籌決勝克振軍威未及一月捷功立奏逆賊殲滅疆圉敕甯近以平涼阻兵日久屢命剿撫罔有成功特簡圖海爲大將軍統率大軍節制各路果爾謀略淵深調度得宜軍鋒所至一戰克捷更能體朕好生之心宣布恩威開誠招撫遂使平涼慶陽固原等處文武官員兵民傾心

向化悔罪歸誠生靈免於塗炭邊境賴以保安數日之間關隴悉定皆因籌畫周詳布置神速勦撫並用克建膚功圖海以心膂大臣膺秉鉞重寄實心爲國克副倚任朕心深爲嘉悅於軍功議叙外應從優加恩封三等公以示朕眷注忠勤酬答勲庸至意又

諭兵部自逆賊煽亂以來姦徒附和侵擾地方關隴以西疆域遼闊大兵一時未集人心不無動搖靖逆將軍侯張勇提督王進寶總兵官孫思克一聞蘭州之變即率兵星馳渡河勦禦收復城邑條奏機宜舉發僞劄緝獲姦謀綏定邊陲厥功甚大及大兵攻取平涼專任靖逆將軍侯張勇等鎮守秦鞏復殫心籌畫調度合宜勦禦川賊屢奏捷音紓朕西顧之憂功尤茂著伊等皆宿將重臣矢志報國同心協力展布謀猷兼以訓練士卒忠義素孚故能身先行陣所向克捷其所屬將卒亦皆効力共建功績朕甚嘉之於軍功議叙之外應從優

甘肅新通志

卷首之一

四

加恩以示朕獎勵忠貞酬答勲勞至意張勇著爲一等侯襲十次王進寶加一等阿思哈尼哈番襲八次授爲奮勇將軍仍兼管平涼等處提督事務孫思克著授爲一等阿達哈哈番提督涼州軍務

二十二年癸亥十二月丙辰

諭戶部陝西西安甘肅等處前當大兵進剿之時轉輸糧糗辦運芻茭一應軍需取給閭里小民由陸供億勞費煩多今既經蕩平朕心時切軫念康熙二十三年應徵地丁錢糧著蠲三分之一以昭朕矜念民生勞苦之意 二十五年

勅賜奮威將軍左都督陝西平涼提督事三等精奇尼哈番加十一級加贈太子太保諡忠勇王進寶

朕惟人臣授律中權策勳天室非忠無以立節非勇無以圖功故徇國忘身者志堅於金石執訊獲醜者氣厲於風霜寇虐於以遏除疆

隅由之綏靖邦家攸賴展在斯人爾王進寶樸誠自植驍果超羣自束髮從戎久居邊徼招攜綏遠厥有成績是用書勞盟府建節西甯迨滇寇弄兵涇原煽禍忠義奮發投袂東馳涉險濟師裂眦誓衆遂收金城下天水伏莽肅清叛人自靡隴坻以西無風塵之警旣乃徼道竅斜規收洋鳳縫革船以浮江水走棧道而蹙武關鐵騎宵飛妖氛旦掃漢興一路望風吐款遂薄閬中颯馳電驚取彼渠首聚而殲旃傳檄而定三川者爾之力也爾有立懂之威制敵之智殊勳方面莫與爲二而又素矢堅貞克輸忱悃兵間辛苦不忘君父泊師旋獻凱囊韃入朝晝接從容宴賚稠疊遣還舊鎮三命滋共古所云不二心之臣熊羆之士爾殆兼之庶無慚色天不羸算遽以疾殞已命所司易名加典因鐫文於石以甄明風烈嗚呼惟懋嘉乃功洵錫乃寵爾其不昧尙克祇承 是年渭南

甘肅新通志

卷首之一

五

大閱賜陝西固原鎮西鳳副將康泰

御製詩曰南苑風高水潦收旋催羽隊肅貔貅九天鼓吹鳴金鑼萬乘旌旗擁翠虬馬足過時殘雪盡峰巒迴處朔雲浮定威端在承平日自昔經邦有大猷 三十年辛未正月壬子

諭大學士等聞噶爾丹劫掠墨爾根濟農巴圖爾額爾克濟農向青海而去著將陝西西安兵酌留城外其餘兵丁命將軍親率之川陝督標綠旗兵命總督親率之甯夏鎮標兵命總兵官親率之俱於甯夏備噶爾丹致仕勇略將軍趙良棟見在甯夏熟習軍務令與將軍總督酌議行事 三十三年正月十一日乙丑

諭大學士等四川陝西總督佛倫請修黃城爾舊城朕覽其所進地圖黃城爾地方實屬緊要自甘州至西甯道里遙遠若自黃城爾至西甯其路甚近三日可達令官兵駐防甚爲有益青海居住台吉等曾

以爲此地乃伊等地方懇給還朕親政時諭輔政諸臣此係大草灘地方於我朝最爲要地斷不可給故至今隸我版圖凡遣往西邊官員復命者朕常詢問地方情勢亦嘗詳閱輿圖故於邊疆要地無不記憶此處駐防兵丁事屬緊要著該督會同提督確議具奏

三十五年

諭戶部朕惟治天下惟期民生得所而欲民生得所必以敷恩寬賦爲要朕於一切事務尙少有動用民力之處即廛懷殷切刻不能忘比年以來因厄魯特噶爾丹狂逞逆命遣發大兵分道進剿軍興供億不得已而煩民力甘肅所屬各州縣衛所及榆林等處沿邊各州縣衛所實當師行要道餽養軍前需用馬匹並大兵往來經過各項措辦雖俱支給正項錢糧而供億繁多閭閻勞苦朕心實用軫念著將康熙三十六年甘肅巡撫所屬州縣衛所陝西巡撫所屬榆林等沿邊州縣衛所地丁銀米盡行蠲免行文各該撫徧加曉諭務俾小民均沾實惠稱朕體恤黎元至意甘肅所屬銀米既經全免需用錢糧著於鄰近省分作速撥給爾部卽遵諭行

三十六年丁丑春正月乙卯二月癸巳

諭議政大臣等前旣陣斬噶爾丹之妻阿奴喀屯今又生擒其子賊之根本已斬噶爾丹雖各處投生其年老邁能延幾何其子爲我所獲是乃天之所賜也凡用兵之道要在乘機噶爾丹窮迫已極宜乘此機速行剿滅斷不可緩朕今親臨寧夏相度機宜調遣軍士賊聞之必魂魄俱喪其部屬亦必張皇而別部蒙古聞朕親臨寧夏各欲見功扼噶爾丹而圖之彼若不自盡亦必爲人擒獻克成大事正在此舉矣又

諭朕親歷行間塞外情形知之已甚悉自古以來所謂難以用兵者是

也其地不毛間或無水至瀚海等砂磧地方運糧尤苦而雨水之際樵爨頗難區畫不周豈可妄動朕今親臨寧夏凡有可用兵之地必詳察行道水草全備馬駝糧糗等物然後起程稍有可疑雖諸臣勸行朕亦不允也 丁酉

諭大臣等著傳旨與貝勒松阿喇布今噶爾丹已將成擒其子塞卜騰巴爾珠爾已被獲近聞噶爾丹在薩克薩特呼里克之南格隔特哈朗古特地方衆僅四五百人又青海諸台吉俱降見有人來請安朕今親臨寧夏著將右翼三旗貝勒公台吉等兵共派二千以備調遣爾蒙古裝載橐駝監管牧放素能練習可豫備以俟待朕到寧夏應從何路前進俟旨行著侍衛綽克圖前去傳諭左翼王貝勒貝子公台吉毋以朕往寧夏間道前來請安爾等有能效力者往貝勒松阿喇布處伺候以聽指揮 三月初九日丙子

甘肅新通志

卷首之一

七

上自橫城渡黃河駐蹕河崖遣大學士伊桑阿祭黃河之神文曰朕以廩念安懷巡幸邊境自晉省濟河以來跋履千餘里歷秦延慶二郡之地茲復將濟河而西進抵寧夏惟神洪流灑漾膏潤宏長醞入唐漢之渠允貽朔方之利朕乘輿式泣秩祀宜申是用再遣專官虔具牲帛致祭尙其丕彰靈爽永惠邊氓惟神默鑒焉

諭朕巡幸沿邊地方詢察閭井生聚及土田沃瘠之狀自晉抵秦經行二千餘里直抵寧夏所以勤求民隱至殷且切惟朔方資大河之灌注疏渠溉田宜於稼穡當茲春風鬯遂正三農盡力南畝之時誠恐有司官員不體朕懷因車駕經臨調遣師旅借辭供億擾累小民旣東作之有違將西成之奚望今一切軍需芻糗俱經儲備足以資用至扈從人役概從簡約所有馬匹悉牧放水草善地並不須以供辦草豆動煩民力爾可專飭有司禁勿借端妄行科派違旨事覺定行

處分仍徧諭地方百姓各安本業廛無廢市隴無輟耕庶不負朕親
歷邊圉軫恤民依之意特諭 閏三月甲午寧夏紳衿兵民人等聞
駕起行齊集行宮前叩懇留數日以慰羣情

上曰朕欲掃蕩寇氛以安黎庶特幸寧夏經理軍務駐蹕十有餘日曩
者南巡凡所巡幸之處未有駐蹕至三日者且邊地磽瘠民生艱苦
朕甚憫之朕扈從人衆恐多留一日即滋百姓一日之擾朕已定十
五日起行爾等誠懇之意朕已悉知又向者曾欲使禁軍駐防此地
恐民間居處狹隘已命將房舍查明給還原主爾等即回故居可也

紳衿兵民等懽呼叩謝奏請

御製聖訓勒之貞珉光垂奕世

上曰朕巡幸原欲民安今製文頒賜則百姓運碑雇匠轉致煩苦不必
行 紳衿兵民等復懇請

甘肅新通志

卷首之一

八

上諭大學士等議奏大學士伊桑阿等奏曰人民叩請
皇上親製聖訓勒石垂久洵爲盛事應如所請從之

御製碑文曰諭寧夏文武官員兵民人等朕體天育物日以治安爲念
雖身在宮庭而心恆周四海頃因指畫軍務不憚勤勞遠洩寧夏無
非爲蕩滌寇氛綏乂生靈計也緣邊千餘里土壤磽瘠惟寧夏洪流
灌輸諸渠環市巡覽所至甚愜朕懷夫農桑者衣食之本積貯者殷
阜之原爾官吏宜董勸父老子弟三時力田以盡地利比屋勤殖以
裕蓋藏縱使歲偶不登亦可無憂匱乏若夫秦風健勇自昔爲然其
在朔方尤勝他郡爾等或職居將領或籍隸戎行尙各厲精銳以效
干城禦侮之用斯國家有厚賴焉至於忠信慈惠服官之良軌孝弟
慈讓生人之大經法紀不可不明禮教不可不肅勿以地處邊陲而
不治以經術勿以習尙氣力而不澤以詩書總期上率下從庶幾馴

臻雅化茲乘輿返蹕距靈朔雖遠而睠念塞垣如在几席爾等誠能敬體朕言將吏協恭兵民咸理生聚日益厚風俗日益醇則疆宇實有攸裨朕心亦用深慰慎勿視爲具文辜朝廷惓惓牖導之意欽哉

四十年辛巳十月己未

諭戶部朕孜孜圖治宵旰靡寧於民生疾苦時切軫念甘肅等處地方切近邊陲土瘠田薄今年雨澤愆期田禾多有未穫閭閻饑困朕心深用憫惻已特飭該督撫等官將被災之處概行蠲賑令其得所更念來歲青黃不接西土小民輸納維艱著將甘肅巡撫所屬州縣衛所康熙四十一年分地丁錢糧通行豁免地方有司務期切實奉行毋令官吏借端侵漁俾小民得沾實惠以副朕軫念災黎至意

四十二年

賜甘肅巡撫齊世武箴

甘肅新通志

卷首之一

九

茫茫方域分理需人岳牧之選實維重臣寄以封疆千里而遠地則星羅令猶風偃控攝文武統馭司繩違糾慢宣德布慈廉善是推貪黷毋宥小眚是矜吞舟毋漏彼昏而墨日削月朘或市循縱以恣撓虔澤不下逮民隱罔恤政迺不和爲時蠹賊曾是源濁而流則清曾是表正而景則傾職汝之由是日曠墜軫我元元保釐奚賴天命天討我不敢私勗哉有位敬聽箴辭

賜甘肅巡撫齊世武詩

八水源秦隴山河輔帝京此方文武職須教盡和平 四十三年
聖祖仁皇帝御製平定朔漠告成太學碑

維

天盡所覆海內外日月所出入之區悉以畀予一人自踐阼迄今蚤夜殫思休養生息冀臻熙皞以克副維皇大德好生之意庶幾疆域無

事得以偃兵息民迺魯特噶爾丹險阻北陲因此一方人既荼毒
塞外輒狡焉肆其凶逆犯我邊鄙虐我臣服人用弗寧夫蕩寇所以
息民攘外所以安內邊寇不除則吾民不安此神人所共憤天討所
必加豈憚一人之勞弗貽天下之逸於是斷自朕心躬臨朔漠欲使
悔而革心故每許以不殺彼怙終不悛我師三出絕塞朕皆親御以
行深入不毛屢涉寒暑勞苦艱難與偏裨士卒共之迨彼狂授首脅
從歸誠荒外君長來享闕下西北萬里灌燧銷烽中外乂謐惟朕不
得已用兵以安民既告厥成事迺蠲釋眚災潔事裡望爲億兆祈昇
平之福而廷臣請紀功太學垂示來茲朕勞心於邦本嘗欲以文德
化成天下顧茲武略廷臣僉謂所以建威消萌宜昭斯績於有永也
朕不獲辭攷之禮王制有曰天子將出征受成於學出征執有罪反
釋奠於學以訊馘告泮宮之詩亦曰矯矯虎臣在泮獻馘又禮王師

甘肅新通志

卷首之一

十

大獻則奏凱樂大司樂掌其事則是古者文事武事爲一折衝之用
具在樽俎之間故受成獻馘一歸於學此文武之盛制也朕嚮意於
三代故斯舉也出則告於神祇歸而遣祀闕里茲允廷臣之請猶禮
先師以告克之遺意而於六經之指爲相符合也爰取思樂泮水之
義爲詩以銘之以見取亂侮亡之師在朕有不得已而用之之實或
者不戾於古帝王伐罪安民之意云爾銘曰巍巍先聖萬世之師敬
信愛人治平所基煌煌聖言文武道一禮樂征伐自天子出朕臨域
中逾茲三紀嘗見羹牆寤寐永矢下念民瘼上承帝謂四海無外盡
隸侯尉維彼兇醜瀆亂典常旣梗聲教遂窺我疆譬之於農患在螟
螣秉畀不施將害稼穡度彼游魂險遠是怙震以德威可往而取朕
志先定龜筮其依屬車萬乘建以龍旗祝融驂鸞風伯戒途宜暘而
暘利我樵蘇大野水涸川瀆效靈泉忽自涌其甘如醴設爲犄角一

出其西一出其東中自將之絕域無人獸羣受掩五日窮追彼狂走
險大殲於路波血其孥翦其黨孽俘彼卒徒衆烏晝號單馬宵遁恐
久駐師重爲民困慎固戍守還轅於京自夏徂冬雨雪其零載馳載
驅我行至再蠢茲窮寇昏惑不悔我邊我氓以休以助爰寧其居爰
復其賦藩落老稚斯恬斯嬉歲晏來歸春與之期春風飄翻揚我旌
旂我今于邁如涉我郊言秣我馬狼居胥山登高以眺閔彼彈丸天
降兇罰孤雛就羈三駕三捷封狼輿尸旣腊梟獍旣獮豺獍大漠西
北解甲棄殳振旅凱入澤沛郊卜明禋肆赦用迓景福昔我往矣在
泮飲酒陳師鞠旅誓屈羣醜今我來思在泮獻功有赫頌聲文軌來
同采芹采藻頌興東魯車攻馬同亦鐫石鼓師在安民非出得已古
人有作昭示此旨緬維虞廷誕敷文德聖如先師戰慎必克惟兵宜
戢惟德乃綏億萬斯年視此銘詞 五十二年甲午三月乙巳

甘肅新通志

卷首之一

十一

諭戶部甘肅一帶地方去冬春麥失收秋田亦歉經該督撫奏報甚明
其地具係山田稍遇天旱易致荒歉是以舊歲特沛恩澤蠲免租賦
見在雖據該督撫設法賑濟給與牛種此外更應作何籌畫使小民
得永有裨益著遣工部右侍郎常泰大理寺少卿陳汝咸到彼會同
該督撫詳查地方百姓情形確議具奏 十一月庚戌

諭戶部朕撫御寰區勤求民瘼凡地方水旱災傷必詳加咨詢先事豫
籌其荒歉上聞蠲賑頻施務令得所五十餘年來夙夜孜孜如一日
也前因甘肅靖遠衛等處年歲不登民艱粒食已多方賑濟本年錢
糧或蠲或停而山地磽瘠民鮮蓋藏若不大沛恩施目前已自艱難
來歲更何倚恃此被災二十八州縣衛所康熙五十四年額徵銀九
萬七千八百七十兩有奇糧二十三萬九千四十石有奇草二百五
十三萬七千八十束有奇俱著通行蠲免行文甘肅巡撫實心奉行

務使比屋均沾實惠用副朕撫恤災黎至意

五十四年乙未十二月二十三日乙酉

諭戶部前因甘肅靖遠衛等處年歲歉收既已多方籌畫蠲賑頻施復將甘肅被災二十八州縣衛所康熙五十四年額徵銀糧草束通行蠲免但被災之民鮮蓋藏若非再沛德施恐來歲辦賦猶艱除寧州隴西渭源狄道臨洮五州縣衛康熙五十五年額徵銀糧草束已經蠲免外其靖遠等二十八州縣衛所康熙五十五年額徵銀九萬七千八百七十兩零糧二十三萬九千四十石草二百五十三萬七千八十束零亦盡與蠲免 五十七年戊戌閏八月戊辰

上諭戶部朕臨御五十七年凡行師轉餉及災侵偶見靡不廛懷憂切蠲免賑濟稠疊加恩蓋治安天下惟期民生得所而欲民生得所必以敷恩寬賦爲急也三年以來因策妄阿喇布坦狂逞跳梁遣發大

甘肅新通志

卷首之一

十一

兵屯駐西邊一切軍興征繕雖動支正供錢糧不使累及閭閻而轉輸輓運陝西百姓勞苦急公實堪憫恤又莊浪等處地震隨經特遣部院堂官馳往察賑而用兵之後尤宜格外施仁撫綏黎庶應將陝西巡撫甘肅巡撫所屬通省各府州縣衛所錢糧米豆草束悉與蠲免目今係有軍務之時除米豆草束外其康熙五十八年應徵地丁銀一百八十八萬三千五百三十六兩有奇並歷年積欠銀四萬七百五十七兩有奇著一概蠲免爾部速行文該督撫通行曉諭實心奉行務必均沾德意以副朕篤念民勞拯恤災傷至意

五十八年己亥十二月辛酉

諭戶部朕惟治天下之要務首以乂安民生爲先故自御極以來於閭閻疾苦無不博諮廣詢渙敷庥澤其有動用民力之處尤惻然軫念刻不能忘蓋六十年如一日也比年因策妄阿喇布坦狂逞跳梁興

兵征勦遠歷邊陲其沿邊數處師旅屯駐一切雖皆支用正項錢糧而協辦轉輸行齎運送之事民力勞瘁朕心時切憫念曾將陝西甘肅所屬康熙五十八年額徵地丁銀一百八十八萬兩零歷年舊欠銀四萬兩零特沛恩綸悉行蠲免而沿邊各州縣衛所軍行既多飛輓之勞辦賦復滋催科之擾若非格外加恩小民恐致失業所有沿邊一帶陝西所屬府谷神木安塞綏德米脂安定吳堡保安榆林保寧長樂雙山魚河歸德嚮水波羅懷遠威武清平葭州龍川鎮靖鎮羅寧塞靖邊柳樹澗安邊磚井定邊饒陽水堡高家堡甘肅所屬山丹高臺古浪莊浪西寧肅鎮寧夏左屯中屯平羅中衛靈州寧州平涼衛固原鎮戎西安阜城甜水河州蘭州洮州寧夏前衛平涼縣固原衛河州衛蘭州衛慶陽涼州衛永昌衛鎮番衛甘州左衛右衛肅州衛鎮燹所等六十六州縣衛所堡康熙五十九年錢糧米豆草束俱宜蠲免但目今係有軍務之時除米豆草束外將康熙五十九年額徵銀九萬八千一百兩零盡行蠲免爾部行文該督撫通行曉諭實心奉行務俾均沾德意以副朕曲軫邊民至意

五十九年庚子十月初九日庚戌

諭戶部朕自御極以來無日不以民生爲念凡閭閻疾苦必詳加諮訪至於地方偶遇災傷一有所聞即行蠲賑撫恤備至務期黎庶遂生樂業優游化日六十年來夙夜孜孜未嘗稍釋也邇年因西陲用兵師行糧從雖芻粟悉支正供絲毫無擾民間然轉輸必需民力勞苦宜恤曾將康熙五十八年陝西甘肅所屬額徵地丁銀一百八十八萬兩零歷年舊欠銀四萬兩零康熙五十九年沿邊各州縣衛所額徵銀九萬八千一百兩零屢沛恩綸盡行蠲免近聞二年歉收民有艱於粒食辦賦急公力何能支若非渙敷德澤無以培養窮民是宜

特頒浩蕩之恩用申勤求民瘼之念著將陝西甘肅所屬各州縣衛所除應徵米豆草束外康熙六十年應徵地丁銀一百八十八萬三千七百四十兩零通行蠲免爾部速行文該督撫徧行曉諭實心奉行務俾均霑實惠如有不肖官吏陽奉陰違澤不下究該督撫嚴察題參從重治罪又署撫花善奏稱甘肅地方數年歉收糧草價值騰貴兵丁採買維艱朕念兵丁効力行閒勞瘁堪憫准預給半年兵餉著卽行文附近省分撥銀三十萬兩速解甘撫頒發以副朕篤念民勞優恤軍士至意 雍正二年甲辰二月十二日

諭總理王大臣等青海之事不日告竣而策妄阿喇布坦亦屬恭順其撤回各路之兵及固守地方之事應豫行定議額駙策凌貝勒博貝俱在阿爾泰駐紮年久地方情形皆所悉知見皆在京可詳詢阿爾泰一路兵丁如何撤回及駐防兵丁應於何處安設之處確議具奏

甘肅新通志

卷首之一

十四

四月初四日

御筆賜奮威將軍四川提督公岳鍾琪

岷峨稱重鎮專閩賴干城舊著甯邊略新聞奏凱聲風霆嚴步伐雲日耀麾旌三捷成功速歡騰細柳營

一掃欃槍淨師旋蜀道中錦城休戰馬玉塞集飛鴻智勇原無敵忠誠實可風丹書褒偉績還與錫彤弓 五月甲辰

上諭兵部陝西地屬雍涼人材壯健強勇者多騎射嫻熟勝於他省每科鄉試取中不過三十名而入學額數亦與他省不相上下額少人多不無屈抑自雍正四年鄉試爲始西安甘肅武舉各加中十名其武童入學額數若通省俱加恐有冒濫照文章改學例令督撫會同學臣查明技勇最優之州縣酌量數目奏請加額 二十二日

諭自西陲逆賊羅卜藏丹津背棄國恩招集同惡殘其骨肉侵犯邊城

朕命年羹堯揆度機宜指麾將士犁庭掃漠迅奏膚功惟逆賊犯塞之初邊民略被騷擾克敵之後居民安堵不知有兵且士馬有飽騰之歡閭閻無轉運之苦支用錢糧一無糜費昨因野番掠劫成性出沒無常又令奮威將軍岳鍾琪領兵搜捕餘孽將士用命於深山林木之中轉戰五十餘日俱已蕩平從此鋒鏑永清疆圉開拓今具奏善後事宜十三條又定禁約青海十二事運籌周密措置精詳朕心嘉悅之至其所奏善後諸事皆合機宜惟新闢地方宜廣屯種而欲令五省有罪之人發往開墾恐此等之人未必習於耕種又無室家可以羈留於邊塞之處少當留意耳爾等一併悉心妥議具奏

三年

世宗憲皇帝御製平定青海告成太學碑

我國家受

甘肅新通志

卷首之一

十五

天眷命撫臨八極日月所照罔不臣順遐邇乂安兆人蒙福乃有羅卜藏丹津者其先世固始汗自國初稽首歸命當時使臣建議畀以駐牧之地其居雜番羌密近甘涼我

皇考聖祖仁皇帝睿慮深遠每廛於懷旣

親御六師平定朔漠威靈所加青海部落扎什巴圖爾等震驚承命聖祖仁皇帝因沛殊恩封爲親王兄弟八人咸賜爵祿羈縻包容示以寬大而狼心梟性不可以德義化三十年來包藏異志朕紹登寶位優之錫賚榮其封號尙冀革心輯甯部衆而羅卜藏丹津昏謬狂悖同黨吹拉克諾木齊阿爾部坦温布藏巴扎部等實爲元惡謂國家方浩浩蕩之恩不設嚴密之備膽敢首造逆謀迫脅番羌侵犯邊城反狀彰露用不可釋於天誅遂命川陝總督太保公年羹堯爲撫遠大將軍聲罪致討以雍正元年十月師始出塞自冬涉春屢破其衆

凡同叛之部落戈鋌所指應時摧敗招降數十萬衆又降其貝勒貝子公台吉等二十餘人朕又憫其蠢愚若悔禍思愆束手來歸尙可全宥而怙惡不悛負險抗違乃決翦滅之計以方略密付大將軍年羹堯調度軍謀簡稽將士用四川提督岳鍾琪爲奮威將軍於仲春初旬馮牙徂征分道深入擣其窟穴電掃風馳搜剔巖阻賊徒蒼黃靡潰窮蹙失據羅卜藏丹津之母及謀逆渠魁悉就俘執擒獲賊衆累萬牲畜軍械不可數計賊首逃遁我師踰險窮追獲其輜重人口殆盡羅卜藏丹津子身易服竄匿荒山殘喘待斃自二月八日至二十有二日僅旬有五日军士無久役之勞內地無轉輸之費克奏膚功永清西徼三月之朔奏凱旋旅鑼鼓喧轟士衆訢喜四月十有二日以倡逆之吹拉克諾木齊等三人獻俘

廟

甘肅新通志

卷首之一

十六

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六師殄滅狂賊行閒將士亦由感激

湛恩厚澤爲朕踴躍用命斯役也芟夷凶悖綏靖番羌俾烽燧永息中外人民胥享安阜實成

先志以懋有不績廷臣上言稽古典禮出征而受成於學所以定兵謀也獻馘而釋奠於學所以告凱捷也宜刊諸珉石揭於太學用昭示於無極遂爲之銘曰天有雷霆聖作弧矢輔仁而行威遠甯邇維此青海種類實繁錫之茅土列在藩垣被我寵光位崇祿富負其阻遐禍心潛搆恭維

聖祖慮遠智周睠念荒服綏撫懷柔朔野旣清西陲攸震爵號洵加示之恩信如何凶狡造謀逆天鼓動昏愆寇侵於邊惟彼有罪自干天

罰桓桓虎貔爰張九伐王師即路冬雪初零日耀組練雷響鼙鉦蠢
茲不順敢逆戎旅奮張螳臂以當齊斧止如山嶽疾如雨風我戰則
克賊壘其空彼昏終迷曾不悔戾當翦而滅斯焉決計厲兵簡將往
擣其巢踰歷欽嶇坦若坳郊賊棄其家我繫而獲牛馬谷量器仗山
積蹇免失窟何所逋逃枯魚遊釜假息煎熬師以順動神明所福旬
日凱歸不疾而速殪彼逆謀懸首藁街獻俘成禮金鼓調諧西域所
瞻此維雄特天討旣伸羣酋別息囊戈偃革告成辟靡聲教遐暨萬
國來同惟我

聖祖親平大漠巍功煥文邁桓軼酌流光悠久視此銘辭繼志述事念
茲在茲 六年戊申十二月初九日

諭戶部朕惟善政養民利賴必資地力而率作興事倡先端藉搢紳惟
茲寧夏所屬之插漢拖輝地廣土饒水利充裕朕特遣大臣會同該

甘肅新通志

卷首之一

十七

督撫等悉心經理濬治渠道設縣築城募民墾種次第修舉行見人
民樂業饒沃殷阜漸成西北蕃庶之區此朕經國裕民之至計欲使
地無遺力而亦寧夏一方人數百年未興之樂利也聞彼中得水可
墾之地計二萬餘頃每戶以授田百畝可安置二萬戶朕已諭令廣
行召募遠近人民給以牛具籽種銀兩俾得盡力開墾繼爲世業惟
是原議寧夏本籍現在出仕文武官員俱令開墾授業俾爲世享之
利今聞報墾者寥寥記曰貨惡其棄於地力惡其不出於身也况乎
上以急公而裕國下以力本而厚生搢紳者小民之望也果能身先
倡率則民間之趨事赴公必衆凡屬本籍之人不論文武官員或見
任或家居均當踴躍從事急先墾種不可觀望因循耽延善舉凡茲
所墾地畝俱照原議給爲世業三年起科果能沃土肥田有廣收之
益無閒曠之區則不但於體國經野之謨重有攸賴而經營世產伊

等子孫亦蒙永遠之澤矣 七年己酉九月甲戌

上諭戶部據寧遠大將軍岳鍾琪奏稱自西安起程歷西鳳平臨以至甘涼等處小民承辦軍需莫不踴躍懽呼趨事赴公爭先恐後而靖逆衛屯民於應辦草束之外情願另備餘草運赴大東渠站所堆積以佐軍需等語靖逆遠處邊外人民無幾而自備割運草束輸力效誠可見師以義行統領大臣又能令承辦軍需各員無絲毫扣剋是以輿情鼓舞相率辦公朕心深爲嘉悅著將靖逆衛庚戌年應徵馬糧四百六十石零大草五千三百八十八束全行蠲免以示嘉惠邊民急公之至意 己丑

上諭內閣年來用兵西藏勦撫苗蠻一切辦理軍需皆動支公帑而糧餉轉輸不無資於民力朕心深爲軫念是以降旨將甘肅四川雲貴廣西五省庚戌年地丁錢糧全行豁免查甘屬之河西四府如寧夏

甘肅新通志

卷首之一

十八

西寧及甘涼肅以至嘉峪關外之靖逆赤金柳溝等衛所歷來額徵俱係糧料草束與各省額徵折色無異今當用兵之際雖絲毫不派及民間而黎民踴躍急公之意大將軍岳鍾琪屢次奏聞甚屬可嘉著將額徵本色加恩豁免以示惠愛邊民之至意 十一月奉

上諭據陝西署督查郎阿奏稱招往安西沙州等處地方屯墾民戶今年到者統計共有二千四百零五戶屯種既廣樹藝益繁所種小麥青稞粟穀糜子等項計下種一斗收至一石三四斗不等共收穫糧一十二萬餘石確計分數十有二分其餘各色種植亦皆豐厚家給人足莫不歡欣樂業臣恐口外奸販囤戶聞知糧多價賤輿販射利已令總兵道員嚴行查禁并傳諭戶民按一年所需扣存外其餘在本處糶賣以資兵丁商民之口食等語安西屯墾地畝今年人力既勤天時復稔各種糧穀俱獲豐收朕心深爲慰慶今查禁止奸徒輿

販射利辦理甚是惟是飭令民戶多餘之穀只許在本處糶賣尙未妥協朕思民戶盈餘之穀原期糶價以爲日用之資若本地糶穀者少則出糶未免艱難不可不爲計及著該地方官酌量本地情形不必相強若有將盈餘之穀情願出糶者著動支官銀照時價糶買存貯公所明年儻有需用之處聽辦理軍需之大臣及該督撫行文支撥安西現有備用銀兩即可動用採買再於西安藩庫撥補還項此朕體恤民戶俾糶穀得價用度豐裕之至意著地方官善於奉行不可勒令糶賣生事滋擾特諭 八年庚戌二月戊辰

上諭據署陝西總督查郎阿奏稱安西沙州等處地方招民屯墾仰蒙天恩賞給沿途口糧盤費借給牛具籽種房價又因民戶到沙之日尙未耕種借與七月口糧以資口食養育之恩無微不至至於輸賦原以三年陞科自雍正六年民戶到齊之日計算至雍正辛亥年正

甘肅新通志

卷首之一

十九

屆陞科之期凡此無業窮民得以安居樂業又蒙

上天賜佑兩歲豐收暖衣飽食即三年起科亦屬小民之常分第以新經移住之家一切費用取給於田畝又值軍興之際物價未免稍昂民力尙未饒裕或照前議於辛亥年陞科或稍寬其年限出自聖恩等語安西沙州等處招民屯墾原爲惠養邊民之計是以累年以來備極籌畫經營期於得所今從民戶到齊之日計算至辛亥之歲乃例當輸賦之期但念小民甫經安插公私兼顧爲難著寬期二年於癸丑年陞科俾民力寬裕俯仰有資以副朕格外加恩之至意特諭欽此 三月庚辰

上諭內閣甯夏地方萬民衣食之源在大清漢唐三渠水利是以定例每年疏濬修理使水流暢足民田均沾灌溉自歷年官員疏忽怠玩以致閘道堤岸損壞衝決日見淺窄而三渠之中惟唐渠爲尤甚近

來其口過低其梢過高水勢不能逆流而上多誤小民耕種之期雖每春定有歲修之例然不能以一月之工程整十數年之荒廢也現今兵部侍郎通智開濬惠農昌潤二渠於寧夏水利自然明悉著會同光祿寺卿史在甲即行查議今歲預備物料明春動工修補務令三渠堅固俾邊境黎元灌溉有資永享盈寧之慶 四月十三日上諭古稱黃河之神上通雲漢光啟圖書禮曰三王之祭川也皆先河而後海此之謂務本惟神澤潤萬國福庇兆民自古及今功用昭著我朝自定鼎以來仰荷神庥尤爲彰顯或結爲冰橋以濟師旅或淤成沃壤以惠黎元或湧出沙洲作天然之保障或長就堤岸屹永固之金湯他如濟運通漕安瀾順軌有禱必應無感不通至於澄清六省之遙閱歷七旬之久稽諸史冊更屬罕聞神之相佑我國家者至矣朕敬禮之心至爲誠切因念江南河南等處皆有廟宇虔恭展祀

甘肅新通志

卷首之一

二十

而河源相近之處向來未建專祠以崇報享典禮亟宜舉行查河源發於崑崙地隔遙邊人稀境僻其流入內地之始則在秦省之西寧地方朕意於此地特建廟宇專祀河源之神敬奉烝嘗以答神貺其如何加封神號及度地建廟一應典禮著九卿悉心詳議具奏特諭

六月己未

上諭戶部甘肅地方雍正八年地丁錢糧前已降旨蠲免其河西四府州縣暨各衛所額徵糧料草束又經一體免徵朕念新歸內地番民向風慕義願附版圖其地畝額徵本色糧草與河西等處賦稅相同亦應一體蠲除俾令同霑恩澤著將雍正八年河東之河州廳洮州衛歸德所河西之西寧涼州府屬應徵番糧共一萬二千有奇俱加恩蠲免該督撫即督率所屬有司敬謹奉行俾番民均霑實惠

十二月丁巳

上諭戶部朕查陝西臨洮府屬之保安堡番民歸化多年按照田畝起科共額徵糧八百一十五石五斗因該堡向日止設番兵一百二十名即以應納之額糧抵作應支之兵食伊等知種地而不知完賦知充伍而不知領糧相沿已久嗣因番兵差操未便於是另募內地民兵二百名以備防汛即將額徵之番糧充作兵丁之月餉其舊設番兵悉行開除惟是保安一堡與新附上下龍布阿步喇等番族界址相接新附番族俱按戶科糧每戶止納青稞一斗而保安則按田起科以不及千戶之番民歲徵糧八百餘石未免多寡懸殊非朕一視同仁之意著將保安堡番糧亦照新附番民之例每戶納糧一斗徵收在倉留爲積貯其現募之民丁二百名所須糧料俱照例給與以示朕加恩邊民之至意 九年辛亥二月初二日戊戌

諭大學士等肅州甘州涼州移駐滿洲兵四千名又涼州有歸化城一

甘肅新通志

卷首之一

二十一

千名尙無統領之員寧夏滿洲兵見今不過六百名著戶部右侍郎傅泰前往署理寧夏將軍印務其肅甘涼等處兵丁著常賚往給以鎮安將軍印務令其統領仍聽大將軍岳鍾琪調遣

又十八日乙卯

諭大學士等陝甘二省年來辦理軍需雖皆動用正項錢糧民間無絲毫之費然輸輓糧運伺候差徭不無勞苦朕已降諭旨加恩獎勵但必得地方大吏仰體朕心凡料理軍務固不可任其延緩而過於迫急未免擾民查核錢糧固不可聽其浮銷而過於苛刻則必至剝民督撫等大員嚴緊一分則州縣官必於百姓加緊一倍如能寬容一分則小民必得一分之惠武格馬爾泰二人急公之心皆切但恐諸事過於苛迫可將朕旨傳諭凡承辦州縣或於原額之外遲緩無多而其人之才有可用者不妨姑示寬容其開銷物料腳運之費亦必

斟酌時價不可刻意覈減但此旨不可宣露於人恐有不肖之州縣借此遷延浮冒其漸不可長也 十年壬子正月己卯

上諭內閣寧夏爲甘肅要地渠工乃水利攸關萬姓資生之業莫先於此是以朕特遣大臣督率官員等開濬惠農昌潤二渠又命修理大清漢唐三渠以溥萬民之利年來惠昌二渠及唐渠工程漸次告竣於民田大有裨益其大清渠漢渠雖未竣工然聞連年加謹堵疊極力挑濬水澤已可敷用不過湃崖閘座有應行修理之處可以從容經理非比唐渠之必應及時速成也目今甘肅軍興之際輓運兵糧正需車輛茲因修理渠工又復雇車運送物料恐小民承應公事力難兼顧有誤春耕所當酌量變通以體恤民隱者查寧夏有專司水利之同知著將未竣之渠工交與該員照通智史在甲等所料估之處於每歲春工內分年陸續修理再令寧夏道鄂昌勤加督率不時

甘肅新通志

卷首之一

二二二

稽查務期工程堅固利濟有資使民田永霑膏澤通智史在甲與鄂昌交代清楚即行回京其在工効力之文武官弁交與該署督查郎阿計其在工之久暫訪其奉職之勤惰量其辦事之能否應留陝題補委用者留陝題補委用應咨部請旨者咨部請旨應發回本地者發回本地其現任武弁及兵丁等派撥渠工効力者俱令各歸營汛在工夫役等交與鄂昌將附近者令歸南畝遠來者酌量遣回

七月壬辰

上諭內閣甘肅地方年來預備軍需雖事事取辦於公帑而百姓輸輓効力亦甚勤勞朕心軫念屢加恩澤聞今歲蘭州平涼西寧等府所屬州縣內有雹損蟲傷之處已諭該督撫留心賑恤停止催科嗣聞從前雨少之處俱已霑被甘霖秋成可望朕心深慰因念甘肅爲軍需總匯之區百姓急公趨事所當格外加恩以昭朕子惠元元獎勞

賞善之至意著將河東河西各屬民戶屯戶及番民等本年應徵各項銀米草束一概蠲免若有已經完納者准作來年正賦該督撫等務體朕心督率有司敬謹奉行俾秦民均霑實惠儻有豪胥猾吏舞弊作姦使澤不下逮者經朕訪聞定將該管大小官員嚴加議處

是年

敕賜廣惠寺碑文

黃教之興盛於西土其道根源天竺演說因果覺悟羣生使爲善者知勸作惡者思懲與作善降祥作不善降殃之理默相符會所以易風移俗裨助於王化爲益洪矣西甯舊有郭莽寺地處通途爲邊方古刹從西藏進口之喇嘛皆於茲託足即佛家所謂十方院也自羅卜藏丹津悖義作逆茲寺奸頑喇嘛與相連接煽動部落遂使修行之區轉爲藏奸之藪是以大兵進討除其衆而燬其寺所以鉏惡止

甘肅新通志

卷首之一

二十三

亂非得已也邇來氛翳廓清疆土甯謐宜振興黃教以綏撫番夷爰發帑金遣官往爲重建佛殿經堂僧舍山門規模復舊丹牖一新常住之僧以二百人爲限俾其宣揚妙法且使往來僧衆有所棲憩董役之臣請易嘉名賜額曰廣惠寺所望重建之後遐邇番夷一心信奉敦崇善行以延慶祐永享我國家億萬載太平之樂是朕錫福拯民躋諸仁壽之意也紀文勒石用昭示於久遠焉

敕賜祐甯寺碑文

西甯郭隆寺地處通途喇嘛之自西藏來者於茲取道爲邊陲古刹自羅卜藏丹津之叛結連奸頑喇嘛煽惑番夷一時蠢動是以大兵進討燒焚寺宇俾奸宄無所藏匿凶徒旣殄邊境糶甯梵刹舊基理宜修復爰發帑鳩工遣官往董其事山門佛殿規制秩然僧舍經堂一準舊式限令延僧二百人常住薰修宣揚妙法往來梵衆亦得棲

息之所役既告竣以舊稱不雅敕定嘉名賜額曰祐寧寺並紀文勒石以昭久遠夫黃教之傳盛於西域凡厥部衆尊崇信奉遠邇一心其爲道蓋佛氏之支流開示迷途因俗利導於治化不爲無助書曰惠迪吉從逆凶惟影響覽茲寺興廢之由順逆之理昭然矣我國家洪敷德澤以振興黃教撫綏番夷繼自今恪守清規虔修梵行諸部落歸依崇奉之願久且益堅將見鴻慈普祐永戴清寧茲寺與西土山川同其悠久可也

敕賜河神廟碑文

四瀆之中河爲大自星宿發源經行數千里而入中國互絡坤維澤潤九宇方望之祭三代以來尙矣我國家敬共明神欽崇祀事精禋昭格靈貺丕彰南北隄工安瀾底績漕艘利濟輸輓以時抑且引河自汕於中浚沮洳悉淤爲沃壤澄清千里經歷三旬上瑞光昭鴻庥

甘肅新通志

卷首之一

二十四

屢著充淮豫江之境各建廟宇春秋展祀尊崇令典視前代爲加虔顧河源所自廟貌闕焉於禮未稱朕念崑崙遠在荒徼命使不能時至而禹貢有導河積石之文考其地在今西寧河州境內黃河流入中國自此始則建廟以祀河源之神實惟茲地爲宜乃命禮官詳議敕甘肅撫臣於河州相度善地恭建新廟高門廣殿肅穆閎深發帑鳩工專官董役雍正九年冬十月告成朕親灑宸翰賜額曰福祐安瀾先是諭旨甫頒經營伊始雍正八年六月之望河州有慶雲捧日之瑞自午至申萬衆瞻仰七月五日臨洮道臣相地積石關外見河流澄澈上下百有餘里徹底瑩潔凡三晝夜同時入告共慶嘉祥朕惟河嶽山川均爲造化之功用而潤澤廣遠利賴溥被惟河最靈河神之福國佑民歷有明驗今茲立廟之地顯著休徵益以知

天心降鑒感則必通神德昭明誠無不格爰誌建廟歲月揭諸貞珉兼

紀明神顯應之蹟垂示永久以昭朕夙夜懋勉恭承

天眷敬迓神庥之至意云 十一年癸丑春正月十六日壬寅

諭內閣甘涼肅等處兵丁本年應支糧料草束例應折給銀兩自行採買朕因甘省年來辦理軍需糧價昂貴兵丁所領銀兩恐不敷用特令加倍增給以示格外之恩提鎮大員自應體朕軫恤兵丁至意悉心料理加意愛養近聞員弁中尚有營私瞻徇凡有過往應酬及一切雜費俱於各兵攤派即如甘提馬廠每年尚有餘利若盡歸公用於兵丁不無稍補前任提督宋可進止知罔利不恤兵艱剋扣餉銀濫用公帑各鎮將弁未必不做倣而行著署督劉於義侍郎杭奕祿嚴飭陝甘提鎮將營中所有除各官俸薪及親丁名糧外凡有餘利俱歸公用接濟兵丁不准絲毫乾沒入己亦不得借公費等項名色攤派署提督劉世明受恩深重尤當實力奉行毋得仍蹈故轍自取

甘肅新通志

卷首之一

二十五

罪戾嗣後有員弁私派侵蝕等弊該署督等即行叅奏並將該管提鎮一併叅處 十二年甲寅十月丁未

上諭內閣數年以來甘肅等處地方辦理軍需民人等轉輸効力朕心深爲軫念已屢加恩澤以示嘉獎前據督撫等奏報今年禾麥收成俱好朕心深慰今聞秋閒有雨少之州縣如階州靖遠環縣數處收成不足民食稍艱或他處有似此者亦未可定著劉於義許容確加訪查所有歉收之處或應蠲免或應停徵其乏食之民如何撫恤一面定議奏聞一面即行辦理若西安所屬有秋田歉薄之州縣著史貽直碩色亦即確查奏聞照此辦理 冬十一月二十三日甲午

諭朕聞涼州府屬鎮番縣柳林湖地方屯田地畝經加銜侍郎蔣洄估計開墾修築渠壩置備農具等項共銀七萬八千餘兩而辦理此事率多營私作弊蔣洄委用原任知縣潘治州判石廷棟二人所修渠

工岸壩在在草率俱經冬水衝塌而蔣河視同膜外不問不究又今春下種之時種少報多隱匿籽種一千餘石又平地工價一項共該銀七千八百兩委官領去分發屯民而潘治石廷棟等朋比分肥短發工價銀四千餘兩又蔣河將屯田下賸存銀八千二百餘兩虧空無存朕所訪聞如此蔣河受朕深恩何以負恩溺職至於此極非派員確查難定虛實著副都御史孫國璽前往涼州將以上情節詳細確查無得絲毫瞻徇 十三年乙卯五月甲辰

上諭內閣西陲用兵以來一應軍需皆取資於公帑絲毫不以累民惟是甘肅等處運送糧餉不能不藉民力之輓輸朕心軫念屢沛恩膏即當豐稔之年亦下蠲租之詔所以賞百姓之急公示朕心之體恤也茲聞甘省所屬地方入夏以來有雨澤愆期之州縣或收成稍薄納課艱難著將雍正十三年甘肅通省所屬應徵地丁錢糧全行蠲

甘肅新通志

卷首之一

二十六

免俾催科不擾民力寬舒該督撫可董率有司實力奉行以副朕加惠秦民之至意

甘肅新通志卷首之二

乾隆元年正月癸丑

諭總理事務王大臣甘省百姓連年承辦軍需急公踴躍甚屬可嘉皇考屢沛恩膏朕亦深加體恤上年聞有缺雨歉收之州縣已諭該督加意撫綏務令貧民得所除散賑米穀外所有借給口糧籽種之類例應秋收徵還者著悉行賞給免其還項該督撫可通行曉諭並飭有司實力奉行毋使胥吏土棍侵蝕中飽

是月蘭州巡撫許容奏請

聖安

諭曰朕安據劉於義奏汝賑濟固環等處貧民大口日給米三合小口日給米二合不敷度日難以充飢目下窮民尚復逃散四出等語汝爲地方大員既不能先事豫防於前又不能竭力賑救於後而且一

甘肅新通志

卷首之二

一

經奏報遂謂了事恐甘省之災荒二字再入朕耳如此輕視民命爲民父母之謂何汝意固爲國家惜帑乎夫民之元氣乃國家之根本也傳曰百姓足君孰與不足豈汝未之聞乎 八月戊寅

諭總理事務王大臣陝甘之人長於武事其人材之壯健弓馬之嫻熟較他省爲優向來武闡鄉試中額每省各四十名應試之人每以限於額數不能多取其如何量行廣額之處著該部議奏

十一月辛丑

諭總理事務王大臣據陝西署督劉於義奏稱甯夏府屬之甯夏新渠寶豐等縣今夏雨水甚多黃河泛漲以致衝決隄岸淹浸民田臣已動支社倉公用銀糧加意賑恤念此被災人民今冬明春口糧或有缺乏准布政使詳議甯夏縣之何忠堡新渠縣之通吉通義通昶清水等堡被災偏重酌借六箇月口糧甯夏縣之王堡及寶豐縣之紅

岡永潤等堡被災較輕酌借三箇月口糧俟來年收成之後催徵還項等語朕子惠元元一夫不獲實如已溺已飢而於甘肅民人歷年奉公尤深軫念茲覽劉於義奏報甯夏被水等堡秋成歉薄民食艱難所當加意撫綏者著將各該處額徵糧石確查豁免所借六箇月三箇月口糧俱准抵作賑給之項免其來歲交還該督撫司出示通行曉諭並飭有司實力奉行務令小民均沾實惠

二年丁巳七月庚子

諭總理事務王大臣噶爾丹策零賦性狡詐伊聲言欲犯西路但西路一無所利或爲敲此擊彼之計欲窺伺北路擾害喀爾喀亦未可定可傳諭額駙策凌等加意防範不可疏忽朕覽樊廷摺內有駐防官兵僅五千名兵力單弱應如何設備可恃無虞之處悉心熟籌另奏等語樊廷此奏似微有氣餒之意大凡爲將之道貴氣壯而心定蓋

甘肅新通志

卷首之二

二

三軍之仰賴將帥猶百體之聽令一心所謂心君泰然百體從令也朕曾諭樊廷云無事之時當作有事觀及至有事又不可稍存畏葸之念現在安西一帶駐有重兵相隔不遠再沿邊一帶亦有豫備之兵可以調遣接應兵力原未嘗單也況賊人即來窺伺不過鼠竊狗偷在邊地亦屬尋常之事惟當持以鎮靜不可因此驚惶亂其心曲本年四月間大學士查郎阿奏請於秋閒前往肅州巡查邊地今既有傳聞之信可在肅多住時日若有應辦之事即可就近辦理俟應回西安之時奏聞再行起程 二年戊午二月丙寅

諭內閣據元展成奏稱甯夏府屬之寶豐新渠二縣前奉恩旨將雍正十二年以前民欠豁免緣兩縣民戶已將應完十三年之正糧儘納卜二年之舊欠是以復欠十三年之額徵銀三萬兩有奇現在設法催徵而民力維艱等語朕思兩邑招墾新戶安業未久所欠十三年

額賦既因儘納舊欠致虧正額今又新舊並徵未免拮据朕心深爲憫念特格外加恩將雍正十三年以前舊欠悉行豁免其乾隆元二兩年有未完正額錢糧著分作十年帶徵以紓民力 丁卯

諭內閣上年因陝甘地方收成歉薄物價昂貴曾准各營兵丁等豫借銀兩糴買糧石以資接濟例應陸續扣還朕念地方歉收之後兵丁力量不敷伊等既有從前所借未曾扣清之項又有借辦軍裝火藥銀兩應行按季扣除合計所扣之數過多兵丁食用未免艱窘著大學士查郎阿酌量本地情形再寬其期酌展三四季以紓兵力示朕優恤邊兵之至意 十一月丁亥

諭內閣據甯夏將軍阿魯等奏稱甯夏地方於十一月二十四日戌時地動滿城官兵房屋盡皆坍塌等語朕心深爲軫念所有城內官兵人等作何加恩賑恤之處著該將軍作速查明一面奏聞一面辦理

甘肅新通志

卷首之二

三

其各處被災軍民人等著該地方官即行查明一體賑恤邊地寒冬務令安妥毋致一夫失所 辛卯

諭內閣前據甯夏將軍阿魯奏報甯夏地方於十一月二十四日戌時地動朕心軫念已降旨令將軍督撫等加意撫綏安插無使兵民失所今據阿魯續奏是日地動甚重官署民房傾圮兵民被傷身斃者甚多文武官弁亦有傷損者朕心深爲慘切惟有敬懍

天變深自修省著兵部侍郎班第馳驛前去即於明日起程動撥蘭州藩庫銀二十萬兩會同將軍阿魯并地方文武大員查明逐戶賑濟急爲安頓無使流離困苦其被壓身故之官弁著照巡洋被風身故之例加恩賞恤其動用銀兩該部另行撥補再甯夏附近之州縣被災者著班第會同文武大員一體查賑毋得遺漏 四年正月丁卯

諭內閣上年十一月甯夏地動民人被災甚重朕聞奏即遣大臣星馳

前往會同督撫將軍等加意賑恤並籌撫綏安輯之計日來伊等陸續奏到正在多方經理以濟災黎朕思民人等困苦播遷之後縱能勉力耕耘豈復能輸租稅著將甯夏甯朔平羅新渠寶豐五縣本年應徵地丁及糧米草束雜稅等項悉行豁免如有舊欠亦著蠲除儻附近州縣有被災之處應加恩免賦者著欽差及督撫等查明奏聞請旨 三月甲寅

諭內閣前據大學士查郎阿等奏稱甯夏鎮標分發各當舖生息銀兩自上年地震後查被災甚重之各當舖所領生息本銀共計八千五百十七兩零其雖經被災貨物未致全失之各當舖所領生息本銀共四千五百四十兩零可否分別加恩寬恤等語朕念甯夏此次地震商民同時受災深爲憫惻著將被災甚重各商所領八千五百十七兩之本銀並利銀俱著豁免其被災稍輕之各商止令交還所領本銀

甘肅新通志

卷首之二

四

四千五百四十兩零所有應交利銀悉著豁免至此項豁免銀兩有關兵丁緩急之需不便缺少著在蘭州藩庫內照數撥補足額以資生息俾兵民一體均霑恩澤 六月壬午

諭九卿等今日據元展成奏報甘省於五月十三十四等日霖雨霑足等語現在各省先後奏報已蒙

上天降佑雨澤普徧朕心甚慰從前因各省得雨稍遲朕憂勤莫釋爾等仰體朕心頗存修省儆惕之意辦理政務勉矢勤慎近日甘霖徧沛或因我君臣交儆

上蒼默鑒之所致但前患雨少嗣後又恐雨多夏秋之交儻得雨暘調協則大田定可豐收雖麥收稍歉民食不致缺乏朕仰承

嘉貺倍切誠虔敬

天勤民之心未敢一息稍懈爾等宜當益加黽勉勤修職業不可因豐

收有象略萌侈然自足之念或致少弛政務大凡立心辦事敬之一字最關緊要必時時返躬體驗常存敬畏之心乃可導迎善氣感召嘉祥我君臣當共勉之 九月庚午

諭內閣甘省之秦安等十五州縣俱有被水被雹之處朕已格外加恩將該州縣本年應徵地丁錢糧降旨免寬但甘省州縣從前多係衛所其額徵之項本色多而折色少亦有全徵本色者朕前因甘省州縣屯地皆徵本色而無折色每遇蠲免之年不得一體霽恩曾降旨准免三分之一此次秦安等十五州縣應徵糧草亦著照屯戶之例蠲免三分之一以示朕優恤邊民之至意 是日

諭內閣據鄂彌達元展成奏稱西甯府屬之碾伯縣甯夏府屬之靈州中衛俱續有被水被雹之處又碾伯平番西甯三縣乾隆三年分額徵並節年一切借項前經奏聞緩至本年催徵今查各該縣夏收除

被災處其餘俱有七八分收成但上年已經被雹被蟲收成僅在五分以上平番現在採買供支駐莊滿兵糧草西碾二邑亦因倉儲缺少正需採買積貯今積年應完各項爲數繁多若一時並徵民力不無竭蹶請將三縣今年所借籽種口糧於秋收後照數徵收其舊欠分年帶徵等語朕因秦安等十五州縣俱有水雹偏災業經降旨特加優恤將本年應徵銀糧草束分別蠲免今碾伯靈州中衛亦有被災之處而碾伯上年已屬歉收靈州中衛又當甯夏災傷之後著將此三州縣應徵銀糧草束與秦安等州縣一體加恩分別寬免其碾伯平番西甯三縣所有三年分額徵並節年借項著於庚申年起分作三年帶徵以紓民力 十一月壬申

諭內閣甯夏供支滿兵糧草向係每年採買散給共計白米一千五百餘石粟米七千餘石草一十三萬餘束其所定部價白米粟米每石

價銀一兩草一束價銀一分今聞該地方自上年被災之後新寶二縣田地被水淹浸不能耕種已少產米糧數十萬石目下糧草之價日漸昂貴所定部價不敷採辦勢必貽累小民著將乾隆五年應支滿兵糧草白米每石加銀一兩粟米每石加銀五錢每草一束加銀一分如此則價值增添官民易於辦理但係格外之恩後不爲例該部可即行文該督撫知之 乾隆五年十月甲寅

諭內閣從前甯夏等處地方被災民人困苦朕百計籌畫加意撫綏始不至於失所惟是瘡痍甫起戶鮮蓋藏本年平羅地方又有被水被旱之處若照分數成例蠲免錢糧恐民力仍不免於拮据著格外加恩將銀糧草束概予全免至未被災之村莊及夏朔二縣從前被災較重雖兩年以來均屬有收而工役繁興人夫雲集米糧物價猝難平減亦應酌量加恩與民休息著將夏朔二縣及平羅未被災村莊

甘肅新通志

卷首之一

六

辛酉年額徵銀糧草束寬免一半 十一月壬午

諭內閣甘肅提鎮各營歲需糧料例係本折兼支於額徵糧內估撥如遇歉收緩徵之年本色不敷則將應估本色之糧料亦行酌估折色朕聞乾隆三年分原估涼州鎮標本色糧料共三萬二千九百餘石係於乾隆二年豫爲估撥嗣因乾隆三年涼屬收成歉薄例應緩徵原估前項額糧除將現有之糧供支外尚不敷本色糧一萬二百餘石照例改估折色每石按部價估銀一兩緣兵糧例係季首關支於未經改定之時已值應支秋季兵糧之候兵食嗷嗷遂借採買積貯糧三千六百餘石暫資五營兵丁之急需至估撥乾隆四五兩年分兵糧又因涼屬連經歉歲民欠難徵每年本色糧俱僅敷一月有餘而今年涼屬又遇偏災現在豫估辛酉年本色亦止敷兩月之糧是窮兵餬口尚且不足難以再行扣還借項是以三年分所借積貯糧

石至今尚未還倉其改估之折色銀兩現存司庫查積貯糧石向無供支兵食之例而涼屬連歲歉收糧價昂貴若令將扣存改折之項買糧還倉則市價較之部價相懸過半朕深念邊塞窮兵度日艱難准將此項糧石作正報銷免其扣還本色其存庫銀兩留作折色之用以示朕加惠邊兵之至意 六年辛酉正月戊辰

諭內閣陝甘兩省自軍興以來出征兵丁等俱有賞賚而平時製備軍裝器械等項陸續借支司庫銀五十七萬兩有奇例應在本兵名下按季扣還者除年來已經扣除外西安司庫未扣銀約二萬六千四百餘兩甘肅司庫未扣銀約一十九萬六千餘兩前任總督鄂彌達以現今兵力不敷請緩至五年之後營伍漸充公費稍裕再爲扣除部議以五年之內不免再有借支作何辦理行令總督尹繼善另行妥議今尹繼善議稱此項銀兩應均作五年帶扣如有營伍需用之

甘肅新通志

卷首之二

七

處亦未便竟不借給應請酌定數目不許過多指定限期不准過久以便隨同帶扣等語朕思兵丁等現領之餉僅足供養家口之資若將新舊借支之項一併帶扣則所存無幾食用艱難且此項借欠歷年已久若本人更換勢必至貽累妻孥及該管之將弁朕心深爲憫惻況西陲軍興以來陝甘兵丁備極勤勞而甘省兵丁尤爲出力著將借欠未完帑銀二十二萬二千四百餘兩悉行豁免以示朕優恤邊兵之至意 七年壬戌正月甲申

諭內閣甘省地處邊徼土瘠民貧朕所加意撫恤頃聞涼州府屬之武威平番永昌古浪四縣頻歲歉收上年又被旱災民情甚苦積欠頗多查自雍正十三年至乾隆四年武威縣未完額糧八萬一百餘石草六十四萬二千餘束平番縣未完額糧一萬三千一百餘石草一十九萬二千餘束永昌縣未完額糧八萬五千二百餘石草二十萬

四千餘束古浪縣未完額糧四千三百餘石草九萬三百餘束又西甯府屬之西甯縣自雍正十三年至乾隆三年未完額糧二萬八千九百餘石草二十九萬八千餘束碾伯縣未完額糧一萬一千一百餘石草一十三萬七千餘束以上六縣皆西陲寒苦之地雖上年尚屬有收然積歉之餘元氣未復若將新舊額糧草束於一歲之內合併徵收民力實爲艱窘著將舊欠之項分作三年帶徵俾閭閻易於輸將示朕加惠邊氓之至意 四月丁未

諭內閣朕念甘省地瘠民貧前特降旨將民欠借糧自雍正六年至十三年者一概蠲免其乾隆元年以後借欠之項從壬戌年爲始分作六年帶徵至最寒苦之武威平番永昌古浪西甯碾伯等六縣則將帶徵之項一併豁免今思民欠借糧內從前有因倉糧缺少以銀一兩作糧一石借爲籽種口糧之需者計自雍正十年至乾隆六年如

甘肅新通志

卷首之二

八

武威平番永昌古浪西甯碾伯等六縣欠銀八萬八百七十三兩有奇又蘭鞏平慶甯夏五府屬之金縣河州靖遠隴西會甯通渭鹽茶廳平涼崇信靜甯固原涇州華亭合水平羅花馬池等處欠銀四萬六千五百四十二兩有奇此項借銀原係以銀作糧即與借糧無異其自雍正十三年以前者既已加恩蠲免其在乾隆元年以後者又分作六年帶徵至武威等六縣又復全予蠲豁此等抵借之銀事同一例著照乾隆元年借欠糧石之例從乾隆七年爲始分作六年帶徵俾民力愈得寬紓受國家休養之澤 五月辛巳

諭內閣甘肅地方遠在邊陲土瘠兵貧非內地可比向來散給兵丁口糧俱係四本八折而倉貯不敷之處又於四本之中多給折色是兵丁之得本色愈少矣每當米價昂貴之時所領折色不敷糴米之用度日未免艱難朕心深爲軫念用加特恩著將舊例每糧一石折銀

一兩者增銀二錢定爲一兩二錢之數料豆亦照此加增從乾隆七
年秋季爲始永著爲例俾邊遠寒苦兵丁俯仰寬裕他省亦不得援
例以請 乙酉

諭內閣甘省涼州府屬之柳林湖肅州所屬之三清灣柔遠堡毛目城
雙樹墩九壩等處各屯民戶舊借牛具口糧銀兩原請自乾隆二年
起分作五年帶徵迄今年已滿除已完外未完銀米例應如數催徵
完納者又查口外之安西柳溝布隆吉沙州等處屯民原借牛具口
糧銀兩除已完外未完銀兩亦應如數催完者朕思此等屯戶原係
招徠窮民素無積蓄自開墾以來若遇年穀豐收尙可完繳舊項儻
值收成歉薄則力量維艱應加體恤況此借欠之項乃屯民領借製
備牛具口糧以爲公田之用非小民自種地畝者可比今歷年已久
帶徵爲難著加恩全行豁免以息追呼之擾

甘肅新通志

卷首之二

九

八年癸亥閏四月戊寅

諭內閣甘省地方山土磽瘠風氣苦寒民力艱難甚於他省一遇歉收
所有應徵錢糧往往不能按期完納如蘭州府屬之皋蘭狄道金縣
靖遠平涼府屬之平涼涇州靈臺固原鹽茶廳鎮原靜甯華亭慶陽
府屬之安化甯夏府屬之中衛花馬池甘州府屬之張掖等處既有
本年正額銀糧及本年借貸籽種口糧又有從前借欠籽種口糧分
作六年帶徵之項統應完納加以積年舊欠地丁銀糧爲數繁多一
時交集小民力難兼營深可軫念朕思本年額賦係惟正之供例應
輸納本年所借籽種口糧春貸秋償亦應如數交還至於從前借欠
之籽種口糧已分作六年帶徵無容再緩惟有舊欠地丁銀糧自乾
隆元年起至二三四五六七等年積算其數較之一歲正額幾至加
倍若責令一時輸將民力實爲竭蹶著將皋蘭等十六廳州縣節年

舊欠地丁銀糧分作四年帶徵以示朕優恤邊民之至意 丙辰
諭內閣陝西甯夏滿兵乾隆六七兩年應需糧草前因甯郡地震新渠
寶豐等縣倉貯空虛不敷估撥在於平羅縣估撥糧一千七百二十
五石草一萬八千三百餘束中衛縣估撥糧一萬六千六百餘石所
需腳價因從前無給予之例是以部議未准但甯夏當震災之後物
價昂貴不能概估折色使兵自買故於改支折價之外於附近之中
平二縣搭估供支以濟兵食其運價一項勢不能免况彼時已經照
數運交滿兵支用今若不准找給小民力難賠補用是特頒諭旨將
乾隆六七兩年輓運糧草腳價准其找給其乾隆八年滿饟已經循
照舊例辦理亦不至遂爲成例該部即遵諭行

九年甲子三月甲辰

諭內閣甘肅地方向來民間積欠繁多朕曾降旨將張掖皋蘭狄道靖

甘肅新通志

卷首之二

十

遠安化平涼涇州靈臺中衛九州縣民欠自乾隆八年爲始分作四
年帶徵又將武威西甯二縣帶徵雍正十三年至乾隆四年之項一
併蠲免此外應徵舊欠銀糧理宜按期輸納但念該省土瘠民貧地
處邊陲非內地可比一年而清積年之欠未免艱難著將張掖肅州
高臺皋蘭河州狄道靖遠安化平涼涇州靈臺靈州中衛十三州縣
及武威西甯二縣累年未完積欠銀兩草束等項再行寬緩自乾隆
九年爲始分作六年帶徵以紓民力 七月戊戌

諭軍機大臣等甘肅地方土瘠民貧非內地可比朕所軫念其有舊欠
錢糧一年難以並徵者已加恩寬緩矣頃聞甘州府山丹縣積年民
欠亦屬繁多乾隆元年至八年共欠屯糧一萬二千六百餘石又自
三年至八年共欠籽種糧六千五百餘石又自元年至八年共欠草
六十萬一百餘束此時若按例一併催徵民力未免艱窘著從本年

爲始分作六年帶徵俾小民從容完納 甲辰

諭內閣甘省涼州府屬之柳林湖肅州所屬之三清灣柔遠堡等處及口外之安西沙州柳溝布隆吉等處屯田民人從前開墾之始借有牛具口食銀兩日久未得全還朕已於乾隆七年五月內降旨全行豁免惟肅州所屬之九家窰一處當時未經議及是以尙在帶徵朕思此等原係窮苦之民責令完納不免拮据著將九家窰未完牛具銀一千六十餘兩一體加恩豁免以息追呼之擾 九月甲午

諭內閣涼州西甯等處遠在邊陲民貧土瘠朕所軫念彼地舊欠錢糧在乾隆二年以前民力不能輸納者朕已陸續降旨蠲免查西甯縣尙有未完元年二年馬糧五百四十二石七斗七升實欠在民均係散戶零星力量微薄若照例催徵仍不免於追呼之擾著即行豁免以示優恤 十二月丙辰

甘肅新通志

卷首之二

十一

諭內閣從前甘肅擺羊戎等處建築城堡興工之時於鎮海巴暖等營派兵赴工巡防借給過各兵口糧鹽菜銀二千四百六十餘兩例應追扣還項朕念兵丁離汎旅食原與在營不同且事歷數載多有事故開除之人難於逐一抵償此項借給銀兩著加恩免其追扣以示優恤 十二年丁卯十月己卯

諭內閣甘肅之皋蘭金縣靖遠安定會甯五縣本年均被旱災且連歲歉收舊欠不少若一併徵輸民力未免拮据著將歷年未完額徵銀糧自乾隆戊辰年起分作五年帶徵其狄道隴西安化正甯甯州靜甯禮縣七州縣收成亦各有歉薄其歷年欠項一時完納維艱著將此七州縣歷年未完額徵銀糧自乾隆戊辰年起分作四年帶徵以紓民力 十一月庚子

諭內閣甘省各標協營及陝提標內兵丁積欠有雍正七八九十等年

出征西路軍營派往哈馬爾達巴漢等處長支鹽菜草料并馬乾馬價乾隆元二三等年所派駐防哈密赤金等處并豫備戰兵製辦行裝及雍正十三年至乾隆二五六七八九等年護送夷使進藏少交馬匹鍋帳羊價等項借支未扣銀共二萬四千餘兩例應於每年餉銀內按季扣還但念邊省生計艱難現在兵丁尚有應扣之項若將歷年積欠一例坐扣未免拮据著加恩令該督撫查明豁免以紓兵力 十三年戊辰正月辛未

諭內閣上年甘省蘭州等府屬有被旱成災之處已加恩賑恤俾災黎不至失所惟是本年地丁銀兩例於二月開徵朕念入春以來現在加賑去麥秋尚遠其應納額銀即於此時徵輸小民未免拮据著將蘭州等府屬之皋蘭金縣狄道靖遠安定會甯隴西通渭西固廳鹽茶廳平番中衛靈州十三處被災地方所有本年應納錢糧緩至秋

甘肅新通志

卷首之二

十一

成後再行徵收以紓民力 十四年己巳正月甲午

御製平定金川告成太學碑文曰

天畀我皇清握乾符俯坤軸函括萬邦悉主悉臣

五后纘承創守佑啟亦惟是二三蓋臣布德宣力予曰有先後予曰有禦侮用造我不丕基罔有蘖芽罔不煦嫗長養游於大當粵有金川莎羅奔者居西蜀桃關以外界綽斯甲小金川之間向曾從征得受符檄與諸土司齒顧恃其險遠夜郎自大構釁鄰番各土司申訴封疆吏吏曰蔓之不圖豈其視爲甌脫乃請兵籌餉期埽其穴而司其事者或怯縮以老師或獯狡以蓄志軍無適從事用弗集予心憫然念邊徼之不甯或致增防置戍重勞吾民大學士忠勇公傅恆義同休戚毅然請肩斯任乃命以經略印益厚集諸路軍芻粟相繼閭閻不驚卜吉於戊辰十一月之二日

馮牙以指所征朕親御武帳賜經略酒以行天日和昶陽氣宣復都人
士聽覩聳躍罔不忭喜謂露布之旦暮至也乃歷燕晉驅秦隴越劍
閣絕川江凌桃關之巖徑天射之峻又日討軍實而教誡拊循之均
其渴飲飢食同其曉征夜眠至於密贊機務親草奏章則又經略獨
勤其勞而諸武臣有所不知有弗能共者恩威既明士用益勵度番
落如戶庭過部伍於衽席奸酋授首軍聲大振復以巨礮擊其碣堅
礪以摧將俟諸軍之集擣其中堅而番酋駸瞿駝喙稽首請降經略
臣以彼罪重惡極窮而乞生久或渝且僭焉慮不允所請朕惟
天地之德在好生彼蟻潰而鼠駭者毋甯赦而宥之且求降而盡殲之
不可謂武矧不足以污我斧也於是經略宣朕明旨登壇受降己巳
二月之望日金川平定捷音至京是役也采入數千里奏凱未七旬
而振旅之師多有返自中途未究其用者昔之成功巴蜀如建武之

甘肅新通志

卷首之一

十三

定公孫江陵之降李勢皆版圖之內無足比數廷臣舉

皇祖朔漠

皇考青海成例請勒碑成均以示來許夫秉丹誠而運籌決勝永靖荒
徼者經略大學士之功也商可否於帷幄衝矢石於行陣者叅贊大
臣及諸將士力也朕何有焉惟是體

乾元之德懷佳兵之戒保大定功安民和衆庶幾可以垂則乎系之辭

曰維

天生人類聚羣分凡茲林林孰非我民有羈而縻有誨而諄豈伊異視
遠近殊倫守在四夷稽古明言無已用之寓義於仁蠢彼金夷恃其
險阻蠶食豨張謂莫我拒不靖不庭侵厥鄰聚駭奔叫呶以干大咎
匪棘匪紓獫狁之故我張我伐獫狁之故我師既集賊亦相持匪敢
相持懼誅自支兩易寒暑收功稍稽賊益以狂怒臂當車罪臣既誅

以徇我師朕咨於恆汝往視之朕咨於恆惟汝同德惟我庶士亦久於役將茲旗兵羽林神策其勇熊羆其心金石何敵弗摧何攻弗克濟以汝忠奏捷頃刻恆拜稽首臣敢弗覆旣

馮旣宜師出於京師出於京時惟一陽未逾五旬乃壓其疆前旌獵獵有節煌煌羣番乃驚謂自天降維彼攸恃曰良爾吉以偵以謀如鬼如蜮其恃爰誅其類股慄紀律是明我兵是詰鑄礮攻碉其守以失惟是懼誅潛弗敢出其潛弗出乃旦夕延將齊我軍披其中堅大鞞大膊期日之前彼乃窮蹙乞降悚虔惟命是從六事永遵除道築壇肉袒羊牽起起鍾琪乃度之愬聿抵賊巢開誠以諭攜其二酋軍門親赴悔罪歸誠車塵馬足順斯撫之昭我王度昔也雷霆今也雨露七縱諸葛單騎汾陽曰我相臣於前有光晉爵錫服黼黻龍章速歸黃閣左右贊襄休養生息惠鮮蜀邦我武旣揚無疆惟慶

甘肅新通志

卷首之二

十四

十五年庚午正月壬子

諭內閣據甘肅巡撫鄂昌奏稱肅州并山丹縣地方收成歉薄從前州縣有匿災未報查勘不實之弊已飛飭委署甯夏道楊灝候補知州許登第逐一查明借給口糧等語甘省遠處邊陲地瘠民貧非他省可比鄂昌於奏報賑務情形甚屬遲緩著飭行其肅州被災地方已降旨緩徵外山丹縣被災之處所有本年未完正賦及帶緩各年未完正借錢糧概予緩徵以紓民困并作何資助之處該撫即速查明分別借賑一面奏聞一面辦理副朕軫念邊氓至意

十六年辛未十月丙辰

諭內閣朕前降旨將甘省乾隆元年至十年舊欠錢糧概予蠲免復令將乾隆十一年至十四年未完錢糧分作五年帶徵俾得從容輸納以恤邊氓惟是甘省各屬舊欠錢糧之外尚有額徵草束一項不在

蠲緩之例歷年既久積欠已多若令其按年一併完納未免拮据著將甘省乾隆元年至十四年未完草一千五百萬餘束分作十年帶徵以紓民力 十九年甲戌八月乙亥

諭軍機大臣等據陝甘總督永常甘肅巡撫鄂昌奏西路一切軍需糧石已經陸續購辦將次到齊可以轉運哈密等語但思各處調遣之兵明年三四月始陸續到營爲期尚遠此時哈密巡防兵丁僅止綠旗及回民人等殊不足恃若將一應軍糧悉行運往哈密堆貯則守禦未免單弱恐準夷狡黠或乘雪前來攘竊轉足飽其所欲雍正八年前事可鑒也永常等所辦軍糧宜從容緩運分貯安西以內一帶地方俟明歲大兵齊集之際再行運往哈密則程途旣不甚遠儘可源源接濟而於防範之道更爲周密

二十年乙亥十月戊午先是達瓦齊敗竄回人阿奇木霍集斯

甘肅新通志

卷首之二

十五

伯克執獻軍門至是檻送至京獻俘闕下準噶爾平

御製平定準噶爾告成太學碑文曰遼矣山戎薰粥旃裘毳幕之人界以龍沙畜其驪奚雖無恆業厥有分部蓋自元黃剖判萬物芸生東夷西夷各依其地謬舉涇維未爲理據皇古莫紀其見之書史者自周宣太原之伐秦政互海之築莫不畏其侵軼猾夏是虞自時厥後一二奮發之君慨然思挫其鋒而納之宥然事不中機材不副用加以地遠無定處故嘗勞衆費財十損一得搢紳之儒守和親介冑之士言征伐征伐則民力竭和親則國威喪於是有守在四夷羈縻不絕地不可耕民不可臣之言興矣然此以論漢唐宋明之中夏而非謂我皇清之中夏也皇清荷

天之龍興東海撫華區有元之裔久 章歲朝貢從征狩執役惟謹準噶爾額魯特者本有元之臣僕叛出據西海終明世爲邊患至噶

爾丹而稍強吞噬鄰蕃闌入北塞我

皇祖三臨朔漠用大破其師元惡伏冥誅脅從遠遯跡毋俾遺種於我
喀爾喀厥姪策妄阿拉布坦收其遺孽僅保伊犁故嘗索取地無
敢不共逮夫部落滋聚乃以計襲哈密入西域準夷之勢於是而復
張

兩朝命將問罪雖屢獲捷而庚戌之役逆子噶爾丹策凌能用其父舊
人乘我師怠掠畜於巴里坤擣營於科卜多於是而準夷之勢大張
然地既險遠主客異焉此勞往而無利彼亦如之故額爾德尼招之
敗彼亦以彼之貪利而深入也

皇考謂我武既揚不可以既允其請和以息我衆予小子敬奉
先志無越思焉既而噶爾丹策凌死子策妄多爾濟那木札爾暴殘喇
嘛達爾札篡奪之達瓦齊又篡奪喇嘛達爾札而酗酒虐下尤甚焉

甘肅新通志

卷首之二

十六

癸酉冬都爾伯特台吉策凌等率數萬人來歸越明年秋輝特台吉
阿睦爾撒納和碩特吉班珠爾又率數萬人來歸朕謂來者不可以
不撫而撫之莫若因其地其俗而善循之且毋令滋方來之患於我
喀爾喀也於是議進兩路之師問彼罪魁安我新附凡運饟籌馱長
行利戰之事悉備議之始熟經於庚戌之艱者咸懼蹈轍惟大學士
忠勇公傅恆見與朕同而新附諸台吉則求之甚力朕謂犁庭掃穴
即不敢必然喀爾喀之地必不可以久居若而人毋甯用其鋒而觀
厥成即不如志亦非所悔也故凡

馮旗命將之典概未舉行亦云偏師嘗試爲之耳塞上用兵必以秋而
阿睦爾撒納瑪木特請以春月欲乘彼馬未肥則不能遯朕謂其言
良當遂從之北路以二月丙辰西路以二月己巳各起行哈密瀚海
向無雨今春乃大雨咸以爲時雨之師入賊境凡所過之鄂拓克攜

羊酒糗糒迎恐後五月乙亥至伊犁亦如之達瓦齊於格登山麓結營以待兵近萬我兩將軍議以兵取則傷彼必衆彼衆皆我衆多傷非所以體上慈也丁亥遣阿玉錫等二十五人夜斫營覘賊向賊兵大潰相蹂躪死者不可勝數來降者七千餘我二十五人無一受傷者達瓦齊以百餘騎竄六月庚戌回人阿奇木霍集斯伯克執達瓦齊來獻軍門準噶爾平是役也定議不過二人籌事不過一年兵行不過五月無亡矢遺鏃之費大勳以集遐壤以定豈人力哉天也然

天垂佑而授之事機設不奉行之以致坐失者多矣可與樂成不可與謀始亦謂蚩蚩之衆云爾豈其卿大夫之謂旣克集事則又曰苟知其易將勸爲之夫明於事後者必將昧於幾先朕用是寒心且準噶爾一小部落耳一二有能爲之長而其樹也固焉一二暴失德之長

甘肅新通志

卷首之二

十七

而其亡也忽焉朕用是知懼武成而勒碑文廟例也禮臣以爲請故據實事書之其辭曰茫茫伊犁大幹之西匪今伊昔化外羈縻條支之東大宛以南隨畜獵獸蟻聚狼貪乃世其惡乃恃其遠或激我攻而乘我緩其計在斯其長可窮止戈靖邊化日薰風不侵不拒不來其那款關求市亦不禁詞始慕希珍終居奇貨吏喜無事遷就斯悞漸不可長我豈懼其豈如宋明和市之爲旣知其然飭我邊吏弗縱弗嚴示之節制不仁之守再世斯斬篡奪相仍飄忽荏苒夙沙革面煎鞏披忱集泮飛鴉食黷懷音錫之爵位榮以華裾膝前面請願効前驅兵分兩路雪甲霜鋒先導中堅如鼉錯攻益以後勁蒙古舊屬八旗子弟其心允篤二月卜吉牙旗飄飄我騎斯騰無待折膠泉湧於磧蕪茁於路我衆歡躍謂有

天助匪啻我衆新附亦云黃髮未覩水草富春烏嚕木齊波羅塔拉台

吉宰桑紛紛款納牽其肥羊及馬潼酒獻其屠耆合掌雙手予有前諭所禁侵陵以茶交易大愉衆情衆情旣愉來者日繼蠡達瓦齊擁兵自衛依山據淖惟旦夕延有近萬人其心十千勇不日逃掄二十五日阿玉錫率往賊所銜枚夜走直入其郭揮矛拍馬大聲疾呼彼人旣離我志斯合突將無前縱橫鞞鞞案角鹿埵隴種東籠自相狼籍孰敢攖鋒狐竄鼠逃將往異域回部遮之兇渠斯得露布旣至告廟受俘凡此蕝功荷

天之衢在古周宣二年乙亥淮夷是平常武詩載越我

皇祖征噶爾丹命將

馮旗亦乙亥年旣符歲德允協師貞兵不血刃漠無王庭昔時準夷弗恭弗諱今隨師行爲師侯尉昔時準夷日戰夜征今也偃卧知樂人生曰匪準夷日我臣僕自今伊始安爾游牧爾牧爾耕爾長孫子曰

甘肅新通志

卷首之二

十八

無向非豈有今是

兩朝志竟億載基成側席不違保泰持盈 二十一年丙子二月庚申諭內閣陝甘兩省辦理軍需以來綠旗各營辦解馬匹及一切公私借墊爲數頗多例應於官兵糧餉內均攤扣還朕念伊等趨事急公倍多勞苦更加扣餉生計尤爲拮据今竄逆就擒兵艱宜恤著加恩免其按名扣抵但此等借項均關國帑不便虛懸著於陝甘各營兵數內酌留公費糧名通融彌補以清帑項該督黃廷桂詳細查明妥協籌酌應留名數覈實奏聞一面辦理副朕優恤戎行至意

五月丁亥

諭內閣甘省一應軍需多於甘涼肅等府州縣就近採辦雖一絲一粟悉皆取給公帑卽輓運轉輸之事亦必計丁給值不以派累閭閻但此數郡小民急公趨事較之他屬倍覺勤苦出力朕心深爲軫念著

加恩將甘省之甘涼肅三府州縣民戶屯戶及番民等本年應徵各項錢糧米豆草束一概蠲免其有已經完納者按數扣出准作來年正供該督撫其率各地方官實力奉行務俾邊郡小民均霑實惠如有不肖官吏以完作欠侵蝕中飽者察出即行嚴叅治罪

九月戊子

諭內閣前因甘省地方承辦軍需降旨將甘涼肅三府州屬民屯及番民等本年應徵各項錢糧米豆草束一概蠲免其餘各府州縣雖地方有衝僻之不同承辦有多寡之或異朕念該處小民趨事赴公均屬勤苦著加恩將甘省十三府州廳屬各州縣衛乾隆十一年至十五年民欠地丁錢糧草束概予蠲免十六年至二十年民欠未完正借錢糧著自丁丑年起分作五年帶徵其安西五衛近接軍營皋蘭一縣地居省會出力尤多著將本年應徵各項錢糧俱照甘涼肅三

甘肅新通志

卷首之二

十九

府州之例一體蠲免其甯夏平涼鞏昌蘭州等府屬十七州縣本年應徵各項錢糧亦著蠲免十分之三以紓民力再甘肅通省尚有乾隆元年至九年蠲贖未完及十年至十五年民欠籽種口糧牛本等項銀兩非因災出借爲定例所不應免但該省承辦軍需民力實堪軫念著一併加恩蠲免該督撫等其董率屬員實心經理務使膏澤下逮以副朕格外施恩優恤邊民之至意

二十二年丁丑正月戊戌

諭內閣甘肅地方承辦軍需去歲屢經降旨將該省本年應徵及歷年民欠各項錢糧分別蠲免但念西路現在用兵甘省小民趨事赴公甚屬勤苦朕心深爲軫念著再加恩將甘涼肅三府及安西五衛皋蘭一縣應徵本年地丁錢糧米豆草束概予蠲免其甘肅通省自乾隆十六年至二十年未完地丁錢糧一併加恩蠲免該督撫等其董

率屬員實心經理俾小民均霑實惠毋致胥吏中飽用副朕恩施格外優恤邊氓至意 六月壬戌

諭內閣甘肅地方承辦軍需小民急公趨事甚屬勤勞屢經降旨將該省歷年積欠並承辦之甘涼肅三府安西五衛皋蘭一縣本年應徵地丁錢糧米豆草束概予蠲免但現在軍務未竣該省爲總彙之地小民出力尤多朕心時切軫念著將甘肅通省乾隆二十三年應徵地丁錢糧加恩概予豁免該督撫等其督率屬員豫行出示曉諭實心查辦毋任不肖官吏從中舞弊用副朕優恤邊民格外施恩至意

十月壬戌

諭內閣前因陝甘二省滿漢官兵採買撥解馬匹及各標營摘缺買補借動公帑若依限扣還兵力未免拮据降旨該督應作何展限加恩之處查明具奏今據黃廷桂奏陝甘二省滿漢各標營借墊未還銀

甘肅新通志

卷首之二

二十

三十五萬九千三百兩零其解送馬駝添補口食盤費等項除季餉坐扣外尙未還銀六十萬八千三百兩零等語此所奏借墊未完之三十五萬餘兩著加恩免扣以示優恤其坐扣未還之六十萬餘兩著酌量分別年限按期展扣以紓兵力該督撫其善爲經理務俾均霑渥澤以副朕加惠邊兵至意 十一月乙卯

諭軍機大臣等陝甘兩省挑解軍營馬匹所有摘缺應買補之馬定價不敷多借公項墊用分限扣還朕已降旨加恩矣直隸連年挑解馬匹各標營摘缺買補或亦有似此借墊者著方觀承即查明具奏其動項買補者不在此例 是月大學士管陝甘總督黃廷桂等奏奉旨將陝甘二省滿漢各營採買補缺馬匹借墊銀免其扣還其借送馬駝添補口食盤費坐扣未完銀分年展扣請分六年扣還

上諭曰六年尙覺限迫著寬至十年 癸巳

諭內閣甘肅提鎮標營兵丁每年應支兵米向例止給四箇月本色其餘月分俱給折色年來西路用兵兼之口外地方今歲偶被風災商販之出口者多內地米價未免稍昂所支折色不敷買食兵丁生計未免拮据著加恩將甘提涼肅二鎮所屬標營無論馬步兵丁每兵賞借小麥一石六斗於本年十一月起分作四箇月按月支領以濟口食各照本營額定折色之例自來年春季起分作四季扣還其安提各營兵丁前因災歉業經賞給一月口糧但安西地處口外兵丁之差使較繁亦著一體借支連前所借一月口糧一併分季扣繳以示體恤邊兵之意 十一月甲申

諭內閣甘涼肅安一帶各標營官兵因本年米價稍昂曾經加恩每兵賞借四箇月口糧以資接濟其陝省延綏一鎮地屬邊徼差務絡繹本年秋收適值歉薄各營口食未免拮据來歲青黃不接爲時正長

甘肅新通志

卷首之二

二十一

朕心深爲軫念著照甘涼肅安之例無論馬步守兵每名賞借四箇月口糧一石六斗自十二月起按月米麥兼支俟來年照各本營折色四季扣還歸款以示體恤邊兵至意 二十三年戊寅正月己丑諭內閣甘肅一省承辦軍需雖絲毫不以派累閭閻而小民之趨事勤勞殊堪軫念前經降旨將該省乾隆二十三年地丁錢糧悉行加恩蠲除但本年正項雖已免徵而歷年久欠尙有應須輸納者邊氓仍不免追呼之擾著再加恩將該省乾隆十六年至二十二年一應民欠未完銀糧草束通行豁免該督撫其董率屬員實行查辦尙有不肖官吏以完作欠侵蝕中飽及違例私徵致百姓不霑實惠即行嚴叅究治用稱朕嘉惠體恤之至意 是日

諭內閣據黃廷桂奏稱現在陝甘買補摘缺營馬官價八兩實有不敷及買解巴里坤等處屯田牛隻請於官價四兩四錢外添給一兩六

錢等語兩省連年需馬甚多市價未免昂貴若拘定成例誠有不敷著於定價八兩外准其加給二兩至牛隻係本省農民所需用時屆春耕不惟官價四兩四錢不足即增一兩六錢亦未必充裕若再加二兩給以官平足數採買自屬易集而閭閻亦無滋累因此次購辦過多特加恩格外以示體恤後不爲例 五月戊子

諭內閣甘肅地方數年以來辦理軍需悉頒帑項雖絲毫不以累民而小民急公趨事甚屬勤勞殊堪廛念前經降旨將本年應徵地丁錢糧概予蠲免又經降旨將二十二年以前舊欠之銀糧草束通行豁免但該省爲軍需總匯民風淳厚出力尤多朕心時切軫念著將甘肅通省乾隆二十四年分應徵地丁錢糧再行加恩悉與蠲免該督撫等其董率屬員豫行出示徧爲曉諭毋任不肖官吏從中舞弊以副朕格外加恩優恤邊民至意 六月庚申

甘肅新通志

卷首之二

二十二

諭軍機大臣等據吳達善奏稱甘省大勢缺雨其杖徒以下等罪可否亦照直隸清理刑獄之例酌減辦理等語已於摺內批示清理刑獄亦祇祈求雨澤之一端今甘肅涼蘭等屬未得透雨而涇州高臺數州縣又有被災之處邊省貧民深爲軫念雖該省頻年額賦悉已加恩豁免若秋成未能接濟則應行撫恤之事不可不急爲籌畫甯夏一帶素稱產米之區價值較他處必當平減其應如何設法採購以爲未雨綢繆之計務宜作速部署以備臨時酌量賑糶庶邊氓得霑實惠將此詳悉傳諭吳達善知之 辛巳

諭軍機大臣等甘省連年承辦軍需雖一絲一粟不以派累閭閻而運送兵丁輸輓糧餉多資民力急公趨事朕心時廛於懷今歲復值得雨較遲深爲軫念現今各屬已曾徧行得雨否秋收可不至甚歉否其從前未經種植者曾補種雜糧否當此連歲餽運之後繼以雨澤

愆期米糧自必短少黃廷桂勞動日久刻下辦理糧餉設或拮据不可不爲之體恤現在尙須再派京兵一千前往軍營朕意即令此一千兵於京師各帶軍前四箇月口糧以免甘省購辦如此籌畫是否簡便易行於邊省地方有益著傳諭黃廷桂令其酌量速行具奏

七月戊子

諭內閣甘肅歷年正供及雜項錢糧並乾隆二十四年地丁額賦屢經降旨加恩豁免其正賦之外隨徵耗羨係留支地方公費之需例不免徵但念甘省地處邊陲土瘠民貧正供旣已蠲除而歷年積欠耗羨尙須照數完納小民輸將仍不免拮据著再加恩將甘省自乾隆元年至二十二年民欠耗銀三萬三千四百餘兩耗糧一十五萬八千六百四十餘石概予豁免除其二十三、四兩年應徵耗羨銀糧亦著暫緩催徵俟正賦開徵之年再行輸納用昭體恤邊氓之至意

甘肅新通志

卷首之二

二十三

八月丙子

諭內閣黃廷桂奏甘肅河東河西州縣內有雨澤愆期不及補種秋禾之處目前即應照例銀糧兼賑但該處現在糧價頗昂若照部價每石一兩折給不敷買食請於部價之外河東每石加銀二錢河西每石加銀三錢等語該省每歲辦理軍需繼以雨澤愆期不及播種糧價自不免昂貴即照該督所請加增之數折給恐尙不敷著加恩於部價外河東每石加銀三錢河西每石加銀四錢俾民間買食寬裕以示格外軫恤至意

十月丁丑

諭內閣甘省調運陝省西安鳳翔邠州乾州四府州屬採買米麥以備軍儲所有應給腳價除自涇州交界以內道路平坦而經過各屬秋成豐稔照例給發腳價外其自涇州接運赴蘭山路崎嶇沿途之平涼等屬今秋又俱有偏災若照例給以腳價往返食用未免拮据著

加恩准照河東運送兵糧之例每京石每百里給腳價銀一錢六分
回空給銀四分以資挽運 十一月丙辰

諭內閣甘省因年來辦理軍需兵民輻輳米糧市價未免稍昂所有各
營兵丁應支折色若仍照舊例支給兵丁不免拮据著將該省滿營
官兵除六箇月照舊折支外其六箇月如有改支折色者每石加賞
銀一兩其甘涼甯西肅五提鎮所屬並蘭州撫標城守固原提標各
官兵除八箇月照舊折支外其四箇月有改支折色以及六箇月本
色馬料改支折色者每石俱加賞銀一兩安西口外每石著加賞銀
一兩五錢至陝省延綏鎮屬地方偶被災歉著將明歲應關折色亦
照甘省甘涼各鎮之例一體每石著加賞銀一兩再甘省應納草束
業已降旨豁免其滿漢各營折支草價恐不敷採買著將口外安西
提屬每束加銀一分五釐口內甯夏涼莊滿營及甘涼甯西肅延綏

甘肅新通志

卷首之二

二十四

六提鎮屬蘭州撫標城守固原提標每束各加銀一分以示體恤兵
弁之意 己未

諭內閣陝甘滿漢各營餽解馬匹自去秋以及今春各項借支官銀據
黃廷桂查奏計五十萬九千二百餘兩皆應行按限扣還之項朕軫
念邊兵用昭優恤著加恩全行寬免以示鼓勵獎勞至意

二十四年己卯正月甲申

諭內閣甘肅本年應徵地丁錢糧及歷年積欠銀兩草束等項業經上
年屢次加恩豁免但念該省邊地寒苦年來承辦軍需小民急公趨
事朕心深爲嘉予著再加恩將甘肅通省來年應徵地丁錢糧悉予
蠲免該督撫等即行出示徧爲曉諭並嚴飭屬員實力奉行副朕格
外優恤邊氓至意 是日

諭內閣甘省遠處邊陲地方寒瘠比歲收成歉薄生計未免拮据雖邇

年辦理軍需毫無派累而一切受雇輓運罔不踴躍急公民情涸樸深堪軫念業經疊次加恩將近年正供雜項並歷年積欠帶緩銀糧草束概予豁免惟昨春曾被偏災之地尚有官借牛具籽種口糧及積年應交官項爲從前恩旨所未及者若照例徵收無力貧黎仍復艱於輸納著再加恩將甘省上年曾被偏災及勘不成災各州縣所有未完籽種口糧九萬六千餘石又折給銀一千餘兩未完口糧四萬四千七百餘石又折給銀五千八百餘兩又各屬被旱及被雹處所內有勘不成災地畝原借籽種糧一萬一千三百餘石又折給銀二千五百餘兩口糧一萬餘石又折給銀四千七百餘兩又甘州涼州肅州未完牛價銀一萬一千五百餘兩乾隆二十三年各屬借給牛本糧一萬五千九百餘石銀八千餘兩皋蘭縣借製水車未完銀兩及雍正七年起至乾隆二十二年止未完牙稅磨課等銀兩普行

甘肅新通志

卷首之二

二十五

蠲免其乾隆元年至二十二年止帶徵民欠未完各官養廉公費銀三萬九千二百餘兩糧一十二萬三千二百餘石並雍正十三年未完耗羨銀糧均屬遠年積欠概予豁免除俾免追呼以安耕作至口內之柳林湖毛目城等處口外之靖逆柳溝赤金瓜州小灣等處屯田並著一體加恩將本年應分糧石各照交官之數酌減一半交收俾得均霑渥澤 丙戌

諭內閣從前甘省安臺送兵多雇民間馬騾用過腳價及到站守候支給料草銀兩該部按例察覈議不准銷但念領價分雇俱屬無力里民且事在乾隆二十年閱今三載若復按名查追邊氓力難完繳著加恩將送兵雇價銀三萬八千六百餘兩支過五日料草銀一萬一千九百餘兩一併准其報銷 是日

諭內閣甘省河東河西各屬上年偶被偏災業已加恩多方撫恤但念

該省地處邊隅民生素稱寒瘠現在時屆春初小民方勤東作至青黃不接之際例賑旣停閭閻未免拮据著再加恩將河東之皋蘭金縣靖遠會甯武威古浪平番永昌山丹碾伯鹽茶廳花馬池等十二廳州縣上年被災處所無論極次貧民災分輕重俱一體加賑三箇月仍准銀米兼賑其餘應行酌借口糧者並著照例查辦俾窮黎得以接濟用資力作至皋蘭省會之地以及平番古浪武威靖遠張掖肅州等屬糧價較貴而關外之安西五衛價值尤昂雖該督等現在減價平糶然照常例酌減恐仍不足以平市價著再加恩將粟米每石減糶銀二兩四錢小麥每石減糶銀二兩二錢庶貧民不致艱於買食該督撫等其董率屬員悉心查辦務使農民普霑實惠

二月丁丑

諭內閣甘省地處邊隅風土貧瘠兼之去冬未得透雪麥苗未能徧種

甘肅新通志

卷首之二

二十六

民力不無拮据前經降旨將上年被災各屬於青黃不接時一體加賑至本年五月但其時秋成未屆又逢閏月貧民餬口維艱深堪軫念著加恩再行加賑三箇月酌量銀穀兼賑以資接濟現在東作方興各屬內有不能及時耕種者俱應量借籽種牛具折價給予務俾農民早事南畝以冀有秋著該督吳達善詳悉查明奏聞借給副朕念切恫瘝至意 庚午

諭內閣甘省河東河西兩路衝驛及口外各驛並關內各塘馬夫併陝省延榆二府屬之葭榆神府懷定靖七州縣沿邊塘驛馬夫現在差務絡繹照例額支工食未免不敷食用著加恩於常例外每日賞給米一升以資養贍俟軍務告竣之日即行停止 三月己丑

諭軍機大臣等吳達善奏稱續調滿洲索倫等兵五百名並應需馬匹當即於甘涼肅等處餵養馬內挑選一千匹起解等語所奏與現在

辦理軍務情形均未得其肯綮從前節次解送之馬約計已及二萬匹陸續趕赴阿克蘇其所調征兵如達什達瓦及西安滿兵皆係勁旅足資應用至此次續調兵馬無論解到軍營必逾進剿之期即能如期解往而爲數無幾軍營得此不爲有餘少此亦未見不足究何裨益况甘省頻年辦理軍需收成復多歉薄此時正當令其耕種休息若當民力拮据之時復事增添購辦雖所用不致浩繁而民情倍爲累苦所謂強弩之末也昨經降旨加展賑期已至七月此時間閻生計若何正當加意體察據實具奏以慰朕西顧殷懷一切更宜加意拊循鎮靜辦理若黃廷桂在時熟諳事機更不作此措置所有兵丁馬匹已經調解者自毋庸置議該督務體朕意於權衡緩急輕重之間熟籌妥辦惟將現在馬匹加意飼餵勿徒牽合應付轉致民間滋擾可耳 四月辛亥

甘肅新通志

卷首之一

二十七

諭內閣安西瓜州屯民所種地畝本屬瘠薄年來雇運軍糧頗能急公襄事所有乾隆二十二年分應行交納借給牛具碾磨未完銀一萬七百三十餘兩著加恩悉予寬免其未完籽種口糧三千五百七十餘石并平分糧二千零八十餘石俱著緩至今歲秋後分作三年帶徵以紓民力 戊辰

諭內閣據吳達善奏報河東之河州渭源等十州縣夏田俱已種齊皋蘭金縣等六廳州縣佈種無多正需雨澤茲於四月初一二等日甘雨連縣皋蘭縣城鄉各入土三四寸金縣亦同時得雨各屬雖尙未報齊而雨勢甚廣夏秋均可趕種等語覽奏深爲額慶該處今年春雨稀少時廑朕懷現在幸沛甘霖正可乘時勸種以冀有秋著該督吳達善即速查明如有力不能置牛具者即行借給牛具缺乏籽種口糧者即行借給籽種口糧俾得及早耕作盡力南畝並派委賢員

多方勸導務使農夫咸知勤奮仰承膏澤以慰朕軫念邊民至意
賜悼甘肅安西提督豆斌

御製詩曰老將行閒名久標援師深入重嫖姚鋪敦早已占三捷矍鑠
不圖喪一朝杜牧悲曾譏點筆孟明壯詎肯迴橈最憐來歎臨終際
強起猶虞衆志搖 丙辰

諭軍機大臣等前據吳達善奏甘省河西之永昌古浪等處相繼以牛
瘟具報窮民無力添補降旨將巴爾品等所購牛隻分借農民以資
力作今據奏到現委員將牛隻經過牛少之處酌其地方之大小缺
牛之多寡隨處截留均勻分借其有領銀在先已經買補者自可毋
庸置議如領銀未買情願還者亦應仍與牛隻該督等務籌妥辦俾
小民均霑實惠至此項牛隻原係應解軍需之用因地方一時急需
是以通融截留借給窮民則牛隻一項接濟軍需最關緊要著傳諭

甘肅新通志

卷首之二

二十八

吳達善等令其嚴飭妥員沿途加意牧放乘此青草發生之時送至
軍營以收實用儻辦理不善以致疲瘦倒斃惟該督等是問 辛酉
諭內閣甘省上年被災各州縣疊經加恩撫恤展賑已至七月其河州
狄道環縣東樂等四處被災次重雖已照例領賑當此青黃不接之
際窮黎謀食維艱朕心深爲軫念著加恩一體展賑三箇月按月支
給俾小民餬口有資自可力勤耕作以待秋成 是日

諭軍機大臣等甘省望雨之處甚多朕心深切軫念所有祈求雨澤事
宜前已降旨令該督虔誠申禱此時更宜多方設法祈求並博訪能
祈雨澤之人齊心協力以冀感格或得甘霖普降有裨農田也

五月丙申

諭軍機大臣等據吳達善等奏甘省河東河西各屬春夏以來均未得
有透雨夏收恐致歉薄現在率屬祈禱並豫爲籌畫部署等語甘省

積歉之後全望夏禾有收今復雨澤不繼農田已有旱象尤深憂切前經降旨令該撫等虔誠祈禱並將刑獄清理以格

天庥此時亦惟有遵照前旨盡心辦理並留心訪覓諳習祈雨諸色人等設法祈禱凡有應行籌辦者豫爲部署一得透雨即將夏田及早翻犁亟爲改種晚秋以收地利總在該督撫等董率各屬留意民瘼實力善爲經理則修省祈禱之法莫逾於是至清理刑獄亦當斟酌得宜儻不肖之徒乘此飢法作奸則又當從嚴究治若一概寬釋轉非所以感嘉祥而冀膏澤也著將此傳諭楊應琚吳達善總以鎮靜體恤並行不悖爲要勉之 閏六月丁酉

諭內閣據吳達善奏稱甘肅所屬皋蘭三十六州縣衛五六月間雨澤愆期被旱情形輕重不一等語甘省地處邊陲連歲秋成歉薄去冬雨雪稀少今夏禾失收糧價昂貴閭閻必多拮据朕心深爲軫念該

甘肅新通志

卷首之二

二十九

督等應悉心體察民情勤加撫恤各屬內有趕種秋禾並借籽種晚秋現在乏食之戶即查明量借口糧銀兩以資接濟其被災較重節候已遲不能改種秋禾及止種一收成災之處不在現領加賑之內者接濟尤不可緩俱著該督等詳悉確查速行賑恤使窮黎不致失所至皋蘭金縣等處前因被災屢經降旨加恩展賑已至七月今該省現在尙未收穫所有加賑之期未便拘於常格至十月始行散給著即於八月內接續放賑俾得源源接濟朕加惠窮黎有加無已該督等其董率屬員實力奉行體朕優恤邊民至意 癸未

諭內閣甘省附近之連城紅城兩土司所屬地方上年被有偏災已加恩借給籽種今歲雨澤未能霑足夏收歉薄念邊外土民餬口未免拮据著再加恩借給口糧三箇月照例折給該撫吳達善即委幹員前往會同該土司等按戶散給俾霑實惠並著令於來歲麥熟後同

前借籽種分作三年交還以示體恤 八月壬辰

諭內閣甘省連年歉收倉貯尚未充裕明歲春耕一切籽種口糧皆須酌借向來原有折銀借給之例但念該處現在糧價稍昂若照每石折給銀一兩之數購買尙覺不敷著加恩自今冬明春各屬災地及勘不成災處所應借籽種口糧河西每石折借銀一兩四錢河東每石折借銀一兩三錢俾窮民耕作有資不致拮据用示體恤

十一月辛亥

御製平定回部告成太學碑文曰建非常之功者以舉非常之事舉非常之事者以藉非常之人然亦有不藉非常之人而舉非常之事終建非常之功者則賴

昊蒼篤貺神運幹旋事若禍而移福機似逆而轉順順

天者昌逆

甘肅新通志

卷首之一

三十

天者亡故犁準夷之庭掃回部之穴五年之間兩勦並集始遲疑猶未敢信終劫劬以底有成荷

天之寵在茲畏

天之鑒益在茲爰敘其事如左達民齊之就俘也伊犁已大定矣無何而阿睦爾撒納叛彼其志本欲藉我力以成己事時也人心未定佐饗者嘗一蠅肆狂萬狙應響蜂屯蟻雜不可爬梳畏難者羣謂不出所料準夷終不可取並有欲棄巴里坤爲退守謀然予計其衆志不齊將有歸正倒戈者於是督策將帥之臣整師亟進旣而伊犁諸台吉宰桑果悔過勤王思討逆賊以自贖此

天恩助順者一也二酋大小和卓木者以回部望族久爲準噶爾所拘於阿巴噶斯鄂拓者也我師旣定伊犁乃釋其囚以兵送大和卓木布拉呢敦歸葉爾羌俾統其舊屬而令小和卓木霍集占居於伊犁

撫其在伊犁衆回乃小和卓木助阿逆攻勤王之台吉宰桑等阿逆賴以苟延及我師再入阿逆遂逃入哈薩克而和集占亦收其餘衆竄歸舊穴此

天恩助順者二也準夷之事前紀略見梗概茲不復紀紀興師討回之由則以我將軍兆惠在伊犁時曾遣副都統阿敏道往回議事小和卓木乃以計誘阿敏道而拘之及我師抵庫車問罪彼攜阿敏道以來援至中途害之及從行者百人彼猶逞其狂悖抗我師顏且敢冒死入庫車城乃雅爾哈善略無紀律致彼出入自由然我滿洲索倫衆兵士無不念國家之恩効疆場之力故能以少勝衆逆渠懼而免脫此

天恩助順者三也知儋轅之無濟掄幹材之可任時將軍兆惠以搜剿準夷餘黨至布魯特部落已款服其衆因命旋師定回部於是克庫車存沙雅爾定阿克蘇略烏什收和闐師之所至降者望風直至葉爾羌城下而我軍人馬周行萬有餘里亦猶強弩之末矣二酋以其逸待之力統數萬人與我三千餘人戰我師之過河者纔四百餘猶能斬將搴旗退而築堡黑水固守以待此

天恩助順者四也萬里之外抱薪救火其何能濟乃予以去年六月即降旨派兵撥馬欲以更易久在行間者耳故兵馬率早在途一趨進而各爭前恐後人人有敵愾之憤此

天恩助順者五也副將軍富德及參贊舒赫德輩率師進援以速行戈壁中馬力復疲值狂回據險坐俟頗有難進之勢夫援軍不能進則固守以待者危矣而參贊阿里袞驅後隊之馬適至夜擣賊營我師內外夾攻彼不知我軍凡有幾萬握炭流湯之徒自相蹂躪顧命不暇於是解黑水之圍鹿駭麇驚遁而保窟我之兩軍合隊全旅以回

阿克蘇此

天恩助順者六也既而彼料我必再入泰山之壓難當乃於我師未進之先攜其部落載其重器跳而遠去而葉爾羌喀什噶爾二城之舊伯克等遂獻城以降參贊明瑞一邀之於霍斯庫魯克副將軍富德再陷之於阿勒楚爾於是離心者面內前途者返旆二酋惟挈其妻孥及舊僕僅三百人人拔達克山境此

天恩助順者七也人跡不通之地語言不同之國既已雀毆甯不狼顧其授我與否固未可定也然一聞將軍之檄莫不援旗請奮整旅前遮遂得兇渠函首露布遙傳此

天恩助順者八也夷考西師之役非予夙願之圖何則實以國家幅員不爲不廣屬國不爲不多惟廩守成之志無希開創之名兼以承平日久人習於逸既無非常之人安能舉非常之事而建非常之功哉

甘肅新通志

卷首之二

三十二

然而輾轉輻湊每以艱而獲易視若失而反得故自締始以逮定功雖予自問亦將有所不解其故而不敢期其必然者故曰非人力也天也夫

天如是顯佑國家者以

祖宗之敬

天愛民蒙

眷顧者深也則我後世子孫其何以心

上蒼之心志

列祖之志勉繼繩於有永保丕基於無窮乎繫以銘曰二酋僭德始亂爲賊是興王師報怨以直伊犁既平蕞爾奚屑徐議耕闢徐議戍設以噢以咻伊予本懷豈其弗戢圖彼藐回彼回不量怒臂當車戕我王臣助彼狂狙始攻庫車僨輶敗事用人弗當至今爲愧悖逆罪重

我武宜揚易將整師直壓彼疆阿蘇烏什玉隴和闐傳檄以定肉袒
羊牽二酋孽深知不可活狼狽相顧固守其穴桓桓我師周行萬里
馬不進焉強弩末矣以四百人戰萬餘虜退猶能守黑水築堡間信
達都爲之傷悼所幸後軍早行在道督勅速援人同怒心曾不兩月
賊境逼臨賊境逼臨彼復徼隙馬繼以進賊營夜斫出其不意賊乃
大驚謂白天降孰敢鋒撻大鞞大膊如虎搏兔案角隴種誰敢迴顧
黑水圍解合軍暫旋整旅三路期並進焉賊偵軍威信不可支挈其
妻孥遁投所依亦回豈不自謀豈伊庇猿而受林憂利厥輜重
無遺盡掠遣其都丸遂來獻馘詎惟獻馘並以稱臣捧齎表章將詣
都門奏凱班師前歌後舞尸逐染鏑前禺鬯鼓露布至都正逮初陽
慈甯稱慶亞歲迎祥

郊廟告成諸典並舉皇皇太學豐碑再樹豐碑再樹敢予喜功用不得

甘肅新通志

卷首之二

三十三

已

天眷屢蒙始之以武終之以文戡亂惟義撫衆惟仁布惠施恩寰寓共
喜古不羈縻今爲臣子疆闢一萬兵出五年據實書事永矢乾乾

癸亥

諭內閣甘省輓運軍糧及調運協濟糧石所需腳價前據大學士黃廷
桂奏明疊經降旨一體增給俟秋成後仍照舊例支發但該省本年
收成歉薄米糧價值尙未平減所有一切運腳著再加恩仍暫照從
前增給之數一體支放俾輓運貧民用度充裕以示體恤 甲子
諭內閣甘省折賑向例每石給銀一兩上年因該地方歲事歉收恐貧
黎買食不敷已降旨河東每石加銀四錢今皋蘭等各屬被災地方
糧價尙未平減朕心深爲軫念著再加恩將皋蘭靖遠金縣平番固
原鹽茶廳環縣古浪安定會甯新甯隆德靈州花馬池中衛狄道河

州碾伯各廳州縣賑糧折價俱於前加每石三錢四錢外河西河東每石再各加給銀三錢俾窮黎足敷買食以示惠養邊民至意

戊辰

諭內閣甘省今歲收成稍歉糧草價值較昂滿漢各營改支折色若照向例折給購買未免不敷所有明歲官兵改折糧料草束及採買滿營糧草價值者加恩照二十三年之例一體加增其河州鎮標臨洮鞏昌二營及陝省延榆地方並固原一帶協路各營隸於甘省者均屬災歉之區著將明歲各營應關折色亦一例增給以示體恤

二十五年

命圖甘肅安西提督豆斌像於 紫光閣

御製贊曰宿將行閒久矣宣力所董綠旗遵其律則隊中獨喪是有命焉裏創慰衆益塵哀憐 正月戊申

甘肅新通志

卷首之二

三十四

諭內閣甘省自軍興以來連年疊次施恩豁免正雜錢糧及一切展賑緩徵酌增運腳所有正賦已蠲至二十五年俾邊民溥霑渥澤現在大軍凱旋軍務全竣正宜與民休息且上年歲收未能豐稔朕心尤深軫念著再加恩將甘省乾隆二十六年應徵地丁錢糧通行豁免俾得共安耕鑿永承樂利之休以示朕優恤邊黎有加無已至意 是曰

諭內閣甘省上年夏田秋禾均被偏災其較重之皋蘭等十廳州縣及次重之靜甯等八州縣已降旨分別加恩展賑其災輕之渭源等十七廳縣亦經照例蠲緩賑恤並於春初借糶兼行以資接濟惟念勘不成災處所夏田被旱改種秋禾小民已費工本未免拮据著再加恩將所有春借籽種牛價緩至麥熟後徵還仍於青黃不接之時酌借籽種口糧俾得盡力耕作至該省被災等處尚有無業貧民艱於

覓食者並著飭令地方官或設廠煮賑或開工傭作俾資餬口以示體恤 已酉

諭內閣甘肅蘭涼平慶一帶上年偶被偏災已加恩一體賑恤但念邊氓生計拮据春耕在即而例賑將停恐不足資接濟著再加恩無論被災分數極次貧民將皋蘭金縣平番古浪會甯安定固原靖遠環縣鹽茶等十廳州縣於正賑之外再加展賑至麥熟後停止靜甯隆德狄道三州縣再加展賑四箇月靈州花馬池中衛河州碾伯五廳州縣再加展賑三箇月俾小民得以餬口力耕副朕念切痾瘵至意

二月庚辰

諭軍機大臣等閩相師奏甘肅各鎮備戰馬匹及兵丁營馬因陸續撥解軍營率多缺乏購覓維艱請將哈薩克馬匹買補足額等語西陲大功告竣內地營馬將來無須調撥而伊犁闢展一帶現議駐兵屯

甘肅新通志

卷首之二

三十五

田皆需馬匹是以經畫市易務令有餘其甘肅各營額缺原可徐爲補足不必汲汲於此今閩相師所奏或因哈薩克屢來貿易遂爲籌補營馬起見抑或該督撫等催令各營補額未爲官兵熟計不知內地馬匹原以儲備調撥今新疆即不需接濟與其收槽充數又不若立廠孳生若急於購補馬價昂貴兵丁必多賠累即足額後終年飼秣徒耗芻豆何如即水草以善牧養於公私均有裨益著傳諭楊應琚吳達善據現在情形妥議速奏 六月乙亥

諭內閣甘省乾隆二十三四年耗羨業經降旨緩徵其二十五六年應徵耗羨該撫吳達善奏請帶徵朕念隨徵耗羨向遇蠲免正供例不應停緩但甘肅自辦軍務以來小民急公趨事誠樸可嘉業已疊次加恩凡屬緩帶及一切正雜錢糧無不破格豁免以示撫綏今軍需告竣幸遇雨暘應時秋收可望正宜益加惠養俾蒙樂利鴻庥

著將該省二十五六兩年應徵耗羨概行豁免用彰優恤編氓格外
加恩之至意 九月己酉

諭軍機大臣等據鐘音奏陝省沿邊各站額外增添馬一千八十匹除
已撤五百八十四匹外其尚存五百匹應盡行裁撤仍照原價每匹八
兩變價歸款等語此項額外增添臺馬從前雖經軍機大臣議令裁
撤但目下陝甘二省馬價尚在昂貴之時若照原價變賣將來儻有
需購買之處轉不免周章且現今烏嚕木齊等屯田處所亦皆需馬
是以甘省此項添增臺馬及孳生馬匹皆令其解赴巴里坤等處馬
廠牧放今陝省應撤臺馬事同一例亦若照甘省之例辦理在陝省
既免變賣之煩而出口牧放屯田處所可就近撥用亦甚爲有益著
傳諭該撫令其遴委幹員妥辦解赴勿致疲瘦若業經變價歸款即
不必月行辦理 十二月丙戌

甘肅新通志

卷首之二

三十六

諭內閣前因平定西陲版圖式廓朕本意欲於伊犁葉爾羌等處皆置
屯田令地方官管理因念陝甘總督所轄既廣勢難兼顧是以准議
將陝甘總督改爲甘肅總督而陝西一省歸於川督管轄然軍需之
際恐隔省呼應不靈是以雖定有此制仍令照舊統轄俟軍需辦完
再降旨如新制今思新闢各處俱有大臣駐劄無須更設道員則甘
督無鞭長莫及之慮莫若仍照舊管轄著將甘肅總督仍爲陝甘總
督統轄二省其四川總督不必兼管陝西

二十六年辛巳正月壬寅

諭內閣甘省連歲承辦軍需兵民俱爲出力其民間應徵錢糧已節年
蠲免而昨歲雨暘時若穡事大豐閭閻諒紓拮据惟是滿漢各營歷
年餽解馬匹尚有豫借銀兩雖屢次加恩豁免至八十餘萬今猶有
九十餘萬之多本應於各該營俸餉內扣還第念兵弁等日用攸資

按限坐扣必致艱窘茲大功旣蒞惠愷宜宣所有豫借銀兩著再加恩悉予豁免用示朕體恤兵力至意 二十八年癸未七月戊辰諭內閣據留保住奏青海地方西南界連川藏沿邊與內地合州沙州接壤凡民人唐古忒交涉命盜及玉舒番子扎薩克等支領俸餉承襲官職並徵收巴彥囊產等部落馬匹賦稅辦理藏使行糧等項非給與印信恐致滋弊貽誤應請頒給西甯辦事章京關防等語前因西甯無事不必專駐大臣是以將副都統撤回止留部院章京一員帶領筆帖式一員在彼辦理事務今因大臣撤回地方官員即有妄行給票舞弊情事看來必須仍設大員諸事方有裨益七十五著賞給副都統銜前往辦事該處現在乏人七十五不必來熱河請訓即於京師領帶撤回原印馳驛前往所有該處一切事件俱著照舊辦理 二十九年甲申正月甲寅

甘肅新通志

卷首之一

三十七

諭內閣甘肅皋蘭等屬上年夏秋俱有偏災較重之處雖經該督撫等照例撫賑災黎自可不致失所第念該省土瘠民貧生計維艱時屆春和若使糴殮不繼何以課其盡力田疇著再加恩將夏秋兩次被災之永昌西甯碾伯三縣無論極次貧民俱各展賑兩箇月其夏禾被旱之皋蘭縣並所屬之紅水張掖縣所屬之東樂以及撫彝廳山丹莊浪廳武威鎮番古浪平番中衛秋禾被災之狄道河州靖遠平涼華亭固原隆德鹽茶廳擺羊戎廳等十九廳州縣無論極次貧民俱各展賑一箇月以資接濟該督撫等董率屬員妥協經理務俾災黎均霑實惠副朕愛育黎元至意 一月壬辰

諭軍機大臣等據明瑞等奏現在涼州莊浪熱河移駐兵丁需用口糧除所存餘糧及本年秋收雖可多得二三萬石僅足補數年不敷之數未可遽以爲羨餘請於此二年內挈眷兵未曾全到之時於各回

城再派回人二千名赴伊犁屯田等語著照所請即行知各回城駐劄大臣酌量派往惟擇其情願赴屯者不必勉強至從前所派回人該伯克等捐助資送此次所派俱著官辦起程毋庸協助併傳諭明瑞等知之 四月甲午

諭內閣甘肅皋蘭等屬上年偶被偏災業經降旨展賑復念該處貧黎或尚有應行加恩之處並諭令該督楊應琚查明奏聞近又降旨令將續報成災之金縣等處一例加賑矣今據楊應琚奏到該省冬秋雨雪霑足俱已借給籽種口糧翻犁播種惟涼州府屬之武威縣上年被災較重山丹縣稍次等語該二縣前此雖在展賑之內足資接濟但念其地較寒瘠麥收尚遠民間口食未能充裕著加恩將武威縣再行展賑兩箇月山丹縣再行展賑一箇月該督董飭所屬實心經理務俾小民均霑實惠 乙酉

甘肅新通志

卷首之二

三十八

諭內閣甘肅省續據題報翻種秋禾復被偏災之金縣沙泥州判環縣靈州花馬池等處雖經該撫照例賑恤恐民力尚不無拮据並著加恩照皋蘭縣等十九州縣之例加賑一箇月該督撫等其各飭屬實心經理務俾小民均霑實惠 八月辛巳

諭軍機大臣等楊應琚奏甘肅皋蘭等三十二州縣廳均有被災之處已降旨查勘賑恤並加恩捐免額賦厚示撫綏因念該處現在收成歉薄緣邊瘠土之民生計未免拮据年來新疆屯政屢豐如烏魯木齊等處糧儲甚爲饒裕且其地泉甘土沃並無旱潦之虞如令該省接壤居民量其道里近便遷移新屯各處則內地資生旣廣而邊陲曠土愈開實爲一舉兩得著傳諭楊應琚令其悉心體察隨民情所願設法開導善爲經理仍一面熟籌詳議奏聞 是日

諭內閣甘肅鞏昌等府屬前此雨水未足時廩朕懷今據楊應琚奏到

六月中連次得雨夏禾仍屬有秋秋禾亦可及時趕種惟皋蘭等州縣廳屬不及補種秋禾應查勘辦理等語該處緣邊土瘠夏秋雨澤未徧歲事歉收朕心深爲軫念該督其速飭所屬悉心察看按例實力撫綏無使災黎稍有失所因思西陲辦理軍務時歲歲加恩蠲除正賦今大功告竣已歷數載甘民未受恩惠本年秋成旣未能一律收穫民力未免拮据著特加恩將被旱較重之皋蘭金縣渭源靖遠紅水縣丞沙泥州判隴西通渭會甯鹽茶廳山丹東樂縣丞等十二州縣廳並被旱稍輕之河州狄道漳縣安定平涼固原靜甯隆德莊浪張掖武威鎮番平番古浪永昌西甯碾伯花馬池州同等十八州縣廳及靈州中衛縣屬之被災旱地所有本年應徵地丁錢糧概予蠲免該督其董率有司妥協辦理毋致胥吏人等中飽侵漁副朕加惠元元之至意 三十年乙酉正月戊申

甘肅新通志

卷首之一

三十九

諭內閣去歲甘省夏秋偶被偏災各州縣業經降旨令該督等加意撫綏照例給賑並蠲免本年額賦以示優恤但念該處地土瘠薄當此青黃不接之時例賑將停麥秋未逮小民口食恐尙不免拮据著加恩將災重之皋蘭金縣渭源靖遠紅水縣丞沙泥州判鹽茶廳山丹東樂縣丞平涼隴西通渭會甯安定等十四廳縣無論極次貧民概行展賑兩箇月稍重之漳縣固原張掖武威鎮番平番古浪永昌西甯中衛靜甯隆德莊浪靈州花馬池州同等十五廳州縣無論極次貧民概行展賑一箇月該督其董率屬員實心查辦毋令胥吏侵蝕中飽務俾貧民均霑實惠以副朕軫念邊氓之至意 八月乙丑諭內閣據楊應琚奏省城皋蘭縣於七月十八日地覺微動少頃即止並無傷損其鞏昌府屬之隴西安定會甯通渭漳縣甯遠伏羌西和岷州直隸秦州并所屬之清水禮縣等十二州縣亦於是日地動內

有損壞舊城倉署民房并閒有壓斃人口牲畜者而甯遠伏羌通渭等三縣較他處稍重現在親往查勘分別撫恤等語甘省遠處西陲地瘠民貧茲以地動壓損房屋人口朕心深爲軫惻現在該督親往查勘撫恤著加恩照乾隆三年賑恤甯夏成例查明被災情形分別優恤其災重地方并著將本年應徵錢糧一體蠲免該督其董率所屬實力奉行毋任胥吏侵漁中飽俾閭閻均霑實惠以副朕矜念災黎至意 三十一年丙戌正月癸酉

諭內閣前因甘肅河東河西各屬有秋禾偏旱及閒被雹水風霜之處業經照例賑恤但念偏災處所蓋藏未必充裕特令該督再行悉心查勘具奏今據查明奏到所有被災較重稍重之各州縣於例賑完畢之後正值青黃不接之時民力不無拮据著加恩將被災較重之靖遠紅水縣丞安定會甯通渭甯遠伏羌鎮原平涼安化等縣靜甯甘肅新通志

卷首之二

四十

州涇州甯州等十三處無論極次貧民俱展賑兩箇月被災稍重之皋蘭金縣隴西漳縣華亭莊浪固原州鹽茶廳隆德靈臺合水武威鎮番平番中衛等十五處無論極次貧民俱展賑一箇月以副朕優恤邊民至意 三十五年庚寅八月辛卯

諭內閣今年正月降旨將各直省應徵錢糧通行蠲免一次經部議甘肅省應於明年輪免第該省所徵地丁少而糧草多著照乾隆十年蠲免之例將甘肅臨邊各屬辛卯年應徵番糧草束均格外加恩一體蠲免其河東河西額徵屯糧草束亦著蠲免三分之一俾得均霑愷澤 三十六年辛卯正月戊辰

諭軍機大臣據楊景素奏甘省自乾隆二十三年至三十五年民借籽種口糧牛本等項除徵還外尙未完京倉斗糧四百四萬餘石折色銀一百三十二萬餘兩等語此等應還官項爲時甫及十餘年積欠

已至數百餘萬之多固由該處地瘠民貧所致亦因前此辦理軍需時遞年疊行蠲貸民間習以爲常及大功告成軍需停辦自不能如向來之格外邀恩而愚氓不知饜足奢望常懷轉將本分應完借欠輸納不前以此日累月多勢將何所底止是舊逋固不可不及時清釐致令積疲不振惟是邊陲生計艱難尤當急爲籌畫以裕長久庶幾瘠薄之區得有起色因思新疆底定以來緣邊一帶如安西闢展烏魯木齊等處地方膏沃屯政日豐原議招募內地民人前往耕種既可以實邊儲並令腹地無業貧民得資生養繁息實爲一舉兩得況邇來邊外商民輻輳風景不殊內地所有舊日瑪哈沁等並已搜捕淨盡所至皆成樂土更復何所畏避乃願遷之戶雖官爲資送而爲數仍屬無多總緣民人等於新疆饒裕情形未能知之甚悉遂爾意存觀望耳不知小民於利之所在果灼見其安便易圖自無不爭

先往赴即如熱河及張家口外各處凡有可耕之地山東等省民人俱不遠數千里襁負相屬以爲自求口食之計何嘗官爲招集耶況甘省密邇新疆較之山東出口路程更爲近便若能詳爲勸諭俾知沃壤可耕資生甚易足以自圖甯宇諒皆趨之若鶩久而相安成習必且邀朋攜侶熙攘往來各自適其謀生之樂並無庸似舊時之官與經營俟將來關外生聚滋繁兼可酌添郡縣而此等待食之民向外多移一人即少耗內地一日之粟可使蓋藏漸裕化瘠爲腴其裨益更非淺鮮此皆明山所當時常留心者而總未見其奏及著將如何設法勸導令民人踴躍樂從之處即行詳晰妥議具奏並將現有欠項作何逐漸徵完或另籌調劑之道一併定議奏聞 三月庚申諭內閣據明山奏甘省歷年民借籽種牛本等項銀糧積欠甚多請分別六年四年帶徵等語該省邊陲地瘠民乏蓋藏從前因辦理軍需

歲予蠲貸閭閻幾不知有輸將自大功告成以後無從格外施恩而常時所借籽種等項例應按年償納乃比歲疊被偏災收成歉薄致舊欠日積日多在小民固屬分所應完即帶徵己爲體恤第念該各州縣民間借欠究屬因災若令其新舊並完貧民未免拮据著加恩將甘省各廳州縣所有節年未完民借籽種口糧等項倉糧四百四萬餘石概行豁免俾邊氓得免追呼其未完銀一百三十二萬餘兩無論被災輕重統予分作六年帶徵完納以紓民力該督其董率所屬實力辦理使窮簷日臻康阜生計有資副朕加惠邊黎至意

六月辛巳

諭內閣甘肅上年收成歉薄今春雨澤又復稀少恐不能及時播種民食未免拮据節經傳諭該督籌辦借糴以資接濟並令將該省現在情形據實奏聞候朕酌量加恩今據署總督文綬奏稱甘省州縣有

甘肅新通志

卷首之二

四十二

於四月中得雨已足業經補種秋禾者尚可望有收成其得雨較遲之處晚禾不能復種現需籌辦等語甘肅土瘠而寒早歲止一收其曾經及時趕種者尚可冀秋成有獲若夏秋俱未及種小民終年待哺口食維艱朕心深爲軫念著加恩將甘省現被夏災不能趕種秋田之各州縣廳屬即照秋災之例查明加意賑恤分別蠲緩俾貧民不致稍有失所吳達善到任後並宜董率所屬實力經理務俾閭閻均霑實惠生計有資副朕軫念邊氓至意 甲申

諭內閣各直省普蠲錢糧向當輪免之年適遇災歉即不復再議重蠲此固恩無屢邀之理第念甘肅省地瘠民貧兼以連歲歉收與他省情形迥異而各州縣得雨較遲處所因地氣早寒不能補種現已降旨令該督查明照秋災之例賑恤撫綏務俾得所但本年正屆該省輪免之年所有成災州縣按分數議蠲之項已概其中朕念切民瘼

茲特加恩將該省本年錢糧普行蠲免外其因災議蠲之各州縣著展至明年補行按分酌免該督其董率各屬悉心經理使窮簷得倍霑實惠以副朕軫念邊氓有加無已至意

三十七年壬辰正月戊戌

諭內閣甘肅省當積歉之餘上年春夏短雨河東河西各屬成災輕重不同業經分別加恩撫恤曾降旨撥帑運糧多方賑贍前據該督查奏被災次重及少輕之處今春酌借口糧均已足資接濟第念河東屬之安定會甯皋蘭金縣靜甯隆德等六州縣地止一熟值頻年歉收之後去歲未能補種秋禾專待夏田餬口當此青黃不接之時農民不免待哺著加恩將此六州縣再行加賑一月該督等其董率各屬善爲經理務俾貧民均霑實惠 二十八年癸巳正月癸巳

諭內閣每歲新正豫查各省有因災予賑地方俱降旨加恩展賑以示

甘肅新通志

卷首之二

四十三

體恤昨歲各直省俱年穀順成秋田普獲豐稔且報收十分者居多即甘肅省據報偏災數處而通計收成亦在七分以上原毋庸再沛恩膏第念邊陲地瘠民貧非沃壤殷饒者可比雖成災僅屬一隅恐民力究未免拮据特令該督確查如有應行加恩之處詳悉覆奏茲據奏到偏災各廳州縣業經照例賑恤窮黎已成登衽席若於春初酌借籽種口糧更足資接濟惟河東之皋蘭暨所屬之紅水縣丞靖遠乎涼涇州等五處被災情形較重入春青黃不繼之際不無待澤等語所有皋蘭等五州縣俱著加恩展賑一箇月其有應酌借籽種口糧者仍著查明妥辦該督其董率所屬實心經理毋任胥吏侵漁中飽俾閭閻均霑實惠以副始和布令優恤邊氓至意

四十年乙未正月辛亥

諭內閣昨歲甘肅夏秋二禾據報通省收成統計八分有餘尙屬豐稔

惟皋蘭武威等七州縣夏禾閒有偏災而皋蘭金縣等五處秋禾復被霜雹均經先後分別照例賑恤災黎自可不致失所第念該省土瘠民貧其被災之夏秋二禾收成未免歉薄閭閻不無拮据著加恩將皋蘭武威二縣夏禾被災較重之處於青黃不接時再展賑一箇月其被災較輕之靈州甯朔平羅鎮番沙泥州判等五處如有缺乏籽種口糧並著該督隨時體察照例酌借以資接濟又皋蘭金縣等五處秋禾亦被偏災除皋蘭一縣已於夏災案内展賑外所有金縣西甯平番肅州四州縣屬並著展賑一箇月以示朕軫恤邊氓至意

是日

諭內閣甘肅僻近西陲民貧土瘠一遇水旱偏災即降旨蠲賑緩帶殆無虛歲比年各屬收成尚稱豐稔所有該省自乾隆二十三年至三十五年民借籽種口糧牛本等項積欠甚多前念邊地民食維艱特

將積欠糧四百餘萬石全行豁免其折色銀一百三十二萬餘兩分作六年帶徵以紓民力乃自三十五六七八等年僅完銀二十八萬六千餘兩仍未完銀一百四萬餘兩地方官以定有年限之項照例按數催徵第念該省每年均有應徵地丁籽種口糧等項若同時新舊並徵民力恐不無艱窘自應再加區別展帶用昭體恤所有河州等二十五處歷年雖閒有災傷不過一隅收成尚稔其未完銀十三萬六千八百餘兩仍依原限帶徵外其甯遠十二處雖有偏災尙不致荒歉其未完銀十八萬四千六百餘兩於原限之外再展限二年至皋蘭等十二處歷年被災稍重民力更覺拮据其未完銀七十一萬九千餘兩於原限之外再展限四年俾得從容完納該督務將應徵應緩之處出示曉諭令小民共知朕格外加恩之至意

四十一年丙申正月甲戌

諭內閣上年甘肅省夏秋二禾統計收成七分有餘惟皋蘭等三縣一廳州縣夏禾間有被旱被雹之處皆屬一隅偏災業已蠲賑兼施俾無失所內惟皋蘭金縣渭源平番中衛靈州肅州七州縣並皋蘭分駐之紅水縣丞所屬或情形較重或值積歉之後民食未免拮据著加恩於青黃不接之時各展賑一箇月又續報秋禾偏被霜雹之隴西等十一州縣亦經照例賑恤內涇州平涼二處被災稍重並著一體展賑一箇月用敷春澤其餘秋夏被災較輕之河州隴西等處今春如有缺乏籽種口糧之戶並著該督隨時體察酌借以資接濟該省係瘠薄之區災黎尤堪廛念勒爾謹務董率所屬實心妥爲料理俾得均霑實惠以副朕軫恤邊氓之至意 四月己巳

御製平定兩金川告成太學碑文曰太上立德其次立功又其次爲立言而德與功皆賴言以傳言之無文行而不遠文之時義大矣哉然

甘肅新通志

卷首之二

四十五

傳德之辭直而寡傳功之辭費而多直而寡者不因文而德自見二典三謨經世立教是也費而多者必因文而功乃明周誥殷盤佶屈聱牙是也吾嘗讀韓昌黎平淮西碑益悉此言之不爽何則彼其藩鎮乃家奴之類愆愆因循以致宛成敵國削而平之是宜引以爲愧而不可炫以爲功賴昌黎之文幾與江漢常武同稱耆定然有識者固知其辭費而多飾而未知憲宗之愧與弗愧耳今之平定金川之文不有類於斯乎解之者曰逆酋羈縻徼外非若淮蔡之居中土元濟之爲世臣也吾則以爲旣已受職爲土司則是我臣而其地近接成都遠連衛藏則是我土我土我臣而橫生逆志蠶食鄰封將欲大有所爲弗勦而滅之西川將不能安枕茲雖蕝事與平定淮蔡擒吳元濟何以異故宜引以爲愧而不可炫以爲功者以此金川之始見於己巳告功之文茲不複記記其復叛而復征則其陰謀負恩已自

戊寅年始蓋戊辰之師實緣其跳梁不靖而師旣臨境彼即窮蹙乞降遂以赦罪班師甫十年而其酋郎卡即與革布什咱構釁又四年遂與綽斯甲布及三雜谷爲敵而逆子索諾木兇悖益甚自恃地廣人衆力與各土司構兵訖無甯歲故各土司皆畏之如虎而以勢分力散又莫能如之何余以爲業已受其降不宜復加兵且蟻鬪蠻觸不足以勞王師因命地方文武大吏隨宜彈壓弗令越內地界亦足以安民而示度耳不虞地方大吏欲息事而每示寬逆酋轉以爲無足懼而日益逞其小金川逆酋僧格桑者始則與索諾木水火相仇繼乃狼狽爲奸於是索諾木計殺革布什咱土司色楞敦多取其印敕以歸而僧格桑亦侵佔鄂克什地界且發兵圍其土司色達拉之官寨期於必取總督阿爾泰提督董天弼知事不可掩乃有發兵之請是役也或咎阿爾泰依違誤事之過而予則以爲阿爾泰之過皆

予之過蓋金川因其地險衆悍久蓄異志是以有殺至維州橋之謠則其不忘內地情率可知戊辰之役我師采入屢勝即不宜赦其罪而受其降此一誤也甫十年而郎卡背恩作亂以及逆子踵其蹟皆不即發兵問罪惟令地方大吏隨宜處置又屢誤也以至尾大不掉終於興師故予不咎人之議爲窮兵黷武而轉咎已之類於姑息養奸蓋中國之制外域張撻伐則彼畏而斂跡主和好則彼輕而生心漢唐宋明之覆轍率可鑒也若謂予窮兵黷武則予賴

天恩平伊犁定回部拓疆二萬餘里豈其尙不知足而欲滅蕞爾之金川以爲揚赫濯紀勳烈之圖哉雖然平伊犁定回部其事大矣然費帑不及三千萬成功不過五年茲兩金川小寇地不逾五百里人不滿三萬衆而費帑至七千萬成功亦遲至五年則以跬步皆險番奴效命死守故得延至今日而我將軍阿桂立志堅定決機明敏兩副

將軍及參贊領隊諸臣同心合力各軍士敵愾奮勇凡經大小數百餘戰而後成功視平伊犁定回部費力轉不啻倍蓰設非

天恩助順衆志成城則金川未易言滅而國威或致少損矣是不可以不記觀斯文者尙諒予懷慙悔過之不暇知非稱功詡德而爲言其庶幾乎繫之以辭用誌始末云爾小金首禍曰僧格桑兵救鄂什竟抗顏行督臣提臣每事遷就知弗勝任將軍別授攻破巴朗直取達圍進抵資哩數月克之兩路夾擊遂得美諾鼠竄狼奔金川助惡旣平償拉遂討促浸雪多境險奏功以沈奏功以沈賊更遮郗綠營怯懦遇戰辟易兵旣無能將復失算豈如南路全師而返重調勁旅吉林索倫健銳火器其心忠純仍分兩路堂堂正正不旬日間美諾重定谷噶旣入馬尼並克豢養旗兵允得其力釃三路進一阻宜喜及彼絨布遇險而止阿桂西路則屢建功羅博湖普逮遜克宗喇穆山

梁日則丫口舉默格爾以擾其後明亮宜喜亦據嶺梁而復難進徒然望洋逮昨乙未略康薩爾木思工噶賊碉並毀明亮河西亦有所據日旁以前五十里路夾河兩軍聲息可通並清後路遜克爾宗菑則大海昆色拉枯層層破要步步披嶇遂克勒圍紅旗飛遞而何四月大捷未至旣克西里乃若建瓴科布索隆不日而傾雍中舍齊易如拉朽密圍噶依賊其奚走是時河南明亮亦入富德馬邦傳檄芥拾設非西路圍噶喇依則其兩路亦無進期諸軍旣合火攻周遭雖據三穴訖其奚逃然猶死守四十餘日計窮力竭乞命而出金川之功阿桂居首特恩異數加之宜厚能出能有權有經運長繫短後實先聲金川之功允資羣力寸步層峯冰滑石仄將軍指揮無不奮勇以此破敵鹿埵隴種金川之功非予所期事弗可已久而得之鬪猶獸困捨懲鷄肋念我衆勞至今心惻金川之功允賴

上蒼靖彼蕃徼我武惟揚勒碑太學用遵成例靜言思之文以誌愧御製平定金川勒銘勒烏圍碑文曰美諾旣克移問促浸狼狽爲奸而更謀深劫木果木其恨至今將土何辜弗雪冤沈兵威大振勁旅繼至師分兩路谷噶馬尼上下同心據忠敵愾西路遂進南路略泥丫口深入爰克羅博喇穆喇穆併占默格獲康薩爾木思工噶遜克爾宗其險難託凡此數處林立堅碉層次攻勦我師實勞據昆色爾乃近賊巢北軍亦至隔河匪遙曰勒烏圍賊舊官寨垣固碉高力守要害經樓輔車陡礮劃界木卡石城蠶簇鱗繪拏柵周遭援路截其洩水拽橋囊土濟師穴道旁出轟以地雷凡此百計用盡無遺四面礮攻碉摧垣裂遂督大軍斫牆衝閬遊魂弗支奔迸蹙躡功成一夕中秋八月衆軍之力一師之謀靖彼賊穴安我蜀陬肫乎厥忠卓乎厥猷銘誌鴻功永示千秋 六月壬子

甘肅新通志

卷首之二

四十八

諭軍機大臣等昨據勒爾謹奏途次接奉諭旨知甘省各屬被旱情形隨即兼程馳回甘肅率屬實力查辦茲復據王亶望奏皋蘭等二十九州縣禾苗被旱業已成災五月二十三至二十八九等日各處有得雨五六寸至深透者雖夏禾不及接濟於秋田大有裨益等語已於摺內批示一切妥爲之以救窮黎矣勒爾謹回任自必督同王亶望飭屬確勘妥辦但竭伊等心力不過就災辦災恃有國家帑項董率地方官詳慎勘查實心賑恤嚴禁吏胥等扣剋侵肥使災黎得以均霑實惠此雖足卸牧民之責何嘗通盤籌畫計及久遠之計哉如甘省捐監收糧貯倉原以備賑贍糶供之用其法仍不離乎豐斂而歉散現在被災之處夏禾旣已無望其糶價自必加昂若再令買穀交倉則市中糧食價必更漲閭閻日糴餬口倍覺艱難自應將此成災之二十九州縣廳暫停捐監多留市米以供民食其餘不被災

各屬糧充價平之地又當多爲收捐運至辦災處所以資接濟此亦酌劑盈虛轉移利便之一法不知勒爾謹等現係如此籌辦否至甘省地瘠民貧災歉幾無虛歲惟將賑濟賙給賴以生全年復一年究非長策在朕念切惻痲惟恐一夫失所原不惜歲費帑金而爲地方大吏者目擊民艱豈可不早爲悉心規畫必待其旣荒始藉賑恤以爲救濟乎即如烏嚕木齊一帶地皆沃壤可耕之土甚多貧民果能往彼墾藝不但可免於饑窘并可贍及身家此乃天地自然之美利供民取攜昔爲外夷地固不可行今幸入我版圖近在邊地百姓自當成就樂土共享豐饒是以屢諭該督等善爲勸導俾其羣往謀生自求樂利而歷任督臣總未有辦及者大率以爲人情安土重遷難以勉強此固愚氓之昧於自計亦由大吏之心存畏難若云小民憚於遠涉則山東之距塔子溝等處較之甘肅至烏嚕木齊其道里約

略相仿何以每歲山東出口之人扶老挈幼不可數計雖禁之亦不能止而甘肅之人獨不聞有赴新疆之事甚且勸之仍裹足不前乎蓋百姓可與樂成難與圖始如知有利可圖自皆趨之若鶩直隸各口外即其明驗甘肅督藩等何獨不能設法勸民俾之聞風鼓舞而徒聽其終歲嗷嗷待哺乎從前招來之民出邊曾有辦過之案督臣等每因資送需費不肯多辦此在常時則然若當被災之餘撫恤賑濟每戶原不無所費設以十年而計每年每戶約須賑恤若干若合五年之費爲資送之需亦當足用雖現在所費較多而算至十年則已省其半且此時多送一人往邊外耕作將來邊內即少一待賑之人如是遠籌其省不知凡幾在國家爲一勞永逸之計在閭閻爲去苦就樂之圖而出邊戶口日多家計日益饒裕邊鄙窮黎自皆聞風趨赴並可不再煩官爲勸諭一舉而兼數善該督等又何所畏而不

爲乎著傳諭勒爾謹王宣望即照此旨實心熟籌善體朕意妥爲經理毋負朕諄切委任之意仍將作何酌定妥辦之處迅速詳悉覆奏

七月庚寅

諭軍機大臣等前因甘省皋蘭縣等屬秋禾被旱節經諭令該督等上緊查勘撫恤並將各處曾否續得雨澤據實奏覆今據勒爾謹奏稱七月初四日省城及鞏昌平涼涼州秦州階州等六府州屬俱陸續稟報得雨二三四五寸至深透不等確查各屬凡平川窪地稍可薄收者現在尙敷餬口其夏禾無濟可以播種晚秋者借給籽種等語所辦恐屬無益得雨已屆七月初旬即亟亟補種六十日成熟之晚禾亦須再遲兩月方能收穫彼時已屆九月初旬邊地氣寒霜早豈能結實收成所云借籽補種仍屬有名無實看來該省今年已成旱災各處惟當加意撫恤轉不必稍存諱飾之見著傳諭勒爾謹即速

甘肅新通志

卷首之一

五十

董率各屬實力妥爲撫綏賑恤務使邊地災黎均霑實惠毋致一夫失所 四十二年丁酉正月己巳

諭內閣甘肅地處邊陲土瘠民貧一遇水旱偏災即降旨蠲賑緩帶殆無虛歲民間節年所借籽種口糧等項積欠甚多曾於乾隆三十六年降旨加恩將舊欠倉糧四百餘萬石概行豁免其舊欠各項銀兩一百三十餘萬分作六年帶徵以紓民力嗣因該省歷年均有偏災復經節次加恩分別展限徵收俾得從容輸納近年以來僅完銀四十八萬餘兩仍未完銀八十四萬餘兩地方官以欠項定有年限自應按數催徵第念該省係積歉之區上年夏禾又被旱災民力實多疲乏況每年均有應徵地丁籽種等項若同時新舊並徵輸將不無拮据朕心深爲軫念乘春布澤用沛恩膏著加恩將該省自乾隆二十三年至三十五年民借折色未完銀八十四萬餘兩概予豁免俾

荒瘠邊黎得免追呼共享昇平之福 是日

諭內閣昨歲甘肅省夏秋二禾統計收成七分有餘惟皋蘭等二十九廳州縣夏禾被旱又有被霜被雹之處在通省雖僅一隅而成災究覺稍重屢經降旨令該督切實查勘妥協賑恤貧民自可不致失所第念今春正賑已畢尙屆青黃不接之時民食未免拮据著加恩將皋蘭金縣安定會甯鹽茶廳武威平番肅州八處各展賑一箇月又續報秋禾被災較重之鎮番中衛二縣並著一體展賑一箇月用敷春澤其餘被災較輕之河州等二十一處今春如有缺乏籽種口糧之戶並著該督隨時體察酌借以資接濟該省係積歉之區災黎九堪廛念勒爾謹務董率所屬實心妥爲料理俾得均霑實惠以副朕軫念邊氓之至意 乙亥

諭內閣上年甘肅省皋蘭等三十七州縣夏秋二禾均被有偏災業經

甘肅新通志

卷首之二

五十一

降旨於照例賑恤外乘春布澤再沛恩膏特予加賑用資接濟惟念皋蘭等處尙有應徵從前因災未完民借籽種口糧折色等項曾經疊次加恩於原限六年之外再 二年四年者其四十年分應徵之數例應按期催徵第念各該處上年秋夏又經被災民力不無拮据著勒爾謹將該年皋蘭等三十七州縣被災之處應徵未完籽種各數迅卽詳查奏明再予展限一年俾荒瘠邊黎得緩追呼共安樂利

丁丑

諭軍機大臣等據伊勒圖奏甘肅狄道州大佛寺喇嘛遜郎素等八人在歸化城同知處討取路引路經烏嚕木齊該處大臣等並未查問換給路引請嗣後由該處大臣覈查換給同知給發路引之處永行禁止等語伊犁烏嚕木齊均係新疆地方距哈薩克布魯特邊界甚近此等化緣喇嘛行同乞丐如任其在新疆各處行走偶出邊卡至

哈薩克布魯特地方殊多關礙非但不宜令往哈薩克布魯特地方即喀爾喀地方與俄羅斯境界相通亦不可令其前往此等喇嘛至烏嚕木齊時想索諾木策凌因不在彼是以遺漏未行查辦永慶所司何事理宜查訊辦理乃聽其徑往伊犁殊屬不合永慶著嚴行申飭再該喇嘛係三十八年由本寺外出之人行至歸化城向該同知處討取前往伊犁烏嚕木齊等處路引本非照例辦理之事該同知並未查覈又不稟明該管大臣甚屬糊塗不曉事體著將歸化城同知交巡撫巴延三查明叅奏仍將此通諭陝甘總督山西巡撫駐劄新疆各處大臣烏里雅蘇台科布多等處將軍大臣等嗣後如內地喇嘛及實在商人出境駐劄該處大臣等查明准其換給路引遣往若此等化緣遊方行乞之喇嘛等務須嚴查實力禁止毋許出口

七月丙戌

諭內閣前經降旨普免直省地丁錢糧甘肅省應於戊戌年輪免其額徵糧草一項本不在蠲免之例第念該省所徵地丁少而糧草多乾隆十年及三十五年普蠲各案内均經加恩將各項糧草分別蠲免現在又屆普蠲之年所有甘肅省臨邊各屬應徵番糧草束仍著一體蠲免其河東河西額徵屯糧草束亦著照上次之例蠲免十分之三俾邊省羣黎咸霑愷澤 四十二年戊戌正月癸亥

諭內閣昨歲甘肅省皋蘭等三十二廳州縣因夏閒雨澤愆期以致田畝被旱成災節經降旨令該督切實查勘賑恤兼施俾無失所第念皋蘭渭源安定會甯平番涇州平涼七州縣被旱情形較重開春正賑既畢民食未免拮据著加恩各展賑一月用敷春澤其餘被災較輕之金縣等二十五廳州縣雖亦經照例賑恤如今春尚有缺乏籽種口糧之戶並著該督隨時體察酌借以資接濟勒爾謹務期董率

所屬實心料理俾得均霑實惠以副朕軫恤邊氓之至意

四十四年己亥正月己丑

諭內閣昨歲甘肅皋蘭等三十六廳州縣因夏間雨澤愆期以致田畝被旱成災節經降旨令該督切實查勘賑恤兼施俾無失所第念皋蘭河州靜甯固原平番安定涇州等七州縣被旱情形較重開春正賑既畢民食未免拮据著加恩各展賑一箇月用敷春澤其餘被災較輕地方雖亦經照例賑恤如今春尚有缺乏籽種口糧之戶並著該督隨時體察酌借以資接濟勒爾謹務董率所屬實心料理俾得均霑實惠以副朕軫恤災黎之至意 六月丁卯

諭內閣甘肅地處邊陲民貧土瘠歷年均有偏災即降旨蠲賑緩帶民間所借籽種口糧及緩徵等項積欠甚多曾於乾隆三十六年降旨加恩豁免該省舊欠倉糧百餘萬石又於四十二年降旨將該省自

甘肅新通志

卷首之二

五十三

乾隆二十三年至三十五年民借折色未完銀八十四萬餘兩概予豁免俾邊民共慶盈甯茲據該署督畢沅將各年正雜錢糧已未完數目開單具奏朕詳閱單內所開每年未完銀糧數目尚多雖係按年帶徵之項且該省上年額徵地丁正賦業已加恩輪免本年各屬節次得有雨澤二麥豐收民力尚爲寬裕徵納自可如期但念該省究屬積歉之區若將遠年積欠一體並徵爲數過多完項仍不無拮据著再加恩將該省自乾隆二十七年起至三十七年止因災帶徵未完銀二十三萬五千餘兩糧一百零五萬四千餘石概予豁免其自三十八年以後緩帶各項及此豐年帶徵小民天良感發當必踴躍輸將且積逋既普免追呼其近欠自易於完納如此體恤優施閭閻更得永資樂利 九月庚戌

諭內閣戶部議署陝甘總督畢沅奏請將皋蘭等三十七廳州縣被災

地畝應免銀糧於四十四年補蠲之處毋庸議一摺甘肅地丁額徵銀糧已於乾隆四十三年普行蠲免恩無屢邀自屬照例議駁第念甘省地瘠民貧與他省情形迥異著再加恩照三十六年之例將皋蘭等三十七廳州縣夏禾被災應免正銀一萬三千一百七十餘兩番糧四十四石四斗零於四十四年補行豁免以示朕軫念邊氓有加無已之至意 四十五年庚子正月癸未

諭內閣上年甘肅皋蘭等廳州縣夏禾閒被偏災業經降旨分別賑恤小民自不致失所第念青黃不接之時正賑已畢窮黎未免尙形竭蹶著加恩將皋蘭狄道平番武威肅州安定會甯固原涇州等九州縣災重平民加賑一箇月其餘被災較輕地方並著查明酌借籽種口糧以資接濟 四十六年辛丑正月丁丑

諭內閣昨歲甘肅皋蘭等一十八廳州縣因夏閒雨澤愆期以致田畝

甘肅新通志

卷首之二

五十四

被旱成災業經降旨令該督切實查勘加意撫綏俾無失所第念皋蘭河州金縣會甯安定武威平番涇州肅州等九州縣夏禾被災較重開春正賑既畢民生未免拮据著加恩各展賑一箇月其餘被災較輕地方如今春尙有缺乏籽種口糧之戶並著隨時體察酌量借給以資接濟該督即董率各屬實心經理務使窮簷均霑實惠

四十六年辛丑三月壬寅

諭軍機大臣等據勒爾謹奏蘭州撒拉爾回人蘇四十三等搶據河州城勒爾謹因兵丁尙少現在屯兵狄道州俟各路營兵調齊即行進剿現已傳諭西安提督馬彪帶兵二千名迅速前往並諭西安將軍伍彌泰甯夏將軍莽古賚各選集兵一千名豫備儻須調用即令前往協同剿捕並於火器健銳兩營兵丁內挑選豫備阿桂此時查辦河務已將次就緒著即速起程來京儻有必須勁旅之處阿桂即可

帶兵前往 癸卯

諭軍機大臣等各路大兵雲集調度機宜最爲緊要著傳諭阿桂竟不必來京即從河南取道徑往甘肅程途較近所有節次所降諭旨併批示奏摺已經鈔寄閱看亦別無訓諭之處阿桂即由河南馳驛前往到甘後即將查明新教舊教及調度勦賊情形迅速具奏

四月戊申

諭軍機大臣等逆回傷害職官占據河州一案將來辦理時凡隨同逞凶肆逆者均應勦洗不得稍存姑息使鄰近番人知所畏懼此爲綏靖邊方起見不得不如此辦理至賊匪人數據勒爾謹原奏連婦女不過二千人而王廷贊奏稱圍蘭州時有三千人蓋伊身在城圍未免爲羣言淆惑其實逆賊旣占河州自必留人占守焉得復有三千餘賊圍逼省城此或賊人所過地方迫脅良民爲之先驅將來執訊

甘肅新通志

卷首之二

五十五

時不可不分別辦理此皆阿桂和坤到省時應行留心之事著即先行傳諭令其存記遵照妥辦 六月己丑

諭軍機大臣等前以甘省私收監糧一事明係捏災冒賑上下一氣通同舞弊不可不徹底嚴查己屢經傳諭阿桂李侍堯將歷任道府何人如何冒銷賑濟勒買分肥查明據實叅奏至監糧折收之銀大半歸於冒銷賑恤但賑恤一事甘省旣向來如此自應治冒銷者之罪不應因有此弊竟因噎廢食將應賑恤者致不賑恤朕愛養黎元每遇各省水旱偏災不惜多費帑金優恤甯濫無遺以期不使一夫失所況甘省素稱邊隅饒瘠尤宜加意撫綏豈可以有冒賑之事遂致貧民或有拮据昔宋臣曾有以薦人不當後有悔意者時程子云願侍郎受百人欺不可使好賢之心稍替爲大臣者尙應如此存心況朕君臨天下保赤情殷亦甯可受萬人之欺不可使視民如傷之念

因此稍懈也即以逆回一事而論蘭州百姓並無從賊之人此實由朕平日子惠邊氓有加無已是以閭閻激發天良不肯附從逆匪豈非仁政之明效大驗耶總之甘省冒賑之弊斷不可不辦而甘省賑恤之事仍不可不行此意著傳諭阿桂李侍堯徧行出示甘省百姓使之家喻戶曉倍深愛戴以仰副朕意 癸巳

諭內閣據阿桂等奏本月十五日令海蘭察明亮率同乾清門侍衛併侍衛章京等帶領奮勇官兵屯練降番及阿拉善兵豫備埋伏令海祿等帶兵策應舒亮等各由本卡進攻乘密雨時出賊不意將板網土袋拋入賊壕我兵勇氣百倍哈當阿帶領降番首先跳入壕內與賊攪殺並用撓鉤鉤開土袋板片一面拋擲火彈一面躡身而上剿殺賊衆占得賊卡賊壕俱經拆毀填滿海蘭察明亮又督率官兵遠則鎗箭齊發近則短兵相接各路官兵咸懷振奮分占礮上賊卡海

甘肅新通志

卷首之二

五十六

蘭察明亮又立擊木柵帶兵撲入賊營痛加剿殺拋射火箭火牌將帳房板屋盡行燒燬奪獲賊人刀矛鳥鎗無算賊匪退回華林寺死守海蘭察明亮又逼擊木柵賊人被我兵鎗箭擊死甚多除被賊搶去屍身未經割獲首級外共割得賊人首級一百二十餘顆首逆蘇四十三黨惡韓一提巴拉周阿渾張懷德馬黑提卜等首級此外被官兵殺死及帶傷者三百餘人現止二百餘人退回華林寺死守均不過殘敗賊黨數日內即可剿戮淨盡等語此次圍剿賊巢海蘭察明亮屢次率衆爭先攻奪賊卡殲戮甚多實屬首先奮勇出力並哈當阿著交部從優議敘其餘在事出力之大小各員弁著阿桂等查明分別等第一體咨部議敘其陣亡之三等侍衛吉爾坦保著交部照例給與恤典拜唐阿塔克達那並著加恩照藍翎侍衛例議恤此外受傷各員弁及陣亡被傷之官兵等均著阿桂等查明照例給與

優恤至此次川省降番尤爲鼓勇先登內受傷者著阿桂先行賞賚其餘一概再行賞給一月錢糧以示獎勵其逆首蘇四十三首級並著傳示各省俾回民等各知儆戒

七月壬子欽差大學士公阿桂署陝甘總督李侍堯奏攻剿華林寺賊衆擒殺淨盡并查辦逆犯家屬黨與情形

諭軍機大臣等此次剿捕逆回雖因其死守抗拒遲至三月有餘始行殲滅然使賊於一月前衝突而逃剿捕正自費力今乃占聚華林寺俾官兵得以全數殲擒竟無一名漏網仰賴

上天嘉佑朕愉快之餘惟益深虔畏耳至阿桂等所稱馬明心家屬徒弟並伏羌縣斂銀之新教阿渾與各逆黨家屬已委按察使福甯前往查辦等語所奏甚是此等從逆回民露有形跡證據者必須全行搜查不可稍存將就了事之見至省城及循化河州等處監禁逆犯

甘肅新通志

卷首之二

五十七

之婦女幼孩人數甚多著阿桂等查明將應發煙瘴者即行分別發遣毋令久稽監獄 九月己巳

諭內閣李侍堯奏甘省雨水禾苗情形一摺據稱夏秋以來連得雨澤各府州縣屢次稟報入土深透田禾成熟秋收可望豐稔等語甘省歷年以來地方官以冒賑之故每以旱侵入告朕未知其弊實爲憂之今據李侍堯奏報夏秋以來霽澤頻霑並無被旱之區可見該省雖稱地瘠民貧並非雨露所不到從前屢以災害爲言者總以監糧可以冒賑該地方官竟視報災爲常例藉詞虛捏以便侵漁即有實在被災年分亦因劣員等從中取利朘民肥橐百姓鮮受實惠以致積成戾氣雨澤愆期今經徹底查辦之後夙弊風清民情豫順其感召

天和雨暘時若未必不由於此然此不可視爲恆例以後若果有遇旱

歲歉該督即當據實奏報朕仍加恩賑恤並令督率屬員毋蹈前轍俾窮民均受實惠毋忽 四十七年壬寅正月癸卯

諭內閣上年甘肅甯朔平羅等縣因河水泛溢秋禾被災屢經降旨令該督切實查勘照例給賑第今春正賑已畢尙屆青黃不接之時民力未免拮据著再加恩將被災較重之甯朔平羅二縣貧民展賑一箇月其隴西甯夏二縣被災較輕仍著該督飭令地方官留心體察如有缺籽乏食之戶即行酌借籽種口糧以資接濟務使災黎共慶安全用敷春澤 癸亥

諭軍機大臣等李侍堯覆奏辦理土司控案一摺內稱上年十一月內接青海副都統留保住咨稱拏獲搶竊蒙古馬匹之番子一名隨飭西甯府知府會同青海委員嚴行審辦又十二月內復准留保住咨稱有賊番將扎薩克旗下章京巴朗所管馬搶去一百餘匹經巴朗

甘肅新通志

卷首之二

五十八

追趕被賊射死等因隨飭西甯鎮道督拏務獲旋據該鎮道稟請派撒拉土爾兵並附近番兵前往彈壓因恐所辦過涉張皇祇令購線拏緝又去年八月內千總賀利瑄越界滋事現在另摺具奏等語既有此事何未早奏且所辦殊屬非是此等番人雜處邊徼最易滋生事端遇有搶竊訐訟之案必須嚴行查辦迅速審斷方足以綏靖邊夷斷不可存化大爲小之見今李侍堯所奏俱係上年案件彼時何以不即行具奏即西甯鎮道稟請派兵彈壓一節該督亦當籌度機宜如其事果須稍示軍威正不妨酌派兵丁使知震懾倘止聽地方官前往督緝該番等或將兇犯藏匿以致控案懸宕不結轉屬不成事體此事惟在該督斟酌事體輕重熟籌妥辦固不宜稍涉張皇亦不得遷就完事甘省節年以來因勒爾謹在彼諸事因循皆欲化大爲小以致釀小成大李侍堯不可不引以爲鑒現在各案內應行緝

拏之犯務即督飭妥員剋期務獲從嚴辦理 三月乙卯

諭內閣據李侍堯奏查辦甘省各屬虧空錢糧案內有節年民欠未完籽種口糧銀一項內除歷次邀恩豁免外尚有應徵積欠倉斗糧二百四十五萬四千八百三十餘石折色銀三十萬七千三百二十餘兩請分年帶徵等語甘省地瘠民貧朕於從前出借緩徵用紓民力在小民感激朕恩自無不踴躍輸將但念該省每遇偏災動項賑恤多爲劣員侵蝕冒銷閭閻未得普霑實惠甚非朕愛養黎元之意今該省積弊已除所有此項積欠銀糧著加恩全行豁免以示朕體恤邊氓有加無已之至意 四月戊子

諭軍機大臣等李侍堯奏甘省各屬於三月下旬及四月上旬連次得雨自省城以至遠近各屬無不均霑等語覽奏甚爲欣慰甘省向因雨少每報旱災以致不肖各員釀成冒賑積弊上年該省即得雨露

甘肅新通志

卷首之二

五十九

足秋收豐稔今歲正當禾苗長發之時仍復並霑甘霽農民得及時播種可卜豐收但該省究係地瘠民貧之區雖現在雨澤應時尚恐將來通省各屬間有一二歉薄之處該督仍當悉心查察據實具奏毋得稍存諱飾朕念切民瘼務使一夫不致失所該督自當仰體朕意不可因甘省向有捏災積弊遂爾因噎廢食轉致匿災不報也將此諭令知之 四十八年癸卯二月丁巳

諭內閣甘省積年帶徵錢糧自乾隆三十六年起至四十六年止尙有未完銀三十四萬六千四百五十六兩零糧一百三十八萬九千二百九十一石零因思甘省自辦捏災冒賑一案所有民欠籽種已屢經降旨全行豁免此項未完帶徵銀糧如果係地方實在災歉分年遞緩之項朕必概予恩免此項乃從前該省地方官通同捏報被災其捏稱災重者已冒賑分肥即必有捏報災輕者因予以緩徵此乃

蠹吏爲掩飾地步今據李侍堯奏明此等未完之項係從前冒混並非實因災歉所致本應按年帶徵但念積壓年久爲數較多若令一時徵完民力不無拮据官吏亦多被處分是廉者代貪者受罰也著再加恩展限八年帶徵以示賑恤窮簷有加無已至意 四月甲戌諭軍機大臣等甘省撒拉爾回人只有十二工從前蘇四十三滋事逆黨止係三工新教回衆其餘九工之舊教回人向俱隸循化廳所屬昨詢據善德奏稱舊教回人亦係撒拉爾種類與內地回民不同現在該處舊教回人目睹上年大加懲創之後各知畏懼安分守法不敢再生事端等語撒拉爾回人既另行居住各爲一種則與內地回民自應區別其往還結親亦當聽伊九工之衆自爲婚配內地回民不得雜入其中致日久滋事前李侍堯在京時未經而諭著遇便傳諭李侍堯於回任之後飭屬留心體察設法防範開導內地回民各

知守法自愛勿與撒拉爾回衆往來聯絡總宜不動聲色爲之以漸日久風俗自然移易方爲妥善至黑帳房番人與撒拉爾回衆種類本殊又各奉一教向來亦互有恃強陵弱之事嗣後亦當隨時訪察防閑使各安居守業勿致生事惟在該督等嚴飭所屬實力奉行

四十九年甲辰四月丙午

諭軍機大臣等據剛塔奏固原新教回人田五等聚衆滋擾該處與西安府相距不遠而離寧夏尤近亦當豫爲籌備著傅玉莽古賚酌量各派兵數百名俟李侍堯咨調時即作速帶兵前往應用至揀派此項兵丁須審密辦理不可過涉張皇 五月庚午

諭內閣甘省逆回田五等滋事經官兵剿拏田五中傷自戕餘賊因守馬家堡已成釜底遊魂俟其力盡計窮別無逃路自必束手就斃前因李侍堯奏馬家堡靠山居險朕即慮其翻山逃逸早經節次降旨

傳諭李侍堯迅速親赴該處會同剛塔等設法四面嚴密圍堵毋使賊匪一名免脫乃於朕旨未到之先剛塔惟知在馬家堡圍剿並不嚴防山後去路致賊得以設計乘閒奔竄該提督又不星夜帶兵追捕尙咨會總督來往文移耽延迨賊已遠颺止在後尾追任其肆行劫掠李侍堯又安坐靖遠以辦理逆犯家屬爲畏避地步並不親赴調度會剿及聞賊人逃逸毫無措置失意張皇並不即行親往此事若交伊二人辦理恐致遺誤儻日久使賊蔓延尙復成何事體是以特命尙書福康安帶欽差關防同領侍衛內大臣海蘭察帶領巴圖魯侍衛章京等馳驛前往福康安素嫻軍旅且兵力厚集賊匪餘黨自可剋期撲滅地方百姓亦可早就奠安似此小醜跳梁原不值特派大臣前往但以該省督提辦理不善不得不簡重臣督率整頓以期速於蕝事所有該省辦理不善之文武各員統俟賊匪剿除淨盡

甘肅新通志

卷首之二

六十一

福康安按其功過覈其情罪詳晰奏聞另降諭旨 壬申

諭軍機大臣等據伍岱等奏賊人復行竄逸且有石峰堡等處回民聚集滋擾之事等語賊人屢次逃逸糾合夥衆擾害地方揆度情形必須滿洲勁旅前往方能迅速蕝事著傳諭阿桂於火器健銳兩營內挑選精兵一千名豫備聽候諭旨再行帶領起程所有分隊帶領之侍衛章京等並著酌量派選京兵聲勢壯盛經阿桂帶領前往尤足以壯軍勢而懾人心阿桂所帶京兵一到自可會同調度剋期竣事也 六月庚寅

諭內閣前因甘省逆回滋事所過地方百姓田廬牲畜被其劫掠及聞信驚避遷徙流離者均爲可憫已諭令福康安到彼即行查明酌量撫恤第念該省現在調集官兵會剿賊匪一切軍糧料草雖均係地方官發價購辦而沿途輓運未免有需民力是未經被賊滋擾之處

百姓共効供輸亦宜一體加恩均施惠澤所有該省本年應徵錢糧著概行豁免如有本年業經徵收者著詳晰查明於下年豁免該督務宜董率所屬實力奉行俾閭閻得霑實惠以副朕優加軫恤普沛恩施之至意此旨到甘省福康安騰黃普諭各屬 七月甲子

諭內閣據阿桂福康安奏初四日石峰堡內投出老弱賊匪一千五百餘名阿桂福康安恐賊人詭譎伎倆希冀官兵見賊衆投出防範稍懈即乘勢撲出竄逸豫派官兵層層分布埋伏豫備初五日子刻賊首張阿渾果同楊填四等帶領賊衆向外直撲思欲奪路竄逃官兵槍箭如雨盡力截殺殲賊千餘張阿渾等竄回堡內其時天色黎明福康安同海蘭察帶領各官兵一湧而上進堡搜捕將首逆賊目全數擒獲兩日撻仗殲擒賊回共二千餘名拏獲首從逆犯及各賊眷屬孩稚共三千餘口等語覽奏實深欣慰國家愛養黎元凡直省編

氓遇有水旱災荒無不立時賑蠲至甘省回民久隸帡幪食毛踐土便與齊民無異該省地方礪瘠閒有不登即行蠲免賑濟較他省爲尤多回民等同在編氓之中百數十年仰沐膏澤家給人足伊等具有天良豈不當稍知感激且地方官並無苛徭酷派激變事端乃逆回等敢於光天化日之下肆其逆謀實爲國法不容神人共憤而前此李侍堯剛塔等辦理不善致賊四出勾結蔓延猖獗經朕特派大學士司桂陝甘總督福康安先後帶領巴圖魯侍衛等前往督辦並諭以底店係賊匪門戶當先由該處以次進剿福康安先抵甘省數日之內即將底店賊匪剿辦淨盡肅清後路俾賊衆聞風膽落萌蘖潛消阿桂抵石峰堡後復會同福康安遵照朕硃筆圈示之處安營設卡將匪嚴密圍堵並斷其水道辦理均爲妥協且剿辦甫經一月即能將賊匪迅速殲除而賊首張文慶等俱悉數生擒並拏獲活口

三千餘名不使有一人免脫此皆仰荷

上天嘉佑是以軍士用命俾該犯等惡貫滿盈按名生致盡法懲治而諸臣之蔽功完善不可不特沛殊恩以昭懋賞阿桂前於平定金川時已封頭等公爵現爲大學士恩施無可復加著再給予輕車都尉世職即令阿桂於伊子孫內揀選一人奏聞承襲福康安籌辦底店賊匪先得機宜較爲出力前於平定金川時已封爲嘉勇男著再晉封嘉勇侯海蘭察前在金川超衆奮勉已封侯爵今在甘省節次撻仗復能首先帶領官兵奮勇殺賊前已加恩將伊子安祿擢授二等侍衛在乾清門行走著再給與騎都尉世職即令安祿承襲伍岱係搭爾巴哈台班滿回京之人路過甘省即自奏留該處協勦且於福康安未到任之先在伏羌等處擊退賊匪頗爲奮勉著授爲都統亦給與騎都尉世職其餘巴圖魯侍衛章京等及領兵各員分投勦殺

甘肅新通志

卷首之二

六十三

兼有能不避箭石殺賊受傷者均屬奮勇可嘉所有此次勦賊受傷出力之大小各員弁著阿桂福康安查明出衆特等者及其餘之侍衛章京官弁兵丁等分別等第奏聞交部議敘以示獎勵至此次勦辦賊匪三月以來朕披覽奏章指示機宜和坤首承諭旨繕寫寄發巨細無遺一體宣勞和坤本身現襲輕車都尉著再給與輕車都尉世職歸併前職照例議襲其餘在事慶成之軍機大臣梁國治董誥福長安並軍機章京之勤勞出力者著一併交部議敘所有此次賞給各世職俱著世襲罔替其應如何議襲之處著該部查例具奏

八月癸巳

諭內閣甘省壓欠起運銀糧自乾隆三十八年至四十六年共計一百六十餘萬前經督臣奏請分作八年帶徵經朕特沛恩綸將此項銀糧普行豁免第念該省尚有存留項下民欠銀糧及起運項下民欠

草束未經一體邀免者著再加恩將三十八年至四十六年民欠存留項下銀五萬一千四十五兩零民番糧二萬五千六百九十五石零又起運項下民番未完草束覈計價銀二十萬四千一百八十餘兩及二十三年至四十六年民欠未完耗銀十一萬二千一百六十九兩零耗糧四十五萬二千四百四十五石零概行豁免以示朕軫念貧黎有加無已之至意 五十年乙巳五月庚戌

諭內閣據浦霖奏前赴肅州惠回堡等處查勘地震被難居民照例撫恤共用銀一千六百三十兩九錢五分等語邊氓猝遇地震倒塌房屋損傷人口情形殊可憫惻著加恩於撫恤銀一千六百三十餘兩外再加一倍賞給福康安現在馳赴該處即著督率該地方官加意撫綏務使均霑實惠以副朕軫恤邊地災民有加無已之至意

十月癸未

甘肅新通志

卷首之二

六十四

諭內閣據福康安奏甘肅皋蘭金縣伏羌安定會甯平涼靜甯隆德鹽茶秦安平番莊浪等十二廳州縣縣丞地方閒被雹水偏災請將銀糧草束蠲免等語甘省地瘠民貧上年逆回滋擾業經降旨將通省額賦概免徵輸以紓民力其皋蘭等十二廳州縣復有雹水偏災之處著再加恩將皋蘭金縣伏羌安定會甯平涼靜甯隆德鹽茶秦安平番莊浪等十二廳州縣縣丞地方所有應徵正耗銀二千七百一十兩六錢七分糧一千一百八十二石七斗七升草二千三百四十二束概行蠲免以示朕軫念邊黎有加無已至意

五十二年丁未六月甲子

諭軍機大臣等據福康安奏甘省六月初河東河西連得雨澤蘭州省城初八初十日亦獲甘霖附近金縣河州等屬及稍遠之隴西等處並俱得雨露足惟節候業已稍遲前奏皋蘭等屬被旱較重地方仍

不免夏收失望如有必須撫恤蠲緩事宜俟該司道查勘明確督率妥辦等語甘省地處邊陲當夏禾長發之際全賴雨澤滋培今蘭州及隴西等處雖已節次得雨露足但節候業已稍遲夏收失望其被旱較重地方業經福康安酌借籽種口糧並量撥倉糧減價平糶但恐乏食貧民不無拮据著傳諭勒保於到蘭州後一俟該司道查勘明確如有必須撫恤蠲緩者即一面奏聞一面督率所屬實力妥辦毋致一夫失所其各屬內間有被雹及山水驟發田禾被傷並淹斃人口衝塌房屋之處均關民瘼亦著飭屬查明分別輕重一體撫恤以示朕惠恤邊氓至意 五十二年戊申正月丙寅

諭內閣上年甘肅皋蘭金縣等州縣被旱成災節經降旨令該督實力撫恤分別賑濟毋使一夫失所第念今春正賑已畢青黃不接之時民食不無拮据著再加恩將皋蘭金縣安定等三縣被災貧民概行

甘肅新通志

卷首之二

六十五

加賑一箇月至狄道河州靖遠會甯沙泥州判等五處酌借口糧籽種以資接濟其各災區未完新舊正借錢糧著照該督原題概緩徵收仍著察看被災各屬情形如有缺種乏食之戶分別辦理該督務須飭屬實心經理俾災民均霑實惠以副朕軫念窮黎有加靡已至意 十月戊申

諭內閣據勒保奏甘肅各屬秋禾分數通計收成八分有餘內惟平涼等八州縣間有被雹被旱之處又平羅一縣瀕河地畝間被水漲淹浸委員查勘俱不成災惟收成未免歉薄等語平涼等州縣本年夏秋以來間被雹旱漫水雖不致成災但田禾未免受傷收成稍爲歉薄民力不無拮据著加恩將平涼華亭武威平番古浪蘭州金縣狄道平羅九州縣本年應徵正借銀糧及舊欠銀糧草束俱緩至來歲徵收俾從容完納以紓民力仍著該署督於今冬明春察看情形如

有缺籽乏食者酌量借給接濟以示朕惠愛邊黎格外體恤至意
五十四年己酉三月甲子

諭內閣甘肅地瘠民貧並陝西延安榆林綏德三府州屬附近甘省地方亦屬磽薄向來該處民欠未完地丁耗羨及籽種口糧等項屢經降旨分別豁免昨勒保來京陛見詢以該省近日情形據稱甘省自四十七年至五十三年民欠地丁正耗並未完籽種口糧折色等銀二十七萬九千餘兩糧二百一萬七千餘石草束一千一百一萬餘束陝西延榆綏三屬自三十八年至五十三年民欠未完倉穀三十六萬九千餘石等語甘省等處地方自從前加恩蠲免以後又有年所朕於加惠黎元之事從無遲待即多費帑金亦所不靳所有甘肅省自四十七年至五十三年民欠未完地丁正耗銀二十三萬九千三百餘兩糧八十萬四千六百餘石草一千一百一萬餘束四十九年至五十三年未完籽種口糧折色銀四萬五千三十餘兩糧一百二十一萬三千餘石俱著加恩豁免並陝西延榆綏三屬民欠未完常平倉穀三十六萬九千餘石著該督撫飭屬查明亦一併加恩蠲免以副朕惠愛邊氓有加無已至意

五十五年庚戌十月己未

諭內閣勒保奏甘省蘭州府屬之皋蘭金縣靖遠三縣高阜地方先因六月內雨水較少禾苗長發稍遲嗣於八月閒天氣驟冷正當升漿結實之時猝被嚴霜以致黃萎各該屬素稱瘠土現在收成無望民力未免拮据請將本年應徵正雜銀糧草束緩至來歲徵收等語著照所請甘肅皋蘭金縣靖遠三縣所有應徵本年正雜銀糧草束概行緩至明年輸納俾民力得臻充裕以示朕體恤邊氓至意

壬申

諭內閣勒保等奏甘省蘭州府屬之皋蘭金縣靖遠三縣高阜地方先因六月內雨水較少禾苗長發稍遲嗣於八月間天氣驟冷正當升漿結實之時猝被嚴霜以致黃萎現在收成無望被災戶民力難接濟乏食堪虞請照例給予賑濟等語皋蘭金縣靖遠等三縣猝被嚴霜前據該督奏明業經降旨將本年應徵正雜銀兩草束緩至來歲徵收今既查勘成災小民口食維艱自應給予賑濟以示體恤著該督即派委委員實心經理俾災黎均霑實惠以副朕愛養邊氓至意

六十年乙卯八月壬寅

諭內閣秦承恩奏甘肅平涼等九州縣因得雨未能霑足高原地畝間有受旱又皋蘭等縣各鄉村或因雨雹受傷或因山水被衝收成均不免歉薄等語平涼等州縣因夏閒雨澤稀少以致秋成稍減雖據奏勘不成災但民力究未免拮据皋蘭等州縣各鄉村秋禾間有傷

甘肅新通志

卷首之二

六十七

損雖係一隅收成亦未免減薄所有平涼府屬之平涼華亭涼州府屬之武威鎮番永昌涇州暨所屬之崇信鎮原靈臺等九州縣並蘭州府屬之皋蘭縣西鄉狄道州西鄉河州南鄉平涼府屬之靜甯州楊家嘴等村本年應徵各項銀糧草束均著加恩緩至來年麥熟後徵收以紓民力該署督務督率所屬實力奉行以副朕加惠閭閻不使一夫失所至意

甘肅新通志卷首之三

嘉慶元年丙辰二月乙巳

上諭內閣西甯地處邊陲兼轄民番現在即有緝捕劫掠通事之番賊員缺最爲緊要昨召見西甯道榮德看其才具中平恐難勝任新授漢中府知府鄂雲布係哈勒吉善之孫定長之姪家風具在人亦明白著即升授甘肅西甯道所遺陝西漢中知府員缺即著榮德降補一轉移間人地兩屬相宜而於繁簡均得其當矣 五月丙辰上諭軍機大臣等宜綿現已駐劄商南不過在彼防堵彈壓並無緊要應辦之事甘省現在缺少雨澤一切正資調劑著該督酌量該處情形如堵截等事可以就近交與柯藩或地方官等辦理宜綿竟當回至蘭州董率所屬實心經理俾窮黎不致向隅爲要

二年丁巳六月乙酉

甘肅新通志

卷首之三

一

上諭軍機大臣等陸有仁奏甘省四月分糧價較上月加增一二分至四五分不等恐該處民食拮据著傳諭英善迅即赴甘查明各屬糧價昂貴地方有應行平糶及酌加蠲借各事宜奏聞妥辦務令民食不致缺乏糧價平減 七月甲戌

上諭軍機大臣等英善奏甘肅各屬五月分糧價單朕詳加披閱糧價多係中平惟鞏昌等屬較上月稍貴英善惟當察看情形如有需平糶之處即飭屬妥爲辦理若無需平糶即可不必周章仍當隨時體察調劑俾民食饒裕糧價平減方爲妥善 四年己未三月乙酉上諭軍機大臣等廣厚奏痛剿賊匪分路追剿情形所辦甚好近日川省蕭占國冷天祿等股竄匪業經先後剿淨朕所慮者正在甘省今據廣厚奏賊匪張映祥等或分或合經官兵追剿殲賊一千餘人生擒一百八十六人并將賊目張世龍擊斃剿散賊匪由山後奔竄覽

奏深爲欣慰此皆係廣厚吉蘭泰二人之功廣厚著加恩賞戴花翎吉蘭泰著加恩賞給伊青阿巴圖魯名號並賞戴花翎以示嘉獎此股賊匪勢已窮蹙廣厚吉蘭泰當乘勝進擊速行剿淨後即前赴富成一路夾擊一經剿竣甘境即可肅清至賊匪現在奔竄地方係在鞏昌一帶相距陝境不遠並著恆瑞察看情形派撥弁兵豫行堵截毋任甘省竄匪乘間闖入陝境爲要 六月丙申

上諭軍機大臣等此時甘境已無賊匪但賊蹤往來無定而蘭州省城現有楊揆蔡廷衡在彼足資彈壓廣厚吉蘭泰仍當在甘省邊界一帶駐劄防堵設有敗竄賊匪仍行折回廣厚等即可迎頭截擊但亦不必越境追剿惟當嚴防本境不使賊匪復行闖入以期綏靖地方至撒拉爾回兵此次摺內未將伊等是否出力之處提及該回兵等從前告請來營原資剿捕之用今甘境已就肅清自不必令伊等一

甘肅新通志

卷首之二

二

同在彼間住但既已遠來如有出力者亦應量加獎賞著廣厚查明此項兵內若有實在奮勇出力之人即行奏明賞給頂戴以示鼓勵並著廣厚察看情形如該回兵已無需用之處即厚加賞資遣歸本處儻藍白二號賊匪尚有窺伺甘境折回之意勢須多兵剿捕即將該回兵等仍暫留營應用亦無不可 九月庚辰

上諭軍機大臣等昨據蘇甯阿奏阿郎杆賊番出搶孳生馬匹四羣已降旨令台布馳赴西甯相機妥辦今據奏該番賊等因兵丁追趕將搶去馬匹全行放回是賊性尙知畏懼但恐素習詭詐難保其去而不來且雖將官馬放還而搶馬正犯必須拏獲正法方足示懲現在蘇甯阿已赴該處派兵緝捕如番賊等尙敢抗違台布當仍遵前旨酌派甘涼官兵親往督辦以助軍威其外委劉全印以六十名兵深入番地全獲馬匹殊爲奮勉著遇缺拔補 五年庚申正月壬申

上諭軍機大臣等川省竄入甘境之賊如過白水江即係龍安地界該處有路可通成都聞即係陰平小路自有險要可守著魁倫豫爲籌備飭令該處文武員弁加意防範勿使川南未經被賊之區致滋擾累 二月辛丑

上諭軍機大臣等額勒登保奏勦辦甘省及川陝楚竄匪情形所辦俱好惟現患肝旺心怯之症殊爲廩念現今伊姪福忠阿帶同御醫田廣福前赴軍營診視賞給人蔘半斤並賞親佩小荷包一箇如朕親臨問病此時額勒登保惟當在秦州安心調養不可力疾督師用示體恤額勒登保前次因竄甘賊匪有二萬餘人事關緊要彼時力疾趕往意在急公朕亦不深責現在額勒登保派撥各路兵將皆合機宜岱森保竟不必赴陝所有勦辦竄匪及各路官兵均交那彥成管帶督辦額勒登保在秦州駐劄亦應留兵防備儻賊匪經由該處伊甘肅新通志

卷首之三

三

仍可派往堵勦即作爲一路守禦之兵亦屬有益經略印信仍係額勒登保掌管其欵差大臣關防著那彥成暫行留用

六年辛酉七月戊戌

上諭內閣長麟奏甘省被旱成災情形一摺甘省自夏徂秋雨澤愆期被旱較重其成災分數除俟長麟督飭各屬查勘確實具奏外所有此次被災之各廳州縣節年新舊正借積欠銀一百零七萬三千二百五十七兩草五百四十三萬五千一百五十七束著加恩先行蠲免其新舊積欠糧一百一十三萬九千六百八十三石著該督查照成災分數將例應蠲免者即行蠲免外其例不應蠲免者著於來歲豐收後分作三年帶徵該督務須飭屬妥爲經理毋俾一夫失所以副朕軫念災黎至意 七年二月二十一日奉

上諭韓自昌勦賊陣亡前經額勒登保奏到當即交部賜卹茲聞伊即

係前次陣亡副將韓嘉業之胞兄弟兄均沒於王事且家有八旬老母甚爲可憫韓自昌著加恩照總兵陣亡例議卹其一切資送回籍俱官爲辦理加賞伊母銀三百兩並著惠齡派地方官與伊原籍官建祠堂一座賜名雙烈祠本處地方官春秋致祭伊有子幾人俟服闋後俱著送部引見如無子嗣即查伊胞姪咨送以示朕優恤忠藎至意欽此 五月二十五日奉

上諭康二麻子充當僞元帥多年爲楚匪主謀之人且曾經戕害副將韓嘉業實堪痛恨著將該逆首級送交韓嘉業之母告知此係戕害伊子之賊業經擒獲臠割示衆可將該逆首級即在雙烈祠設祭以慰忠魂欽此 八年癸亥九月癸巳

諭內閣惠齡奏各州縣秋雨過多山水漫溢情形一摺據稱皋蘭縣西鄉於七月二十日河水泛漲淹沒秋禾地畝衝塌房屋又沙泥州於

甘肅新通志

卷首之二

四

六月二十三等日被水衝塌城角城身及民房一百四十七間又秦州及秦安縣被水衝刷土山傾圮壓斃人口甯夏府屬民田亦被黃河猛漲漫淹此外平涼等府屬地方城垣衙署民房多有被山水衝塌等語該省因雨水過多致各屬地方間被山水衝刷民廬田畝多有淹沒甚至傷斃人口此係民瘼攸關爲地方緊要事件惠齡現往西甯查辦番案王文湧駐劄省城接據各屬稟報即應一面稟知總督一面先行具奏查勘撫綏惠齡現駐邊境於接到稟報後亦應由驛馳奏乃率用差人齎遞奏摺試思該省被水地方其最早者係在六月下旬乃直至九月朔日始達朕前甯不知朕宵旰民依而任意遲延若此亦太不曉事矣惠齡在西甯得信較遲但未經由驛馳奏究屬非是著傳旨申飭王文湧身任藩司並不即時具奏實屬玩延著交部議處惠齡即馳回省城順道將被水各屬親行履勘加意撫

恤所有動用銀兩均著作正開銷毋庸捐貲辦理其成災地方有應行蠲賑之處亦著迅速奏明請旨毋得再有遲緩

十年乙丑閏六月甲辰

諭內閣倭什布奏查明甘省各屬被旱輕重及偏被水衝地方情形一摺甘肅隴西等七州縣本年夏禾被旱黃萎六月後又未得雨秋苗不能滋長皋蘭等七廳縣因暑雨連朝山水匯發黃河驟漲以致衝壓民田廬舍並淹斃人口牲畜該十四廳州縣地方分被水旱情形較重深爲可憫均應亟加撫恤以甦民困所有隴西甯遠伏羌通渭西和靜甯環縣皋蘭古浪平番西甯碾伯大通巴燕戎格各廳州縣應納新舊各項錢糧草束俱著緩至明年麥秋後徵收並著該督迅速飭查此內有應先行賑恤併加恩蠲免者即據實奏聞候朕再降恩旨其蘭州等府州屬被旱較輕之各廳州縣統於秋收後一體查

甘肅新通志

卷首之二

五

勘如有收成歉薄民力拮据分別施恩之處亦即續行奏明請旨不可諱飾 八月甲午

諭內閣前因倭什布奏甘省甯朔縣田禾被水情形當經降旨飭令據實查辦候朕加恩茲據覆奏勘明甯朔縣積水疏消不致成災並續報被水州縣委員確勘分別辦理等語靈州屬之漢柏等四堡及東路一三三四五牌等處因山水猛發一時未能宣洩被災較重著即查明戶口加恩賞給一月口糧其甯夏縣屬之王洪等十三堡甯朔縣屬之玉泉等十一堡平羅縣之通福等四堡雖被水之後旋即疏消業據勘明不致成災但秋收究屬歉薄所有甯朔甯夏平羅靈州四州縣被水各莊堡本年應徵新舊正借銀糧草束緩至來年麥秋後徵收以紓民力仍於冬春之間察看情形再行酌借籽種口糧俾資接濟又據奏稱古浪縣城東山水陡發下游田禾俱被淹浸並將

河西渠道衝斷直逼城根經甘涼道等派撥民夫開挖引河積水稍退因該民夫口食無資飭縣借給口糧四百石以資工作等語該縣民夫等奉派開挖引河保護城垣田禾實爲踴躍趨公所有借食口糧四百石即著加恩賞給毋庸於來歲徵還以示朕軫念窮黎施恩無已至意 十月己亥

諭內閣倭什布奏勘明甘省各州縣收成情形一摺本年甘省各屬間有被旱被水處所業經加恩分別賑恤茲據奏稱皋蘭等三十五廳州縣秋收自五分至六七分不等例不成災其甘州府所屬之東樂縣丞一處實屬成災業據該督委員查勘分數照例具題請給賑恤外所有蘭州府屬之靖遠縣所屬馮家園等處毗連災區秋收歉薄雖例不成災閭閻究未免拮据著加恩將本年應徵新舊正借銀糧草束一併緩至來年麥熟後徵收以紓民力至皋蘭等各廳州縣仍

甘肅新通志

卷首之二

六

著該督隨時體察情形如有應須酌借籽種口糧之處據實具奏候旨加恩該部知道 十一年丙寅四月丁未

諭內閣倭什布奏漳縣岷州兩當三州縣猝被水災現在查辦情形一摺漳縣所屬之西南鄉於三月二十九至四月初一等日雷雨大作上游山水陡發居民不及遷避以致人口淹斃多名房屋多有衝塌情殊可憫岷州及兩當縣所屬村莊亦於三月十七二十九等日暴雨傾注均有衝斃人口損壞地畝處所現據該督飭委藩司蔡廷衡督同印委各員照例賑恤外所有該州縣衝塌房屋並當官給修費若仍於頂衝處所修建究非日久安居之計應飭令地方官曉諭居民即於就近處所另擇地勢及時建蓋以資棲止其被衝地畝是否尚可補種豆穀等項如有應須酌借籽種及分別蠲緩之處該督即速查明據實具奏候朕施恩 十五年庚午八月己丑

諭軍機大臣等那彥成奏查辦甘省被災各屬情形一摺甘省被旱成災各地方前據那彥成兩次奏到節經降旨緩徵外其應行分別賑恤之處該督即應上緊查明以憑續降恩旨至其餘尚有續報被水被雹及山土推壓處所以及續報被旱地方那彥成一據稟報之後亦即應迅速查明將如何施恩撫恤之處分別具奏請旨以安衆心乃今日那彥成之摺祇敘稱查辦情形並酌擬災賑規條進呈而於應辦賑恤事宜全未之及小民流離失所望澤孔殷朕廩念災區惟欲早覃恩澤似此空言奏報於實惠奚裨且閱伊單內規條亦尚有未善之處如查點戶口一節向祇責令地方官委員查勘今那彥成忽欲令本處紳衿耆老隨同點查其意自以不肖官員浮開侵賑舞弊繁多如上年江蘇省之王伸漢即其明證因欲矯而爲此以杜弊端殊不知紳耆中亦不皆誠實可靠儻或挾私舞弊亦可將其親戚

相好之人意爲朦混甚或浮開戶口圖便私已隱匿侵吞均屬事之所有將來紛紛上控告案更多辦理多有窒礙殊可不必那彥成惟當遴派賢員妥爲經理隨時嚴禁弊竇有犯必懲則貪吏奸胥自然斂戢毋庸因噎廢食此旨到後著速將皋蘭三十州縣以及渭源平涼河州等各處災分輕重賑濟緩急應如何請旨之處速行分晰奏明毋再延緩 二十一年乙亥十一月丁酉

諭內閣先福奏查明甘肅被災地方情形一摺本年甘肅皋蘭等七縣夏田被雹被旱鹽茶廳秋禾被霜雖俱勘不成災而收成歉薄民力不無拮据加恩著將皋蘭金縣靖遠安定隴西平羅西甯等七縣鹽茶一廳本年應徵新舊正借錢糧俱緩至來年麥收後徵收以紓民力仍於冬底春初酌借口糧籽種俾資接濟其餘勘不成災各州縣如有應酌借口糧籽種之處俟該督查明再行覈辦

二十一年丙子正月己酉

諭內閣景安等奏覈議甘省出借籽種口糧限期一摺前據藩司嚴焮奏請酌定甘省出借籽種口糧詳奏限期當經降旨令景安等查覈具奏茲據景安等奏稱甘省距京路途較遠若如該藩司所議限期恐致稽延另行酌議奏聞請旨著照所請嗣後儻遇歲饑仍照例隨時撫恤外其遇偏災之區應於該年冬閒出借口糧者於九月內具奏收成不及六分暨六分有餘應於次年春閒出借籽種口糧者於年前十一月內具奏歉收處所應於青黃不接之時出借口糧者於二月內具奏該州縣道府如有詳報覈轉遲延者查明分別嚴參仍著該督隨時酌量如計程不誤限期照常差人齎遞儻民食孔亟其由驛具奏以重民瘼 道光二年壬午七月癸巳

上諭內閣長齡奏酌籌生息銀兩貼補州縣捐款一摺甘省地當孔道

甘肅新通志

卷首之二

八

差務殷繁各州縣每年攤捐款項勢所必需自應酌籌調劑著照所請准其於司庫存儲草價項內提銀八萬兩兵饟建曠項內提銀十二萬兩以十萬兩飭交甘肅藩司十萬兩解交陝西藩司均各發商生息所得息銀甘省由府按季解司陝西由該省藩司遇便搭解甘肅仍將一半歸還原款一半爲苦瘠州縣攤捐公用是原款盡數提還後每年所得息銀二萬兩即作爲通省攤捐公用之費所有收支銀款著無庸報部查覈以歸簡易 六月己未

上諭內閣長齡等奏青海地方全就肅清移住蒙番防守一摺循化貴德野番前此盤踞助勒蓋克克烏蘇一帶原係蒙古貝勒特里巴勒珠爾等六旗遊牧地方現經大兵將野番剿除淨盡該督等諭令該貝勒等各歸原牧僉以移居青海已久人少勢孤不願復業該遊牧地方寬闊若強令遷回勢不能固守藩籬著照所議助勒蓋一帶即

令察罕諾們汗移居克烏蘇一帶飭回司里克大百戶住牧均各給予執照俾垂久遠每歲河冰結後責令分段防河並於冬春兩季賞給該諾們汗及阿里克大百戶置備口糧銀各一千兩用示體恤現在阿里克大百戶歡布他拉已故其子喇沁納木札爾尙未承襲係歡布他拉之弟乙達木代管其事乙達木著賞給六品頂戴及身而止俟喇沁納木札爾襲職後仍責成佐理以資防守其向年會哨之兵即行停止至察罕諾們汗失察屬下勾結野番屢次搶掠本有應得之咎姑念此次隨營出力又將該旗賊犯查拏送究著加恩免議 是日

上諭軍機大臣等長齡奏野番一千數百人復過河北搶劫察罕諾們汗牲畜並殺傷男婦十數人現已前往趕辦據稱察罕諾們汗不能抵禦亟需另籌防河事宜等語青海野番滋事前據長齡等奏報大

加勦戮黃河以北全就肅清並籌議善後章程賞給察罕諾們汗等銀兩以資防守彼時該督等所保人數過多朕因其辦理迅速概予准行並未斥駁一人其所議章程亦著准令照辦乃撤兵甫經兩月該番賊復過河北搶掠可見前次辦理不善所奏該處地方全就肅清之言竟不可信即此次具奏野番一千數百人殺傷男婦十數人亦恐不止此數前因該蒙古等不能固守藩籬該督以察罕諾們汗移居助勒蓋一帶足資防守每年賞給銀兩置備口糧其向年會哨之兵即行停止今又稱察罕諾們汗不能抵禦另議防河是長齡於此事毫無把握致前後所奏自相矛盾該督現已前赴西甯著即會同松廷督兵妥速勦辦務期邊圉迅就肅清俾番賊知所儆懼不敢再出滋擾尙可稍贖前愆倘仍辦理不善致番賊於撤兵後又復前來肆行搶掠擾及內地惟該督等是問恐不能當此重咎也 庚午

上諭軍機大臣等那彥成奏遵旨前赴西甯查辦番賊復出肆掠一案據稱察罕諾們汗即係白佛僧亦即蒙古二十五旗之一原牧在循化邊外後移居黃河之南今又潛往河北時與野番勾結爲奸移之則驅而爲賊留之則引賊作賊所論甚是那彥成於野番情形熟悉著交那彥成辦理必須籌畫萬全妥爲安置勿使仍前窩賊分贓方稱至善其匿名揭帖字識務向各營汛訪拏正犯到案如比對筆跡確有可憑雖該犯訐告得實亦按律治以應得之罪至所謂現屆九月西甯地方正值大雪封山之時未便議剿惟嚴飭各提鎮查明各卡隘山口額定兵數照例支給口糧柴薪派令副參等官帶兵赴各卡隘分紮駐守各提鎮來往會巡嚴密稽查使野番無由闖入內地並盤查漢奸代爲銷贓禁止商民私販茶葉火藥以防爲剿等語該野番本係烏合之衆糾聚搶掠祇爲謀食果能實力防制使之無以

爲生日久漸形窮蹙正可不剿自潰著即照那彥成所奏辦理儻察看情形必須進剿俟明歲春融時再厚積兵力痛加剿辦斷不可存畏難苟安之見惟青海蒙古王公台吉等臣服已久迥非外夷可比若如那彥成所奏僅將各沿邊卡倫移駐官兵防守竟置該蒙古等於不問該野番等或於秋冬閒乘隙往彼搶掠以致該蒙古不能自存亦非安邊撫馭之道況青海一帶爲通藏要路去年即有進貢堪布被劫之事如該野番等故智復萌道路稍有梗阻殊屬不成事體那彥成亦不可不爲籌及也 八月初九奉

上諭那清安等奏兵部當月司員付送新疆文移等項於巴里坤黃布口袋內拆出匿名揭帖一紙並未粘封謹將原帖呈覽一摺據揭帖內稱陝甘總督長齡等查辦青海番賊一案甫經凱撤官兵旋有賊番復出約二千餘人分作四股肆行劫掠該管大員並不派兵堵剿

等語青海番賊滋事前派令長齡齊慎前往查辦旋據奏稱帶兵剿除黃河以北全就肅清並移住富強蒙古番子以資防守籌議善後章程八條俱照所請飭行在案茲復有字識匿名揭帖其所稱賊番肆掠情形有滋擾月日及經過地方並搶劫馬牛羊數目如果屬實是長齡等前此奏報肅清盡爲虛捏殊出情理之外但揭帖內究係一面之詞亦難遽信那彥成接奉諭旨著即馳驛前赴西甯嚴密確查據實具奏此事關係邊疆重務不可稍有瞻徇隱飾況營馬搶去三百餘匹之多必不能掩人耳目原揭帖一件發交那彥成閱看並於該處營汛內查訪字識係何人造寫一經訪有端倪即拏獲到案比對筆跡務得確實以憑根究至陝西巡撫印務著交唐仲冕暫行護理其未經審結各案交辛從益審辦盧坤現已補授廣西巡撫著即赴陝西署理巡撫印務俟程國仁到任後再行交卸起程來京請

訓再前據長齡等奏助勒蓋一帶即令察罕諾們汗移居克克烏蘇一帶飭回阿里克大百戶住牧均各給予執照並於冬春兩季賞給該諾們汗及阿里克大百戶置備口糧銀各一千兩已降旨依議行矣朕近聞河北蒙古二十五旗內該察罕諾們汗較爲富強其在游牧處所往往首鼠兩端當大兵經臨之時即督率番族依附官弁及大兵撤退之後仍復勾結野番乘閒搶劫實屬不安本分那彥成於青海情形較爲熟悉著一併密行訪察該諾們汗旗下現在有無勾結滋事之事查明設法妥爲安置務令安居游牧邊圉靖謐方爲妥善將此諭令知之欽此 十月己酉

上諭軍機大臣等那彥成奏確查青海現在情形並酌安卡隘嚴拏漢奸一摺據稱長齡勦辦野番屢獲勝仗所奏尙非虛捏惟撤兵太早且察罕諾們汗實係野番中禍種雉媒長齡反爲捍護草率輕忽已

明降諭旨將長齡撤去雙眼花翎准帶單眼花翎仍交部議處矣野番冥頑成性蒙古虐其屬下其屬下反投野番謀生因導引搶掠其主至內地歇家奸販貪利潛往貿易無事則教引野番漸擾邊境有兵則潛與報信近年番勢漸張弊實在此蒙古回民漢奸皆能爲番子衣冠始僅句結鄉導繼或冒名肆掠欲除外患自應先絕內奸其西甯之丹噶爾哈拉庫圖及歸德循化巴燕戎格各屬回漢民人並熟番私販茶葉火藥口糧潛往貿易者悉屬漢奸至各屬蒙古番子歇家擇山僻處所私開小店銷變贓物亦所不免此等回民熟番與內地奸民搶劫成風甚屬可慮那彥成所奏乃正本清源之道然必須辦理周妥計出萬全以期一勞永逸不可稍有疏失其請分飭提鎮查明毗連番地卡隘通衢要路酌增防兵多不過百名山僻小路增防兵二三十名其路徑叢雜即挖斷以防偷越野馬川一帶暫駐

備兵數百員名俱照所議行儻番賊仍前占踞明歲春融即厚集兵力痛加驅剿至屯田一節俟河北肅清後再行妥議再奏

十一月丁丑

上諭軍機大臣等那彥成等奏擒獲搶掠撲卡之蒙古番子審明正法並籌定各章程一摺所辦均是此次賊番百餘人撲番窩卜圖卡經那彥成督飭署遊擊丁玉柱率領官兵奮勇直前傷斃賊番十餘名生擒二名現據訊明正法又守備愛隆阿因聞知賊番搶劫趕至黑河東岸槍傷十餘名淹斃無數出力弁兵俱著該督等分別記名獎賞鼓勵至甘涼肅州所屬邊地請撥兵分安各要隘其河南循化貴德兩廳屬請派兵嚴密巡防又河州鎮屬二十四關添設卡兵俱著照所請辦理惟沿邊移駐官兵係一時權宜之計日久恐滋糜費務須於春融後剿捕肅清即行裁撤至西甯各城內向設官歇家容留

蒙番近復於山僻小路分開私歇家銷贓易糧私買軍火自應嚴行查禁嗣後城關歇家無論官私一律造具花名清冊並循環印簿由地方官詳報備查其各旗蒙古請票易糧每糧一石配茶二封著於糧票內註明如買糧不買茶及無力糧茶並買俱著由西甯辦事大臣衙門酌給印票填註數目如有浮冒請領者查明治罪又河南安分生野番族易買糧茶即著各寺喇嘛並各族曉事番子報明戶口計買均照蒙古之票辦理就近在貴德循化廳營呈請如番族中有作賊者即不准代請現在占據河北野番俟歸河南方准請票易買糧茶仍著該督等速籌章程趕緊辦理所有西甯辦事大臣額設通事日久滋弊著即全行裁革遇有案件由各衙門傳喚應差儻查有舞弊者即從嚴治罪至察罕諾們汗窩賊分贓已久斷不可姑息容留如能將屬下賊犯按名擒獻遷回河南原牧尚可貸其重罪若稍

涉抗違明春即行勦辦所有長齡原請每年賞給察罕諾們汗及阿里克銀二千兩之處即著停止其占住河北野番亦多作賊之人俟查有實在情形即行具奏又另片奏據署永安營遊擊之都司周佐勝等擒獲麻木溝一犯已供認多案著窮究黨與務盡根株都司周佐勝等俟定案時奏請鼓勵出力兵丁酌予獎賞至此案匿名揭帖人犯尚未得有確據著嚴密查訪務得私拆口袋裝入揭帖之人查出端倪磨對筆跡嚴行懲辦毋稍枉縱 十一月丁未

上諭軍機大臣等陝甘總督那彥成等奏察罕諾們汗率屬悔罪願歸河南原牧現押令過河並妥爲清理安插一摺察罕諾們汗夥同野番勾結漢奸作賊已久此次經該督將糧茶斷絕立見窮蹙願歸原牧不勞兵力不延歲月易於反掌辦理認真實屬可嘉之至該諾們汗既已悔罪投誠自可寬其一線其屬下頭目人等向不遵約束自

應加以嚴懲經該督將同來之圖薩拉克齊小完冲等重責鎖禁斥革並將該旗所管二十族分爲左右兩翼照該旗蒙古舊例每翼設員管束稽查擇誠實頭目另行充補其諾們汗獻出之搶劫蒙古賊犯丹達勒等三名業經分別懲辦並委署副將劉印景等押令渡河惟渡河以後必須妥爲安插俾統束嚴明互相鈐制令搶劫故智不敢復萌方爲經久善策不可將就蕝事以致別滋事端又另摺奏清理河南番族並河北賊番情形現在河南循貴賊番尙知安分自應趁其畏懼之時立法約束該督現傳到各番衆面加曉諭如各族內有逃至河北句結賊番者即著擒獻毋許隱匿其河北野番過河以後查係伊等族內之人自行管束如係漢奸立即捆獻所有各番族頭自准其按計戶口百戶一人每管百戶至三百戶歸一千戶管理百總一人每管五十戶兩百總歸一百戶管理十總一人每管十戶

至五十戶歸一百總管理令其公舉誠實公直之人充補其千戶等著照例給予頂戴俟三年無過發給印照號紙作爲實缺至易換糧茶章程每年准買兩次由千戶給呈該廳營給予照票如實係良番方准發鋪照買所需布線等項亦於票內註明一同換買此時河北野番勢成孤立該督仍嚴查卡隘糧茶趕籌肅清至河北番族應趁其過河之時查明安插均著照河南之例辦理俾不致疑懼該督仍察看情形再行妥議具奏又另摺奏審擬漢奸盤踞務盡根株並籌定巡防會哨及稽查山內保甲章程首犯麻木溝經該督等嚴訊多在甘州之邊境野馬川一帶結黨盤踞其中之野牛溝八寶山等處產有金砂奸民潛行偷窆現據該督全行封禁窯洞窩鋪概予填塞拆毀所辦甚是其所請提鎮副叅帶兵會哨道府州縣編查保甲俱著照所議行至麻木溝等犯著暫緩正法俟續拏餘黨逐案質審再

行辦理又另片奏漢奸私歇例無明文著照所請嗣後西甯地方拏獲私歇家除審有不法重情實犯死罪外其但在山僻小路經年累月開設私歇家者將爲首之犯照私通土苗例擬發邊遠充軍爲從之犯擬杖一百徒三年所有現獲各犯卽照此例嚴辦 戊辰

上諭內閣那彥成奏玉舒番族每歲馬貢折銀請循舊例交納一摺青海大臣衙門所管玉舒番族向有馬貢折銀由該番目自赴西甯交納嗣於乾隆三十一年改派主事通丁前往催收各番族供應較繁殊滋擾累那彥成等請循照舊例辦理用示體恤著照所請嗣後此項貢馬折銀著仍循舊例責令該總管千百戶等照數湊齊於每歲九月間交該處貿易番目自赴西甯交納仍著青海大臣會同西甯鎮派員兌收貯庫所有主事通丁催徵之例永行停止至該主事前往會盟之年如有自備土儀致送番族及客商私帶貨物一併查明

甘肅新通志

卷首之二

十五

究辦以除積弊 二年癸未正月癸酉

上諭軍機大臣等那彥成等奏河北野番及察罕諾們汗全數回巢並酌移河南四旗蒙古各一摺青海黃河以北屢經番族占據察罕諾們汗一旗復勾結漢奸夥同搶掠經那彥成等設卡防堵斷絕糧茶並訪獲漢奸巨盜及偷窆金沙各犯分別懲治現據察罕諾們汗稽顙乞命所屬蒙番全數押回河南貴德原牧各族野番勢已窮蹙自可寬其一線惟河北不可復留野番一人使漢奸蒙古無可假借方爲正本清源之道所有偷住河北之貴德循化各番族共一萬七八千人現已全數回巢著該督等派委幹員卽將河南各族野番逐一編查設立千戶百戶等分別管轄仍各按戶口與蒙古一律易買糧茶由各族千戶就近代爲請票如有爲匪不法及偷渡河北之人卽不准請票易糧並著於野番南渡時查明本係何族卽交該族千百

戶遞管安插各處渡口分派把守儻有一人私渡即將該千百戶一律治罪該番族經此次懲創之後管束既嚴門戶亦別其勢愈分其力愈弱自屬一勞永逸之計其請將該番族比照玉舒番子之例立定貢馬章程於約束之中仍寓羈縻之意著妥議章程具奏至另摺奏河南四旗蒙古札薩克郡王達什仲鼐等較河北各旗稍爲富強因屢被野番賀爾族侵掠不遑安居請遷居河北助勒蓋一帶酌給口食並派循貴營員沿途護送等語該四旗蒙古遊牧河南已久此時若令移居河北是先示番賊以弱如移駐後該蒙古不能自固藩籬或番賊復行渡河搶掠仍恐不能相安此事務當籌畫萬全不可輕議更張致將來又滋流弊其河北原住二十四旗蒙古除台吉恩開巴雅爾一旗尙堪自衛外餘二十三旗札薩克大半避入內地並有散處邊內插帳住牧及沿途乞食者自應妥爲安置所有各旗蒙

古散失戶口著該督即飭令各府州縣於編查邊內居民保甲時查明該蒙古姓名旗分分起押交各該旗王公台言領回住牧其實係窮苦無依者如捐償口食銀兩尙有不敷即著奏明酌發賞需以資接濟該督等務須妥爲經理使內地不得存留蒙古亦不使蒙古界內私藏漢奸婢各安生業永靜邊陲方不負委任 三月壬寅上諭軍機大臣等那彥成等奏據循貴文武各委員將回巢之察罕諾們汗屬下及野番各族逐細編查已查出歷年搶竊官馬贓物及熟番婦女現將渡口交各番頭目看守並遵旨將河南四旗蒙古仍留原牧等語回巢各番散處河濱欲其不渡河北全在地方文武員弁實力稽查周詳妥善俾野番自當懾服乃可歷久相安那彥成等此次督飭查辦河北實已肅清其叩頭悔罪看守渡口之番目等承充戶總並未賞給頂戴亦未另予賞號俟一二年後如果野番絕跡再

行奏請賞給頂戴並著嗣後責成西甯鎮道於春秋二季輪往循貴點驗門牌戶口如有一戶逃亡即向該管戶總嚴追下落儻係潛渡河北詢明住所飛報西甯大臣總督衙門立往擒拏嚴切究辦編查番族爲邊疆要務那彥成等務當按照奏定章程飭屬奉行勿怠不可日久視爲具文以致番族覬覦復行偷渡也 庚午

上諭軍機大臣等那彥成等奏請定商民與蒙古貿易章程並封閉邊外金廠西甯涼州等處向來商民攜帶貨物由西甯辦事大臣衙門給票出口徑赴蒙古遊牧貿易旣不指定地方去來亦無期限以致漢奸混雜並夾帶違禁器物於邊陲大有關繫惟念蒙古以遊牧爲業若將羊客禁絕誠恐生計日艱如漫無稽查又復諸弊叢生該督等請嚴立章程明定地界自應如此覈實辦理嗣後無論何州縣羊客與河北蒙古及河南蒙古番子交易即以現走地界爲限不許輕

赴蒙番遊牧處所收買至甘涼肅州羊客准由野馬川沿邊一帶行走先行報明西甯辦事大臣衙門分別發給大票小票逐一註明嚴定期限由西甯府知會各提鎮飭知守卡弁兵據實查驗毋許浮冒其蒙古羊隻每年定以四月至九月按照指定處所售賣事竣不准逗遛以杜弊端至河南番族出售羊隻並飭循貴兩廳於貿易時照給票之例辦理此外甘州之野牛溝肅州之赤金湖等處向有漢奸偷窆金砂現經該督等嚴拏查禁惟大通縣屬之札馬圖官金廠該匪徒等難保不乘閒潛往開採著即嚴行封禁所有應納正撒課金二十八兩零即停其交納此項人夫糾聚已久該督等務須妥爲安插無致流而爲匪倘經理不善仍有匪徒溷跡偷窆致生事端惟該督等是問 辛巳

上諭內閣那彥成等奏請賞給野番各族千戶百戶百總並防河蒙番

青稞一摺循化貴德野番向係分族而居本無統束故易於偷渡河北散漫無稽現據那彥成等編查戶口分立千戶百戶百總令其遞相管轄稽查各族番子易買糧茶由該千百戶等代爲請票遇有爲匪不法者責令擒獻究辦茲該督等奏稱野番之千百戶等現在均知管束番衆復獻貢馬察其情詞肫懇洵爲懾服歸誠自當量予恩施所有該番目等果能始終不懈著每年千戶一名賞給青稞十二石百戶一名賞給青稞八石百總一名賞給青稞四石至循貴黃河渡口二十處責令察罕諾們汗旗下圖薩拉克齊等及野番千百戶等把守亦當分別賞罰以示勸懲其最要渡口如果一年無偷渡之人賞給青稞二十石次要渡口賞給青稞十五石又次要渡口賞給青稞十石儻防守疏懈致有偷渡又匿不舉報者查出由何渡口偷渡即將把守之圖薩拉克齊及千百戶等斥革嚴辦該野番千百戶

及防河圖薩拉克齊等經此次特加優賚生計有資當知感知畏認真效力方得長邀恩賞也懍之 五月乙未

上諭內閣那彥成奏酌支西甯防兵行裝分例一摺西甯口外新設換防官兵前經該督奏明按年更換除沿途應需鹽菜車輛等項並官員借支俸銀均照新疆換防舊例辦理外所有兵丁行裝一項該處氣候較寒向無兵房棲止每兵一名著准其暫給銀五兩俾禦寒有資以示體恤俟兵房修建完竣仍照舊支銀三兩附入新疆防兵案内一併報銷 七月癸未

上諭內閣那彥成奏換防兵丁中途水淹衝失軍裝銀兩分別辦理一摺甘肅甯夏鎮各營派往烏什阿克蘇換防官兵行至中衛縣屬地方猝遇暴雨山水陡發淹斃兵丁趙連登李得勝王得喜車夫徐自信石萬倉五名又衝失軍裝包十七箇帶解防所及車價銀九百四

十兩零據該督查明經該縣將被水兵丁按名捐給口糧並墊給行裝車價銀兩剋期前進加恩著照所請此項墊發銀兩軍裝准其在藩庫動款補製還墊毋庸於該兵丁等月餉內扣繳賠補其淹斃兵丁等五名著每名賞銀五兩以示矜恤 十月庚子陝甘總督那彥成奏蒙番回衆均極安謐並將公呈譯奏

上諭曰蒙番回衆果能長此畏威懷德邊徼無事則是長齡同卿莫大之功也嗣後仍當隨時留意相機料理以期永靖邊陲慎勉而行
四年甲申三月辛卯

上諭內閣陝甘兩省綠營馬兵前經奏准酌減十分之一茲據那彥成奏查明肅州鎮屬之安西沙州靖逆三營及巴里坤鎮原設馬內向有摘缺緩補不足一兵一馬之額若照兵裁馬於各該營巡緝差操實屬不敷應請免照兵數統裁等語著照所請准其於安西沙州靖

甘肅新通志

卷首之二

十九

逆三營裁馬六十一匹巴里坤各營裁馬七十九匹所有各該營實存馬匹該督撫隨時點檢毋許稍有短缺俾資操防 十月癸亥上諭內閣那彥成奏酌增青海酬賞銀兩一摺西甯辦事大臣衙門額設酬賞銀一千兩現據該督查明每年辦理蒙古番子事務及巡查兵役並緝拏賊匪均須厚賞鼓勵需費數倍於昔額設之項實屬不敷該管大臣因措辦維艱支用養廉殊非經久之道自應量爲增益俾資辦公著照所請於司庫存貯各屬舊草變價款內提出銀二萬兩發交西甯府就近發商生息按年一分可得息銀二千兩以一千兩解繳司庫統限二十年歸還原款以一千兩解交西甯道支供青海酬賞之需仍由青海衙門歸於酬賞案內造冊咨部覈銷

十一月庚寅

上諭內閣那彥成等奏酌派總兵巡哨番地並派兵防河一摺河北蒙

古游牧地方水草茂盛現值冰橋凍結之時野番尤易偷渡雖設有防河千百戶等仍須官兵巡緝據該督等奏除照上年防河章程派撥西甯河州二鎮屬兵丁四百名選派將弁數員分布河干防範外並酌派西甯河州二鎮各帶弁兵百名親赴番地抽查保甲遊巡渡口至冰橋融化後再行撤回辦理甚屬周密著該督等嚴飭該鎮認真會哨隨時稽查毋任該千百戶等稍有疏懈以杜奸萌而靖偷渡不可有名無實日久視爲具文也 五年乙酉二月癸亥

上諭內閣那彥成奏會哨事宜請專責成一摺甘肅沿邊一帶山多路雜每年每季令提鎮大員等前往會哨自應實力巡查據該督奏稱近來會哨各員往往憚於跋涉即由平坦大道前行誠恐日久偷安漸致有名無實著照所請嗣後每年每季會哨時於派定地方後即責成甘州提督就近實力稽考如有任意怠玩者由該提督揭報著

該總督隨時指名叅辦仍令不時派人密查儻有前項情弊提督不行揭報即一併嚴叅統俟一年會哨完竣再將有無潛匿漢奸偷竄金沙之處於次年春閒令該提督自行彙奏以重邊防 六月戊辰上諭內閣那彥成等奏邊要地方請撥添弁兵增設塘汛一摺甘肅西甯鎮屬之康家寨堡爲漢回番民雜處之區且山後插帳野番往往勾結熟番乘閒出沒地方最爲緊要據該督等查明該處舊設弁兵除分撥屯防守卡分巡外該營堡存兵無多不足以資防緝著照所請准其在該鎮屬標路各營抽撥經制外委一員馬步守兵五十名連原設額此外委馬步守兵共有一百一十五員名於控制緝防兩有裨益其巴燕戎格廳屬之日蘭木地方爲河北渡口要津南岸野番尤宜加意防範並著准其於該處添設塘汛一處就近派撥巴燕戎格營外委一員兵十名隨時更換稽查務期周密毋得日久生懈

餘著照所議辦理 七年丁亥十月庚辰

上諭內閣前據鄂山奏甘肅應付兵差及協濟軍需各州縣恩免六年七年錢糧請將六年應免新賦改免通省未完舊欠當交戶部速議茲據奏稱前此加恩係因承辦軍需資用民力之州縣並非普免本省錢糧該督所請將應免道光六年新賦改免通省自嘉慶二十三年至道光五年積欠互相比較計與通省應免新賦銀數尚有減無浮惟舊欠糧草較之新賦滋多且內有未辦兵差及不應全免之各州縣尙應分別剔除等語甘肅省地多磽瘠戶鮮蓋藏自上年軍興以來該省爲新疆門戶軍行絡繹供頓綦繁雖一切皆取給帑項而應付車馬採辦軍需不無借用民力在應予恩施之州縣固應將業戶編氓一律體恤即不辦兵差之地方皆得戶免追呼藉資培養亦損上益下閭澤覃敷之道著照該署督所請六年分應免一年錢糧

甘肅新通志

卷首之二

二十一

改將嘉慶二十三年至道光五年通省民欠未完地丁正項銀二十一萬八千餘兩耗羨銀三萬一千九百四十餘兩馬廠租息雜賦銀一萬三千八百四十餘兩正糧六十八萬二百一十餘石耗糧一十萬二千三十餘石番糧學租一千三百九十餘石本色草五百八十九萬三千餘束全行蠲免其七年分應蠲應減各州縣仍遵前降諭旨分別辦理內有已經徵收者查明截數准其劃抵下年錢糧賦課至六年分已輸在官銀糧草束仍著儘數報撥並將未完之項照數催徵該署督當將各州縣應免積欠銀糧草束細數造冊報部備查仍將此旨刊刷謄黃宣示城鄉村鎮咸使聞知俾免官吏胥役影射重徵致滋弊竇以期膏澤下究用副朕普惠閭閻至意該部即遵諭

行 庚子

上諭軍機大臣等據戶部奏甘肅地處極邊儲備尤關緊要向係額貯

銀三十八萬兩分貯銀二十二萬兩爲數本少節經動用所存無幾請於藩庫貯銀二百萬兩先在山西秋撥地丁款內撥銀五十萬兩解甘收貯其餘於陝西河南山西山東湖北及甘肅捐監應解部銀兩並該省舊貯實存銀兩共陸續湊足二百萬之數責成藩司加謹封貯不准率請動支等語藩庫封貯銀款原備地方緩急之用甘肅地鄰邊塞自應豫籌經費以資儲備惟該省舊存封貯銀兩久經動缺未能歸補足額亟須寬爲籌畫著照所請先於山西省秋撥地丁項下動撥銀五十萬兩解往甘肅收貯其餘銀兩著陝西河南山西山東湖北各該撫將所收監餉每湊足五萬兩即行奏明改解甘肅藩庫交收其甘肅所收監銀亦無庸解部每湊足五萬兩即奏明儘數歸補封貯總俟該省藩庫共收足二百萬兩之數即由該督奏請停止仍著各該省將監銀照常解部交納此項銀兩隨時解往著責

成該藩司顏伯燾加謹封貯若非實有要需概不准率請動用儻有絲毫挪缺必當按律嚴懲仍著該督按年盤查奏報以憑稽覈將此諭知鄂山傳諭顏伯燾併諭徐炘楊國楨福綿琦善楊健知之

八年戊子六月己卯

上諭內閣軍機大臣等會同長齡議覆那彥成等奏增設防兵通盤籌擬一摺前因回疆甫經平定暫添防兵八千名合之舊設防兵共計一萬餘名分布各城以資守禦現在首逆就誅邊陲安謐那彥成等體察情形請於伊犁滿兵及綠營兵內共減兵一千五百名以節糜費著照所擬辦理其喀什噶爾新設總兵著將甘肅涼州鎮總兵一缺改爲該處換防總兵班滿三年由參贊大臣奏請簡派應行增設副將等官著那彥成等妥議具奏現在涼州鎮總兵哈豐阿著留於甘省交該督差委俟有缺出請旨簡放其涼州鎮總兵營汛即以甘

肅莊浪協副將移駐該處以資統領並將涼州中營遊擊移駐莊浪至涼州既改鎮爲協應裁汰額兵一千五百名分撥甘肅督標及河州鎮標各營一切事宜著該部行知陝甘總督照例辦理至口外換防官兵向係儘陝甘兩省口內外十四營派撥從前內地派兵換防故習大半以衰老充數到戍後復准告駐一兩班至三班不等以致虛糜糧餉嗣後該管督撫提鎮等務須認真挑派兵丁內年逾四十者卽不准換防其班滿告駐陋習著永遠禁止並著參贊大臣等務將派往之換防兵丁加意操演俾得悉成勁旅以歸實用此項換防兵丁三年後應酌減二千名五年再減二千名屆時何城應減若干或有暫難裁減之處由參贊大臣等酌量奏辦現在留駐均係前次出征官兵已經三載著陝甘總督自本年秋季起按照現定數目分三季派遣前往更替此後仍循五年舊例分三班更換以期經久餘

甘肅新通志

卷首之二

二十三

俱照所議行 七月丁未

上諭內閣昇寅等奏籌議調劑甯夏滿兵事宜一摺甘肅甯夏滿兵舊有私幫私借二款現經昇寅等查明飭禁該營幫差公項不敷自應量爲調劑著照所議於通益庫現存馬價銀內提借銀二萬兩交甯夏發商按年一分生息每年可得銀二千兩以五百兩歸還原款以一千五百兩加幫差務俾免苦累至該處滿兵除月支錢糧外別無生計情形不免竭蹶著加恩照綠營豫支餉銀成案於每年歲底豫支次年餉銀一萬一千三百四十四兩按馬甲二千二百名每名借給四兩步甲養育兵匠役一千二百七十二名每名借給銀二兩於次年二月至十一月按十箇月扣還該署將軍卽將生息項下應行加幫差務各款逐一詳覈咨部立案以便年終報銷其豫支餉銀著咨會陝甘總督自本年年底爲始遵照辦理仍俟生息馬價歸款後

由馬價項下借給將豫支餉銀停止 九月丙寅

上諭內閣穆蘭岱奏請與西甯鎮一體校閱營伍一摺西甯辦事大臣向遇軍政之年會同該督出考舉劾並不閱看官弁騎射平時亦不督同操演茲穆蘭岱因接奉前此訓飭新疆各城大臣勤加操練諭旨請督同西甯鎮一體閱伍尙爲覈實起見著照所請准其督同該鎮隨時勤加訓練每遇軍政之年閱看副將以下官弁騎射再行出考以符名實

九年己丑二月丁未以平定回疆勦擒逆裔告成太學

命勒石於大成門外

御製碑文曰征而滅之謂之勦生而致之謂之擒命將出師聲罪致討此可必得之數也戟手張拳生纍駢繫此不可必得之數也矧旣已遁逃而猶望其自投羅網尤難之難矣乃失之而復得之且生得之

甘肅新通志

卷首之二

二十四

此豈人力哉

天也逆回張格爾者爲薩木薩克之子自稱係和卓木後裔嘉慶二十五年沖巴噶什愛曼布嚕特比蘇蘭奇與張格爾糾煽回衆殺傷卡倫官兵欲圍喀什噶爾經官兵擊敗張逆等竄逸道光四年張逆復糾合回衆夤夜搶卡官兵殲獲助逆賊目張逆復遁五年差人詐降句結四百餘人爲亂因奈曼部落不從仍復竄赴薩雅克部落句結汰劣克等同來喀什噶爾滋事巴彥巴圖帶兵出卡遇賊接仗中槍自刎朕諭慶祥往喀什噶爾督同永芹辦理勦捕事宜旋因永芹病沒以慶祥爲喀什噶爾參贊大臣六年六月張逆率安集延布嚕特五百餘人夜由開齊山路突至阿爾圖什回莊衆回從逆者多分股搶城臺路斷絕所調援兵路梗未能猝赴英吉沙爾葉爾羌和闐旣分兵應援存城兵少賊勢猖獗各城紛紛告急烏什阿克蘇二城亦

俱戒嚴朕遂授長齡爲揚威將軍楊遇春武隆阿參贊大臣先後調派吉林黑龍江官兵三千名各路官兵三萬二千餘名又簡派巴圖魯侍衛章京等馳往帶兵進剿隨頒發硃諭十條指授機宜而賊匪擾至阿克蘇渾巴什河南岸屯聚伺隙躡渡經長清達凌阿巴哈布等督兵晝夜嚴防兩路夾擊殺賊甚夥賊首奔竄追斃之楊芳搜剿柯爾坪從逆賊匪殲戮殆盡七年長齡等於二月初六日統大兵進剿二十三日至洋阿爾巴特甫經接仗賊勢披靡布魯特俱奔竄二十五日進至沙布都爾莊兩次鏖戰擒戮賊匪數萬二十八日進至阿瓦巴特回莊三次續獲勝仗三月初一日克復喀什噶爾張逆先已乘間竄逸長齡留喀什噶爾楊遇春等帶兵進剿英吉沙爾葉爾羌以次收復楊芳分剿和闐亦復克其城朕以四城雖定逆首未除諭長齡派兵各要隘安營務確探張逆蹤跡期於必獲五月長齡奏

甘肅新通志

卷首之二

二十五

張逆在木吉地方潛匿飭安福等出卡追捕添調楊芳督辦張逆復竄拉克沙地方檄令喀拉提錦部落助剿時朕諭楊遇春來京入覲楊芳授爲參贊大臣長齡奏請仍留喀什噶爾朕允其所請並諭以張逆勢雖窮蹙難保其不復來窺伺該將軍等當嚴加防範設法剿擒張逆果於十二月二十七日潛由開齊山路入卡長齡楊芳分統將領連夜剿捕追及於喀爾鐵蓋山兩路並剿衆賊逃竄張逆僅賸賊黨十餘人情急將自絕頸總兵胡超等奪刀生擒之餘賊殲戮無遺隨將張逆解大營檻送闕下獻俘長齡等紅旗報捷閱二十日遞至京師爰錫封長齡爲威勇公楊芳爲果勇侯其餘將士升賞有差朕思回疆自

皇祖高宗純皇帝平定以來休養生息六十餘年彼回衆踐土食毛無不感承

聖化乃張格爾以逆裔遺孽招集沙蟲之族潛行梟獍之謀朕何敢不
導揚

先烈勉迪

前光是役也擒渠於萬里而遙奏績於一年以內儻脅從之衆一鼓就
殲而煽惑之魁隻身遠遁事未稱爲盡善功猶墮於垂成且逆首或
畏罪自戕或拒追被戮雖伸國法未快人心是旣得而猶未得也今
則飛蛾赴火自蹈危機臨陣生擒束手就縛與檄諭外夷設計獲獻
者厥功尤偉然此豈人力所能爲哉罪人斯得

天奪其魄也我武惟揚

天之所助者順也禮曰執有罪告成於學故據事書之繫以銘曰惟我
皇祖拓土開疆大小和卓自取滅亡背恩反噬敢肆鴟張爰敕將帥翦
彼狻猊二酋授首獻馘廟堂懾

甘肅新通志

卷首之三

二十六

威懷

德綏靖遐荒濟惡作奸薩木薩克遂匿深藏苟延喘息弗忍加誅投畀
有北逞其詭謀爲鬼爲蜮助虐者誰狼心叵測曰安集延曰布嚕特
根株弗斷滋蔓難圖蠢張格爾甘自速辜巧營三窟雄長一隅窺邊
越卡常若覬覦有時擊敗窘若囚拘乘閒而遁終爲逃遁煽亂游魂
稽誅遺孽搶占城垣棄離巢穴虺毒豺兇蜂屯蟻結竟抗顏行羣效
據竊前圍後攻左牽右掣燎之方揚如火烈烈恭行

天討詰爾戎兵卜云其吉命將邁征三戰三捷克復四城以少勝衆猛
助軍聲狡哉鼠竄惜死偷生神人共憤星埽欃槍窮猿投林枯魚泣
釜遯跡莫偵孰襲而虜自夏徂冬以防爲堵彼若不來我焉能取惟
天不容俾罹綱罟故智復萌餘勇欲賈霜鋒雪甲桓桓我師賊棄馬走
高山屣屨揮弓閃電激矢風追逆渠生縛援戈而麾自我勦之自我

擒之堂堂正正邊定西陲將軍長齡首功懋賞參贊楊芳壯猷優獎
爾公爾侯用褻忠讜大小臣工恩波浩蕩押獻戎俘乂安邊壤紫閣
銘勳凌煙畫像凱歌除夕慶洽元辰萬方送喜九寓同春肇應靈序
允惠黎民如

天之福如

天之仁告功太學勒碑成均嚴恭寅畏

天命懍遵 十年庚寅三月丙申

上諭內閣兵部議覆楊遇春奏籌款生息增設甘肅涼州莊浪滿洲營
餘兵請照該省駐防滿洲營閒散酌補附近綠營兵缺可期行之久
遠著該督即於涼州莊浪二處綠營額兵內酌量馬步之多寡均勻
挑補二成以資調劑其所請籌款生息增添餘兵之處著無庸議
十二年壬辰七月乙巳

甘肅新通志

卷首之三

二十七

上諭軍機大臣等前據楊遇春等奏貴德卡外思昂拉番族搶劫派用
撒拉回民彈壓摻捕朕思撒拉回民賦性獷悍向來卡外小有不靖
從未派令前往拒敵當降旨令楊遇春將此次派用撒拉回民究係
何人主見據實覆奏茲據奏恆敬酌派回兵前往後始行札知該督
是此派用撒拉回民自係恆敬一人主見不知事體之輕重實屬冒
昧著傳旨申飭嗣後如有卡外搶劫等案不得派用回民仍令報官
查辦以杜流弊 九月癸丑

上諭內閣楊遇春等奏番賊偷渡搶劫拒傷官兵現設法查辦一摺此
次河南賊加咱等四族瞻敢於噶布古僻靜沿河地方紮筏偷渡將
附近各旗牧放牲畜肆行搶掠當經駐防都司甯顯文帶兵往捕致
被拒傷官兵適統領防兵永安營遊擊冉貴帶兵在卡巡查遇賊接
仗殺斃數賊奪獲牛羊三千餘隻現飭弁兵分路摻緝遊擊冉貴係

統領防兵之員於賊番偷渡失於防範未能先事覺察都司甯顯文帶兵往捕不知慎重致傷官兵均有應得之咎著一併交部議處該督等即飭署河州鎮總兵副將馬鳴謙帶兵五百名督統循化貴德二廳營酌帶馬步兵三百名親赴防所督飭追緝並著落該管千百戶勒獻正賊將搶掠牲畜悉數呈繳所有拒捕賊番務期按名弋獲盡法懲治毋使漏網冉貴甯顯文仍責令帶兵上緊摻捕俟完案後再同失察之該管千百戶及傷亡官兵另行分別辦理

二十三年癸卯四月乙酉

上諭軍機大臣等富呢揚阿等奏西路官兵捕逐番賊連獲勝仗情形一摺西甯野番竄至青海地面分股肆擾經該督前赴西甯會同法豐阿相機籌辦並派提督周悅勝等帶兵勦辦副將慶和等於距紅溝口三里許之大岔山地方追擊賊匪殲斃七十餘人復偵探另股

甘肅新通志

卷首之二

二十八

賊匪分兵馳往加攻槍斃二十餘人奪獲鳥槍馬匹現在該督酌帶官兵移駐察漢托洛亥防所遙作聲援俾各提鎮帶兵前進後路不至空虛所辦甚好其甘涼肅等處扼要口隘著一律嚴密防範如有賊番竄至立即堵截防勦毋稍疏虞又另片奏蒙古盟長及番子百戶等挑補蒙兵番兵隨同進剿該蒙古等深明大義踴躍急公自當准其隨營効力惟卡外地險路遙我兵不值窮追深入務使該賊番畏懼兵威不敢再至近邊滋擾並可酌量撤兵即蒙古番兵亦可隨時裁撤辦理方爲妥善又另片奏代理永安營遊擊龍盛友將零股番賊三十餘人殲斃淨盡著准其量予獎勵阿里克番目多銳帶兵迎擊首先殺賊著加恩賞給六品頂戴並賞戴藍翎所有此次進剿出力各員弁著該督等於事竣後擇其尤爲出力者酌保數員候朕施恩毋許冒濫 二十四年甲辰二月丙午

上諭內閣戶部奏請將甘肅新疆等處未墾地畝飭查試墾等語西陲地面遼闊隙地必多果能將開墾事宜實心籌辦當可以歲入之數供軍食之需實爲經久有益前據伊犁將軍布彥泰奏報於塔什圖畢等處開墾地畝疊著成效洵屬忠誠爲國之舉均經分別施恩而烏嚕木齊於道光二十年閒開墾地止二萬餘畝其未墾之地未據該都統奏明續辦著布彥泰會同惟勤體察情形派員確勘如有可墾之地務須設法招徠隨時奏明辦理其伊犁已開地畝業經照例升科此外及各城地方如有曠地可以招墾者仍著該將軍等詳細飭查一律奏辦至甘肅報明水衝沙壓案內尙有七千五百餘頃未經墾復著富呢揚阿遴委委員確加履勘遇有堪以墾復之處卽將應復地畝隨時咨報不得任聽該委員等畏難捏稟阻隔不行務使野無曠土人盡力田俾民食邊儲並收實效 六月戊申

甘肅新通志

卷首之二

二十九

上諭內閣前據戶部奏各省未經報部各荒地恐有私墾隱賦各情當經降旨令該督撫等覈實查明具奏並因甘肅水衝沙壓之地未經墾復者七千五百餘頃之多復令富呢揚阿委員確勘將應復地畝隨時咨報辦理茲據該督奏請專辦招墾立限升科等語荒地旣多其閒私墾者或漏未升科拋荒者或憚於墾復若非特派大員親加周歷廣爲勸諭則委員捏飾州縣遷延種種弊端終無實效所有該省招墾事宜著卽責成鄧廷楨專心妥辦其藩司篆務著楊以增暫行署理甘肅臬司著富呢揚阿派員接署鄧廷楨曾經歷任封疆此次又棄瑕錄用簡任藩司必能激發天良仰體朕意實力講求著於接奉諭旨後親赴各屬逐一勘明將堪以墾復之處設法招徠一律報墾其有未經報明私行墾種者均卽勒限照例升科儻各州縣畏難苟安藉詞撓阻並著指名叅奏務使查辦之後野無曠土人盡歸

農以實邊儲而足民食毋得仍照向年舊案苟且塞責

十二月丙申

上諭內閣前因甘肅省荒地較多特降旨令鄧廷楨親歷周勘設法招墾茲據奏稱各屬履勘完竣計共查出荒地熟地一萬九千四百餘頃又番貢地以段折畝一千五百餘頃又甯夏鎮馬廠歸公地一百餘頃分別差等酌量升科該藩司奉派專辦所到之處勸諭詳明妥速蕲事甚屬可嘉著加恩賞換二品頂戴並交部議敘其隨帶委員及各州縣著擇其尤爲出力查地較多者詳明該督酌量保奏候朕施恩毋許冒濫 是日

上諭內閣富呢揚阿奏查報成熟地畝懇恩暫緩升科等語甘肅省各項成熟地畝兩經查獲未便遽予徵收著加恩統於道光二十五年再行一律升科其現在暨歷任失察之地方各官著從寬免議處藩

甘肅新通志

卷首之二

三十

司鄧廷楨現已查辦完竣著卽飭回本任所有各屬認墾升科等項事宜仍著該藩司隨時覈辦一手經理 二十五年乙巳七月辛巳上諭軍機大臣等人奏從前勦辦青海野番甫報肅清旋又有傷弁搶馬之事今復戕害總兵大員總由疆臣閹帥姑息養癰等語據稱山內生番多由內地遊民回子及脫逃遣犯竄匿其中教誘生事其損失馬匹但知分派各營攤賠完結並有捐賠馬價情事又前歲西甯會剿時富呢揚阿與周悅勝並未見賊接仗惟將番僧邀至大營面結和約該僧有包管十年無事之語遂卽張皇奏捷師旋之日已有賊衆圍困鎮將焚掠居民之事並未奏聞似此彌縫諱飾以致兵制曰非馬政日壞何以綏靖邊陲德興到任在前次會剿以後無所用其回護接奉此旨著卽逐條確切訪查究係如何鋪張粉飾馬匹實在被搶若干現在短缺若干查明後卽自行繕摺具奏毋庸會商

儻有不實不盡將來別經發覺惟該大臣是問

二十七年丁未八月戊申

上諭內閣布彥泰奏西甯縣屬猝被水災並黃河水勢驟長委員查勘撫恤一摺甘肅西甯縣屬地方山水陡發衝沒田廬人口業經該督派員先行履勘撫恤惟事關民瘼必宜迅速辦理不可稍緩須臾至黃河水勢驟長上下游有無被災應否賑恤之處著該督再遴派賢能之員迅速分別前往各處逐細詳勘酌量被災輕重妥爲撫恤悉心覈實妥辦以副朕軫念災區至意 二十八年戊申三月乙酉

上諭內閣布彥泰奏請分別緩免征兵領過銀兩一摺此次調赴回疆進征中途停止之陝甘督標暨甘涼肅州各提鎮營原派兵丁領過賞裝銀兩著加恩概免繳還其官弁借支二年俸銀並著加恩自道光二十八年春季起分作四年在於應得俸廉內按季扣還以示體

甘肅新通志

卷首之三

三十一

恤 三十年庚戌六月甲戌

上諭內閣琦善奏請除積弊以恤民艱一摺據稱甘肅地瘠民貧前此承查官吏將畸零地方指爲隱墾私開勒限升科以致民力不支流離潛匿殊失朝廷重農本意著照所請所有該省民地一萬六千餘頃番貢地四萬一千餘段共應繳銀一萬七千餘兩糧一萬三千餘石准其概予豁免仍照向來舊額徵收以恤窮黎

咸豐元年辛亥七月乙酉

上諭內閣薩迎阿奏甘省營務廢弛籌議責成提鎮實力整頓等語昨據琦善奏番賊復出搶掠已有旨令該署督嚴飭鎮將跟蹤剿捕野番頻年肆搶官兵前往追捕未能得力甚至退縮不前總由該省營務廢弛已久歷任總督粉飾消弭以致養癰成患實堪痛恨番匪出沒深山兵少則抗拒兵多則逃竄設卡巡防嚴密偵探最爲要務著

即責成該提鎮平日嚴督將弁認真操練兵丁飭令防守弁兵隨時確探如有野番出掠飛速傳報該提督迅派將弁帶兵趕捕該鎮即親帶弁兵馳往堵剿必須立時加以懲創使野番知畏不敢輕出肆劫並通飭地方文武查拏內地奸民毋令勾結接應以淨根株薩迎阿現署總督距裕泰到任爲日尚遙恐秋閒賊番復出劫掠滋事著會同提督索文嚴飭各鎮隨時認真防範並將廢弛積習實力整頓不准再蹈從前欺飾故智致干重譴儻將弁仍前玩泄奉行不力即著嚴叅懲辦 八月乙丑

上諭軍機大臣等王懿德奏土民呈控番賊擾害請飭查辦並節錄原稟呈覽一摺本年五月以來西甯一帶野番時出搶劫節經薩迎阿奏官兵追捕情形並將遇賊怯懦之都司焦士忠奏叅革職先後降旨諭令該署督分飭各鎮營實力操防嚴守要隘茲據王懿德奏稱

甘肅新通志

卷首之二

三十一

西甯紳士平番耆民等於金縣途次具稟並稱曾在署總督處喊稟多次不爲查辦是否該署督前奏情形尚未詳盡抑或另有別情現在賊番果否斂跡地方文武如何辦理廩生李國棟等業由王懿德遞交甘省著薩迎阿確切訊明妥爲查辦據實覆奏番匪屢出搶劫事關邊防民瘼必應嚴飭剿捕大加懲創方足以衛民生而肅邊圉諒薩迎阿自能懍遵節次諭旨認真整飭不因暫時署事稍形寬懈亦斷不以琦善因剿辦番案獲咎遂任鎮將等姑息偷安轉貽後患也 二年壬子六月庚子

上諭內閣舒興阿奏中衛縣城地震派員勘辦一摺甘肅中衛縣城鄉地方於本年四月初八日起至二十三日連次地震經該督派員查明居民房舍震倒二萬餘閒壓斃男女大小三百餘口受傷者四百餘口該縣城垣衙署及倉廩監獄等處均多坍塌傾圮居民糧食衣

物牲畜亦多被壓沒餬口無資深堪憫惻著該督迅委賢員前往妥爲安撫並將同時被震各堡迅速查勘應動支何項錢糧分別撫恤及該縣被災處所本年地丁錢糧應行寬免之處一併確覈奏明妥速辦理毋令一夫失所以副朕惠愛黎元之至意 八月乙酉

上諭內閣舒興阿奏涼州鎮屬之鎮羌卡外番賊復行竄入滋擾現派官兵剿捕一摺甘肅近年以來沿邊番賊每伺官兵進退以爲出沒前值提鎮會哨之期膽敢竄入永昌一帶滋擾甫經擊退復於七月間由鎮羌卡外竄入松山寬溝等處肆行劫掠甚至阻截道路拒傷官兵如果該營官平日偵探的確嚴拏內地奸匪杜絕勾引何至任其紛竄搶掠毫無顧忌現經該督派委署涼州鎮總兵崇保署督標中軍副將雙來莊浪協副將松齡署右營叅將樂善等分帶官兵遏守要隘在煙墩溝炭壑溝等處兩次擊賊殲斃甚多並殪紅衣番僧

甘肅新通志

卷首之二

三十三

數名該番等竄入黑茨溝藏匿並有甘州兵在察漢俄博金羊嶺一帶西甯兵在永安大通等處遏其歸路趁此番匪腹背受敵之時亟應痛加剿洗以儆兇頑而靖邊卡著即責成該鎮將等趕緊追捕奮力夾攻如卡外沿邊尚有潛伏零股即著隨地殲除並飭提督索文西甯鎮總兵雙銳等一體偵探嚴防總期有犯必獲毋得稍有疏縱

九月甲寅

上諭內閣舒興阿奏官軍兜剿番賊大獲勝仗全股殲除並生擒首惡現在撤兵歸伍一摺甘肅涼州鎮羌卡外番賊竄擾松山一帶糾合族番二千三百餘人分股搶掠沿邊牲畜四萬有奇潛匿麻黃溝內經官兵疊次追剿提督索文督同總兵雙銳副將雙來並派護副將蕭鳴章叅將樂善等各帶弁兵分路堵截合力剿捕先將大股番賊六百餘人悉數殲除又將分竄之賊殲斃百數十人其首惡阿里克

公住復經蕭鳴章督兵用礮轟傷即時生擒餘匪逃竄者僅百餘人此股番賊糾結數千人盤踞河北柯柯烏蘇地方肆出搶掠從未大受懲創此次官兵冒雪衝鋒兩日之間四戰四捷生擒賊首梟示並將盈千番賊殲斃殆盡復疊次緝獲漢奸多名分別根究懲治惟番賊出沒靡常各屬仍多零星搶劫之案並賊目才旦朵爾吉等所帶野番尙多逃匿不得因此股番賊剿除殆盡稍涉大意致有疏虞仍著該督嚴飭該提鎮等於沿邊一帶要隘處所隨時嚴密摻捕勿留餘孽以肅邊境而靖閭閻 四年甲寅五月癸丑

上諭軍機大臣等廣福奏陝甘省綠營每年應補馬匹向由伊犁等處調取轉運請變通辦理一摺陝甘每年應補缺馬一千五六百匹向由該督移咨伊犁塔爾巴哈台調取運至烏魯木齊轉運至巴里坤牧放再運至肅州赤金湖地方由口內各營派撥弁兵分領據稱道

甘肅新通志

卷首之二

三十四

里相距五十餘站之遙帶牧帶解耽延幾至一年中途經歷多係沙漠戈壁及運至赤金湖倒斃損傷者不少領馬官弁恐千賠補往往就地變價帶回買補輾轉解送徒費鹽糧兵力而所缺馬匹仍係變價買補該都統擬將此項馬匹即由伊犁塔爾巴哈台隨地出變令各營領價自行買補自係爲節省運費起見但口外如何變價口內如何買補亟應酌立章程無滋流弊方爲妥善著奕山易棠迅就該都統所奏體察情形妥議具奏毋稍遲延 甲寅

上諭內閣易棠奏請招募獵戶堵禦番賊並試採金砂以資口食一摺上年甘肅西甯一帶番賊窺伺邊卡節經該督飭令各屬招募獵戶人等隨時擊退提督索文於察漢俄博營所管之亦斯們沁地方招募獵戶一千名並令淘挖金砂自濟口食現在邊疆靜謐辦理業有成效復經該督派委鎮道會同該提督詳細履勘因察漢俄博營地

處卡外南山與甘涼邊界中隔一山僅於亦斯們沁安設獵戶各隘口尙難兼顧擬請於迤西之野牛溝迤東之沙金城兩處各招募一千名與亦斯們沁互相堵禦並因該三處均素產金砂令所募獵戶一半淘試金砂一半防禦番匪並籌議約束稽查及升科各章程等語近年番賊入卡搶掠雖經該提鎮等隨時撥兵勦辦往往掩捕不及致令遠颺旣據該督與該提督等查明獵戶人等熟悉路徑用以協助官兵可資得力著即照所請於亦斯們沁野牛溝砂金城等處共安置獵戶三千名責成總管練總人等實力稽覈毋令混冒其開採金砂發給獵戶口糧外並酌定課額年限均著照所議辦理

八年戊午五月丙子

上諭軍機大臣等樂斌奏縷陳番務情形請飭西甯辦事大臣等詳查籌辦一摺甘肅西甯口外野番爲患樂斌到任以後派令署西甯府

甘肅新通志

卷首之三

三十五

知府那遜阿古拉派兵勦捕隨有剛咱等族野番情願投誠求將河北地方賞給住牧保護蒙古邊民各旗蒙古亦願將青海迤南戈壁地方暫行借給住牧似此權宜辦理原期相安無事惟野番貪殘成性移至河北後或不免欺陵蒙古滋生事端更恐河南各番相率效尤墾求遷徙自宜慎之於始以安蒙古生計此事著樂斌督辦即不能親身前往務須派委明幹大員隨同圖伽布督飭西甯鎮道確切查明通盤籌畫應如何定立界址設法鈐束以杜侵越及不准再有番族過河以期日久相安之處妥議章程具奏不得遷就目前致滋後患 九年己未四月乙丑

上諭內閣樂斌奏甯夏口外匪徒乘閒肆擾請分飭鎮道出口會哨等語甘肅甯夏口外蒙古地面曠闊匪徒乘閒肆擾自應嚴加巡緝著照所議即由阿拉善親王遴派委員操練蒙古兵丁每年自三月至

九月在於蒙民聚集各要隘梭織巡查如遇賊匪出搶即併力擊捕送交內地審辦儻持械拒捕准其格殺勿論至甯夏鎮總兵及甯夏道均有地方之責尤應親歷巡查以資彈壓嗣後著該總兵於每年三月內統帶弁兵出口在磴口上下游一帶與蒙古會哨一次甯夏道於九月內選帶幹役出口與蒙古會哨一次如有賊匪潛匿務須悉數拘拏嚴行懲辦毋得日久生懈視爲具文該督仍飭各州縣營汛於所管卡隘派撥兵役常川盤詰稽查儻有內地民人私行出入形跡可疑者立即嚴拏審明治罪如敢任意疏懈將來拏獲匪徒訊明係由何處出入即將該管文武指明叅處以靖邊圉

六月己亥西甯辦事大臣福濟奏籌辦投誠野番大概情形上諭曰此時祇好羈縻將來蒙番能否相安惟在隨時妥辦若仍藉端滋事更可驅逐有辭著曉諭蒙古不可自弛武備賴他人之勢以自

甘肅新通志

卷首之三

三十六

立若蒙古能強堪以敵番任其自行驅逐亦無不可 九月丁卯上諭內閣福濟奏番族投誠地方肅清並安插戶口善後章程開單呈覽一摺甘肅野番連年滋事經該大臣親督員弁出口查勘開誠布公殲厥渠魁寬其脅從隨處覈定界址編查戶口妥爲安插統計八旗共一千七百四十七戶男婦大小一萬八千四百二十名口該番族感激歡呼交出認賠牲畜及被搶牛馬羊各物呈出承保十事及分守要隘各甘結地方得以肅清辦理尙爲妥速所有善後事宜即照奏定章程十條妥爲辦理嗣後每年巡查禁通事之句引防歇家之容留賞罰必明奉行心力均責成該管廳營妥爲經理以期日久相安此次調撥兵勇所需經費俱係在事官紳捐辦著免其造冊報銷除捐貲人員照例請獎外其出力各員著福濟擇尤酌保數員毋許冒濫 十年庚申七月乙未

上諭軍機大臣等本日福濟奏甘省要政亟宜練兵裁冗足餉養鋒以除糜費而防飢譟一摺甘肅地處窮邊額兵甲於直省歲須各省協餉甚鉅近年撥解維艱於咸豐五年議准餉銀每兩按時價折八錢五分仍緩發二成先發一成茲據奏稱所發餉銀實數祇得一半猶有短欠遲支不能按季士卒腹枵時有出伍辭糧陽爲求餉陰謀鼓譟之事以致曠操違令該管官亦無如何設兵無以爲養多兵反足爲害若不及時裁冗恐有尾大不掉之患第裁之不可太驟必須辦理得法陸續汰其老弱留其遺缺積之年餘可去三分之一然後將所留二分勤操練習悉成勁旅庶幾裁冗卽以練兵糜費可除於現在養鋒先期足餉飢譟可防於未然卽文武各官歷年添設不少冗員亦應隨時裁改以省枉費等語著樂斌林揚祖卽按所奏情形悉心體察斟酌妥議覈減務須兵能日贍餉不虛糜以期有備無患另

片奏甘肅兵餉除地丁釐金協款外惟倉糧尙屬有餘可資搭放如甘涼肅等處月放銀麥各半惟西甯倉多豌豆陳陳相因易致徵變其他縣亦有應存三四萬石至十餘萬石者該管道府縣目擊飢兵困苦且恐或生覬覦酌量准借抵放而藩司拘於成例責令籌議扣還上下相持有名無實等語併著該督督同藩司查明各州縣實儲新舊倉廩除應留各營例支本色外其餘存糧各就地方情形於現領二成餉銀之外酌量搭放並將各兵所借之糧統俟協撥充裕餉銀全領之時再行陸續按季扣還是否可行有無窒礙之處一併詳細查明妥議具奏

甘肅新通志卷首之四

同治元年壬戌十月乙未

上諭議政王軍機大臣等恩麟奏陝省逆回竄入清水縣境並北路鹽茶廳匪裏脅日衆添兵捕剿並回匪竄陷恭門鎮川匪竄入兩當縣各摺片陝省逆回由華亭闌入清水縣境都司范玉春接仗失利賊勢頗形猖獗現經恩麟派楊永魁等帶兵前往即著嚴飭該鎮道等實力堵剿不得再涉延誤賊匪圍攻靈州道員侯雲登以署甯夏鎮慶興未能得力懇請兼署以資調遣足見該道任事勇往不避艱險頗堪嘉尚甯夏鎮總兵員缺即著以侯雲登兼署該道既自稱確有把握即責成迅速撲滅屆時必當從優獎敘慶興精力旣衰豈能勝專閫重任現在雖已撤任著即查參毋稍遷就恩麟委侯雲登署總兵缺雖非舊制但軍情緊要之時全在大吏隨機應變方無貽誤該

甘肅新通志

卷首之四

一

護督辦理此事正能審度緩急不爲成例所拘所請交部議處著無庸議 二年癸亥二月庚辰

上諭議政王軍機大臣等熙麟奏甘省軍情緊急一摺據奏接准恩麟咨據隆德縣知縣李超羣飛稟固原突被回匪擁入焚殺漢民殆盡道員萬金墉等被害現在回匪大股仍踞瓦亭道路梗塞當經咨行延綏歸化及蒙古東西兩旗等官兵星馳赴固熙麟帶同黃得魁兵勇繞道赴甘將於慶陽暫駐請飭多隆阿雷正綰等派撥勁旅交馬德昭統帶繞路慶陽取道赴甘或即令雷正綰回固原提督本任辦理等語又據多隆阿片奏回匪攻圍盤鄠係省城糧路現今雷正綰迅調新募四營移紮咸陽馬德昭一軍仍駐省城與穆騰阿等辦理西安防守並陳近日力攻王閣村等賊巢情形陝省軍情東西兩路均形喫緊陝南興漢各匪又復紛乘多隆阿之東業已不敷分布固

原重鎮爲陝甘兩省咽喉突爲回匪竄陷尤須迅速撥兵剿辦雷正綰專辦陝省西路須馳解鳳岐之圍並兼顧涇原盩鄠等處斷難分身即馬德昭留防西安省城勢亦難即移動固原被陷萬不可令賊久踞要地惟有速催所調延綏及歸化城蒙古等兵星速併集以利攻剿著熙麟飛催所調延綏鎮兵一千名德勒克多爾濟及塔清阿速將恩麟咨調歸化城官兵二千名剋日由定邊等處馳往固原會剿並著奕梁將前次咨行聽調之阿拉善等處及東西兩旗蒙兵一併飛檄由甯夏鹽茶一帶星馳赴固毋稍稽延固原等處前據恩麟疊奏布置情形何以此次猝被回匪擁入焚殺毫無豫備可見平時俱屬紙上空談全無實際著熙麟恩麟將此次固原被陷及萬金壩等被害情形均即查明詳悉具奏前由英桂轉解多隆阿軍營之京營炸礮子一項多隆阿曾否收到此時攻擣王閣村等處賊巢正資

利用此項炸礮京營火器營員弁善於施放該大臣營中定不乏此項員弁即可用其所長督率兵勇速圖擣穴擒渠以彰撻伐多隆阿疊奏成功即在指顧故於各路請撥請援皆不肯分其兵力該將軍當以全力迅奏膚功以副殷望毋稍存輕率之心或至中賊詭計是爲至要 六月癸未

上諭議政王軍機大臣等慶昫等奏詳查甯夏一帶軍務情形請添兵籌餉擇任賢能以除積習而振軍威一摺據稱甘省回匪之反覆無常由地方官首重求和抑漢扶回更張逆燄各處義民集團自衛足見其復仇志切且甯郡一城衆逾十萬其間豈無殷富良由地方官每事誅求假公濟私商民目官場爲騙局故不肯協力接濟等語所奏自係實在情形甯夏甯朔平羅等縣疊被回匪擾害士民紛紛求救而熙麟駐紮慶陽相距較遠恩麟護理督篆省垣事務綦繁均難

兼顧慶昫現駐甯夏於一切尙能諳練著熙麟恩麟迅即飭知附近甯夏一帶之道府州縣及武職各員就近將辦理回匪情形稟商慶昫即由慶昫劄飭遵行免致熙麟等鞭長莫及慶昫惟當督飭該鎮道等激勵旗綠各營聯絡各處鄉團分投剿洗俾漢民得所憑藉不至慘遭焚劫而回匪亦不敢輕視官軍方爲妥善 辛卯

上諭議政王軍機大臣等恩麟奏平羅漢回近復挾嫌互鬪暨平涼被圍日久請飭催馬德昭迅速赴援及蒙兵遇賊接仗南路各屬剿匪並隆德縣及秦州一帶剿賊各情形隆德縣接壤平涼實爲東路要隘此次圍城之賊雖經李超羣擊退而賊衆兵單難保不再來窺伺南路秦州一帶雖經林之望訓練兵團連獲勝仗而伏羌縣漢回互鬪報復尋仇肆行焚殺必須趕緊撲滅俾免燎原即著恩麟督飭靜甯隆德各屬員弁實力防範並飭林之望督率兵勇迅將伏羌初起

甘肅新通志

卷首之四

三

回匪剋期剿辦毋令延蔓平涼被圍時逾兩月勢甚危急恩麟現派參將成桂統兵前往隆靜一帶設法解圍惟東路兵力單薄萬難奏效馬德昭一軍前已有旨令其迅速赴甘即著多隆阿飭令該署提督懍遵前旨剋日赴甘迅解平涼之圍不得稍有耽延致干咎戾雷正綰所派之馮元佐練勇三千人並著多隆阿飭令剋期起程前赴甘省毋許逗遛援兵未到以前熙麟惟當就現有兵力認真防守並添派官兵馳赴涇州分道進攻牽制賊勢毋令賊蹤麇聚平郡致有疏虞平羅回衆復有互相仇殺之事可見從前辦理招撫敷衍了事終貽後患一切情形已據慶昫等陳明即著恩麟恪遵前旨飭令甯夏鎮道稟商慶昫妥籌辦理該將軍惟當督率侯雲登等聯絡兵勇相機策應一面剴切曉諭解散夥黨儻有匪類狡執阻撓立即督兵剿辦毋得再蹈從前覆轍馬化澂雖未滋事而軍械並未繳納其心

實屬叵測恩麟因兵力不暇兼顧暫予羈縻是亦權宜之計即著恩麟督飭所屬不動聲色嚴密防範毋得稍涉大意 是日

上諭議政王軍機大臣等前因總兵熊煥章帶兵援甘逗遛不進當經降旨革職並諭令駱秉章酌調勁旅二三千人籌給川資取道白馬關馳赴甘省以厚兵力本日據恩麟馳奏甘省軍務東路則平涼被圍兩月迄無援兵平羅漢回又相仇殺南路則伏羌縣屬漢回互鬪縣城戒嚴其秦階各屬徽縣則有陝西游匪之滋擾文縣則有川省髮逆之竄擾加以鳳翔大股回匪直撲兩當雖經民團擊退而防範不能稍鬆岌岌情形直有不可終日之勢若非鄰省大支勁旅前往援應不足以振軍威而殄狂寇駱秉章公忠體國素顧大局目睹邊疆重地糜爛至於此極想必能妥籌兼顧力拯阨危著即懍遵前旨迅速調派勁旅二三千人派委得力大員統帶赴甘由秦州一帶徑

甘肅新通志

卷首之四

四

赴東路進剿伏羌漸次進至固原相機攻取庶兵力日增軍務可有起色張由庚等抵漢中後兵數尙單曾經諭令駱秉章增兵籌餉川省白石逆大股殄滅後大局已臻穩固是該省兵勇尙可分撥仍著該督懍遵前旨添調兵勇前赴漢南剿辦髮捻各逆彼處軍務得手則陝省大兵即可抽調赴甘於邊陲全局實有裨益一切進止機宜並著該督妥爲調遣毋稍遲誤 八月戊寅

上諭議政王軍機大臣等恩麟奏西甯花寺臨洮回民糾衆相持派馬奎源等前往解散並擬用蒙番幫同漢民籌辦暨軍務喫緊請飭催何勝必督兵援甘馬德昭迅解平涼之圍及成瑞勸諭出力懇請量予減等各摺片西甯花寺臨洮兩教回民聚衆爭鬪旋復糾約戎屬撒拉幫助肆行攻擊湟屬地方騷然而丹噶爾境內被擾情形尤重亟應乘其釁端初起趕緊解散以免燎原原任參將馬永泰之妻也

氏及其子馬奎源既據恩麟奏稱素爲回教信服飭赴西甯解釋紛爭即著玉通督同道員雅爾佳納責成該頭人認真妥辦儻能奮勉出力安靖地方准由熙麟等據實請獎至護西甯道郭襄之從前籌辦善後事宜已據稟報蔽事何以此次回民又因爭教仇殺可見該員所辦均係紙上空談一味粉飾著熙麟恩麟查明參奏青海蒙番向與丹噶爾漢民往來而貴德巴燕戎格兩廳番族素與撒拉有隙恩麟現在咨商玉通檄爲我用固可藉壯聲威惟番族素性獷悍蒙兵亦未見得力儻非萬不得已自未便借資他族致滋流弊玉通務與恩麟隨時妥商設法籌辦毋稍輕率狄河之案甫經寢息而安定皋蘭金縣三處交界又有劫殺附近回莊之事匪類心志最齊難免不圖報復恩麟現派成瑞等相機彈壓一面增軍募勇於近省各要隘安營駐紮以定人心即著恩麟認真妥辦毋稍疏虞其派出彈壓

委員務令實心勸導漢民事事持平不可輕舉妄動致釁隙一開不可收拾成瑞獲咎甚重現雖勸諭回衆尙知出力而甘省軍務未竣豈能遽爲乞恩懇免死罪著俟甘省軍務大定再行請旨定奪儻該員或敢因此始勤終怠自外生成即著熙麟恩麟等據實奏聞或在軍前正法或解送刑部從嚴懲辦不得稍有瞻徇恩麟奏狄河漢回械鬪委員查辦兩造具結解散地方安定惟三十六會人數衆多良莠不齊而漢民中無賴之徒禦侮不足挑釁有餘恩麟仍當嚴飭在事員弁嚴密稽查秉公妥辦不得稍涉大意 丙申

上諭議政王軍機大臣等玉通奏花寺奸回勾結撒匪攻陷城堡已逼縣城現籌辦理及兵勇接仗情形一摺西甯花寺奸回肆擾已將喇課鎮海堡二處營堡攻陷其南川營塔爾寺及威遠白塔寺各報回匪聚衆焚殺經各營官兵及各該寺呼圖克圖等會同攻剿各有殺

傷現在該匪並從西川蜂擁進撲郡城盤踞城東關廂勢甚兇很經玉通督飭兵勇登城守禦並分路出勦即著玉通激勵該處員弁兵勇嚴密守禦相機出勦飛催所調青海蒙古番子官兵並阿家呼圖克圖等練勇星速到齊合力勦辦並著恩麟仍遵前旨迅即派撥勁兵交前任提督經文岱統帶前往西甯進勦該處情形愈緊經文岱何時進發如果該員不克分身此外何員可以另派帶兵往勦之處著熙麟恩麟迅速辦理具奏青海蒙番業經玉通檄調其貴德巴燕戎格兩廳番族是否可爲我用著玉通恩麟仍遵前旨妥商籌辦也氏馬奎源母子此時曾否行抵西甯該頭人如果能爲回教信服解釋紛爭玉通即遵前旨飭令道員雅爾佳納督率該頭人妥爲辦理此時該匪已偪城關兇燄正惡自應實力勦擊以挫其鋒如能疊加懲創退出城關該回衆實有兩教相持求爲剖辯等情即著玉通相

甘肅新通志

卷首之四

六

機妥爲辦理以平仇怨 庚子

上諭議政王軍機大臣等多隆阿奏馳回北岸進勦一摺熙麟奏平涼失守各摺片多隆阿已由省起程馳赴渭北並檄令穆圖善將南安各營移過北岸合力痛勦現在陝西回匪屢經敗創賊膽已寒多隆阿正宜乘官軍屢勝之威一鼓作氣將十三村餘匪埽除進拔高陵並令雷正綰一軍由西路進攻涇原等處賊巢以期肅清渭北潼關地方防務緊要皖捻竄入豫省後日向西趨該大臣務當隨時偵探加意嚴防商雒等處亦宜嚴密布置扼要堵禦不可稍涉大意致有疏虞甘省平涼府城現已失守回匪兇燄日張勢必併趨涇州冀與固原賊匪聯成一片該省賊衆兵單軍情緊急較甚於陝多隆阿如攻克十三村兵力自可有餘即著速撥一軍馳援甘省以顧大局儻不能另撥兵勇亦宜速飭陶茂林一軍迅解鳳翔之圍以便前赴平

涼毋稍遷延致誤事機熙麟所派余萬明等軍往援平涼尙未起程該處城垣已先爲賊攻陷尙非赴援不力所有自請嚴議之處著加恩改爲交部議處仍著飭令余萬明等嚴扼涇州相機堵剿毋任與固原賊衆勾結仍飛催王泰來續募楚勇星夜馳赴慶陽以便規復平涼其平郡西南各路扼要處所即著恩麟迅速調派兵勇嚴密堵扼毋任蔓延他處致成燎原 癸卯

上諭議政王軍機大臣等前據熙麟奏調外火器營營官吉慶等七員名赴甘差遣並請由該營代雇工匠酌撥庫鋼洋鋼及火箭炸礮子等項交吉慶等運赴甘省備用當交管理該營王大臣酌覈辦理茲據奏稱該營所造軍器等項節經各路軍營請調必須隨造隨撥方足以敷接濟吉慶係製造軍器甚爲熟悉之員未便遽令前往現改派候補護軍校志亮率同熙麟奏調之護軍等將炸子火箭一百枝

甘肅新通志

卷首之四

七

小號炸礮子一百箇星速解往等語此項利器軍營中不可多得將來志亮等運送抵甘熙麟當飭令各營將弁必須於攻城接仗時對準賊營賊隊施放期於箭不虛發而礮子不至虛糜庶足以振軍威而收實效至該營打造一切軍器俱係本營弁兵指示匠役如法製造並無專習打造軍器之工匠此項人夫及隨帶什物未便由京雇募帶往該王大臣所奏均係實情查火器營營官祥安等現在晉省督飭匠役製造火器即著英桂酌派數員名並飭隨帶應用什物前往甘肅慶陽軍營聽候熙麟差遣並著迅速籌辦毋稍稽延庫鋼洋鋼二項火器營本無收存本日已交戶部酌量撥解並由該部知照兵部順天府照例運送矣 九月庚午

上諭議政王軍機大臣等熙麟奏援平弁勇連破銅城丈入寺等處賊巢一摺另片奏陝回西竄請簡派大員帶兵來甘助勦等語平涼失

守之後賊氛益肆此次余萬明帶勇僅二千餘名竟能將備同心三日之內連破堅巢從此軍威一振即可節節剿洗著熙麟督飭余萬明等乘勝進取規復平涼毋稍延誤陝省敗回紛紛西竄白集原神浴河等處愈聚愈多涇甯情形倍形喫重熙麟雖派陝勇一營赴涇扼守而兵數甚單且固原股匪竄擾環縣屬境尤爲慶陽門戶之憂必應厚集兵力方能大挫兇鋒前據多隆阿奏已飭雷正綰帶領十營前赴固原援剿此時甘省軍情喫重雷正綰務當趕緊起程鼓行而西相機進剿陶茂林計已到鳳即著多隆阿飭令迅解鳳翔之圍前赴甘省會同剿賊現在援甘兵勇爲數亦不爲少而雷正綰等又屬久歷行陣勇敢素著之員指曰大兵雲集自可迅奏膚公熙麟當督飭在營將士踊躍赴功慎重防剿毋以驟勝而驕爲賊所乘

十月己卯

上諭議政王軍機大臣等多隆阿奏官軍馳抵鳳翔城圍已解及分兵各路援剿情形一摺鳳翔被圍至十四月之久經陶茂林等督軍援救轉戰而前城圍立解皆由多隆阿調度有方所向奏績深堪嘉尙現在甘省賊氛甚熾即著飭令陶茂林將附城賊壘並所屬回巢趕緊掃蕩迅赴甘省會合雷正綰之師剿辦回逆毋稍遲誤雷正綰現已由邠州一帶赴甘力圖恢復平涼曹克忠一軍又進剿白吉原老巢是甘省援兵雲集熙麟務當督率各軍隨時分兵策應並就現有兵力慎重防剿毋稍疏虞鳳翔各屬被擾一切善後事宜著劉蓉張集馨督屬妥爲辦理多隆阿病體未痊惟因軍勢正順必須一鼓作氣迅奏膚功現仍進駐醴泉分兵剿賊具見忠勇悃忱該大臣務當隨時調攝如各路布置已定即可回駐省城稍息勞勩 庚辰

上諭議政王軍機大臣等恩麟奏平涼失陷賊勢鴟張玉通奏賊撲郡

城勦辦情形各摺片平涼府城失陷已據熙麟奏報現在多隆阿已派雷正綰督率十營兵勇起程赴甘陶茂林亦統率所部於鳳翔解圍後進援甘省擬與雷正綰會合攻拔平涼規復固原計雷正綰與陶茂林兵勇已有二十營之多不難迅掃賊氛惟陝省敗匪陸續西竄雷正綰等軍僅止從後尾追恐賊勢益形滋蔓多隆阿務當飭令雷正綰等軍繞道迎截俾該逆不能西竄不可徒事尾追並著熙麟派撥兵勇會合夾擊以期四面兜勦速奏膚公涇州一帶已經熙麟就近派兵扼紮西路之隆靜一帶防兵甚單著恩麟再行添募兵丁迅速前往以固省垣門戶南路之西河鹽關賊匪尚未勦滅伏羌匪徒復逃至秦安岷州回匪復行滋事又臨洮花寺回匪撲進西甯郡城河州狄道回漢亦互相仇殺情形喫緊該省城賊匪蜂起竟有應接不暇之勢多隆阿督辦軍務兩省防勦事宜均應統籌兼顧著即

飭令在事文武將該匪次第掃除毋留餘孽陶茂林雷正綰均統率所部赴甘省東路兵力足敷勦辦西路尙覺空虛馬德昭到甘後應否飭赴蘭州抑或即留於慶陽軍營派令帶兵之處均著熙麟酌量辦理至花寺回匪屢經兵勇攻擊並設法解其脅從惟賊衆兵單賊首馬歸源僞行乞撫仍復環繞郡城焚殺並分股盤踞東關南山抗拒官兵一股在北川焚殺攻撲番寺實屬兇頑異常現經阿家呼圖克圖帶領僧勇等二千餘人助勦殺斃賊匪多名著玉通即飭令兵勇會合攻擊並激勵番僧等迅將該匪殲除 十一月庚申上諭議政王軍機大臣等多隆阿奏回匪勢窮乞撫並請將甘省兵勇統歸雷正綰調遣熙麟專辦糧臺各等語陝省回匪蓄謀倡亂經多隆阿督軍痛加勦洗所有兇悍逆黨業已殲除殆盡現惟汧陽隴州麟遊尙有零星匪徒陶茂林由鳳翔進兵至汧陽交界地方回衆老

弱婦女頂香跪地哭泣求撫該回衆既經畏威悔罪自可寬其一綫予以自新前經疊降諭旨准予良回投誠著多隆阿即遵奉前旨妥爲辦理並刊刻謄黃徧行曉諭總令其將戕官踞城首惡捆獻其餘一切脅從概行赦宥則回衆可期漸次解散至甘肅固原州爲提督駐紮之所踞城者多係叛兵平涼回匪陷城戕官兇惡已甚該大臣當飭雷正綰等大申撻伐以懲兇頑俟匪勢窮蹙後再行分別招撫以期一勞永逸此外陝甘各路零匪果有誠心悔禍自拔來歸者即由該大臣設法安插毋稍大意雷正綰已抵甘省涇州地方著即迅速前進痛掃逆氛所有該省兵勇均著歸雷正綰調遣以一事權甘肅省垣緊要經理需人熙麟俟道路稍通即應前赴省城現在省東一帶回匪已有雷正綰督軍勦辦熙麟著俟雷正綰進抵平涼後即酌度情形馳赴蘭州整頓吏治並辦理河州狄道等處防勦事宜其

甘肅新通志

卷首之四

十

雷正綰軍營糧臺即由熙麟督飭所屬辦理設法接濟毋令缺乏

壬戌

上諭議政王軍機大臣等慶昫等奏甯夏漢城內亂並迎催道員和祥路阻未能前進各摺片據稱十月二十三日四更後滿城中聞東路火器發聲料是漢回又鬪黎明派員查探途遇難民墜城逃命城門兩日未開其中是何情形無從得知並迎催和祥之委員行至納家插地方因回匪攔路未能前進各等語覽奏實堪詫異前據慶昫等奏甯夏回目較前斂跡咸稱團練一散即當遵繳器械聽憑官辦各謀生理並令本地紳耆曉以利害俾息殺機何以此次忽有爭鬪之事是否侯雲登剛愎釀亂抑係撤團後回衆滋事近日城中情形究竟如何慶昫等摺聲敘殊未明晰著熙麟恩麟確切查明據實具陳昨因雷正綰抵甘諭令熙麟於該提督抵平涼後即馳赴蘭州整理

一切防剿事宜近省一站即已文報不通恩麟所司何事著即派兵疏通驛路熙麟亦即督率所部逐節埽蕩直達省垣以重職守正在寄諭間據張集馨奏甘肅甯夏靈州相繼失守靈州與陝西定邊毗連賊若東竄不但擾及陝境延安等府滋蔓難圖並慶陽餉道亦恐梗阻且恐闖入晉省完善之區該署撫已飛調延綏鎮兵一千名派署遊擊慶連統帶赴定邊屯紮仍恐兵力單薄不敷堵禦著多隆阿雷正綰於涇州防兵內酌撥數營前赴定邊先行扼紮協力防剿並於正甯一帶派兵堵禦使平固逆匪不至回竄三水淳化復擾秦疆仍一面力籌進剿迅殄逆氛毋任延蔓張集馨當飭北山沿邊州縣趕緊集團堵禦以壯聲威山西邊境界連甘肅德勒克多爾濟當整頓綏遠城官兵豫備防堵毋任匪蹤闖入邊界英桂尙未起身沈桂芬將次抵晉著即檄飭沿河州縣實力防堵並飛調弁兵相機堵剿

以固疆圉甯夏漢城既失滿城獨力難支著熙麟恩麟迅即派兵援救慶昫等務當固守待援毋再一意主撫致誤事機甯夏靈州失守詳細情形並近日甘省軍情著熙麟張集馨查明隨時具奏 乙丑上諭議政王軍機大臣等前據慶昫等奏甯夏漢城內亂張集馨熙麟奏報甯夏靈州相繼失陷甘肅回氛甚熾亟宜增兵調將以固秦晉邊防現在多隆阿在盤屋爲一隅所牽掣漢南賊勢猖獗劉蓉尙無入陝消息而張總愚一股盤踞浙川山內藍逆由山陽出竄仍在商南之青山口距荆關僅八十餘里陝豫軍務方殷而甘肅平固未復甯夏靈州又陷該回逆東犯秦晉北竄蒙古皆可長驅直入陝省西北定邊一帶計惟多隆阿所部之兵就近可以調往扼紮而多隆阿既須援甘又須防陝非由各處撥兵赴陝多隆阿亦難分兵兼顧刻下最要者惟浙川張總愚一股該匪負嵎死拒一日不了則河南湖

北陝西三省皆不得安枕楚豫兵力亦難勻撥赴陝著張之萬督同張曜及派出各兵認真進剿如兵力尙單即飛咨僧格林沁等調撥馬隊助剿楚省鄖陽防兵現因商雒浙川一帶賊蹤未淨固不可以移動而麻黃襄棗一帶防兵與其設防於境內不如兜剿於鄰封官文尙能不分畛域嚴樹森亦豈得偏持成見存此疆彼界之心致成不了之局貽禍生靈著即嚴飭在防各軍赴豫會剿張之萬久駐許昌殊無裨益著懍遵前旨移營進紮浙川一帶就近督剿兼遏賊匪紛竄之路所有張總愚一股即著責成楚豫二省協力剿除儻任蔓延竄越或時日久稽即惟官文嚴樹森張之萬是問苗逆授首以後餘黨以次伏誅壽潁各城均已收復現止剿辦零星股匪可以無須大兵屯聚浙川張總愚一股經楚豫兩省兵力夾剿亦可迅速完竣是皖省張德勝蔣凝學成大吉諸軍及楚豫兩省得力勁軍均可移

緩就急分撥赴陝進紮商雒荆關等處要隘歸多隆阿劉蓉調遣以便多隆阿添兵助剿平固漢南及扼防陝省西北邊界陝甘兩省軍務方有起色此中布置機宜必須先事籌畫臨時始有成算在胸著僧格林沁官文曾國藩多隆阿等會商妥籌調度以期一勞永逸屆時何營可以留防以資扼守何營可以赴陝歸多隆阿調遣之處並著迅速會商妥協一面調撥一面奏聞現在皖北及豫省零匪即可由僧格林沁張之萬唐訓方督同陳國瑞張曜等軍實力翦除楚豫交界捻股即由曾國藩責令皖北楚軍會同豫軍分投辦理吳棠嚴飭姚廣武等肅清徐宿一帶捻圩均須剋日掃蕩一律肅清不得稍有遷就以致重煩兵力皖北肅清以 陳國瑞一軍應否移紮徐宿以資彈壓之處著僧格林沁吳棠等民時酌量具奏至僧格林沁大軍一俟皖省肅清即可移紮豫境就近督飭將弁相機剿辦如楚豫

將弁各懷觀望不肯奮勇勦洗即著從嚴參辦毋稍姑容李雲麟當
懷遵疊次嚴諭回軍商南勦除藍逆餘匪不准遷延劉蓉速紮青石
關與多隆阿聯絡聲勢力圖克復漢南各城毋得再有濡遲目下東
南事勢大有轉機而西北逆氛尚熾該大臣督撫等各有地方帶兵
之責務宜通籌全局及早圖維乘此聲威削平醜類如有所見不妨
據實奏聞以收集思廣益之效 丁卯

上諭議政王軍機大臣等慶昫等奏甯夏漢城已成叛亂滿城情形危
急雷正綰奏現在甯靈相繼失守請飭山陝兩省速派勁兵截勦各
一摺前據慶昫奏甯夏回衆近尙安靜惟須撤去團練該回民始繳
器械並將辦理不善之道員侯雲登撤任應足服該回衆之心何以
復糾衆入城竟將侯雲登殺害是該回匪居心狡猾陽言就撫陰謀
倡亂已顯而易見慶昫等尙欲以理義與之剖論何毫無主見一至

於此該逆膽敢圍撲滿城登梯而入傷我佐領等官覽奏實深憤恨
慶昫等不能先事豫防爲該回匪所愚弄實難辭咎但事已至此惟
有亟圖補救勉贖前愆著慶昫等激勵滿城弁兵嚴密守禦平固未
復甯靈又失熙麟等所司何事亟應竭力籌辦剋日救援毋得坐失
事機致千重咎雷正綰現派馬天祥等扼紮環縣以固慶陽著俟涇
城稍鬆即督率各營相機進取陶茂林泮隴之師勦撫兼施計日即
可竣事著多隆阿飭令該提督馳赴甘境會同雷正綰合力勦辦甯
夏境地與山陝毗連亟宜加意防範晉省現有楚勇千名著英桂沈
桂芬儘數調赴定邊協同張集馨派出防兵扼紮防勦惟晉省河防
亦關緊要著閻敬銘迅即選派得力兵勇千名星馳赴晉交英桂沈
桂芬調遣以補其缺所調山西楚勇著英桂沈桂芬迅飭先行起程
不得專待山東各勇到後始行前進並著劉長佑挑派勁旅二千名

交訥欽統帶星速馳由朔平綏遠歸化一帶進趨甯夏以勦爲防德勒克多爾濟等所部兵丁節經諭令該將軍等認真操演該兵弁技藝自必可觀即著德勒克多爾濟塔清阿等懍遵前旨整頓士馬嚴密布置爲訥欽一軍後路策應如敢有名無實致該匪乘虛闖入或策應不力惟該將軍等是問曹克忠埽蕩麟遊回匪曾否肅清定邊所紮秦晉各軍不可無大員統領曹克忠帶兵素稱得力且相距尙屬不遠其能否酌帶所部調赴定邊將山西楚勇一千並歸統帶進攻甯夏之處著多隆阿迅速斟酌調派如曹克忠一時未能調往應否改派何員前往並著多隆阿迅籌辦理刻下甯夏滿城萬分危急所調援軍由定邊朔平綏遠歸化分道並進不可株守一隅務當以勦爲防與多隆阿派出援甘各軍前後夾擊方爲妥善以上所調直隸山西各軍及曹克忠所部餉需均著由直隸山西兩省源源運解

接濟阿拉善等旗地界毗連靈甯等城難保回逆不出邊滋擾著德勒克多爾濟迅速知照嚴密防範 辛未

上諭議政王軍機大臣等王憲奏邊陲地方緊要請將隴西縣丞仍改爲漳縣知縣一摺甘肅鞏昌府屬之漳縣於道光九年改爲隴西縣設立縣丞歸併隴西縣管轄原爲因時制宜起見茲據王憲奏稱漳邑原設縣治距隴西七十里西南接洮州岷州東南接岷州甯遠延袤三百餘里毗連皆係邊要地方遼闊自裁併隴西改設縣丞後書役刁詐盜賊出沒土棍強橫有非縣丞所能治理且該處舊有鹽井課項攸關甘省回逆俶擾河州狄道等處均與漳邑舊治相去非遠尤非縣丞所能籌辦各等語隴西界連邊徼復近回氛練勇籌防在在均關緊要該藩司籍隸漳縣於該處地勢情形所籌尙爲明晰現值滿目兵燹地方彫敝之際所有改官定制苟於時事有裨不妨量

爲變通著熙麟於到省後詳察情形妥議章程具奏固不必徒事紛更亦毋庸拘泥成例總期斟酌盡善經久可行方爲妥協

十二月癸巳

諭議政王軍機大臣等恩麟奏陝西髮逆回匪分竄甘境請飭陶茂林馳赴秦州多隆阿分兵援甘各摺片漢南一帶徧地賊氛沔縣略陽尤爲髮逆淵藪疊撲徽縣兩當各境內均經該地方官督團擊敗其郿縣一股由鳳縣分竄徽縣兩當者亦經該城文武激勵兵團擊退至涇州所屬之崇信靈臺均有回匪巢穴與陝西邠州鳳翔賊匪聲息相通現在鳳翔回匪紛竄甘省鹽固匪徒分擾會甯靖遠另股賊匪潛竄慶陽後路將環縣所屬之紅德城攻陷恩麟請飭陶茂林就近馳赴秦州援應多隆阿分兵援剿並令四川援兵趕緊赴甘之處自係爲軍情緊要起見惟陶茂林一軍先須將陝省汧隴麟遊及甘

甘肅新通志

卷首之四

十五

省靈臺鎮原等處各賊剿洗與雷正綰合取平涼由固原鹽茶轉戰而北進取甯靈勢難徑赴秦州恩麟惟當就現有兵力將會靖秦階各要隘分布並飭該地方文武聯絡鄉團嚴密防剿以固東南兩路毋得專待援師致誤事機陝省南防興漢北防甯夏東南之商南潼關亦須兼顧整屋踞匪尙未攻克勢難再分大支勁旅繞赴甘省西路爲兩面夾擊之舉惟陶茂林一軍久駐麟遊日久尙未蕙事現在剿辦情形究竟若何著多隆阿迅飭該提督將麟遊一帶賊匪趕緊掃除進攻平涼毋稍遲緩紅德城踞賊即著速飭曹克忠會同甘省之師力籌攻克以清慶陽後路陝省防剿緊要多隆阿未能赴甘前經諭令雷正綰於到甘後各營將士均歸該提督節制該提督務當統籌全局督飭諸軍速將各路賊匪掃蕩毋許遷延觀望並著熙麟籌辦糧臺供支軍火毋令缺乏甯夏漢城失守已疊據慶昫熙麟奏

報恩麟所稱漢團王添德率衆燒殺回莊未必即係侯雲登所遣恐回匪藉詞滋事亦未可定該匪業已踞城戕官斷難再行議撫前已諭令訥欽帶直隸官兵二千由朔平歸綏相機進發以爲甯夏援師並由山東調撥楚勇赴陝由多隆阿酌量派赴定邊以資防剿川省官兵現由劉蓉統率由褒斜一路進剿漢南恐亦未能撥赴甘省劉蓉入陝後如漢南軍務迅即蕩平可以分顧甘省即由熙麟恩麟與該撫籌商調撥可也 丁酉

諭議政王軍機大臣等雷正綰等奏官軍攻克黨原等賊巢立解鎮原城圍并陶茂林現已到汧亟籌進剿各摺片熙麟奏遵查甘省近日軍情摺雷正綰之軍攻克王村花所鎮賊巢後涇境已無賊蹤而鎮原境內之黨原北原地當衝要爲賊所踞經雷正綰親督各軍進剿直薄賊壘誘賊離巢總兵成祿魏添應等伏兵齊起奮力剿擊當將

甘肅新通志

卷首之四

十六

兩原賊巢埽蕩進紮鎮原附城一帶摻剿立解城圍餘賊敗向平涼遁去雷正綰以乘此聲威自應直進平涼而陝之汧隴甘之靈崇等處賊巢聯絡不惟涇州空虛即慶陽亦無屏蔽且恐賊得回竄邠長繞至官軍後路必得陶茂林一軍速由鳳翔前進會同剿除秦隴兩省毗境賊氛方可合力以圖進取於熙麟所奏請飭多隆阿迅催陶茂林等所部與雷正綰合籌進剿之意正同陶茂林已將鳳回收撫帶領各營到汧進剿即著雷正綰督率各軍速與陶茂林前後夾擊將汧隴及靈臺崇信之賊痛加剿洗以清後路該提督等即當合兵一路直取平涼以成破竹之勢甯靈相距道路雖較遼遠第使官兵迅克平涼由鹽固轉戰而前自足以褫奸回之魄各地方望援孔亟亦必聞風響應逆回馬化澂分股攻撲中衛地方係與蘭州等處接壤熙麟務須飭令甘省文武多派兵勇嚴扼中衛並激勵各屬官民

悉力備禦嚴防奸宄窺覲保全河西三郡毋致爲賊所乘致剿辦更形棘手鳳翔回民雖經陶茂林收撫其善後事宜並著張集馨督飭該地方官妥慎籌辦務令各回民革面洗心各安生業毋致再生事端前所調派晉省撥赴定邊一軍嗣由山東改撥單縣所紮楚勇一千名即由東省取道汴省徑赴潼關此時當可到防訥欽所帶直隸一軍亦將可達歸綏以圖進取雷正綰務當乘此迅速合軍鼓勇直前以拯隴急而紓西顧 三年甲子正月庚申

諭議政王軍機大臣等熙麟奏甯夏逆回句結情形一摺逆回馬化澂黨與攻陷橫城興武兩處營汛地方即在該處設立集市與蒙古兵民交易囤積糧食並傳聞有與蒙民勾串夥同搶劫得贓依分之事又馬化澂由綏遠城約去回匪二百餘人假冒官兵冀免沿途盤詰及至興武營地方則肆行搶劫隨後有千餘人陸續前往等情雖據

熙麟奏稱所得傳聞均係偵探兵役口述之詞而回情詭譎異常該逆自陷甯靈之後又復攻陷橫城興武兩處營汛前此尙未據奏聞現在該處回氛正熾其四出勾結及聲東擊西所至藉端希圖搆釁均在意計之中綏遠歸化兩城與甯夏毗連蒙地尤應嚴密防範前經諭令德勒克多爾濟等整飭兵勇爲訥欽後路援應副都統桂成係久經行陣之員著即將防剿事宜會同該副都統等妥辦並將綏遠城等處安分良回妥爲撫綏務令各安生業毋爲甯夏逆回恫疑搖惑自取殃禍其有由甯夏前來該城煽約良回之賊匪奸細並本地或有不安本分勾通外匪爲害地方之匪徒人等均即設法嚴密查拏懲辦以杜奸謀而安反側其馬化澂由綏遠約去回匪二百餘人隨後尙有千餘人陸續前去等情究竟有無其事並著德勒克多爾濟等不動聲色嚴密訪查督飭地方妥爲防範毋稍大意訥欽現

在帶兵由朔平綏歸一帶前進亦應隨時戒備沿途偵探情形嚴飭兵弁整隊前行或行至包頭鎮一帶暫行紮駐探聽毋致爲奸匪所乘是爲至要該署提督所帶直隸省官兵二千名恐尙不敷進剿即著劉長佑於直隸各標營再行調撥官兵一千名沈桂芬於山西各營調撥官兵一千名均即剋日派向朔平綏遠城一帶進發以爲訥欽後路之軍此項官兵並著劉長佑沈桂芬挑選精銳派令得力將領管帶迅速啟行仍將所需軍火糧餉寬爲籌備給發行抵歸綏一帶即與訥欽所帶兵會合均歸訥欽節制調遣其統帶之員由訥欽酌定或即於直晉兩省原帶各員內選派或於各軍營知有得力之員奏調均由訥欽自行辦理如由京中察看遇有可派之人亦即續行派往以資臂助晉省沿邊各境此時均應設防而陝省軍務仍尙未竣河濱布置未可稍疏此次飭令沈桂芬於各營調撥官兵一千

名以爲訥欽後路即著閻敬銘於山東省各勇營內調撥勇丁千名選員管帶剋日飭赴山西省以爲填紮之用東省勇丁多由南省募來其到晉後派令於南路如茅津渡等處設防應資得力著沈桂芬妥爲調度訥欽所統之兵前後共四千名係專赴甯夏進剿究由何路進取前已有旨令劉長佑與訥欽妥商即日前進如果由平朔等處進發不由口外行走則歸綏一帶之防德勒克多爾濟等即當專力籌備是否足資堵禦訥欽所統官兵能否分撥一千仍赴歸綏協同防禦並著德勒克多爾濟及訥欽與沈桂芬及時豫爲籌定奏聞至定邊之防係恐賊由內地竄入陝境而設前由東省調赴楚勇千名此時計可到防是否單薄如須添兵即著多隆阿酌量調派並著熙麟於楚勇到防後就近隨時聯絡調度以資防剿 三月庚戌諭議政王軍機大臣等訥欽奏馳抵榆林整隊前進一摺甯夏滿城被

圍日久亟待援兵訥欽現雖馳抵榆林俟至定邊探蹤進剿惟定邊渡河三十里即是靈州該處回匪衆至數萬逆首馬化澂賊巢卽在金積堡靈州附近四面俱爲回逆占踞非攻破靈州不能進援甯夏訥欽現擬派副將趙延烺作爲嚮導直指靈州設法攻剿所辦尙合機宜卽著督率在事將弁實力攻破並於勇往之中加以慎重毋致輕進失利陝省回匪自多隆阿督兵痛剿次第削平其汧隴餘氛有曹克忠等軍分兵掃蕩不難剋日蕝事而甘肅自回匪起事後地方官狃於議撫遂至賊氛日熾到處蔓延若非威望素著之大臣統兵進剿大張撻伐不足以掃羣醜而靖邊陲本日已明降諭旨命多隆阿督辦陝甘軍務矣該大臣務當統籌兼顧俾陝甘兩省迅就肅清用副委任訥欽所部各軍並陝甘帶兵各員均歸多隆阿節制以一事權 壬子

諭議政王軍機大臣等恩麟奏堵剿甯夏賊匪催陶茂林進攻秦清兩縣各摺片甯夏賊匪屢次竄撲滿城及平羅縣洪廣營等處靈州一帶賊蹤紛駛聲息不通中衛地曠兵單不敷防剿恩麟酌撥官兵一千餘名交代辦提督梁生嶽統帶前往中衛又續調前次派赴安定之川黔勇丁千餘名一併交梁生嶽調遣著熙麟恩麟督飭派出各軍實力進剿迅殲醜類並知會慶昫就現有兵力認真固守以待援軍甯夏平羅等處匪目遞稟以漢團仇殺被偏生事藉口狡辯梁生嶽以官兵未集權示羈縻卽令禁止燒殺繳獻城池以緩其謀一面相機布置密籌進剿著熙麟恩麟飭令梁生嶽統率所部力圖掃蕩一俟得有援師卽可奮力攻剿不得專事羈縻致滋貽誤南路之西和鹽關鎮賊匪與官軍久持屢出奔竄著熙麟恩麟督率林之望痛加剿洗迅殄逆氛清水縣之張家川秦安縣之蓮花城等處賊匪時

聚時散肆意衝突非厚集兵力不得迅期殄滅陶茂林一軍本俟泝隴葳事後即當移師赴甘著多隆阿檄催陶茂林轉戰而前會合林之望張華之兵將張家川蓮花城之賊次第剿辦悉數殲除然後由秦安徑赴隆靜與雷正綰之師東西夾擊以收破竹之效雷正綰務當節節進剿俾該逆腹背受敵應接不暇方可痛殲羣醜多隆阿現在督辦陝甘軍務應如何分撥勁旅妥籌兼顧之處著該大臣酌度辦理 乙卯

諭議政王軍機大臣等雷正綰奏疊平賊壘靈宗後路肅清分軍規取平涼一摺另片奏請將西南之清水等處兵勇交陶茂林就近節制等語慶昫奏近日甯夏防守情形一摺雷正綰由靈臺截剿泝隴竄逆後復自崇信連克雙廟集神浴河白水鎮眉縣鎮等處賊巢更番移營前進靈臺崇信後路一律肅清現與陶茂林晤商該提督由東

北白水鎮四十里鋪一帶陶茂林由西南華亭一帶分道規取平涼府城所辦均屬妥協著即會同陶茂林剋日進取平涼以期漸次掃蕩被脅難民自應准其反正如有真心從賊者仍應分別嚴懲該提督由東北路進兵與西南聲息不通所有清水安定隆德靜甯一帶兵勇即照所請交陶茂林就近節制訓練以專責成即著熙麟雷正綰傳知陶茂林認真統率並須兼顧蘭州省城不得稍有疏失曹克忠現在駐軍何處應由何路進剿著多隆阿等迅飭進兵以收夾擊之效多隆阿傷病疊經寄諭詢問如子已取出傷可無礙即著迅速馳奏仍一面督飭穆圖善雷正綰等分道進剿迅速奏功以副委任穆圖善既以幫辦軍務暫署關防不獨剿辦陝省回逆是其專責即漢南髮逆亦應幫同劉蓉妥議截剿不可顧此失彼慶昫等奏甯夏匪衆情形時來撲犯該將軍等固守待援現據恩麟咨稱已在中衛

左近捐籌小麥三千石馱運接濟著該將軍等嚴催運送仍督率在城文武固守待援毋稍疏忽恩麟所籌麥石不過暫濟一時之急此後仍著熙麟會同恩麟隨時設法陸續解濟以蘇民困訥欽一軍前經諭令速援甯夏並著派員催提內外夾擊以保危城訥欽之兵未經行陣該署提督恐難獨當一面前諭多隆阿揀派大員幫同訥欽帶兵剿賊即著多隆阿穆圖善迅速妥籌調派馬隊五百名曾否派往並即催令起程以資得力雷正綰攻剿平涼如已得手即分軍前赴甯夏會同慶昫痛殲醜類規取郡城毋失戎機 四月戊戌

諭議政王軍機大臣等熙麟奏慶陽情形緊要不能迅赴蘭州慶防兵勇在環縣擊賊獲勝甯夏滿城被圍日久亟待援兵各摺片前因甘省軍情緊要慶陽僅辦糧臺轉運文煜到後已有大員接辦是以疊諭熙麟迅赴蘭州省城接印任事茲據奏稱平涼大軍將次合圍定

邊兵勇將次進征恐敗賊紛竄肆擾分我兵力且近獲賊供有東竄之志慶陽之防喫緊實倍往昔等語所奏自係實在情形即著熙麟暫住慶陽會同文煜等於徵兵籌饟各事宜妥爲調度思麟暫權護篆辦理有無偏謬仍著留心隨時查看不得存兩人分任之見稍存諛卸現在漢中髮逆悉數東竄鄂北襄隨一帶到處傳烽僧格林沁駐紮楚豫之交剿辦髮捻斷不能移師西向都興阿由定邊一路前進計現在已入甘境雷正綰尙稱能戰陶茂林亦已抵甘著熙麟會同該提督飭令各營將士迅克平涼節節掃蕩以期早日蕝事慰朝廷西顧之憂甯夏滿城被圍日久望援綦切訥欽兵勇雖有七千餘名之多大都未經戰陣趙延焟所募勇丁既不能符三千之數熙麟令先招勇丁一千名馳往定邊與趙延焟之兵一同進剿著即照該督所擬迅飭該員弁分路前進訥欽之軍已歸都興阿統帶著都興

阿酌量先挑勁兵一千名力解甯夏滿城之圍並分兵越花馬池而西偏近黃河駐紮扼賊東竄並催梁生嶽拔隊前進儻仍前逗遛即著嚴參懲辦雷正綰攻克平涼之後即鼓行而西與都興阿會合進兵熙麟籌解軍火遇事和衷籌商以期共濟正在寄諭間據雷正綰奏請飭多隆阿所部數營撥歸都興阿統率援剿甯靈並曹克忠平毀長甯驛馬鹿鎮兩處賊巢劉蓉奏生擒曹逆並將餘匪搽捕淨盡蔡逆被剿西竄官軍追剿堵擊情形督催姜玉順等拔營赴楚等摺片雷正綰屢獲大捷俟攻克平涼仍遵十九日諭旨與都興阿和衷商推進兵多隆阿所部除姜玉順等馬步各隊已撥赴楚北此外如尚有餘兵固可撥赴甘省如無兵可撥即著劉蓉將所部酌撥若干赴雷正綰軍營以厚兵力平郡城外援賊剿滅淨盡城賊之勢自孤著雷正綰飭令陶茂林等乘勝進徧迅奏膚功曹克忠一軍著仍遵

前旨飭令回隴或駐紮盤屋以資控制逆首曹燦漳既經擒獲餘黨搽斬殆盡仍著劉蓉分飭各將士將零星逆匪悉數殲除蔡逆被剿西犯探悉不能偷越興安思由鎮安竄入甯陝老林趨佛坪褒沔南出昭廣以逞回川之謀現已闌入鎮安大小心川並將小心川附近一寨攻破逆衆尙有三萬之多設使偷渡漢江則川陝之蔓延滋甚著李雲麟由後追躡毋令賊匪得以喘息劉蓉即檄飭蕭慶高等移得勝之師分扼江口一帶截其上竄之路何勝必等會合邀擊儻竟竄近川疆著駱秉章分飭在防將士並地方文武嚴密截擊以收聚殲之效劉蓉俟穆圖善起程即出省督師或徑趨潼商或先赴鎮安著斟酌緩急情形隨時具奏 五月癸丑

諭議政王軍機大臣等都興阿奏接奉寄諭並沿途探悉形勢擬辦情形一摺據稱近日於沿途探訪情形詳按圖勢靈州左近山路崎嶇

險要必爲賊守由定邊至甯夏四百餘里又阻黃河賊情叵測未必遙聞援軍將至即露倉皇情形恐有詭計怠我軍心查甯郡漢城在北滿城在南必得一軍由北山進剿方有制勝之機若西蒙克西克等過渡會合甯夏官兵與北山前後夾擊可斷該逆往來之路請飭綏遠城將軍豫行知會鄂爾多斯各旗稍濟駝隻並派兵會合阿拉善兵相機兜剿該將軍進規靈州兩岸進攻始於援甯有裨等語所奏不爲無見著都興阿催督各軍規取靈州訥欽已到靈州之花馬池該將軍當與之聲勢聯絡量爲調遣如察看該員不能得力或將其兵勇裁撤或調派赴北路防堵均著察覈辦理西蒙克西克等如已到營著即催令迅速援甯並分撥馬隊由安邊堡一帶出邊急趨鄂爾多斯副盟長扎薩克郡王棟魯布扎木素居處之地探明過渡設法會合甯夏滿城官兵與北山前後夾擊先通官軍糧道兼斷該

逆往來之路慶昫仍當就現有兵力嬰城固守俟援軍到後會合剿擊賊情如果惶懼何以未見解圍他竄恐是裝點羸弱情形懈我軍心慶昫不可墮其術中是爲至要官軍由南路進剿若北路無兵阻遏必不能收聚殲之效前已諭理藩院飭阿拉善王統兵數千從磴口進邊列陣嚴扼竄越遇賊即擊其北路平洪孤城等處並令撥兵防守著都興阿德勒克多爾濟等遵旨傳知該王迅即派兵赴防並令多備駝隻以資運解軍需之用桂成尙稱勇往著即統帶勁兵會同阿拉善王部下防兵出甯夏北山進紮險要相機兜擊歸綏本處之防亦關緊要恐有外來奸回勾結滋事著德勒克多爾濟實力經理毋得稍涉大意平涼之圍已久雷正綰當力圖攻克以便進兵甯夏都興阿將次入關該提督當與之聲息相通會商妥辦以期早日竣事 丁巳

諭議政王軍機大臣等慶昫常陞奏圍城賊衆忽退現在辦理情形一摺甘肅逆回自本年二月間圍攻甯夏滿城暗決城西支渠放水灌城經慶昫等急令附城人民開田宣洩得保無虞四月初七日城外南北賊營忽同時拔退復於夜間決渠灌城因滿城依山且係沙地滲水並未淹及慶昫等趁賊衆暫退派員前赴山北提運黃米小麥四百餘石並慶陽糧臺餉銀五千兩入城暫資支放甯夏賊氛甚熾此次暫將城圍撤退乘雨決水灌城逆謀甚屬兇狡訥欽援兵雖已行抵靈州因續調直晉官兵到者甚少趙延烺在定邊所募勇丁亦因前赴慶陽稟請軍械餉項俟多隆阿營內所撥馬隊到齊先攻靈州始能赴援甯夏是該處滿城防剿仍形喫緊都興阿前奏西蒙克西克等到營即令過渡會合甯夏官兵前後夾擊業經諭令德勒克多爾濟等傳知鄂爾多斯各旗多備駝隻並諭知桂成帶兵會阿拉

甘肅新通志

卷首之四

二十四

善王部下防兵出甯夏北山夾擊著都興阿懍遵疊次諭旨迅督各軍起程前進會合訥欽所部相機進兵並著雷正綰督率諸軍迅將平涼攻拔與都興阿各營聲勢聯絡慶昫仍當就現在存城兵力加意激勸嬰城固守以待援軍毋稍疏懈至回情反覆堪虞慶昫等所奏鎮屬回官馬謙遣人單騎來城甘言求撫且稱鎮道印信已交中衛縣由梁生嶽等齎送省城必係因雷正綰進攻平涼疊次獲勝冀以甘詞邀撫綏我師期斷不可信慶昫等惟當激勵兵勇加意防範毋又墮彼狡謀致蹈漢城覆轍雷正綰亦當乘賊情少懈之時迅圖攻克平涼以副委任 辛酉

諭議政王軍機大臣熙麟奏剿辦甯夏回逆請派兵勇赴援秦州並請飭四川總督盤查滇匪各摺片甯夏滿城西門已開城外賊營全行撤退惟平羅賊勢仍未稍鬆顯係該逆聞大軍漸集復擬甘詞求撫

緩我師期疊經諭令都興阿雷正綰慶昫等嚴密布置分路進剿著即懍遵前旨迅速進兵會同掃蕩毋爲該逆所乘秦州所屬之秦安縣張家川蓮花城等處回匪蔓延勢甚危急平固甯靈失陷後蘭州大道梗阻專恃秦州一路爲赴省糧運要道關繫極爲緊要曹克忠一軍能否赴援著劉蓉懍遵前旨酌度情形趕緊辦理如曹克忠未能前往即著劉蓉另撥勁旅馳赴秦州協剿陝省如無兵可撥著雷正綰抽調兵勇兼顧秦州以通餉道平涼逆燄已衰惟每當接仗漸多兇很叛徒聲音服飾均係雲南回類難民朱元升亦供有雲南馬賊七百往攻鞏昌之語甘回旣與滇匪勾結如果源源踵至勢將不可收拾著熙麟文煜雷正綰檄飭毗連川陝等處各地方官務於入甘要隘嚴密盤查認真防堵著駱秉章確查甘肅通滇道路無論驛站大道偏僻小徑嚴飭地方官一體盤詰如有滇省回民及來歷不明之人即行查明懲辦以靖匪蹤平涼屢戰皆捷極爲得手著雷正綰會同陶茂林等迅圖攻拔並將外來滇匪殄除淨盡毋留遺孽

甘肅新通志

卷首之四

二十五

丁卯

諭內閣熙麟雷正綰奏官軍克復平涼府城擒斬巨逆一摺甘肅平涼府城自被回匪竄踞後雷正綰督軍進攻疊次獲勝會同陶茂林之師兩路偪城逆衆併力抗拒官軍奮勇由西北登城守賊潰亂復豫窆地道轟塌東南城隅大隊先後擁入賊占西北拌死巷戰我軍縱橫衝擊鏖戰兩日將城中悍賊一律掃除並將著名巨逆鐵西羽輕材殲斃剿辦極爲得手雷正綰自督軍入甘掃平靈臺崇信黨原北原及白水局現新城等城鎮卓著戰功此次復督隊攻克平涼剿除巨逆實堪嘉尚雷正綰著加恩賞穿黃馬褂並發去白玉四喜搬指一箇白玉翎管一枝大荷包一對小荷包兩箇交該署提督祇領陶

茂林會同雷正綰分路進攻親冒矢石立拔堅城甚屬奮勇陶茂林著加恩賞穿黃馬褂以示優獎 六月戊寅

諭議政王軍機大臣等恩麟奏陝西敗匪句結甘省東路回匪圍攻莊浪靜甯等城請飭陶茂林迅速援剿一摺莊浪隆靜等處賊匪充斥恩麟派出防剿各軍尙形單薄自應厚集兵力迅掃逆氛前據雷正綰奏稱平涼業已攻克擬偕陶茂林分路進擣蓮花城張家川賊巢先通隆靜大路兼顧蘭垣現在靜甯等城待援迫切曹克忠不能赴甘陶茂林一軍應即馳赴安會遏賊西竄援剿隆靜等處力解城圍著都興阿雷正綰會商妥辦恩麟嚴飭成桂等協力固守以待援師一面將省城防守事宜盡心籌畫毋稍大意南路軍情責成林之望相機勦辦甯夏回務責令梁生嶽妥爲布置均不可有名無實

戊戌

甘肅新通志

卷首之四

二十六

諭議政王軍機大臣等恩麟奏北路回目縛賊獻城一摺據稱北路回目張保澂震懾兵威稟請投誠本年四月間自帶所部賺開固原城門殺賊無算生擒逆賊花萬六等八名並將鹽茶廳城一併收復等語回情狡詐反覆無常惟觀此次該回目殺賊獲城情節似尙可信或因官軍克復平涼震懾兵威因而潛消反側亦未可定著恩麟飭令該回目將所獲逆匪花萬六等八名解赴省城訊明正法仍當隨時察看防其中變毋得稍涉大意墮其詭謀雷正綰等攻克平涼後已移得勝之師進攻固原現在固原鹽茶已復平郡迤北賊氛漸戢即可直指靈州都興阿前奏擬由磴口進兵當經諭令都興阿雷正綰合力前進直擣甯靈即著該將軍等慎遵前旨妥速籌商以期節節掃蕩迅殄逆氛靈夏回目馬化澂旣遣回人馬精忠呈繳鎮道印信並約期繳獻郡城其事雖未可深信若能暫示羈縻紓我兵力亦

不妨從權辦理前因熙麟奏甯夏逆匪畏罪投誠當經諭令都興阿雷正綰酌量辦理而慶昫復有中衛縣迪北大堡中馬化澂張貼偽示歸罪赫汶典之奏是甯夏回匪尤爲詭譎恩麟等尤須慎之尤慎不可稍爲含糊希圖了事如可暫加籠絡即咨明慶昫妥籌辦理都興阿雷正綰專辦甘省軍務均屬責無旁貸將來或剿或撫進止機宜即著隨時察看酌辦如鹽固投誠尙可不至反覆即不妨予以自新以期併力北征別無牽阻 七月庚子

諭議政王軍機大臣等都興阿奏力籌進剿先援甯夏慶昫奏郡城近日情形各摺片逆匪攻撲平羅縣城決渠淹灌勢甚猖獗該縣爲產穀之區儻爲賊踞不惟滿城孤立且採辦兵糧備形棘手亟應籌撥勁旅速解城圍著都興阿督飭杜嘎爾帶領派出各軍由石嘴山渡河繞赴甯夏北山星速前進痛加剿洗援救危城如所調各營陸續

甘肅新通志

卷首之四

二十七

到防一面仍著都興阿分兵進剿靈州以期節節掃蕩慶昫奏漢城回匪逐戶搶掠商民失業人心離散賊匪中之強者所搶較多弱者所搶較少是以貧回旣無所得轉致廢時失業賊首馬萬選赫汶典亦因分贓不勻貌合心離該回互相猜忌衆志渙散當此機有可乘如能合兵進擣定當事半功倍著都興阿雷正綰將如何派撥勁兵進剿甯夏漢城以赴事機之處悉心籌商妥爲辦理慶昫常陞就現有兵力嚴密堵剿毋徒株守待援致失戎機現在金陵全城克復殲擒首逆我軍聲勢日壯都興阿等乘此聲威務當大張撻伐如其畏威悔罪捆獻逆首亦可酌度機宜量從寬政總期肅清甘省早紓廩繫以副委任勉之慎之 辛亥

諭議政王軍機大臣等恩麟奏大兵攻克平涼收復瓦亭東路現就疏通亟須籌辦西北各情形一摺雷正綰等攻克平涼後餘賊竄入瓦

亭峽城內復經官軍奪其要隘賊匪北竄自應乘勝進兵節節掃蕩前據都興阿奏督飭杜嘎爾帶領派出各軍由石觜山渡河繞赴甯夏而雷正綰自攻克平涼後一切進兵情形未據入奏現在甯夏靈州一帶匪衆麇集而平涼瓦亭兩處敗賊又盡數北竄勢燄愈張必須南北兩路大軍會合夾擊方可制賊死命又恐賊匪乘虛西竄則中衛正當其衝該處一片孤城僅有梁生嶽所帶兵勇駐紮爲數無多恐不足恃且靖遠又有續到之陝西回目黑牙古赫明堂等帶領數萬之衆具稟乞撫此輩人數過多勦撫均屬不易設或包藏禍心計圖一逞其患尤不可勝言著都興阿迅飭杜嘎爾等渡河之軍由北而南節節進擊雷正綰移平涼得勝之師取道北攻會合都興阿派出各軍實力狙擊力掃狂氛迅克甯夏漢城立解甯夏滿城並平羅之圍並飭陶茂林繞過西面駐紮中衛靖遠適中之地約會南北

甘肅新通志

卷首之四

二十八

兩軍併力兜擊兼防甯靈賊匪西竄之路黑牙古等率衆乞撫旣據該護督稱其人數太多安插不易即著飭令楊柄銜暫示牢籠隨時防其中變毋稍疏虞並著雷正綰到後斟酌情形妥籌辦理毋貽後患 癸丑

諭議政王軍機大臣等恩麟奏鹽固逆回北竄甯靈滋擾中衛靖遠二縣暨撤回句結占踞循化廳城各一摺甘省鹽茶固原回逆糾衆三四千人於五月二十五六等日竄至靈州所屬之同心城旋分股竄撲中衛縣屬之甯安思和等堡與甯郡回逆句連一氣擬將各地麥田搶割後分走花馬池中衛縣拒敵官軍其陝西臨渭之賊亦連日焚掠鹽固四鄉並靖遠北山後一帶前次率衆乞撫之回目黑牙古等以聞風煽動傳知河州東鄉回匪欲爲應援賊情甚屬狡悍現在中衛靖遠各要隘防兵不及千名中衛係四達要衝靖遠爲甯靈等

處入省咽喉省城兵力亦單防勦均關緊要雷正綰所部各軍兵數較多能否酌留數營歸陶茂林管帶辦勦南路張家川股匪其餘各營即由雷正綰統帶星速馳赴蘭州慎固省防妥籌分布或酌派勁旅分扼中靖各要隘或督率各部擇紮適中地方兼籌戰守並著都興阿雷正綰相度機宜妥商辦理都興阿所統諸軍已漸入甯境如未能分兵南顧省垣即專力規復甯夏漢城以牽賊勢恩麟仍當嚴飭梁生嶽等就現在兵力扼守中衛靖遠各隘毋令賊勢復行煽結儻再有疏虞必將該員弁從重治罪循化廳屬街子等上四工撒拉與城內寄居之保安逆回潛行勾結襲撲廳城護參將陝成英等拒戰受傷擁護難民出城旋致城垣失陷恩麟現調洮州卓泥土司楊元等壯健番士兵丁分扼關隘進襲撒巢即著催令同知吳鼎元迅速赴任與陝成英號召附近良撒會同番土各兵力圖克復廳城並

著玉通酌派精銳弁兵協力助勦毋得稍分畛域至清水工等下四工撒拉自稱願隨官軍助力是否出於至誠前據恩麟奏稱回目黑牙古率衆乞援此次回擾甯靈黑牙古即行煽變可見若輩詭詞求撫毫不足恃惟下四工撒拉等現既安靜如常總當飭令陝成英等妥爲撫馭嚴密防維毋令踞城撒匪得以乘間簧惑 丁巳

諭議政王軍機大臣等都興阿奏官軍渡河勦賊獲勝攻克姜家村等賊巢進攻寶豐雷正綰奏通籌布置會攻張家川鹽固回匪投誠各摺片都興阿派撥各軍由草地繞出石觜山渡河援勦疊獲勝仗賊向寶豐遁去杜嘎爾督軍追勦攻克姜家村紅柳堡兩處賊巢現在檄催平羅縣趕造雲梯乘勝進攻寶豐縣城即著都興阿督飭杜嘎爾等所部奮力攻勦迅拔寶豐將賊氛次第掃蕩進規甯夏漢城現在金陵奏捷擬將兵勇酌量裁撤或調赴各營助勦都興阿久在揚

防從前所部將弁兵勇得力者諒復不少如兵力尙覺單薄即可咨明曾國藩等酌量調撥赴甘以利攻剿雷正綰自攻拔平涼平毀固原瓦亭驛賊卡後與陶茂林籌商會軍進攻張家川賊巢以期堵制鹽固等處竄匪疏通驛道兼顧省垣所籌均尙周妥現已疊獲勝仗將張家川木城攻拔殲除悍逆多名即著督飭各軍會同陶茂林所部合力環攻張家川土城迅圖克拔進剿龍山鎮蓮花城等處以期次第肅清前據恩麟奏稱鹽固逆回竄撲中衛等境該二處回民旣已投誠何以復行出境滋擾並著都興阿雷正綰飭令署臬司楊柄鏗等慎密防維妥爲撫馭固不可激之生變牽掣我軍亦不可墮彼狡謀致誤全局隆德靜甯在防諸軍並由雷正綰妥爲布置俟攻克蓮花城等賊巢後隨時詳察機宜與都興阿妥籌辦理中衛靖遠各要隘並蘭州省垣兵力均單都興阿雷正綰仍懍遵前旨妥籌兼顧

甘肅新通志

卷首之四

三十

毋稍疏虞 八月癸酉

諭議政王軍機大臣等恩麟奏隴西漢回民團互相戕害同城文武稟報兩歧一摺甘肅隴西縣西鄉武生李耀榮等聚衆萬餘名爲海團圍攻鞏昌府城由西關擁入與回民互相戕害署遊擊周勝近在同城何以所稟海團來城焚殺情節與該府知府斌越等率多兩歧至西鄉海團與府城回民究竟平日因何結怨並因何事啟釁均著恩麟確切查明據實具奏該護督現派都司鄒玉標所帶調省黔勇八百名留駐鞏昌並經林之望添派勇目文象奎帶黔兵一千二百名馳援即著恩麟檄飭林之望統率兵勇將一切防剿事宜妥爲籌辦俾鞏城速臻安謐毋令再行滋擾知府斌越等辦理不善實屬咎無可辭至誘執團首李耀榮等欲行正法尤難保無殺團媚回情事代理隴西縣知縣黃國錦著先行革職鞏昌府知府斌越著一併撤任

恩麟即督飭林之望徹底根究嚴行懲辦回疆匪勢鴟張軍情萬分危急亟須添撥勁旅以資掃蕩著都興阿雷正綰懍遵疊次諭旨將甯靈等處賊匪迅速殄滅庶可騰出兵力剿辦新疆之匪新疆回逆如入關暗圖勾結與甘省回匪聯絡一氣防剿愈形棘手著都興阿雷正綰酌度情形調派精兵嚴扼要隘使口外之賊與口內之賊不能勾串聯爲一氣方爲妥善俟川陝兵到再行派員統帶進剿

癸未

諭議政王軍機大臣等雷正綰奏攻毀張家川逆巢現移營進攻龍山鎮賊壘及河州戒嚴請飭曹克忠迅赴本任各摺片張家川逆匪踞險抗拒官軍經雷正綰與陶茂林合軍攻剿破其巢穴餘賊向龍山鎮敗竄雷正綰已與陶茂林各派隊伍拔營跟蹤進剿即著該提督等將龍山鎮蓮花城迅圖攻拔盡洗逆氛都興阿之軍進規甯靈前

甘肅新通志

卷首之四

三十一

經派兵渡河將寶豐攻克軍聲丕振賊膽已寒惟甯靈一帶回蹤麇集仍應厚集兵力方能迅就蕩平雷正綰擬俟龍山鎮等處克復親督各營直趨隆靜就近察看固原情形順道北向與都興阿之兵會辦甯靈即著會商都興阿妥籌夾擊固原回匪雖稱乞撫前據恩麟奏報該處回衆北竄甯靈中衛等處喫重是乞撫之說尙難深信雷正綰務當詳查真僞相機辦理不可大意中衛地當緊要梁生嶽等軍本不足恃雷正綰擬令陶茂林於攻克龍山鎮蓮花城後率所部馳赴中衛蘭州一帶扼要防剿所籌深合機宜著即飭令陶茂林將該兩處賊巢迅即攻克率師前進以資得力前次恩麟奏稱趙必達統帶果義一軍剿辦河州回匪連戰皆捷而此次雷正綰則稱河州紳民稟訴趙必達防練疏忽恇怯無能是該員之不能得力已可概見恩麟乃以此等劣員統兵剿賊已屬用人不善又不將該員據實

參奏猶且粉飾多詞鋪張入告該護督是何居心甘省徧地賊氛恩
麟貽誤不少不知力圖補救稍盡心力尙如此昏憤糊塗任令地方
糜爛自問當得何罪著雷正綰即將趙必達劣款查明如果防練疏
忽恇怯無能務即嚴參懲辦一面派委知兵大員前往接統其衆至
河州鎮係曹克忠本任該處情形喫緊陝西賊勢已鬆無須該員在
陝助勦著劉蓉即飭曹克忠統帶所部原營迅赴河州本任不准遲
延並不准劉蓉再行奏留致誤事機陝省近日軍情仍著劉蓉隨時
馳奏曹克忠抵河州後如尙須添兵助勦著雷正綰會商都興阿酌
量派撥數營以資攻勦 丁酉

諭議政王軍機大臣等雷正綰奏攻拔龍山鎮逆巢進攻蓮花城情形
並固原復爲回陷各摺片雷正綰一軍攻克張家川後乘勝進拔龍
山鎮逆巢並將邵家店馬家堡各小巢平毀因聞固原回逆復變該

甘肅新通志

卷首之四

三十一

署提督督隊力攻蓮花城急圖克拔以便移師隆靜詎銳師乘勝深
入山險人馬礙難旋布雷正綰猝被矛傷領下弁勇陣亡者千餘名
披覽之餘曷勝廑繫著雷正綰趕緊調治一俟傷口平復即行整飭
隊伍與陶茂林會督諸軍迅拔蓮花城老巢移軍隆靜規復固原疏
通蘭州驛路兼顧省防雷正綰所部各營因疊次傷亡及裁汰老弱
外現在賊蹤蔓延已屬不敷勦辦而固原州城復於八月初四日被
陝回孫義寶潛帶賊衆四千餘人句合城中回逆赫明堂等乘夜襲
陷固原鹽茶回衆前經甘詞乞撫此次陝回即句結內應撲陷固原
可見若輩狼子野心萬難寬宥亟應大加懲創俾其震懾軍威始能
徐議招撫著穆圖善慎遵疊次諭旨迅即統帶所部赴甘會同都興
阿雷正綰妥爲籌商應由何路進兵助勦均著相機辦理都興阿一
軍已抵靈州花馬池能否與雷正綰聲息相通並著酌度機宜先與

雷正綰等軍聲勢聯絡再行節節進兵毋稍大意 九月癸卯
諭議政王軍機大臣等穆圖善奏督師赴甘請調赴鄂舊部劉蓉奏敗
匪紛竄階州督軍越境窮追遵飭張集馨曹克忠赴甘及因患病懇
請開缺各摺片甘省回氛日熾軍情緊要穆圖善現已督率馬步各
營陸續進發惟後起步隊尚須俟有餉銀方能西上著劉蓉督飭糧
臺迅速籌款給發俾利遄行甯靈一帶地方平曠利用騎兵穆圖善
所部馬隊僅金順兩起三百名實屬不敷分遣其前調赴鄂之溫德
勒克西兩起馬隊本係穆圖善舊部且皖楚交界山路崎嶇稻田徧
野馬隊難以展布不如調赴甘省用其所長較可得力著官文酌量
調派至蘇倫保兩起馬隊及藍斯明四營步隊能否一併飭赴甘省
之處並著酌量軍情妥籌辦理穆圖善勇往直前深堪嘉尚本日已
明降諭旨令其幫辦都興阿軍務該將軍務當益矢忠勤兼程入甘

甘肅新通志

卷首之四

三十三

與都興阿和衷商辦盡力勦洗肅清邊陲以副委任蔡啟等逆業經
蕭慶高等督軍追躡疊獲勝仗擒斬收降匪黨甚衆餘孽狂竄階州
劉蓉現檄林之望力扼要隘並飭蕭慶高等越境窮追辦理尙屬認
真此股敗匪現在猛撲畢口急圖入川蕭慶高等已繞出甯羌截勦
駱秉章當督飭川軍會合陝軍分途兜擊就地殲除毋令紛竄入川
致形滋蔓曹克忠一軍現已拔隊赴甘既可爲雷正綰後路聲援並
可兼顧隴防第該營中有新收降卒必須嚴加鈐束隨時防範毋稍
大意張集馨所陳通籌全局謂議撫緩兵糜餉老師不如先機決策
一勞永逸等語前據雷正綰奏固原降回復叛襲陷城池是該逆詭
譎性成以乞撫爲緩師確有明證張集馨既於回情知之甚悉必能
操縱得宜著懍遵前旨馳往甘省相機籌辦不得膠執成心亦不必
意存遷就雷正綰傷口已否平復甚深廩繫現在逆氛復熾雷正綰

務當與陶茂林迅籌進剿力挫兇鋒恩麟當振刷精神督率兵勇固守省垣認真剿辦河狄等處回匪不得一味畏葸因循貽誤軍事此時陝西境內雖已肅清而西固汧隴之防東嚴興商之守責任綦重劉蓉著毋庸開缺賞假兩箇月安心調理其重大軍情仍著力疾料理毋許推諉 丁巳

諭議政王軍機大臣等據都興阿奏西甯回匪猖獗府城被圍固原復陷各摺片西甯回匪前據玉通奏業已投誠並親赴各處寺院村莊解散鄉勇何以此次青海盟長王公及塔爾寺阿家呼圖克圖復紛紛向都興阿軍營呈稱回匪圍困西甯府城懇請發兵拯救可見回逆犬羊成性反覆無常玉通所奏投誠各情全不足恃著玉通將回逆何以復叛情形迅速馳奏現在該逆句通巴燕戎格廳撤回等肆意焚搶猖獗已極而都興阿雷正綰分剿靈甯蓮花城等處之賊兵力難分非得知兵大員統帶勁旅馳往勢難力挫兇鋒前有旨令駱秉章撥兵援甘並因官文奏調顏朝斌諭令駱秉章飭令該員迅赴鄂省此時西甯軍務緊要自應移緩就急迅速赴援著駱秉章於援甘兵勇外另撥勁旅於顏朝斌江忠濬二員內酌派一員統帶馳赴西甯力籌剿辦並著都興阿劉蓉會商檄令曹克忠即統所部前往西甯協剿如該總兵尚須會剿蓮花城賊一時未能前往即由都興阿劄飭蒙古各王旗同心禦侮以資保衛玉通身任西甯辦事大臣責無旁貸著就現有兵力布置城守事宜妥籌防剿毋稍疏虞 庚辰

諭議政王軍機大臣等張集馨奏馳抵涇州偵察賊情一摺逆回自叛陷固原後麴聚涇平交界之新城地方欲斷平涼各營糧道又有馬步賊萬餘在涇州之北原肆擾首逆孫義寶欲將老弱送回白集原糾衆回竄長安現經留防平涼之總兵周顯承等在黨原各隘連戰

皆捷餘賊遁回新城小峴子一帶盤踞涇平兩處計無可虞糧道尙不至阻塞惟該逆盤踞北原必須力籌扼剿以免旁逸著都興阿雷正綰飭令留防平涇各營務將此起竄賊就地殲除杜其竄陝之路曹克忠已抵蓮花城現與雷正綰陶茂林三路進攻著該署提督督率諸軍迅圖攻拔以便次第規復固原兼顧平涇等處至逆匪既有竄回陝西省城與城中回民勾結內應之語尤不可不嚴爲之防著劉蓉將城守事宜不動聲色嚴密稽查並派兵於邠州白集原等處實力防範儻有疏虞任賊闖入惟劉蓉是問 丙申

諭議政王軍機大臣等張集馨奏敬陳各軍分道進剿一摺雷正綰一軍攻拔蓮花城後現由涇州北原進兵規取鹽固並調曹克忠八營幫同進剿分撥六營屯紮秦州天水以防回逆分竄陝疆即著都興阿雷正綰督飭各軍迅克固原併攻鹽茶將各村逆窟悉數掃除疏

甘肅新通志

卷首之四

三十五

通驛路即可由靖遠直達蘭垣屆時或助剿甯靈或進援西甯如河州逆勢鴟張兼可分兵馳應並著雷正綰隨時會商都興阿等妥籌辦理陶茂林所部各營前經雷正綰檄令由靜甯徑赴蘭州即著迅解靜甯之圍馳赴省垣將省防布置妥帖即由阿干沙泥一帶東行促解河州城圍收復狄道仍飭該提督步步爲營穩慎進取毋得稍有疏虞前據都興阿等奏稱穆圖善已由定邊草地渡河會合杜嘎爾之軍進攻甯夏並著該將軍懍遵前旨與前敵聯絡聲勢奮勉圖功以副委任都興阿雷正綰俟克復固原後如甯靈一路兵力尙單現紮慶陽防守之人營能否調往助剿並著屆期會籌妥辦甘省督標城守六營弁兵千餘均係回籍中軍副將趙秉鑑左右多係回弁張集馨請俟雷正綰到省後將回弁回兵調入大營隨剿有無窒礙抑應作何彈壓撫馭之處著雷正綰張集馨會同恩麟慎密酌辦張

集馨於拜摺後馳赴平涼著將應辦一切機宜與雷正綰悉心籌商
布置妥協仍遵前旨迅赴蘭垣於行抵蘭州後即行馳奏所有簡閱
兵勇鎮撫回衆各事宜並著照所擬商同都興阿雷正綰陶茂林恩
麟等迅籌妥辦雷正綰仍當懍遵前旨迅拔固原節節北趨與都興
阿聯絡夾擊迅殲醜黨克蕝全功以慰懸望 十一月壬寅

論議政王軍機大臣等恩麟奏河州鎮城被陷稟報兩歧雷正綰攻克
蓮花城陶茂林馳赴河州暨瀝陳西甯回匪漢番人等解散未可深
信各摺片馬七氏等既在河州開導回衆何以州城猝然被陷可見
該回婦辦理情形未可深恃前諭陶茂林一軍迅解靜甯之圍馳赴
省垣布置妥帖即解河州之圍收復狄道現在河州被陷軍情尤爲
緊要該提督行抵何處著懍遵前旨飛速前進督飭所部各營並趙
必達等現存各兵勇奮力進攻將河州狄道次第克復河州文武稟

甘肅新通志

卷首之四

三十六

報與難民供詞歧異並著陶茂林恩麟詳查確情具奏千總魏智勇
等糾黨開城情殊可惡著查拏訊明盡法懲治西甯回漢旣稱永息
紛爭何以回撒仍復焚搶其獷悍情狀非大加懲創不足以儆其兇
頑惟甘省兵力未集不敷往剿著玉通暫示羈縻妥爲撫輯俟河州
收復後即著陶茂林乘得勝之勢鼓行而西斟酌剿撫則操縱在我
易於見功並著都興阿穆圖善雷正綰酌量軍情如有可分之兵即
行抽撥前往西甯以資鎮攝 癸卯

諭議政王軍機大臣等劉蓉奏官軍進趨階州淹遲緣由暨逆回竄犯
徽縣請飭曹克忠兼顧汧隴之防等摺片蔡啟兩逆敗殘西竄經劉
蓉派令蕭慶高何勝必等軍分路躡擊滿謂漏刃之匪不難即日掃
除茲據劉蓉奏稱蕭慶高何勝必黃鼎等經駱秉章檄調回川分防
要隘賊遂乘閒竄踞階城句結鹽關等處逆回氣燄又張是該處賊

勢復熾亟須迅圖撲滅著駱秉章嚴飭所派之周達武等軍協同蕭慶高何勝必黃鼎等移軍迅赴階州與劉蓉派出各軍併力急攻迅赴階城將逆衆一鼓聚殲以免旁竄並著恩麟陶茂林嚴防該逆由岷入鞏竄犯蘭省之路兼斷逆回應援昨諭陶茂林由靜甯一路進兵河狄該處與階岷一帶毗連儻階州之賊被剿北竄與河狄等處之賊聯爲一氣則剿辦更形棘手著陶茂林加意防範毋稍疏虞鹽關回匪猝犯徽縣所屬傅家鎮等處或圖與階州髮逆相爲犄角或徑由兩當竄入陝境必須趕緊剿辦方不至墮其詭計劉蓉已檄令彭基品等會同駐防鳳縣之軍往剿著即嚴飭該總兵等奮力縱擊早圖蕝事楚北賊勢已衰仍恐有敗殘之匪乘虛挺走著劉蓉仍飭令隴軍鎮西各營確探嚴防以免竄越蓮花城攻拔後雷正綰已回平涼曹克忠暫紮蓮花城該處甫經收復不能無勁軍屯紮以資鎮

撫兵力本屬不厚刻下又萬難移動惟邠長汧隴等處爲陝省西路門戶即爲平涼等處後路藩籬誠不可令其空虛著都興阿穆圖善雷正綰悉心籌畫如就近有可撥之兵即著酌量分飭數營前往該處駐紮以重防務 癸丑

諭議政王軍機大臣等恩麟奏鹽關回匪出巢滋擾秦州戒嚴現在籌辦情形一摺甘省鹽關逆回竄撲秦州將城外回民裹脅並縱火焚燒四鄉搶掠民糧勢極猖獗林之望所部張華一軍經恩麟撥往階州助剿現僅調到秦安兵四百名到城防守因兵力較薄迄未大挫兇鋒秦州爲甘省富庶之區設有疏虞剿辦更形棘手曹克忠所撥四營赴援秦州尙恐不敷分布著都興阿穆圖善雷正綰悉心籌畫曹克忠一軍能否馳赴秦州援剿並應如何分兵駐紮蓮花城以扼險要之處均一併妥籌兼顧如蓮花城布置已妥無虞逆回紛竄即

飭曹克忠酌帶所部星速往援秦州迅解城圍毋稍延緩並著恩麟嚴檄林之望就在城兵力與曹克忠所撥四營妥辦防剿或進攻鹽關回巢以牽賊勢毋致稍有疏失近省會甯安定一帶賊匪時出肆擾陶茂林一軍現已西進即著懍遵前旨迅解靜甯城圍並將安會等處竄匪節節掃蕩再行馳赴省垣進規河狄前據劉蓉奏稱鹽關回逆竄犯徽縣之傅家鎮等處刻下秦州又復戒嚴匪蹤滋蔓甚廣如與階州髮逆句結攻剿更難著手著駱秉章懍遵前旨嚴檄周達武等軍協同蕭慶高等移軍迅赴階州與劉蓉所派各軍併力急攻迅復階州城垣以杜分竄而免句結蘭州省城防務恩麟就現有兵力慎密防維並嚴飭派援階州之張華一軍與川陝援軍聯絡進剿毋許稍涉疏懈雷正綰現在移軍平固一帶如蓮花城防兵尙單即著酌撥兵勇前往協守以便曹克忠抽調所部馳援秦州即與恩麟

甘肅新通志

卷首之四

三十八

等妥籌會辦 乙卯

諭議政王軍機大臣等劉蓉奏籌辦階州等處軍情並請嚴防下游捻匪上竄一摺鹽關回匪竄往秦州之馬跑泉階州蔡啟兩逆分路扼守隘卡竟圖堵我進兵之路必須官兵四面環擊方可制其死命昨據恩麟奏鹽關回匪出巢滋擾秦州戒嚴當因匪蹤滋蔓恐與階州髮逆句結諭令駱秉章嚴檄周達武等軍協同蕭慶高等迅赴階州與劉蓉所派各軍並力急攻克復城垣著劉蓉嚴飭各軍會合周達武等實力掃蕩迅復階城毋任逆匪久踞由楚西竄之匪窺伺陝疆著官文等懍遵前旨嚴飭馬步各軍取道鄖西一面繞前截擊一面跟蹤躡剿以期迅掃逆氛興商防兵甚單劉蓉務當遵奉前旨設法添調兵勇分赴各該處實力嚴防毋稍疏懈正在寄諭間據張之萬等奏捻匪被擊西遁逼近宛境等語張陳等逆在光山縣境被擊西

竄賴汶洸等亦擾至棗陽南之吳金店是唐桐各屬情形旣形喫重尤恐匪衆句合竄繞宛境著僧格林沁張之萬嚴飭各軍分路扼剿務將窮竄之匪一鼓殲滅毋任竄入陝境又成不了之局邱浣才以賊中悍黨窮蹙乞降雖不妨暫事籠絡亦須時防反側以弭後患汝光一帶匪蹤紛竄靡定著張之萬嚴飭該處防兵嚴堵密遏以重邊防其降衆由汝光經過者人數較衆並著飭令該處文武員弁彈壓撫輯毋令滋事 乙丑

諭議政王軍機大臣等雷正綰奏規拔固原疊平逆壘曹克忠馳解秦州城圍進擣鹽關各摺片雷正綰自克蓮花城後回軍涇平規復固原將石家溝等處逆巢平毀移營進逼東山城賊復大潰追至距固城三十里之打河店並將鸚哥嘴等處巢穴踏平所辦甚爲得手此時軍威大振該逆敗潰之餘聞風膽落雷正綰現抽軍十五營由瓦

甘肅新通志

卷首之四

三十九

亭大道進剿飭總兵胡大貴等次第滾營大舉不難功收破竹迅速名城著即親督各軍兩路夾擊務須嚴防回逆狡詐穩慎進兵將該逆就地聚殲堅城立拔其逆首孫義寶尤當設法擒斬毋令漏刃他竄又形句結曹克忠馳援秦州城圍立解復將分擾甘泉寺之賊斬馘殆盡拔營赴天水進剿鹽關獎賊甚夥著即飭令該總兵乘此聲威鼓行而西迅將鹽關巨巢攻克以期節節掃蕩該處地連秦蜀道路紛歧尤當防其與階州髮逆句合聯絡致剿辦又形棘手陶茂林現赴蘭州專顧西路著傳諭該提督仍遵前旨先解靜甯之圍順道剿除安會一帶逆匪再赴蘭州將河狄一帶軍務妥籌會辦此時甘省各軍分三路剿辦賊勢旣分軍務不難日有起色都興阿穆圖善雷正綰等惟當通盤籌畫妥爲調度迅殄狂氛以期肅清西陲用副委任 十二月乙亥

諭議政王軍機大臣等張集馨奏彙報各路軍務並會商籌辦情形及金縣失守咨催陶茂林赴省並曹克忠攻克鹽關各摺片甘肅進兵形勢須步步防其回竄與陝省用兵可以一意向前者迥不相侔雷正綰督軍進逼固原仍分兵回顧邠長汧隴等處所辦甚合機宜現在雷正綰一軍已紮鸚哥嘴地方距固原城不遠即著督率各營節節進紮分派馬隊繞出賊前兩面夾擊迅拔堅城盡殲醜類曹克忠一軍力解秦州之圍並攻克鹽關逆巢則蓮花城等處無所用其回顧正可騰出兵力相機進剿應如何分兵夾擊之處著雷正綰酌度機宜妥籌調撥金縣失守靖遠危急東則清水稱鉤諸驛南則阿干沙泥等鎮一片逆氛蘭州省垣防守喫緊著陶茂林即由會甯拔營赴省屯紮省郊不必入城庶策應調剿可期靈使其省城守禦事宜恩麟務當嚴密圖維不可稍涉大意張集馨擬由隆德靜甯一帶赴

省此時計早行抵蘭垣即著與恩麟妥籌防剿仍一面具奏所請簡查省垣勇數及調回弁兵出城助剿之策並著相機籌辦務令妥協合宜清水堡攻克後穆圖善等軍已偏甯夏並著都興阿穆圖善等恪遵前旨穩慎進取攻克郡城毋墮賊計川省援甘之兵前據駱秉章奏顏朝斌尙未回籍江忠濬未能出省已飭鶴齡帶兵一千五百名前赴都興阿軍營差遣等語當經諭令迅催前進本日復有寄諭駱秉章促令速行此起兵勇到甘後或令先在階州會剿踞逆或視何路緊要就近策應均著都興阿穆圖善雷正綰等妥籌調遣劉蓉前帶各營多係川兵現在蜀軍追賊入甘陝省防兵無多各營兵額亦因缺餉未補關中負天下形勢必須重兵固守况髮捻西趨駸駸犯陝尤應亟籌防禦力顧疆圉張集馨所奏請於省城募兵三千名仍復總兵舊制並查明叛絕各產認佃無人者按兵授田收租代餉

之議尙爲因時制宜豫籌備禦起見著劉蓉酌量情形實力辦理不得畏難苟安致防守空虛啟賊匪窺伺之念正在寄諭閒據雷正綰奏曹克忠攻克鹽關情形一摺鹽關既克曹克忠兵力已無後顧之虞即著飭令迅率所部由秦安北赴靜甯分路夾擊固原以期必克秦州防務已由曹克忠留撥四營足資鎮撫其林之望統帶之兵即飭馳赴階州會合川陝各軍迅速合圍攻剿毋令髮逆紛竄致成蔓延當此隆冬風雪北地苦寒士卒冒險衝鋒艱苦情形實深廛繫都興阿等務當激勵拊循俾將士人人用命肅清邊陲同膺懋賞

壬午

諭議政王軍機大臣等都興阿穆圖善奏籌防回捻各逆竄擾陝疆並現在甯夏辦理情形暨西甯撤回大肆猖獗各摺片鹽關回匪猝犯徽境既恐繞道入陝綴我兵力現在鹽關雖已攻克而敗殘匪衆勢

甘肅新通志

卷首之四

四十一

必蔓延尤應嚴密扼擊力圖撲滅惟兵力既難分撥都興阿等已飭徽縣激勵民勇會同陝軍嚴防力剿並飭徽縣兩當速辦糧米接濟著即照所擬妥速籌辦並咨明劉蓉嚴飭派出各員實力杜遏以固藩籬雷正綰進偪固原兼顧邠長汧隴等處聲威頗振儻能分兵會剿徽境一帶之賊尤爲妥協著即斟酌情形與都興阿等商酌辦理楚豫捻匪由鄧州竄赴南召一帶陝境防務著都興阿咨明劉蓉慎遵疊次諭旨設法攔截毋令捻蹤闖入陝疆甯夏回匪狡詐獷悍朝廷早經鑒及前恐慶昫掉以輕心已諭令慎守滿城不可稍涉疏懈並諭都興阿穩慎進取毋墮賊計現在該將軍督飭各隊滾營進紮距城不過十里內外偪賊愈近尤須慎重圖維務操勝算以期節節進剿克復名城西甯撤回假稱投誠仍復到處焚殺前因玉通奏到塔爾寺阿家呼圖克圖未肯散團已派官紳前往勸導當經諭令玉

通回情狡譎未可墮其撫計與都興阿此奏相合現在回氛猖獗民不堪命漢民番僧人等自應集團防範以備不虞著玉通遵奉前旨於撫輯之中隱寓防範之意務須聯絡番僧人衆妥爲保護固不可啟釁生事亦不得狃於撫議墮賊奸謀俟甘省軍務漸定即著都興阿等分兵勦辦以靖地方 甲申

諭議政王軍機大臣等都興阿奏逆匪糾集悍黨撲犯營壘堵勦獲勝並撥營進紮一摺回逆糾集馬步悍賊直撲都興阿營盤官軍連環槍礮迎前衝擊逆勢不支紛紛潰敗官軍追至甯郡城邊該逆豫伏馬賊分股包抄馬隊官弁小有傷亡北路之賊徑撲穆圖善營盤亦經擊退擒斬不少據獲賊供稱該逆由靈州調到援賊四五千名又由固原調到悍勇馬賊一千數百名此次出賊幾及二萬各營以少勝多尙屬奮勉都興阿以賊勢日增宜乘勝進勦已令各營及穆圖

甘肅新通志

卷首之四

四十二

善親兵等營前進並調參將趙有勝等相機進紮以圖攻勦自係審時度勢利在速攻未可稍涉拘泥惟賊衆且悍伎倆狡獪該將軍等務當通飭各營於勇往之中加意穩慎以期萬全無失雷正縮屯兵固原節節進逼固原賊旣已分援甯夏則該處賊勢較鬆該提督應趁其空虛之時派兵迅速進攻如固原軍事已鬆並著派兵協同都興阿穆圖善攻拔甯夏漢城盡殲醜類該將軍提督等務須聯絡聲勢毋致爲賊所乘是爲至要 四年乙丑正月甲辰

諭議政王軍機大臣等恩麟等奏近省賊蹤擇要防勦先顧省城並會勦階州獲勝派員督辦軍糧河州回族應撫各摺甘肅狄道河州渭源靖遠徧地狂氛無論進勦何路均應先顧省垣而省城患靖遠之匪較河狄爲尤甚靖遠被鹽固回匪圍攻日久陶茂林前派高餘慶帶領五營前往援勦雖連次獲勝究未大挫兇鋒著即添調數營前

往剿辦先解城圍再圖進取馬步回逆擾及平番之武勝伏羌等堡肆意搶劫西大通之海石灣上礮堡亦有回匪勾結恩麟已飛調莊浪滿綠營官兵剿辦著嚴飭該營弁等迅圖撲滅如兵力不敷再於附近一帶酌量添調所請令穆圖善親督勁旅或抽撥精兵由草地繞赴平番並分兵由涼州迎頭攔截之處刻下情形斷難照辦穆圖善疊經有旨令其出嘉峪關前往哈密現在文祺病故匪衆有窺哈密之意著該將軍仍遵前旨迅速整兵出關前赴哈密必須將哈密保守將來方有進兵道路肅州兵不宜多調西路之防都興阿務當分兵兼顧保全甘涼肅郡縣未可視爲緩圖曹克忠一軍前諭都興阿等妥爲調派應否駐紮會靜適中之地扼制鞏昌洮岷一帶著即妥籌分布期與陶茂林聯絡聲勢會合夾擊雷正綰當力拔固原殄除孫逆近日剿辦情形著趕緊馳奏以聞階州髮逆已形窮蹙著恩

麟飭令林之望督同張華會合川陝各軍實力進攻剋日殄除河州回族衆多現既踰伏不動自可暫緩剿辦馬七氏辦撫前已毫無成效該護督欲藉以羈縻俟兵力充足再行籌辦尙無不可此時就計招撫嚴定條約但恐該逆衆不能悉遵仍不免重煩兵力必須一面辦撫一面嚴防毋得稍涉大意 甲子

諭議政王軍機大臣等雷正綰奏分籌雕剿逆巢並竄逆突入陝疆現飭截剿一摺會甯郭家驛馬賊經官軍堵截獲勝後分爲兩股一股南奔張家川越蓮花城折回會甯老巢一股由隴州竄入陝境飄忽異常前據劉蓉等奏該逆勾結潰勇已竄及醴泉雷正綰所派雷恆等軍適成尾追之勢陝省防兵較單劉蓉現將新募豫勇過陝之參將段登雲等留紮興平以顧西安門戶仍著雷正綰檄飭余萬明雷恆兩軍星馳截剿探明賊竄何處迅即繞出賊後會同陝省各軍實

力兜截務將此股竄匪就地殄除淨盡毋任旁竄劉蓉當就現有兵力妥籌會剿不得稍涉鬆懈甘省悍賊麇聚固原經曹克忠從靜甯夾擊其勢已蹙著雷正綰會同曹克忠穩慎進攻先行雕剿蕭河城彰義堡逆巢以孤賊勢即可恢復固原州城盡殲醜黨毋任匪蹤續竄陝疆 二月甲戌

諭議政王軍機大臣等都興阿穆圖善奏甯夏軍務萬緊穆圖善一軍未能分兵出關據實直陳一摺所籌自係實在情形新疆賊氛日熾古城池西處處蹂躪已至不可收拾而甘省賊衆兵單不敷剿辦若強令穆圖善出關則都興阿兵勢愈孤顧此失彼目前情形大爲支絀楊岳斌回籍募勇爲日已久約計此時必已部署起程楊岳斌受國厚恩畀以兼圻重任自當迅速就道慰朝廷西顧之憂且該督所請各省協餉及酌提釐金等款業經允其所請是兵餉兩端均可無

甘肅新通志

卷首之四

四十四

虞掣肘若再藉詞遷延非但有負委任且無以慰甘省軍民之望著楊岳斌迅帶新募勇丁剋期先行赴甘其未經募足之勇即責成彭楚漢楊明海等趕緊招練成軍陸續西發不准稍事稽遲致滋延誤都興阿穆圖善等務當就現有兵力激勵拊循迅圖規復甯靈肅清北路 已丑

諭議政王軍機大臣等恩麟等奏擊退靖遠逆匪縣城解圍現籌分兵兼顧西路平番縣城圍稍鬆請飭曹克忠等赴援各摺片靖遠被圍陶茂林督隊衝擊平毀賊巢城圍立解連日周厯摻捕附近數十里均無賊蹤惟哀鴻嗷嗷滿目陶茂林已入城安撫良回即著督飭地方官加意撫綏仍督率各營將弁剿捕竄逆毋任四散滋擾河狄回匪雖有就撫之說其心反覆無常萬難深恃著恩麟加意嚴防毋稍大意平番回匪竄入省北秦王川一帶該處爲產糧要區省中民食

所賴陶茂林將靖遠大局布置定妥即酌帶勁旅先赴秦王川會同恩麟所派之宣威各軍殄滅竄匪即赴平番助剿以顧西路門戶鞏昌望援日切恩麟請令曹克忠率領全部專顧鞏昌俟該處賊匪蕩平即與陶茂林合軍規取河狄曹克忠一軍自蕭河城等處剿撫兼施現在應由何處進兵能否令赴鞏昌之處著都興阿穆圖善雷正綰細心酌覈一面奏聞一面檄飭該總兵照辦甯夏未復匪勢正熾都興阿穆圖善未能迅撥勁旅援應平番著恩麟懍遵正月二十九日所奉寄諭責令黎獻調集兵勇妥籌辦理總須俟甯夏克復後方能分兵兼顧此時有陶茂林一軍前往情形當可稍鬆該護督惟當就各路現有兵力妥籌辦法無容日事呼籲爲也 壬辰

諭議政王軍機大臣等雷正綰奏現籌進剿機宜分別良莠安插降回一摺固原地險城堅甯經克復彈壓撫綏均關緊要雷正綰已派提

甘肅新通志

卷首之四

四十五

督劉正高入城鎮撫著即飭該提督慎固防守降回張保龍與陝省叛黨已成仇敵踊躍用命即著飭令將挑出各壯丁作爲前隊殺賊自效如能奮勇出力據實奏聞其各處乞撫回衆並著雷正綰分別良莠妥爲安置總期恩威並濟毋貽後患目前逆鋒大挫正宜乘勢進取著雷正綰即統帶各營由李旺堡同心城一帶節節偏剿並嚴飭派出之提督譚玉龍等由黑城子一帶掃蕩而前雷正綰務當穩慎進攻與都興阿穆圖善會攻甯靈以收廓清之效雷正綰奏稱河狄回尙歛跡洮鞏軍勢亦覺稍安擬飭曹克忠攻剿會甯合軍北向著都興阿穆圖善雷正綰妥籌調度如今曹克忠聯絡北行即飭令先將會甯踞逆攻克並將竄至鹽茶之陝逆殄除淨盡合兵規取靈甯或鞏昌待援尙急亦著都興阿等體察緩急情形酌度辦理陶茂林一軍前曾諭令剿辦秦王川竄匪後赴援平番惟曹克忠之軍北

向則甘肅東南一帶空虛如陶茂林能剋期將平番逆匪剿滅即飭令回軍扼紮安會居中控制牽綴河狄洮鞏賊勢相機進取總之軍情萬變瞬息不同該將軍等必須通籌全局庶不至顧此失彼左絀右支也雷正綰奏鹽茶一帶回民尙稱良懦請分別良莠剿撫兼施本日已明降諭旨剴切曉諭即著雷正綰於接奉後刊刻謄黃出示招撫以釋猜疑而安反側惟仍須隨時察看不可草率遷就貽患將來 三月庚戌

諭軍機大臣等恩麟奏涼州回匪變亂先後撲滅竄擾平番賊匪擊敗回巢及古浪縣屬回匪滋事旋即殲滅各摺片涼州府城關回匪勾結變亂前據瑞雲奏報業已剿滅淨盡回弁馬忠亦經擊斃此次恩麟所奏探報各情與前奏大略相同惟據稱回弁馬忠並在逃之百餘人尙未弋獲與瑞雲所奏剿滅淨盡情節不同是否探報之誤仍

甘肅新通志

卷首之四

四十六

著瑞雲恩麟查明有無餘匪迅速拏辦並著恩麟飭令道員黎獻查明該匪懷疑變亂情由出示曉諭以安反側其竄平番之匪於官軍剿辦之後分踞武勝堡等處經黎獻會同副將張琮督軍剿敗退回米拉溝逆巢並將古浪縣屬馬得彪一股匪徒立時掃蕩以免勾結之患辦理尙屬迅速即著嚴飭黎獻督同各路民團扼要防堵毋任蔓延爲害前諭陶茂林一軍馳赴秦王川會辦平番逆匪並防該匪北竄涼州該提督前由靖會一帶摻剿固原餘匪現在行抵何處能否分兵會合黎獻等軍將米拉溝賊巢迅圖埽滅並嚴防該匪北竄涼州之處著恩麟陶茂林妥籌辦理 辛亥

諭軍機大臣等都興阿穆圖善奏移營進剿獲勝情形並請豫調馬隊一摺都興阿等軍進攻甯夏逐日出隊均有斬擒現在黃金山等已偪紮東門等處擊破賊卡挑穹長濠正當乘此聲勢將城賊聚而殲

旃迅圖克復惟鹽靈中衛賊匪分股竄擾皆爲甯夏賊黨外援雖經都興阿等派兵防剿尤當相機妥籌兼顧庶免賊匪得以句連又煩兵力邠州宜君中部等處亦有賊匪滋擾雷正綰劉蓉當分籌截剿毋令蔓延甯夏肅清後都興阿等即須振旅出關惟所部馬隊無多難資剿辦常星阿等各起馬隊前經雷正綰奏調已諭令僧格林沁酌量調撥著僧格林沁斟酌情形一俟軍務稍鬆即先將此項馬隊迅飭赴甘改歸都興阿軍營聽候調遣楊岳斌前已據奏起程即著星速前進以便與都興阿等商辦一切事宜楊岳斌入陝時常星阿等如尚未抵甘著雷正綰劉蓉催令該副都統等督帶馬隊馳赴甯夏其訥依楞阿馬隊業經劉蓉飭赴都興阿軍營著即催令前進鮑超告假回籍此時想可抵川著駱秉章迅催該提督趕緊部署入甘都興阿等出關後甯夏北路軍情或交鮑超接辦或即由雷正綰兼

顧屆時自可酌度辦理不至接替無人詹啟綸一軍現隨僧格林沁剿辦豫捻都興阿等請令該員迅赴甯夏之處著暫緩置議 辛酉諭軍機大臣等雷正綰奏追剿會甯踞逆獲勝驛路暢通派兵兼顧陝省門戶遵將地勢賊巢繪圖呈覽各摺片二月十七至二十六七等日雷正綰派張集馨統領胡大貴等軍攻克青家驛從威戎鎮一帶追剿直至洛門地方沿途節節擒斬殲賊殆盡通渭甯遠隴西會甯境內均無賊蹤鞏郡解嚴該署提督已咨會張集馨折回會甯合力進攻王德勝六營追剿馬賊直趨鹽茶陶茂林已帶兵馳抵會甯該署提督商令陶茂林扼紮安會控制兼顧省城令張集馨鎮撫固原籌辦一切布置均尙周妥陝甘兩省漏網巨逆均踞黑城子鹽茶靈州一帶著雷正綰與曹克忠卽由二營三營李俊堡等處分道進攻以期一鼓殄除仍應穩慎進取不可稍涉大意賊向甯靈一帶賊巢

求救意圖糾約大隊拌死一戰著都興阿穆圖善相機進攻甯夏勿任竄逸如賊有分兵救援之信可於要路設伏邀擊該將軍等務當與雷正綰等軍聲勢聯絡更易得手階州賊勢窮蹙著駱秉章懍遵本月十九日諭旨督令周達武等軍會同林之望等認真剿辦迅圖克復劉蓉所派出之蕭慶高等軍原係四川派來之隊亦著歸駱秉章調度以一事權東路各隘雷正綰仍當時時兼顧毋任旁竄肆擾雷正綰所進地圖止繪鹽固一隅未能十分明晰著與都興阿等通籌全局將現在進兵道路賊壘情形一併繪圖貼說以備省覽正在寄諭閒據都興阿等奏固原竄匪撲犯花馬池立時擊退恩麟奏肅州回匪變亂現調西路各營官兵馳往援剿及階州擊賊獲勝官兵合圍玉通奏西甯花寺回匪擾害攻陷大通縣並撲府城請派兵援救各摺片花馬池賊匪雖經擊退難保不去而復來且恐該逆以驕

兵之計誘我都興阿務須通飭所部各營晝夜嚴防不可稍有疏失刻下靖遠殘匪竄繞河西中衛縣廣武一帶復形危急而河東又添固原敗逆自靈州以南東互紅柳溝盡係賊氛雷正綰必須趕緊將黑城子賊匪剿滅督軍北進節節掃蕩進規靈州方可與都興阿合軍痛殲醜類即著相機迅進現在鞏昌情形已鬆曹克忠仍宜分攻鹽茶以分賊勢該將軍即飭令速拔鹽茶勿稍鬆勁鶴齡一軍疊經諭令赴哈密進援刻下肅州危急著駱秉章等即檄赴肅州疏通道路以便順道出關肅州爲關外往來糧運要道鶴齡軍餉著寬爲籌備俾利師行穆圖善能否分兵前往援剿之處著都興阿迅速酌度調派恩麟已調一千五百餘名赴肅著就現有兵力認真剿洗黎獻已據恩麟派赴涼州布置甘涼防務所帶兵勇若干能否移撥兼顧肅州著恩麟酌度辦理恩麟摺內所稱聞有肅州東關被口外獵戶

竄入滋擾焚燒房屋圍困城垣本地回民亦即變亂等語究竟肅州曾否失守未據奏明殊屬含混著即趕緊確探具奏如肅州有失致令關內外糧道軍情消息阻隔必治該護督以應得之罪懷之慎之西甯花寺回匪變亂皆由玉通平日議撫撤團漫無準備以致縣城失守郡城危急生民塗炭該大臣一籌莫展惟知令馬文義等往來調停斷難恃以無恐蔣凝學一軍現已行抵何處著楊岳斌飛催該道督率所部徑赴西甯該處有兵一二千名亦即歸該道調遣以資得力肅州西甯賊勢狡猾都興阿等未能兼顧楊岳斌當兼程前進通籌進剿機宜力維西路大局蔣凝學如離甘尙遠或由楊岳斌先撥數營前赴西甯以免疏虞並著恩麟咨商陶茂林暫緩兼顧他處務當先行撥兵援剿此外如有可撥之兵亦應分撥肅州以顧全局西甯郡城人心必須鎮定著玉通妥爲激勸固守待援毋得一誤再

誤致干重罪階州兵已合圍林之望當即督軍會川陝等軍迅克城池如階州先已克復林之望即飭所部迅援肅州階州已降餘匪林之望咨會周達武妥爲安插毋令再滋事端 癸亥

諭軍機大臣等據官文奏稱與楊岳斌會商甘省餉需情形一摺另片奏請將湖北協濟福建滇黔之餉免其撥解全力移解甘肅等語所奏不爲無見甘省軍務正當喫緊之際楊岳斌一軍人數衆多餉需較鉅將來尙須援剿新疆官文務當先行籌撥鉅款源源接濟所有甘省設立後路糧臺代辦軍械火藥等件均著由楚省先行籌撥並著官文迅即咨商江蘇浙江江西各督撫即將每月能接濟甘餉若干數目趕緊籌畫並湖北協濟甘餉定數一併籌定俟定議後迅即奏明辦理至釐金爲餉源所出前據曾國藩奏稱裁撤係專指湖南一省而言其湖北釐局自不在減裁之列官文當妥爲經理以期無

誤供支至官文所稱湖北每月協濟福建雲南貴州餉銀各一萬兩請即停止以便專解甘肅其滇黔閩三省軍餉請由附近之浙江四川勻撥一節滇黔之餉若照曾國藩所擬將來自可由川湘兩省分任惟福建之餉能否專由浙省供支尚未議及著左宗棠馬新貽酌定協撥之數迅速具奏以便即照官文所請辦理 五月乙卯

諭軍機大臣等成祿奏安定圍急催兵助援疏通蘭省東路以利西行一摺甘省河西賊氛甚熾逆回復糾合河狄之衆圍逼安定陶茂林駐紮城中僅止四營合之分紮金縣靖遠之軍不足十營之數儻該匪牽掣安定各軍分撲省垣剿辦更形棘手雷正綰現已分撥趙德正等二營歸成祿調遣並飭劉正高等七營馳赴會甯以解安定之圍即著雷正綰嚴飭劉正高等統帶馬步七營奮力進剿迅解城圍並著成祿激勵趙德正等會合助剿廓清東路並飛調鶴齡等軍星

速西行以厚兵力前因陶茂林潰勇逼近陝西省城諭令聯捷俟將潰勇辦理完竣即速西行嗣據楊岳斌奏稱業已分別剿撫刻下成祿所部僅止二營不足以資攻剿聯捷於接奉此旨後即著統帶所部迅速西進與成祿會兵一處迅解安定之圍毋得遲延干咎前已諭令楊岳斌剋日由陝赴甘即著懍遵前旨星速帶兵前往將各路回匪相機剿辦並分兵會剿安定之匪毋任滋蔓都興阿穆圖善雷正綰迅即攻拔甯靈以便督軍馳赴西路將安定一帶並甘肅等處回匪悉數殲除肅清關內以靖疆圉其蘭州省城防守事務即著恩麟督飭防兵嚴密防範毋稍疏虞正在寄諭閒據都興阿穆圖善奏各路軍情喫緊援軍未至並前敵後路籌剿籌防情形一摺逆回以就撫佯緩我師並未獻城撤圩暗自各處挑濠築壘從上游各渠放水希圖淹斷營路情殊叵測經都興阿嚴拒受降並蹋勘地形相機

宣洩一面催糴糧米固結軍心辦理尙屬周妥惟援甯竄匪勾結甯郡踞匪堅壁死守分股撲犯廣武及石空寺堡勝金關等處窺伺中衛甚緊該將軍等劄派甯夏道三壽前往駐守即著嚴飭該道員督率兵團實力捍禦毋稍鬆勁刻下賊情狡詐尤須加意嚴防都興阿等惟當蓄養銳氣修築隄堰換隊移營設計穩慎其花馬池定邊縣後路賊匪雖經翁同書等擊退向羊圈山一帶奔竄靈州大水阬等匪亦將合股向東南竄回陝西是後路及東竄各匪均關緊要即著雷正綰迅即督軍由東路前進直取靈州兼顧慶防與後路各軍聯絡聲勢扼截東竄以收夾擊之效安定一帶情形喫緊省垣尤爲可慮楊岳斌即迅由南路進省以資鎮懾並分兵援剿各路毋事延玩

癸亥

諭軍機大臣等劉蓉奏官軍攻克階州城池殲除首逆並遣散潰勇完

甘肅新通志

卷首之四

五十一

竣陝境肅清雷正綰奏攻克下馬關等處賊巢擬即進攻靈州並縷陳餉絀情形暨曹克忠軍營缺餉飭陝撫撥解各摺片蔡啟兩逆竄踞階州負隅死守經胡中和蕭慶高等督率兵勇四面合圍攻克城池將蔡逆及全股悉數殲除謀勇兼優實堪嘉尙至啟逆梁成富是否被武字營擒獲抑已乘閒逸出仍著駱秉章劉蓉督飭在事員弁查明實在下落據實具奏川陝甘三省兵力爲階州一隅牽掣已久今旣擒渠掃穴即可分路移兵俾資得力胡中和一軍前據駱秉章奏俟階州克復移防敘南一帶現在應如何調遣之處著駱秉章酌量川省情形妥籌辦理雷正綰一軍餉需異常支絀駱秉章素能不分畛域著每月酌量源源協濟以資飽騰昨因捻逆有渡河窺晉之謀諭令楊岳斌酌留數營防守潼關杜賊竄擾秦晉之路此時蕭慶高等已克階州自可調回陝省於潼關等處擇要扼紮以便替出揚

岳斌之兵全赴甘省林之望所部勇丁疊經諭令毋庸遣撤往援肅州現在安定等處軍情喫緊著楊岳斌恩麟傳知林之望統帶張華全軍先赴該處會合成祿雷正綰所派各軍力解安定之圍即行馳赴蘭州相機前進階州善後事宜著楊岳斌恩麟飭屬妥爲籌辦務令流亡復業毋得視同貝文半角城預望城下馬關等處久爲回逆巢窟經雷正綰督飭各軍奮勇進攻疊克堅巢辦理甚爲得手即著該提督與曹克忠各軍分路並進直搗靈州肅清北路都興阿穆圖善督兵圍攻甯夏郡城日久未下殊屬延玩著即激勵兵勇奮力圍攻迅圖蕝事不得再事遷延致千重咎昨因成祿兵力太單諭令雷正綰將派赴安定之劉正高等七營於解圍後由成祿酌帶西行第雷正綰先後派撥十二營駐防安定一帶現在雷正綰乘勝進規靈州兵力未厚若由川省酌撥數營進駐安定一帶則雷正綰先後派出各營仍可酌量調回策應著駱秉章斟酌情形妥籌調撥陶茂林營中潰勇由兩當南趨者業經漢南地方官弁分別遣散押送回川後起潰卒亦均遣回原籍其漢南一帶仍著劉蓉嚴飭各府廳營縣隨時確探防範將餘匪摻捕淨盡並著駱秉章飭令地方有司將遣散勇丁妥爲安插毋令生事 閏五月庚午

諭軍機大臣等恩麟奏北路回匪圍攻中衛縣城及道員黎獻督兵西

勦獲勝克復高古城等處賊壘情形並回民闌入大通摻搶旋經解散各摺片中衛縣城與省城西甯甘涼等郡處處相通爲兵糧轉輸要地現在北路回匪分股圍撲該縣城池並撲犯梁生嶽營盤勢甚猖獗萬一中衛有失其患不可勝言雷正綰全部現已進規靈州相距中衛較近著該提督斟酌軍情抽撥勁旅數營迅往援勦以保危城成祿及鶴齡等軍疊經有旨諭令進解安定之圍再行西行 楊

岳斌恩麟催令前進如安定業經解圍即著雷正綰將派赴安定之軍調回數營前赴中衛接替藉資得力楊岳斌抵省後並著分撥勁兵前往援剿至梁生嶽營盤有無失事情形並著楊岳斌恩麟查明具奏黎獻帶兵二千進剿甘肅等處賊匪沿途節節獲勝剿辦尚合機宜惟兵力太單必應步步爲營穩慎圖功方無挫失之患著楊岳斌恩麟飭令黎獻激勵兵團將黎園永固等處賊匪次第殲除再行酌度軍情妥籌進取西路回民藉口漢團未散突入大通縣城大肆搶掠倉庫監獄一併被劫被傷人命甚多雖據回目馬壽等悔罪投誠呈交贓物而監犯及首惡並未捆獻斷難憑信該回民詭詐多端總欲撤去漢團得以肆行無忌萬不可墮其術中恩麟現因兵力不敷勦辦暫准投誠即著嚴飭達昌責令該回目等將起事首惡及劫放監犯立即交出不准藉詞宕延致墮詭計各鄉團練仍應聯絡整

備不可輕議裁撤如果該回衆等尙知悔罪息事亦不得無端肇釁著玉通恩麟隨時飭令該地方官先事豫防妥籌辦理 丁丑諭軍機大臣等都興阿穆圖善奏中衛被圍甯夏滿城喫緊回匪滋擾後路運道飭軍堵截常陞奏慶昫因病出缺逆回圍撲滿城各摺片中衛爲入省要衝現被逆匪圍攻萬分喫緊都興阿等擬抽兵由阿拉善草地繞越進剿及派員會同該旗籌運糧米即著迅籌妥辦雷正綰所部進規靈州距中衛較近著懍遵前旨酌度軍情迅抽勁旅數營由南路赴中衛援剿如成祿及鶴齡等軍進援安定業已解圍並著雷正綰將派赴安定之軍調回數營前往助剿以厚兵力甯夏逆回因慶昫病故圍撲滿城勢甚兇狡本日已將穆圖善調補甯夏將軍著都興阿穆圖善先其所急抽撥得力數營繞赴滿城將撲城之賊擊退疏通糧路即由中衛進取會合雷正綰所派援軍節次掃

蕩都興阿等營後路時有回逆在紅柳溝等處四出滋擾窺伺運道蓄謀甚譎雖經官軍連日雕剿獲勝仍恐該逆乘隙肆擾餉道堪虞著都興阿等嚴檄翁同書各軍扼要堵截慎固定邊之防疏通餉運以待援師毋稍鬆懈楊岳斌前據奏報於閏五月初一日起程赴甘著俟到省後酌派數營迅赴中衛助剿 戊戌

諭軍機大臣等都興阿穆圖善奏近日剿辦情形都興阿奏甘省籌剿機宜各摺片甘省紅柳溝等處賊匪爲官軍擊敗甯郡回首僞行乞撫都興阿限以時日令其交械獻城撤圩輸糧該逆仍復詭詞乞緩是其詭詐情形已可概見現在受降既無把握自應鼓勵將士力行進攻不准仍許投誠懈惰軍情致墮詭計鹽茶廳餘匪有圖竄中衛之信都興阿當派兵要路遏截毋令任意奔突甯夏攻圍日久尙未克復深恐師老疲敝都興阿穆圖善當設法迅行攻拔不可再事遷

甘肅新通志

卷首之四

五十四

延雷正綰一軍現已攻克鹽茶進圖靈州陶茂林一軍本可直取肅甘因所部勇丁潰散數營安定一帶賊勢較衆尙復阻於西進曹克忠所部能否兼顧鞏昌移援安定著雷正綰妥籌商辦恩麟亦當添籌兵勇與陶茂林等互相聯絡力顧省垣俟蘭州附近地方肅清後即當鼓行而西掃除肅甘並嘉峪關逆氛以通關外之路並著恩麟寬籌餉銀以濟軍食鶴齡一軍前已有旨令駱秉章催令赴甘仍著恩麟陶茂林飛速迎提飭令迅赴肅州成祿所撥雷正綰六營亦可由省城次第進取西路以助聲威至甘省回匪到處皆有都興阿等俟甯夏克復後當與恩麟陶茂林等會商先擇最要處所力行剿洗其餘自可迎刃而解穆圖善亦可於彼時酌量帶兵出關楊岳斌俟抵甘後兵力厚集更可分路進剿 壬子

諭軍機大臣等恩麟奏查明肅州失事大概情形添兵馳剿及甯靈回

逆屢撲中衛節次堵截獲勝各一摺肅州回氛甚熾恩麟所派黎獻等軍由甘州節次摻剿前進並抽調提屬官兵及張掖民團協助即著檄飭該道等聯絡進攻並飭成桂會同劉秀挹激勵鄉團併力殲剿以期克拔堅城毋任逆匪久踞靈州竄匪疊撲中衛縣城及廣武棗園等處甯郡踞匪因被剿窮蹙亦糾衆力爭中衛一路冀圖西竄甘涼雖經官軍節次堵擊敗走惟梁生嶽所部數止一千五百餘名合之都興阿所派王贊襄練勇亦僅四千餘人兵力較形單薄如該匪大股西趨勢難抵禦雷正綰一軍已由鹽茶北進著即酌度軍情抽拔數營徑赴中衛駐守力遏敗匪西竄都興阿穆圖善當慎遵前旨乘甯夏賊勢已蹙迅圖攻拔即分兵兼顧中衛等防鶴齡一軍已抵鞏昌並著都興阿穆圖善雷正綰恩麟催令迅援肅州與諸軍協力進剿俟肅州克復仍令星速出關 六月己亥

甘肅新通志

卷首之四

五十五

諭軍機大臣等德勒克多爾濟等奏花馬池等處賊勢猖獗防兵力單請飭都興阿兼嚴後路之防一摺花馬池等處界連蒙古邊牆逆匪盤踞該處爲數過多復由靈州竄出數千均在附邊聚集必須趕緊剿除方免蔓延別境德勒克多爾濟等現調伊克昭盟官兵協防歸綏本境沿河口岸並因駐紮託密諾爾之烏蘭察布盟官兵五百名豫備調遣爲渡河進剿之用惟蒙古官兵未習戰陣本難得力設有緊急該將軍等仍當添調歸綏兩城官兵嚴密防剿毋稍疏懈至歸綏防兵力本單薄陝甘邊外蒙古亦不足恃設該匪由草地東竄或由陝省邊內向東滋擾恐完善地方又被蹂躪都興阿統率全軍剿辦甯夏股匪是其專責此股逆回本由甯靈敗竄沿邊之花馬池定邊及依勒圖呼克依等處盤踞肆擾著責成都興阿穆圖善將此股賊匪奮力剿洗以期肅清後路儻令賊蹤竄入鄰境致剿辦又形棘

手惟都興阿穆圖善是問恐該將軍等不能當此重咎也定邊爲陝境衝要地方劉蓉現派段登雲在彼防守仍恐兵力不敷著劉蓉趕緊添調得力將士馳往防剿其由定邊迤東沿邊空虛之處亦須添兵防堵毋稍疏忽並著楊能格督飭在防官兵合力夾擊雷正綰剿辦甯靈賊匪自當將該逆就地殲盡不得以驅賊他竄爲了事儻仍縱令靈州賊股續竄花馬池等處則該提督咎亦難辭懍之慎之綏遠城及晉陝沿邊一帶如有應行添兵防堵之處著沈桂芬酌量情形辦理並著阿克敦布廉至於察哈爾沿邊等處豫行派撥官兵籌備防範 七月甲子

諭軍機大臣等都興阿等奏分營圍剿甯郡並雷正綰軍進剿失利一摺雷正綰自進剿靈州後久未見其奏報茲覽都興阿等所奏該軍於初七日攻打金積堡失利由惠安堡退至韋州所部零落不成隊

甘肅新通志

卷首之四

五十六

伍曹克忠不知退在何處魏添應一軍亦退至姬家圈地方是該軍此次挫敗情形甚重賊勢益肆鴟張甯靈回匪皆將狡焉思逞而都興阿等後路花定一帶尤爲可慮都興阿現派都司李大楷前赴韋州查探雷正綰等軍情著即將甯郡前敵各營一面布置穩慎一面迅速抽撥重兵回援後路與雷正綰等軍相機援剿毋稍遲誤雷正綰趕緊將所部潰勇設法招集力圖整頓剋期再舉該署提督素稱善戰軍律尙嚴何以敗衄至此難保非爲該回求撫所誤此後當妥爲防範萬不可輕爲議撫致墮狡謀甘肅軍情日緊楊岳斌何以仍無抵省信息實屬延緩著趕緊馳赴省城與都興阿雷正綰等咨商調度迅籌策應其金積堡失利情形及曹克忠現在何處並著雷正綰迅即馳奏橫城花馬池定邊一帶人心惶惶該處兵力本不甚厚此時賊勢更熾若再乘銳東竄勢必掣動全局著都興阿嚴飭翁同

書督率各軍加意嚴防遇賊即擊劉蓉仍飭駐防定靖一帶之同知鄢太愚等軍會同甘省防軍扼要堵剿毋稍疏虞山西邊外防務亦關緊要德勒克多爾濟王榕吉務當會商妥籌將綏遠城等處之防嚴密布置毋得臨渴掘井致滋蔓延 八月丙申

諭軍機大臣等劉蓉奏擊退甘回進攻吳旂鎮剿辦甘省逃勇探明捻逆竄擾情形分防潼商等處並張家川竄回猖獗各摺片甘省逆回由合水竄入鄜州所屬之王家角經鄢太愚楊得勝整軍進剿該逆聞風遁回而吳旂鎮大股逆匪尙盤踞未動該處逼近陝邊定靖鄜保一帶均虞竄越劉蓉現飭楊得勝駐兵河上原以防賊回竄鄢太愚率所部四營進攻吳旂鎮踞逆惟兵力較單必須甘省分兵督合始能收夾擊之效劉蓉請派魏添應一軍會同截剿惟該軍前在金積堡敗挫後能否再振著楊岳斌督同楊能格斟酌情形就近調撥

甘肅新通志

卷首之四

五十七

一軍會同鄢太愚等將吳旂鎮踞逆實力剿洗毋留餘孽靈州金積堡之匪擾及紅柳溝羊圈山等處劉蓉現派陶茂林帶兵千名駐防柳樹澗著楊岳斌飭令翁同書將甯條梁所駐防兵移紮柳樹澗以資厚集劉正高所部潰勇由汧隴竄至鄠縣經邱時成彭體道等督隊剿殺殲斃數百名餘衆七百名棄械悔罪剿辦尙屬認真所有擒獲之首犯王得順等即著劉蓉訊明正法以昭炯戒劉蓉以該潰勇等擅敢相率逃逸復於沿途擄搶若准其回籍恐甘省各軍效尤更無固志現仍勒令文元興等帶此項投誠潰卒回甘歸伍所見固是但此等潰勇留在軍營徒糜餉需恐難得力著楊岳斌酌量驅策分別去留毋令再萌故態張家川逆回前已爲雷正綰剿除此時復有逆回數千竄踞著楊岳斌派兵馳剿劉蓉即飭蕭德揚劉玉興等軍迅於汧隴擇要堵禦毋任闖入河南張總愚等股竄入宛境蔓延南

陽鎮平鄧州等處內鄉浙川一帶俱有邊馬肆擾是陝省商南防務尤形喫重劉蓉已派劉厚基督率五營駐防武關一帶黃家焜招募兩營扼堵漫川關著即嚴飭各員會同該處地方團練嚴密布置毋稍疏虞其潼關防務並著迅催黃鼎之軍趕緊馳赴金陡關妥爲備禦秦豫壤地毗連逆蹤時虞西竄豫省各軍業經屢諭吳昌壽迎頭堵擊毋令竄陝矣 九月甲子

諭軍機大臣等德興阿劉蓉奏甘省軍情猝變陝西局勢可虞一摺陶茂林雷正綰張華等營先後變亂潰卒勾結逆回紛竄陝境圍攻涇州各路同時喫緊腹地空虛岌岌可慮著都興阿穆圖善迅撥金順西蒙克西克兩起馬隊馳赴陝省之邠長一帶相機扼堵並著崇實駱秉章於周達武部下抽撥總兵李輝武所帶步隊五營隨趙長齡由川迅速赴陝以護省垣而資調撥其口糧仍由川省源源解濟毋

甘肅新通志

卷首之四

五十八

令缺乏趙長齡疊經有旨催赴新任諒必迅速起程到陝省後著與德興阿劉蓉會商防剿事宜彼時劉蓉應俟邊防稍鬆再行回籍現在甘省情形楊岳斌知之必悉雷正綰現在何處各潰勇能否設法羈縻俾令勦賊自效平涼慶陽有無警報能否撥兵救援並著該督妥籌辦法迅速奏聞以慰馳繫此股潰勇勾結回逆勢甚猖獗難保不乘閒紛竄王蓉吉未可以賊竄尙遠稍涉大意其交界應防處所著早爲布置免致臨渴掘井貽誤地方蔣臨照如已行抵山西即令馳赴太原鎮總兵新任籌辦防務毋稍延誤 丁卯

諭軍機大臣等昨據德興阿等奏提督雷正綰在固原兵變各情當經諭知楊岳斌等傳諭雷正綰令其立功自效本日據楊能格奏雷正綰自金積堡失利之後革去幫辦所部兵勇本因甘省地極寒苦糧餉俱缺視爲畏途惟以保舉爲獎勵之地該提督於以前克復城寨

等案尚有積壓未辦保奏者既革幫辦則保舉絕望以致紛紛潰變雷正綰彈壓不止屢思自盡各等語與德興阿等所奏情形略異自是德興阿劉蓉相距較遠且係接據州縣稟呈不及楊能格之聞見真確雷正綰所部兵勇糧餉缺乏因思譁潰而該提督輒思自盡其情甚爲可憫前已嚴諭崇實等迅速撥解餉需解到時即可散給屢次出力員弁並楊岳斌查明未經獎敘者即行保獎矣該提督自入甘後屢著戰功朝廷深爲嘉許其金積堡挫敗之事咎有應得該提督膺國家干城爪牙之寄方當奮勉自效以贖前愆從前帶兵各員均有身獲重咎後來仍任統帥者其功罪皆視其人之自取豈得因一蹶之後遽作自盡之計甚屬有辜期望著楊岳斌德興阿劉蓉楊能格傳諭該提督拊循將士共圖奮勉立功則朝廷許其自新必當衡其戰績立沛恩施如此剴切開導諒雷正綰具有天良必能感激

甘肅新通志

卷首之四

五十九

圖報也 己丑

諭軍機大臣等楊能格奏續陳固原前敵各營潰變情形各摺片所陳雷正綰各營因乏糧潰變該提督要之以死跟蹤追阻百計拊循始於平涼紮定復據周顯承函稱雷正綰於初七日親帶親兵馬隊由涇州追剿北竄李家堡之賊刻下駐紮平涼各營又移紮四十里鋪等語是該提督爲人所制尙思剿賊自效重整軍威力圖再舉該提督自金積堡之敗朝廷撤其幫辦稍示薄懲仍留提督本任並令剿賊立功原因雷正綰入甘以來克復城寨多處頗著戰功並非即予廢棄即此次各軍潰亂該提督本有應得之咎而稟報訛傳更謂該提督有意爲之朝廷斷不能信雷正綰當如何感激圖報力洗前愆現在甘省回務鴟張各營潰卒紛紛思逞胡大貴等膽敢乘機生變降回赫明堂又復意存觀望正雷正綰努力自效之時豈得以辦

既撤遂思一死塞責該提督現署固原提督本有奏事之責此事即可據實入告何至函致他人求爲剖白嗣後雷正綰遇有軍務緊要事件即著專摺馳奏即現在收撫潰卒情形亦著據實入告並將所部各營重加整飭迅將胡大貴李高啟雷恆叛弁設法擒斬赫明堂等首鼠兩端如果生心煽惑亦當設法誅鋤其周顯承所招該提督舊部即著併歸前敵統交雷正綰調遣仍不得與周顯承互相牴牾該提督糧餉兩缺撫馭良難即著楊岳斌劉蓉趙長齡楊能格迅籌餉精徑解涇州糧臺轉運雷正綰行營以應急需毋令再有缺乏

十月庚戌

諭軍機大臣等雷正綰奏縷陳被誣並潰勇未有圍撲涇州情事各摺片雷正綰所部因餉缺思變前據德興阿劉蓉具奏接據地方官稟報有捆殺固原州知州蔣牧及圍攻慶陽之語德興阿劉蓉疑非事

甘肅新通志

卷首之四

六十

實於摺內陳明雷正綰平日性情尙非強橫之比何至狂悖至此是劉蓉本無偏信地方官稟報率行陳奏之處朝廷亦深鑒該提督積功擢至專閫必思保全令名斷無跋扈情事嗣據劉蓉等馳奏代爲剖析各情俱已明白諭知何以雷正綰積懷疑慮曉曉陳辯想因旁人挑唆所致該提督本係武員亦即無庸深責嗣後惟當懍遵疊次諭旨約束兵丁奮勉圖功不准稍有成見其營中疲乏勇丁亦當酌量遣撤庶餉需易於供支不至再生事端回目赫明堂既據該提督奏稱打仗奮勇即著飭令奮勉立功儻或仍懷異志亦毋許稍涉迴護其義子馬泳和假稱赫明堂之名率衆竄擾甚屬可惡即著雷正綰設法擒拏毋任竄逸正在傳諭閒據劉蓉奏擒獲叛將胡大貴供稱雷正綰兵變時雷恆首先勒令開隊李高啟倡製大旗胡大貴亦隨同謀叛嗣覺事體不好乘閒脫逃固原州官並未戕害各等語固

原州知州蔣方直未經潰勇戕害是雷正縮心跡已明惟胡大貴所供雷恆李高啟倡亂各情雖係一面之詞但不訊明辦理則浮言愈多此事關繫該提督聲名諒必急於剖析劉蓉已經交卸即著將雷恆李高啟二員解交陝西聽候趙長齡質訊則胡大貴之狡飾無可置辯若稍有迴護之心則必至議論紛紛雷正縮尙屬明白事理必能深體此意也 十一月乙亥

諭軍機大臣等楊岳斌奏黎獻營勇潰散並陳甘涼賊勢聯捷奏回目投誠各摺片黎獻一軍向尙得力此次進剿肅州逆回因火藥失火延燒後路糧臺又被賊攻破軍心不固旋即潰散該道員督率無方著先行摘去翎頂以示薄懲現在官軍新挫逆燄愈張該營存兵僅止二千餘名難成勁旅著楊岳斌一面責成黎獻收撫潰卒會合各軍協力堵剿重振軍威一面即飭總兵王仁和管帶之軍迅速由平

甘肅新通志

卷首之四

六十一

番一路節節進剿以爲西軍後路聲援此時河西三郡賊勢日益蔓延若不早籌埽蕩恐與關外之賊連成一氣收拾更難楊岳斌務當統籌全局選派得力將弁添調勁兵實力進剿毋誤事機至聯捷所稱甘肅回目穆生花陝西回目孫義漳率領各路回目遞稟投誠並甯靈兩城回民稟請求撫由聯捷將各回首稟詞鈔錄進呈著都興阿穆圖善楊岳斌斟酌情形辦理此等回衆如係甘心倡逆或曾經踞城戕官焚掠殘殺及屢經投誠反覆難信者罪在不赦斷不可輕行議撫致貽後日無窮之患若其中果有畏禍被脅出於勢不得已者自應准其投誠以示區別總須詳加察看分別良莠不可豫存成見 己未

諭軍機大臣等楊岳斌奏熟籌甘省分道進剿布置情形各摺片甘省賊衆兵單回匪占踞三城地勢廣袤自應統籌全局會合陝省兵力

分別緩急情形以定進剿先後楊岳斌擬令曹克忠等先後會攻甯夏令張在山譚玉龍等分路進攻靈州俟北路平靖後再行南剿狄河等處並請飭令陝省各營分路移紮甘省防剿所籌均合機宜楊岳斌侯布置稍定後擬即出省先赴北路自應首往靈州一帶將此路肅清則甯夏固原兩處之氣可通南北援應均可靈便仍著該督察度情形何路喫緊卽先馳往何路援剿至陝省各營兵勇與其防守本境何如進剿甘回肅清鄰疆卽以自固藩籬著劉蓉卽飭郿定一帶防兵進駐慶陽並飭涇平各營歸譚玉龍統帶由固原進剿靈州俾回匪各路均有牽制不得四出蔓延阻止官軍進攻之路

五年丙寅正月己巳

諭軍機大臣等都興阿奏甯郡回逆投誠將前後辦理情形縷晰詳陳一摺覽其所奏與穆圖善前奏相符都興阿因該回等未能遵限獻

甘肅新通志

卷首之四

六十一

城且城內逗遛回人不少所繳馬匹又皆疲乏不堪並非戰馬該匪等首鼠兩端都興阿將保立等正法並帶隊進城揆查驅逐恩威並用所辦甚屬認真現在南城各營布置已妥回衆亦甚安靜惟奉省賊勢猖獗亟盼該將軍會同文祥等督兵進剿著恪遵疊次寄諭星速起程馳赴奉省以副委任穆圖善身爲甯夏將軍且有督辦軍務之責所有甯夏善後事宜及納家插安插回衆諸務穆圖善務當斟酌輕重緩急妥協辦理聯捷業經革職應卽遵旨隨同成祿出關剿賊諒不敢再行干預辦撫爲逗遛討穆圖善切不可再信其言致誤大局都興阿離營後穆圖善責無旁貸設或善後一切事宜未能周妥致已成之局又生他變屆時縱思諉過他人以善自文飾朝廷惟知治穆圖善以辦理不善之罪杜悞爾本係甯夏副都統所統馬隊數百人仍留甯夏軍營最爲得力著都興阿斟酌情形妥籌調撥迅

速奏聞都興阿前往盛京隨身親兵可以酌帶惟所募之勇須酌量裁汰歸併穆圖善軍營不可帶往盛京 癸未

諭軍機大臣等劉蓉奏覆陳雷正綰情形飭令前赴穆圖善軍營並擊退竄擾隴州回匪各摺片逆目馬泳和假冒官兵由固原繞路回至陝邊撲擾涇州經涇防將士戮力同心立時擊退勦辦尙屬認真現在固原等處回匪盤踞數萬意欲乘此春融氣暖紛竄陝疆著劉蓉督飭防邊將士實力堵禦毋稍鬆懈固原平涼一帶爲陝省赴甘大路回逆麴聚其間聲息阻隔蘭州省垣米糧因此奇窘勢成坐困劉蓉現擬派兵由平涼進勦疏通甘省糧路實能不分畛域力顧大局並著楊岳斌酌帶親兵數營督飭曹克忠鞏昌之軍進擣固原與劉蓉所派劉玉興譚玉龍進勦平涼之師前後夾擊先清東面以期疏通糧路雷正綰既經劉蓉傳知令赴穆圖善軍營所有提督部下將

士及逃赴涇州之親兵並平涼赴涇之勇丁均著楊岳斌劉蓉飭令併歸譚玉龍統帶俾有約束免致散而無紀 是日

諭軍機大臣等前因甯夏收復所有善後事宜及納家插安插回衆諸務疊經諭令穆圖善妥協辦理現聞靈州逆回亦有投誠之信該將軍務當熟察誠僞認真籌辦不可偏重撫議墮賊狡計雷正綰與周顯承等意見齟齬已令其酌帶隨身弁勇迅赴甯夏軍營隨同穆圖善辦理軍務穆圖善與雷正綰共事有年想必能戮力同心埽除賊匪惟該提督近來專以招撫爲事恐爲孫義和赫明堂穆三楊大娃子等所給穆圖善總當遇事詳慎體察毋稍徇庶操縱有權機謀不至宣洩雷正綰何日抵營並著穆圖善隨時具奏靈州爲首各逆必應擒獲正法其投誠之衆非將軍械馬匹全數呈繳不准收降經朝廷再三誥誡該將軍如不能悉心體會冒昧從事致貽後患必惟

穆圖善是問 二月甲午

諭軍機大臣等都興阿奏辦理移交軍務穆圖善奏甯郡回衆仍復求撫各一摺納家插回民前在甯夏城中被官兵殺掠現復赴穆圖善軍營懇請投誠情詞哀切出於至誠著穆圖善妥爲安插毋令失所都興阿交卸起程後穆圖善於甯夏軍營事務責無旁貸該處漢回人心尙未大定自應妥籌綏輯並須留意隄防不可稍涉疏忽俟甯夏善後事宜辦有頭緒再行進圖靈州至回衆投誠時務當責令將戕官踞城首要兇犯捆獻正法並將軍械馬匹交出其脅從回衆酌量情形果係真心悔罪方准受降不可輕率漫無區別致爲奸回所給懍之慎之 三月癸未

諭軍機大臣等本日據楊岳斌馳奏省城兵變大概情形一摺覽奏曷勝焦急甘肅省城因糧餉缺乏督標兵丁竟於本月初三日五鼓擁

甘肅新通志

卷首之四

六十四

衆至督署及軍需局肆行搶劫將督署幕友及留省委員概行殺害該督留省親兵百餘人均行被戕所存炸礮洋槍火藥並標營庫械悉爲搶盡連日緊閉城門肆殺官民被傷甚多城上皆爲叛兵安置礮位並句結逆回赴省盤踞北關黃河對岸之廟灘此時賊氛猖獗占踞蘭州勢必全省震動楊岳斌亟應督兵星夜兼程馳回省垣速將蘭城克復以期力顧大局鎮定人心此外各路兵勇何處可以檄調即著酌量情形先行撥往助剿以厚兵力涇防各營軍心已定楊岳斌自當分撥諸軍前往該二城相機剿撫毋令東路回匪聞風響應與省垣叛兵句結致成燎原之勢仍一面設法疏通陝西糧運分濟甘省各營軍食毋稍大意慶陽查辦糧臺事務卽著該督專交趙長齡辦理所有慶陽留防事宜仍著楊岳斌分派將士嚴飭防守本日復據林之望奏稱副將羅宏裕辦理不善激變營兵一摺該藩司

有無爲叛兵所脅飾詞具奏情事楊岳斌即行查明覆奏儻該叛兵偪脅藩司飾詞奏事難免不僞用印文分向各路軍營並各郡縣逞其詭計該督務當檄飭各該文武嚴密防察並著於回抵省城時設法將被脅滋事營兵先行招撫解散以孤賊勢務當隨機應變謀勇兼施不可稍執成見 四月庚寅

諭軍機大臣等林之望奏再陳省標兵丁索糧激變詳細原委並地方危急情形請旨迅賜查辦及越分陳奏自請察議各摺片甘肅省標各營兵丁因平日楚勇餉厚差輕積懷不平又以飢餓索餉爲署副將羅宏裕喝斥激成變端自係實在情形惟該兵丁等與楚勇械鬪竟將道員吳炳崑等戕害實屬不法著林之望迅速查明將爲首滋事之犯嚴行懲辦其餘被脅各營並著曉以大義告以叛逆之人無不誅滅之理洪逆倡亂竄踞金陵馬榮叛踞雲南省城現俱次第鏟

甘肅新通志

卷首之四

六十五

削全數誅夷况甘省標兵本屬無多指日楊岳斌統兵回省儻不及早擒縛首逆解散黨與將來大兵一到必至玉石俱焚該兵丁等如能悔過自新朝廷亦當寬其既往不事窮究也 是日

諭軍機大臣等據劉蓉馳奏甘肅省城兵變情形酌籌緩急權宜辦理並將林之望此次馳奏摺件由驛遞呈一摺與朝廷所辦情形多相符合蘭州文武各員多爲叛兵戕害四門已設礮位閉守林之望兩次所奏摺件顯係被脅捏飾劉蓉以楊岳斌移師回省恐各路回逆併起以躡其後前阻堅城後迫強寇糧道中梗非制勝之策請先將平固埽蕩疏通糧路然後鼓行而西不宜以孤軍憤進等語所奏亦不爲無見此事本由楚勇與標兵領餉厚薄不均楚軍又從而陵蔑之以致標兵積不能平劣將張玉春等從中播弄遂至陡生變亂楊岳斌當分別首從勦撫兼施不能概行殺戮致叛兵聞風畏懼益堅

其抗拒之心並須將偏袒不公之武員查明參劾以平其心此等叛兵倉卒起事急則合而緩則分總宜設法解散以省兵力省垣城池堅固洋礮火藥均爲叛兵所擄該督當自度兵力如何儻能剋期克復則兵貴神速自應迅回省城辦理如探明賊中守備已固兵力未能遽克或如劉蓉所籌先將平固回匪勦平疏通糧路再行西進之處均著楊岳斌酌度緩急情形辦理林之望此次所奏摺件詞旨與前次所陳大略相同其所稱督標各兵與楚勇不能同處省城請令曹克忠帶所部赴省等語是否叛兵有悔罪望撫之意抑或欲誘曹軍入城圖謀戕害楊岳斌當察訪明確相機調遣不可坐失事機亦不可冒昧從事蘭州城內無糧楊岳斌當分兵要路杜賊勾結外援斷其糧路勢將不攻自潰 乙未

諭軍機大臣等林之望奏近省回匪環伺省垣請飭催官軍進援並軍

甘肅新通志

卷首之四

六十六

糧缺乏及省東官軍接仗情形並代奏標兵訴詞各摺片甘肅省城自兵勇互鬪後北路回匪馬士彥等率衆偏近省垣西南各路賊首馬阿渾謝二崔三等亦四出紛乘意圖窺伺因城守嚴密均以乞撫爲詞暫行撤退林之望因內無糧草外無援兵權宜安輯固屬萬不得已之舉惟回性狡詐每以投誠懈我軍心林之望仍當督率在城文武加意防範不得稍涉疏虞致墮詭計張玉春等三營業經林之望調回省城駐紮要隘第爲數過少尙不足丕振軍聲前已諭令楊岳斌飛飭曹克忠等軍回援省城林之望接此旨後即可一面稟商楊岳斌一面函催曹克忠等以期援兵速到保全根本重地林之望所陳省城飢困情形覽奏實深矜惻著照所請即於陝省運秦糧內先劃撥一萬石設法運解赴省以濟危急楊岳斌不得堅執成見仍將運奏糧石存儲靜甯致令省城兵民飢困難支兵勇同爲國家出

力朝廷本無歧視羅宏裕何得捏造裁汰兵勇之言激成衆怨此等劣員貽誤邊隅大局實堪痛恨已諭令楊岳斌查明嚴行參辦林之望仍遵前旨剴切曉諭衆兵各守營規毋懷疑懼果能殺賊立功自當寬其既往予以自新也 是日

諭軍機大臣等林之望奏省城糧道久梗請撥陝運糧石並兵丁具稟申訴暨近省股匪環伺兵勇接仗情形各摺片已傳諭該藩司善爲撫輯固守待援矣省城兵丁滋事變起倉卒此事本由楊岳斌厚勇薄兵所部將士又從而陵侮之以致兵心不服積憤日深一發莫遏現在該標兵具稟向林之望申訴是尙有悔罪畏法之心楊岳斌當設法撫定查明激變之楚將及爲首滋事之標兵持平辦理並曉諭脅從附和之衆毋懷疑懼以安其心尤須先將省外附近股匪剿平後再行察看情形相機查辦不可鹵莽輕發並不可輕聽所部楚勇

憤激之言不察啟釁情由概行誅戮此次林之望所奏各摺片朝廷詳加披覽似屬實在情形未必皆係被脅捏飾之詞羅宏裕以朝廷欲裁撤兵丁之言捏造激變咎實難辭楊岳斌務將羅宏裕激變情由查明參辦不准稍涉徇省城以外附近地方跬步皆賊藉乞撫之名爲斷絕糧路之計鶴齡現率通判鄭聲文等將河北回匪先行開導權宜安輯並調張玉春文象奎等三營回省以壯聲勢惟兵力仍形單薄該藩司請將雷正綰曹克忠所部調回省垣助剿著楊岳斌遵奉前旨迅速酌調曹克忠一軍赴援鞏昌軍務該督另派得力之員前往督辦省城以外各股匪環伺該督亦當分派將弁疏通糧路以顧根本 壬寅

諭軍機大臣等楊岳斌奏覆陳省城兵變情形並陳上年整頓營務及現在籌辦緣由隆德縣城猝被回陷請調鮑超全軍赴甘各摺片甘

省營伍積弊原應次第整理惟須體察事勢緩急相度辦理不可偏執重勇輕兵成見一味操切從事此時事變已成槍礮火藥俱爲叛兵搶奪城門又爲所踞該督現率所部折向省垣進發自宜先將脅從各兵曉諭解散使其黨與離心方可次第查拏首犯按律懲辦若先揚言督兵勦洗必至該叛兵閉關拒守攻克需時現在省外各路回匪均已逼近省城儻官軍頓兵堅城之下內爲叛兵所拒外爲回匪所乘進退失據恐大局益形窒礙該督現已由涇州起程並令曹克忠一軍先回省城著即飭令迅速前進楊岳斌務須審度機宜謀定後動不可徒逞憤兵輕於一擲北山來賊較前倍加河狄大股圍撲省城並分股繞至車道嶺等處阻截官軍進援之路著楊岳斌分飭將領疏通道路將省外回匪擊退隆德縣城爲回匪襲陷楊岳斌當分兵迅圖克復鮑超所部兵勇現因捻匪滋擾亟須前往鄂豫助

勦斷難調赴甘省朱南桂等前經曾國荃調赴鄂省當諭該督撫等酌量派員帶勇援甘尙未據該督撫覆奏因思甯夏此時已無軍務即著穆圖善分撥得力將士前往靈固一帶勦辦騰出雷正綰譚玉龍等軍由楊岳斌相機調遣互相援應以厚兵力 壬子

諭軍機大臣等劉蓉奏甘省大股回匪併力回竄請飭督臣先清東路並請飭穆圖善撥營駐紮靈州等處各摺片河狄固原會甯諸逆相率蠢動隆德靖遠旣已先後失陷莊浪華亭並形危急現復擾及慶陽府屬之西峰鎮焦村等處將入陝疆逆酋孫義漳等將前所收降之馬德馨及總兵劉玉昌等數人戕斃復偏脅靜甯蕭河等城堡降回隨同起事爲今之計當專用力於東北杜平固出竄之路通慶涇饋運之途後顧無虞方可節節前進即著楊岳斌派撥兵勇先將華亭甯州等處力圖保護以次克復隆德靖遠翦除強寇引軍而西向

平固靜會以規皋蘭林之望呼援甚切曾諭令楊岳斌調派曹克忠督兵赴援軍情變幻無常該督老於行陣惟當通籌大局穩慎進取方爲不負委任劉蓉現擬赴涇州一行該督撫將進止機宜妥爲商酌務出萬全陝西汧隴等處偏近回氛並著該撫督飭在事將弁實力防剿毋稍疏忽穆圖善前奏馬化澂投誠呈繳軍械馬匹各情是否尙有隱匿該將軍派員查勘必須覈實辦理毋任再有構煽穆圖善擬俟甯靈一律肅清察看賊勢何路喫重移師遄征著即懍遵前旨派撥馬步各營駐紮靈州鹽茶交界之地與楊岳斌東路各軍遙爲聲援旣以絕陝回馬生彥等句結之路亦以堅甘回馬化澂等歸順之誠據劉蓉奏甘回素多愚懦此次構難實爲陝回所迫陝回狡悍性成屢撫屢叛此時甘回可撫陝回尙不可撫等語並著穆圖善詳察情形分別辦理毋得一味姑息致貽後患 七月戊寅

諭軍機大臣等楊岳斌奏籌辦南路軍務請飭穆圖善移師西向覆陳彭楚漢等軍並無諱敗爲勝情形各摺片回匪被陝軍擊退折竄入甘秦安清水等處賊騎縱橫漸逼秦州該督現調蔣凝學統帶安字營勇赴省俟此軍到時即擬出省剿辦秦州附近一帶回匪惟省垣兵變甫經綽定且附近各處賊匪尙未殄除正須大吏駐紮藉資鎮攝該督甫還蘭州即思出省能否無憂內顧務須統籌全局妥協辦理不得顧此失彼又蹈從前覆轍秦州一帶現旣檄令王得勝等相機堵剿並調張在山傳先宗等前往助剿著即嚴飭各軍極力剿辦毋令完善之地致有疏虞平番迤至涼州俱爲逆回出沒亟應分兵剿除賊匪疏通省垣糧路現在甯靈一帶業已安定無須多兵駐紮著穆圖善酌度情形督率所部由中衛鼓行而西直赴平番節節進剿毋稍延誤該將軍仍酌留兵勇鎮守甯靈等處以備不虞其平固

一路防剿事宜即著楊岳斌飭令雷正綰妥爲辦理楊岳斌所稱彭楚漢等軍在車道嶺等處擊賊獲勝並無諱敗捏報情事仍著督飭彭楚漢等認真剿賊奮勉立功 八月癸卯

諭軍機大臣等楊岳斌奏各路軍營疊獲勝仗涼郡解嚴並出省剿賊各摺片南字明字兩營在大營川清水驛趙家岔鹽溝各處獲勝提督王仁和署總兵楊占鰲副都統瑞雲等軍亦疊次獲勝涼州解嚴張在山慶防一軍將土匪蘇存鴻等股擊敗剿辦均屬出力在事員弁兵勇著楊岳斌擇尤酌保毋許冒濫省垣變亂甫定正須大吏駐紮藉資鎮懾前據楊岳斌奏擬出省剿賊當經諭令該督妥籌全局妥協辦理此時該督業已出省馳赴南路剿賊雖經派令羅進賢等督帶各營留駐省關內外而根本重地關繫非輕該督仍當迅飭蔣凝學一軍趕緊進省嚴密布置毋得顧此失彼再蹈從前覆轍秦州

甘肅新通志

卷首之四

七十

一帶回匪即著該督迅速埽除不可稍涉延緩 是日

諭本日據楊岳斌奏才力不及病勢日增懇請開缺業經明降諭旨令左宗棠調補陝甘總督其閩浙總督令吳棠補授所遺漕運總督令張之萬調補並令蘇廷魁署理河東河道總督矣陝甘爲邊陲重鎮見當回氛甚熾楊岳斌於人地不甚相宜辦理未能有效眷顧西陲實深廩繫左宗棠威望素著熟嫻韜略於軍務地方俱能措置裕如因特授爲陝甘總督以期迅埽回氛綏靖邊圉該督於接奉諭旨後將閩浙印務交與英桂兼署迅即馳赴新任悉心經理以慰廩繫閩浙見雖平靖而營務吏治廢弛已久吳棠到任後務當認真整頓毋稍鬆懈見在洪澤湖等處盛漲疏洩甚關緊要而捻逆紛竄河防亦宜嚴密張之萬蘇廷魁膺此重任均宜加意整理不可稍有延誤將此由五百里各諭令知之 十月乙巳

諭軍機大臣等穆圖善奏馳抵中衛相機進剿 請調西蒙克西克等軍各摺片馬生彥楊汶智遞稟投誠恐其別有詭謀著懍遵前旨酌度情形如果真心悔罪當先收繳馬匹軍械方可擇地分別安插毋爲該逆所給昨據劉蓉奏捻匪由靈寶闖鄉折由蒿峪小路竄入華陰朝邑等處雒南一路又有賊馬滋擾甘省回匪大股已踞涇州北原分股竄至甯州屬境宜君白水三水各邑均有逆回潰勇紛擾陝州東西兩路同時喫緊劉蓉勢難兼顧且該省兵力甚單亦屬不敷分布穆圖善現在中衛自應先其所急回顧陝省西路即著該將軍暫緩前赴蘭州仍與劉蓉悉心籌商先將陝甘毗境竄匪迅圖殄滅如陝省兵力空虛該將軍所部有無就近可以抽撥援應之處並著相機調度西蒙克西克程興烈等軍均經劉蓉調赴各路防剿此時萬難抽動穆圖善請調該二軍赴甘之處暫毋庸議靖遠一帶賊氛

甘肅新通志

卷首之四

七十一

鷹集穆圖善此時又暫難赴省所有鎮遠蘭垣及靖遠一帶剿匪機宜均著楊岳斌統籌兼顧不得稍涉疏懈 丁未

諭軍機大臣等成祿奏官軍攻剿肅州情形請撥糧石催解協餉軍火各摺片肅州一城圍攻日久未能克復歷次進剿斬獲亦屬寥寥總兵楊廣德又復力戰陣亡前據該提督奏稱設法攻剿旦夕克復此次又奏稱賊勢窮蹙均係徒託空言若再任意延誤惟該提督是問其由肅城逸出股匪並未截剿淨盡現由番地散逸難保不復糾番黨回擾大營後路成祿當慎加防範毋稍疏虞肅州在營兵勇天寒衣單殊形困苦著楊岳斌飭令甘涼肅所屬將分辦之皮衣趕緊辦齊該營需糧甚殷並著楊岳斌於甘涼安肅就近州縣本年額徵糧石內分撥十餘萬石交前敵糧臺存儲並著楊岳斌添派精銳數營迅復肅州以便成祿交替西行成祿未起程 前仍當將肅州軍務

認真督辦剋期克復若因循畏葸不能攻克 州又不能奮勇出關
任意逗遛該提督自問當得何罪 十一月丙寅

諭軍機大臣等戶部奏遵議山西協解甯夏餉銀一摺山西省應解穆
圖善軍營餉銀五萬五百兩該省撥款繁多奏請改爲解米事非得
已亦兵所必需惟甯夏軍營兵勇衆多且有應辦善後各事需款甚
亟若山西全行解米用款誠恐不敷著照戶部所議所有山西省應
協甯夏餉每月五萬五百兩內除景廉營內每月九千兩仍照舊解
銀外其餘四萬一千餘兩即按三成銀兩七成倉米報解趙長齡當
遵照此次部議辦理毋稍推諉至所解倉米該撫當督飭各屬認真
碾運不得以朽敗秕糠搪塞了事穆圖善亦當將各兵勇隨時開導
毋許有意刁難各省撥餉甚多籌款匪易甯夏軍務現已漸平該營
兵勇或可酌量裁撤以節餉需著該將軍酌度情形覈實籌辦

甘肅新通志

卷首之四

七十一

十二月辛卯

諭前因左宗棠奏請來京陛見當經批令來見原冀面受機宜詢問方
略而見在甘省東路平慶一帶陝回肆擾西路河狄爲甘省大股回
匪所聚楊岳斌旣一籌莫展而穆圖善亦不能派兵援救加以哈密
失陷巴里坤危急關內外情形同時鼎沸眷言西顧竟無人能爲朝
廷分憂者左宗棠嫻於韜略素所深知著卽馳赴甘肅督辦軍務暫
時毋庸來京俟甘肅軍務事竣再行奏請將此由六百里諭令知之
諭穆圖善奏瀝陳軍營情形並籌陝省軍務一摺回目馬生彥等遞稟
投誠欲移黃河南岸該將軍見已移知楊岳斌籌地安插惟該回目
並未呈繳馬匹軍械是否真心悔罪該將軍仍當確切查明不可爲
其所給楊岳斌亦當隨時留心體察與穆圖善商酌辦理不得意存
偏執致誤事機中衛等處旣有賊氛穆圖善自應力籌妥辦不得藉

詞逗留擁兵觀望鮑超一軍專辦勦捻事務並非令其久駐陝境辦理回匪如捻匪竄出陝境該提督即當追勦出陝穆圖善勦辦中衛一帶土匪事竣後如遇陝省軍務喫緊之時仍當分兵兼顧包頭歸化城一帶爲該軍後路餉道德興阿已派察哈爾馬隊並蒙古兵共七百名赴包頭防守替出全福馬隊赴甘進勦著福興即督飭此起官兵實力防堵如無賊蹤即飭此軍赴甘以助攻勦趙長齡即飭總兵馬陞遵奉前旨迅赴包鎮毋稍遲緩將此由五百里各諭令知之

甘肅新通志卷首之五

同治六年丁卯春正月丙辰

命陝甘總督左宗棠督辦陝甘軍務

諭軍機大臣等趙長齡奏晉省防務喫緊咨調豫軍渡河協守並林壽圖奏請飭左宗棠先清秦境疏通糧路各摺片捻匪竄過渭北擾及三原高陵勢將東逼同朝該處與晉省僅隔一河防務異常緊急趙長齡見在分布水陸諸軍於蒲州等處要隘駐紮即著督飭陳湜嚴密扼守並著曾國藩李鴻章李鶴年懍遵前旨分飭劉松山保英兩軍兼程馳赴同朝與陳湜所部晉軍聯絡聲勢互相援應毋任捻蹤東渡黃河鮑超一軍著兼程入秦痛剿逆氛援救省會不可再涉遷延亦不可以驅賊入晉爲卸責奮勉圖功毋干重罪並著李鶴年籌糧米接濟援陝諸軍毋得稍分畛域左宗棠前已有旨令其迅速赴

甘肅新通志

卷首之五

一

陝復明降諭旨令督辦陝甘軍務此時陝省情形更爲喫緊軍政廢弛已極著即星夜馳赴嚴申紀律將玩法將領從重懲辦以冀肅清陝境乘勝入甘左宗棠未到以前陝省防剿事宜仍著喬松年勉力督辦將此由六百里諭知曾國藩左宗棠李鴻章李鶴年趙長齡喬松年並傳知鮑超知之 四月癸巳

諭軍機大臣等穆圖善奏馳赴省垣接署督篆請飭左宗棠迅速赴任並陝回具稟投誠情形一摺蘭州爲根本重地四面賊氛楊岳斌患病甚篤非得人前往鎮撫大局實難維持穆圖善現今總兵胡世英統帶所部暫紮甯條梁兼顧陝甘毗境並親率馬隊馳赴蘭州暫行接署督篆所籌尙合機宜惟馬生彥等甫經就撫半箇城地方爲四達通衢甯安堡之防亦關緊要該將軍務當督飭黃金山等密籌防守並將馬生彥等加意羈縻不可稍有疏失左宗棠入陝後尙須剿

辦捻股再議西征甘省慶涇洮河等處賊匪充斥穆圖善於省垣布置事宜稍有頭緒仍當相機出省悉心調度勦撫兼施毋得株守省垣滋多貽誤陝回于彥祿具稟投誠經該署督批令呈繳馬匹軍械即著妥爲開導俾知反正歸誠其河狄各處亦著飭令曹熙等乘機辦理現時在甘陝回不無懷思故土之意惟與漢民積釁已深日後恐難相容前諭左宗棠察看民情地勢於投誠匪衆妥爲安插該大臣謀畫素裕務當體驗情形毋拘成見熟籌辦法惟此次與捻逆句結已經竄陝各回將來勢窮求撫仍不得率行收受喬松年有地方之責其於陝回應如何撫插之處亦著隨時諮訪與左宗棠咨商妥辦用靖邊陲 八月乙酉

諭軍機大臣等本年三月二十五日據楊岳斌奏稱貴德廳回匪叛亂將同知承順及家屬戕害踞守廳城偏脅官民書寫官徇民變等詞

甘肅新通志

卷首之五

二

捏稟玉通已飭鄧全忠等督勇率團設法進勦於四月二十七日奏到當經諭令楊岳斌即飭鄧全忠等迅將貴德廳城攻拔玉通亦當嚴密防守毋再輕信奸回致爲所誤本日接閱玉通四月十一日奏報回衆變亂戕官劫庫等情與楊岳斌前次所奏尙屬相同是回匪之甘心爲逆萬難寬貸玉通一意主撫已誤於前此時尙不省悟另片奏鄧全忠等來甯進勦有礙撫局實屬偏執已見就目前情形而論鄧全忠等既經收復米拉三溝能否督率所部先抵西甯入城鎮撫再將貴德廳城相機攻取著穆圖善妥籌辦理回逆聚衆擾亂固不可不懼以兵威但兵勇進勦之時往往妄行殺戮乘機搶擄致良回無以自存朝廷辦理回務止分良莠並不使其玉石俱焚左宗棠穆圖善務當飭知帶兵各員隨時約束兵勇毋得濫及無辜良回旣安辦理自易爲力西甯地方緊要玉通仍當慎遵前旨悉心籌辦毋

爲奸回所給貽誤戎事甘省回勢蔓延必須安撫良回毋使驚疑剋除逆回以鋤稂莠含此別無良策左宗棠如有所見即商同穆圖善迅籌布置用靖邊陲 丁巳

諭軍機大臣等穆圖善奏河狄西甯各路回衆投誠大概情形並安插南八營降回及靖邊縣城失守各摺片甘肅河狄二州回衆最爲强悍近因米拉溝等處之捷該回衆震懾軍威具稟求撫而西甯洮州等處均有可乘之機穆圖善擬派員先赴河狄責以獻城繳械各條刻示曉諭再行分咨西甯辦事大臣等將米拉溝等處相機辦理惟回衆旋撫旋叛性情殊難揣度穆圖善務飭所派之員乘機開導如該回衆真心悔罪不妨予以自新隨時妥爲防範其西甯一路亦著會商辦理總之受降非易萬不可因其勢窮乞憐遂至掉以輕心轉爲奸謀所誤馬生彥等股仍當善事羈縻毋稍大意至南八營李得

甘肅新通志

卷首之五

三

倉各部之十六萬人據稱現皆乞降可以擇地安插但該股人數過多蕭河城附近處所可否令其居住就近墾種之處即着飭令張瑞珍前往妥辦諭知該回衆繳清軍械馬匹以消亂萌靜甯州一帶並著檄飭王得勝督率數營嚴爲控馭陝西甯條梁地方突經回匪竄踞實爲陝甘巨患該署督當懷遵前次諭旨嚴飭敦奇祥阿等會同陝省各軍迅圖收復毋任蔓延 七年戊辰六月乙亥

諭軍機大臣等前因林壽圖奏請裁撤西安糧臺當令左宗棠酌度具奏茲據左宗棠奏稱西安所設甘肅後路糧臺原爲支應慶涇諸軍而設西安糧臺一撤秦隴餉道中斷平慶涇固一帶實兩省孔道糧臺專設秦安遠道轉輸亦有鞭長莫及之慮西安所設甘肅後路糧臺斷不可撤等語左宗棠身任兼圻自應權總兩省通盤籌畫既據酌度定議即著林壽圖仍遵前旨將西安糧臺各事宜照舊妥爲經

理毋許推諉並著左宗棠隨時提撥協甘各餉通融接濟俾得餉項有著克贍飢軍甘省荒瘠情形既爲該大臣所深悉且現存兵數尙有百四十餘營之多軍士待哺嗷嗷豈能枵腹荷戈雖先秦後隴勢有固然而脣齒相依實爲安危所繫該大臣務當妥籌兼顧以濟急需不可稍存歧視致虞譁潰山西原協涇慶之餉著鄭敦謹照舊撥解西安糧臺以歸簡易穆圖善即行轉飭林壽圖於協餉到時隨時提撥以資接濟 七月戊寅

上諭軍機大臣等穆圖善奏派隊勦辦東南各匪及秦州土匪一摺土匪剛八即張貴在靜甯州地方糾衆倡亂黨與至一萬餘人之多徽成各縣境界突有東來股匪滋擾糧道梗塞自應迅速勦辦以免蔓延穆圖善現已派令善山保傅先宗等分投勦洗著即嚴飭該副都統等激勵將士實力奮擊以靖亂階徽成一帶回匪尙未踞有巢穴

甘肅新通志

卷首之五

四

尤當乘其立足未定併力捕誅毋留餘孽剛八雖係迫而爲盜而麴聚稱亂與回匪等其被脅難民固不必概行誅戮該匪首甘心叛逆豈得曲從寬宥著穆圖善飭令派出各員分別妥慎辦理毋得將就了事貽患方來 八年己巳正月癸巳

上諭軍機大臣等穆圖善奏官軍擊退竄擾南路陝回秦安等城解圍並飭金順前往定邊等處勦辦各摺片陝回馬鎮和崔三率領馬步賊衆數萬圍撲秦安縣城經敖天印等分路抄擊斬馘甚多該逆直趨清水縣地面官軍夜襲賊壘賊向東路紛竄由秦州北路分道進逼四面仰攻疊經敖天印等追殺賊勢不支退竄關山隴州一帶此次賊股竄擾南路意在救援河州敖天印各軍均能踊躍用命將秦州秦安清水城圍立解惟秦州爲該省完善之區該逆股素所垂涎現雖經官軍勦退難保不聲東擊西乘閒紛擾仍著穆圖善督飭敖

天印等偵探賊蹤乘勝壓勦以杜回竄河州地方緊要並著嚴檄在事將士奮力截擊毋任此股前往救援復形棘手定邊花馬池等處直達歸化包頭固應嚴密防範第金順現在榆林一帶勦賊正屬得手未便拔隊前往著俟該處賊匪埽除淨盡再行相機移紮此時花定一路應如何保護糧道穆圖善當妥籌辦理前據左宗棠奏官軍疊獲勝仗賊勢漸衰劉松山等已由綏德西進即著該大臣等檄令各將領與金順等軍聯絡聲勢迅將榆綏等處踞賊痛加勦洗用竟全功 二月丁卯

諭軍機大臣等前據左宗棠奏請於陝甘餉項外專款指撥西征實餉當交戶部議奏茲據該部奏稱各省專協左宗棠劉典穆圖善軍營月餉皆同治六年以前奏定數目此外另協之款如指撥洋稅一百萬兩接濟左宗棠軍餉及劉松山郭寶昌協餉尚不在內本年二月

甘肅新通志

卷首之五

五

間添撥安徽等七省釐金三百萬兩原係歸併覈議令各省轉解左宗棠軍營兌收酌協陝甘兩省之用未便另分西征實餉等語各省報解協餉遲速多寡難免參差若必區定協餉界限彼此不能通融則各路軍營餉需必至此絀彼盈中多軒輊左宗棠總統師干陝甘兩省皆該大臣管轄自應將兩省軍需通盤區畫隨時勻撥接濟不必強分界限亦毋庸稍避嫌疑嗣後各省關前後奉撥陝甘軍餉除專解穆圖善軍營及秦州銀每年一百二十萬兩仍解甘肅外其原撥左宗棠協餉每年三百三十餘萬兩劉典協餉每年六十萬兩及本年添撥各省釐金三百萬兩均仍由左宗棠兌收以一事權該大臣務將各軍一切餉需酌量緩急撥濟並分助甘肅之用不得置穆圖善軍營於不顧至各該省關原撥陝甘兩省各路軍營餉項及安徽等七省本年添撥陝甘軍餉銀兩著戶部咨催各該省力籌報解

儻任意延欠即由該部指名嚴叅至郭寶昌一軍月餉不敷已照戶部所議諭令吳坤修鄭敦謹按月籌解該大臣當督飭郭寶昌奮勉圖功毋得糜餉老師是爲至要 四月己酉

上諭軍機大臣等左宗棠等奏官軍克復董志原回巢慶涇各屬一律肅清現籌布置情形一摺董志原居秦隴要膺久爲回逆老巢經官軍此次痛剿克復慶涇各屬一律肅清該逆由環縣固原兩路北竄下馬關等處左宗棠等因裹糧將盡仍令各軍回駐原防擬擇要興屯徐圖進取固屬老成持重第當此得勝之餘軍威大振回情渙散甘肅各匪經此懲創自必大爲震懾若能乘勢進剿自當事半功倍儻遲遲進取恐回逆結謀抗拒轉形費力著左宗棠將糧餉等事與劉典妥商後即行西征隴回並馳至涇州接受總督關防擇要駐紮居中調度以期秦隴兩省得以兼顧至延安一帶地方是否安謐扈

甘肅新通志

卷首之五

六

彰有無反側董福祥是否歸降興辦兵屯應如何經畫左宗棠籌定後即可交劉典經理免致失此機會穆圖善於左宗棠未到甘肅以前仍當將金積堡等處竄回盡力堵剿毋令逸出邊外勢成蔓延

五月丙子

上諭軍機大臣等穆圖善奏陝回分股竄甘請仍飭金順回駐花定並回匪逼近中衛董志原踞逆紛擾情形各摺片據稱花馬池地方突有大股馬步賊匪爬城經富勒琿等擊退董志原逆匪復竄至中衛縣屬之甯安堡上橋卡將殷家寨等處及河南馬灘攻破並分股渡河逼近城垣其平番縣屬之牛站連城一帶又有西甯撤回圍攻堡城省城附近亦有賊蹤請飭金順迅回花定保護甯靈等語陝回分竄甘境穆圖善所部各軍分布西南於北路勢難兼顧自係實情蘭州爲根本重地關繫尤重仍著該署督就現有兵勇妥籌防守定邊

花馬池爲甘省要害之區固不可無得力兵勇扼賊匪分竄之路磴口界接晉疆金順前奏親統各營由達拉節勦而西以期先復磴口此時自未便撤回即著該副都統懍遵疊次諭旨斟酌辦理張曜統師西進爲金順後路接應宋慶進紮古城榆林防守無人左宗棠等或即於劉松山郭寶昌各軍中抽撥一軍填紮榆林以資鎮撫董志原逆股前據左宗棠等奏稱竄回金積堡茲覽穆圖善所陳是該逆分三路奔竄倏東倏西迄無定所著左宗棠嚴飭各路將弁確探賊蹤迅圖勦辦不得以回氛距陝較遠置之不顧連城城圍旣解西路撤回即著嚴飭張萬美就近兼顧並飭黃金山將涼州南山游匪搜捕即由涼繞赴中衛堵擊北路竄匪以杜紛擾 六月癸亥上諭軍機大臣等穆圖善奏甘省北路賊情並收撫高臺等處潰勇各等語據稱自中衛至靈州一帶賊勢蔓延甘省南路各軍未能兼顧

甘肅新通志

卷首之五

七

請飭左宗棠金順派兵夾擊所奏自係爲力顧東北起見前據左宗棠奏檄劉松山軍向花定前進截勦甯靈之賊當諭該大臣酌派郭寶昌合軍齊進此時甘省北路賊蹤分竄自應乘其喘息未定之際痛加勦洗著左宗棠飛飭劉松山等迅速進兵毋稍延緩金順現在行抵何處並著統率所部聯絡張曜宋慶兩軍扼要防勦使匪蹤不得東竄藉爲包薩屏蔽左宗棠計已行抵涇州該處距蘭州尙遠現在北路賊勢固屬喫緊而南路河狄之賊密邇省城亦須兼顧刻下陝省邊境旣經防軍分布當無後顧之虞左宗棠接篆後自宜移軍前進或赴秦州一帶擇要駐紮以便居中調度該大臣鄭重進兵固是老成之見惟省垣重地關繫甘省全局左宗棠身任封圻責無旁貸總當力籌保衛儻或稍存大意致有疏虞必惟左宗棠是問穆圖善交卸督篆後即著暫駐蘭州聽候諭旨其省城防守及河狄一帶

防勦事宜仍當竭力籌辦不得以接統有人稍涉諉卸高臺山丹潰勇穆圖善已派王仁和招集統帶著左宗棠穆圖善飭令認真訓練以資攻勦儻再不遵鈐束即行從嚴懲辦 七月癸酉

上諭軍機大臣等定安桂成奏回股復犯草地官軍截勦獲勝並請撥兵駐紮甯夏平羅一帶各摺片阿拉善旗之定遠營被回逆圍困甚急張曜會同烏爾圖那遜帶兵往援由蘭扇至察漢淖爾地方遇賊接仗擊斃悍賊甚多紅柳樹一帶伏賊亦經官軍擊敗其塔爾貝都貢地方回股復爲烏爾圖那遜所部衝散該逆等仍由舊路連夜西遁此次逆回糾合東竄疊經官軍擊敗勦辦尙爲得手即著該將軍等迅飭張曜各軍乘此聲威覘賊所向會合勦除以期痛殲醜類現在蒙漢各民避居北山該處直達包薩難保該逆不因邊內乏糧復行窺伺金順一軍前擬由烏喇西進該軍現已渡黃暫紮什巴爾台

著仍遵疊次諭旨酌度情形與張曜等聯絡聲勢分投堵勦定安等以左宗棠大軍進勦靈州賊匪若艇走草地張曜等追勦較遠請飭金順駐軍於甯夏平羅一帶或由左宗棠另撥一軍聯絡扼紮遏賊東竄北竄之路所籌不爲無見金順追賊正緊所部亦不甚厚應否駐軍甯夏平羅著會同定安等悉心商推以免顧此失彼如金順實難兼顧即著左宗棠另撥一軍往彼駐紮肅清餘匪即可專意西征該大臣不得以無軍可撥致賊遂其乘虛之計牽掣我師刻下陝甘各回未必不意圖勾結穆圖善務當督飭將士將河狄各匪痛加勦洗以斷賊援並隨時與左宗棠金順等彼此熟商俾諸軍聲息相通迅殄羣醜杜嘎爾富勒琿等現抵何處仍著定安等隨時知照該處副都統等會合追勦用壯聲威 戊寅

上諭軍機大臣等左宗棠奏進勦甘肅南路竄回獲勝並進駐涇州籌

辦軍務各一摺河州逆回自成縣竄陷兩當經李輝武等進剿收復
縣城並將清水縣唐藏回匪擊敗吳士邁一軍復將秦安康坪堡回
巢攻破剿辦尙屬得手陝回散布黑城子預望同心各堡互相猜疑
甘回亦畏懼求撫惟回情狡詐反覆無常左宗棠務當酌度情形分
別剿撫以期一勞永逸劉松山一軍到花馬池後即飭相機前進毋
稍延緩郭寶昌軍現紮何處應否與劉松山合隊西行以資厚集著
該大臣酌量調遣毋置諸無用之地董志原竄回紛擾邊外及阿拉
善旗境著遵奉疊次諭旨派兵兜剿並飭雷正綰黃鼎兩軍迅由平
涼固原合剿北路逆回兼爲南路聲援左宗棠現已行抵涇州著穆
圖善即遵前旨將關防派員送交左宗棠接收前經諭令左宗棠接
篆後或前赴秦州一帶擇要駐紮本日左宗棠亦奏稱甘肅餉源恃
秦州一綫轉輸河州逆回專以斷官軍餉道爲主是秦州關繫尤爲

緊要該大臣駐涇州恐尙不足以資控制著仍遵前旨酌量移軍總
期力保完善兼衛省垣不得顧此失彼甘省餉絀營多左宗棠接篆
後即當妥爲籌畫竭力整頓務使兵歸實用餉不虛糜以維大局

八月戊午

上諭軍機大臣等左宗棠奏分道進剿布置情形一摺甘省北路兵力
已厚漸可肅清南路河州踞逆近無大股出竄蘭州運道漸已疏通
惟土匪張貴盤踞靜甯州屬威戎鎮等處聚衆甚多分擾靜莊會甯
各境此賊不除爲平涼秦州一大患左宗棠現調黃鼎簡敬臨等分
擣威戎鎮水洛城賊巢著即飭令迅速攻剿務將此股剋期殲滅毋
稍遷延其秦安神峪河另股回逆並著嚴飭吳士邁等實力搜剿俾
中路早日廓清庶兵力不至爲其牽掣陝甘逆回萃於平羅靈州中
衛一帶劉松山已抵花馬池著左宗棠飭令該提督剋日進兵並遵

前旨檄飭郭寶昌軍合力進剿節節掃蕩毋任日久蔓延邊外之賊雖經張曜等疊次擊敗而此時大兵進徧甯靈恐該逆以邊外爲逋逃藪據該督奏稱金順等馬步已行近磴口著金順聯絡張曜等軍勤加偵探遇有賊蹤務須實力堵剿杜其向東北奔竄之路並著該副都統將北路賊勢軍情隨時據實具奏甯夏防兵甚單如遇有警並著金順相機援應前因穆圖善奏稱南路軍情緊要諭令左宗棠酌量移紮秦州茲據左宗棠奏稱涇州爲適中之地可以兼顧南北即著暫時駐紮該處妥籌調度穆圖善即將總督關防迅速派員齎交左宗棠接受毋庸再行請旨該大臣接篆後蘭州省垣防務應交何人接辦或左宗棠卽赴省城駐紮以便居中調度之處即著酌度辦理儻有疎虞亦惟該大臣是問 九月己巳

上諭軍機大臣等景廉奏馳援安西賊匪東竄入關並由安起程赴任

甘肅新通志

卷首之五

十

一摺肅州收復後零匪時出竄擾安西州屬黑山橋村外堡突被越雖經趙壽汝等擊退而布隆吉爾等處時有賊匪搶掠西甯河州回匪又在上赤金堡滋擾由天津衛分股前竄景廉恐後路有失督隊馳抵安西該匪已東竄入關現在玉門所屬地方亦無賊蹤該大臣以哈密防務喫緊將靖邊各營交總兵張玉春駐守安西卽日起程赴任惟肅回一日不清則安敦玉三屬亦一日不靖現雖有各軍防守而無地方官約束難免不四出滋擾即著左宗棠穆圖善分飭該處鎮道及文武各官加意防範毋任時竄出關以 大局其籌辦口糧修理堡寨等事已經景廉劄飭張厚慶及各紳董趕辦該督等如可兼顧並著隨時督催俾免疏失景廉刻已抵任所有哈密防剿事宜著卽會同文麟妥籌布置其各路投誠回目現在情形若何亦著懍遵疊次諭旨彼此商辦不可掉以輕心成祿疊經諭令出關乃

日久遷延不進不知是何肺肝此時景廉已赴哈垣該提督若再帶兵前往自可倍壯聲威即著整隊出關合力剿辦並將起程日期迅速具奏如仍畏葸不前國法具在豈能爲該提督稍寬耶

十一月壬申

上諭軍機大臣等左宗棠穆圖善奏官軍疊剿河狄竄回獲勝左宗棠奏進駐平涼各摺片甘肅狄河回匪糾合陝回崔三等餘黨出巢肆擾經穆圖善派傅先宗進剿獲勝左宗棠又檄李耀南等軍敗賊於李家灣一帶斬獲甚多其甯夏南路回匪楊士恭句結陝回援應納王各寨又經金順張曜督軍迎剿疊獲勝仗剿辦均屬奮勉現在陝境肅清各匪已無立足之處勢必要挾甘回苟延殘喘如能將河狄各賊巢逐一攻破斷其黨援則剿撫皆易得手著左宗棠仍飭李耀南等及前派出之黃鼎各軍乘機進剿毋稍鬆勁一面嚴檄南路在

甘肅新通志

卷首之五

十一

防將士實力嚴防以免顧此失彼穆圖善亦當劄飭傅先宗等與陝軍聯絡聲勢迅掃逆氛納王各寨爲回逆負固之區仍著金順會同張曜迅圖攻拔毋任憑險死守阻截官軍 十二月乙巳

上諭軍機大臣等左宗棠穆圖善奏東南各路官軍剿回疊勝左宗棠奏遵旨覆陳各一摺提督楊世俊等軍將陝回擊敗西竄自十月十九日至十一月初十日在固城清水驛紅土窯等處分軍進剿殺賊甚多並生擒賊目正法其分擾東路之逆目馬油布亦經陣斬現在各逆窮蹙北不能通金積堡之援西不能與河州遽合左宗棠等已令周開錫將南路諸軍覈實歸併分布鞏秦一帶並令黃鼎等軍雕剿回土零匪即著檄飭各該將領偵探賊蹤痛加剿洗一俟北路稍定即由中路掃蕩而前毋稍鬆勁左宗棠現在駐軍平涼策應各路並派黃鼎等分布隆德靜甯會甯安定一帶雖與蘭州聲息相通而

會垣防守事宜亦不可稍形疏懈穆圖善著懍遵前旨暫駐省城就現有兵力督同司道各官妥籌保衛左宗棠仍當隨時兼顧其石成器一股即著飭令蕭宗幹等會同王仁和妥爲安插並將秦望川等處屯政趕緊料理北路之劉松山等軍並著催令前進以期節節疏通河州爲甘回負固之區必須破此巨巢方可迎刃而解著左宗棠察看情形如兵力足敷勦辦即行督軍前進以竟全功 乙丑

上諭軍機大臣等穆圖善奏賊匪阻擾運道疊經官軍擊勦袁保恆奏歸併協餉請旨飭遵各摺片甘省西路回匪在李家窯地方搶劫糧運又於三子溝一帶攻掠民堡經提督劉定邦督隊疾追斃賊多名其竄擾石門溝青沙嶺小川賊匪亦經分防各營擊退古浪運省牲畜突被馬賊搶去統領張萬美等在黑松驛等處將賊擊敗入山穆圖善現擬將糧路改由大靖土門一帶行走並分軍擇要駐守著即

甘肅新通志

卷首之五

十一

檄飭張萬美等實力堵禦以利轉輸一面飭令薩英阿嚴扼金縣杜賊東竄之路西路平番古浪一帶爲甘垣運道所關此時各匪乏食希圖搶掠軍糧疲我兵力非得大軍進剿省防仍屬可虞左宗棠前派之黃鼎等軍現已行抵何處該大臣駐軍平涼於省城聲息亦可相通即著嚴飭黃鼎等各率所部確探賊蹤會合追剿不可稍涉遷延 九年庚午正月戊寅

上諭軍機大臣等文麟景廉奏肅州已撫回匪仍行出關擾害並敦煌玉門稟報回匪滋擾情形各摺片據稱肅州回匪經成祿收撫後仍不時糾衆出關搶殺行旅擾害地方各路防兵因該回持有肅州鎮道傳牌印文不敢盤詰以致該回肆行無忌上年九月間疊在紅柳園大泉等處搶劫軍糧殺害押運官弁又攻破蹋實堡城橋灣等處任意焚掠其成祿派出之回員李進三等復在敦煌玉門境內搜索

糧石搶殺橫行關外民不聊生大局岌岌可慮等語回匪狼子野心非約束嚴明斷難日久安帖本日已諭令成祿將回員李進三迅即撤回惟肅州已撫之回不能設法彈壓則回民積仇愈深勢將變生不測關外大局不堪設想著左宗棠迅派妥員馳往肅州查明實在情節嚴飭該鎮道派兵彈壓力圖補救並約束回衆毋再給文出關前諭成祿將所部勇丁嚴加裁汰奏聞聽候諭旨迄今未據覆奏何以此時忽派員在各屬索糧滋事著該大臣確查成祿近日情形如帶兵不能得力徒事騷擾地方即著據實奏參至關外久遭回逆蹂躪幾至不可收拾烏魯木齊等處一片賊氛巴里坤哈密二城僅存時有防不勝防之勢儻日久大兵不能出關巴哈二城力難撐拄其患不可勝言成祿帶兵如果不能得力關外應如何布置有無兵勇可以抽撥揀派得力大員先行統帶出關駐紮巴哈二城扼要之處

甘肅新通志

卷首之五

十三

藉壯聲威使回逆不能肆行窺伺著左宗棠統籌全局隨時具奏以慰廛繫 四月丁未

上諭軍機大臣等金順奏中衛防軍疊次剿賊獲勝一摺炭山等處竄匪經黃金山擊退後復有河州回逆竄至北沙窩一帶又經該總兵沿途追殺餘逆由沙坡根渡河逃竄即著金順飭令中衛地方文武實力防守不可再令賊蹤竄入並飭黃金山隨時偵探如有股匪滋擾卽行帶隊擊剿盡殄逆氛王家疇回匪乞撫後繳出馬匹器械甚少該匪心懷疑懼亟應加意防維並著金順與張曜隨時會商相機辦理如該匪真心投誠不妨予以自新儻因官軍圍剿甚急故作緩兵之計卽當乘機進剿不可墮其奸謀甯夏至磴口石嘴一帶近日有無賊蹤竄及糧運是否疏通隨時具奏

上諭軍機大臣等左宗棠穆圖善奏官軍截剿甘南逆匪暨分剿河狄

回股獲勝左宗棠奏湘皖兩軍攻破賊壘並截剿自陝回竄逆回疊勝及節次剿辦客土逆回情形各摺片甘南徽兩等處竄回經湯聘珍各軍先後擊敗而賊之前隊竄至甯州又經魏光燾追擊擒斬甚多陝回禹得彥仍由鹽茶廳一帶竄走其西竄之崔三一股由隴州竄張家川後復由秦安北竄至莊浪隆德之間左宗棠已調徐文秀等率隊追剿惟現在各路回股每於陝甘交界處所東奔西竄牽掣官軍而甘之河狄尤爲逆衆逋逃之藪左宗棠穆圖善務當檄飭甘陝各軍分投進剿迅將禹得彥崔三各逆設法殲除以孤賊勢金積堡踞回疊經官軍痛剿勢甚窮蹙二月二十日後劉錦棠等軍又將山水溝賊壘三座暨王銀棚賊壘攻破馬化澂復設詞乞撫該逆詭譎異常現當圍困糧盡正可乘機計取著左宗棠即飭劉錦棠等酌量情形妥籌剿辦毋爲該逆所給馬阿渾等股因爲陝軍剿敗回竄

甘境魏光燾等於打家河毛渠井等處痛加剿擊所贖逆黨無多仍著左宗棠分飭魏光燾等跟蹤追剿迅速殄除毋任該逆苟延殘喘固原鹽茶及環慶各處客土回匪節經周紹濂等剿擊實足大挫兇鋒惟該處山谷盤互回民種類亦繁左宗棠務飭在事文武時加搜緝剿撫兼施毋任匪徒乘機煽惑以消隱患 七月庚寅

上諭軍機大臣等左宗棠穆圖善奏南路官軍克復城堡左宗棠奏北中兩路官軍剿賊疊勝現籌會攻金積老巢各一摺甘肅南路官軍克復渭源狄道城池並攻拔弁佛諦堅堡正可乘此聲勢進規河州左宗棠等以自秦州至狄道計程四百餘里中隔渭源等處一片荒蕪必須節節設防保護運道方能前進察看河州賊勢應俟甯靈肅清由蘭州出兵方能得手固係持重之見現在北路各軍已將靈州一帶賊寨攻破多處軍務自有起色則進剿河州之兵此時卽當妥

爲部署著左宗棠穆圖善悉心商酌以期迅掃賊氛靈州迤西至金積堡僅存賊堡十一處王楊等逆伏誅賊衆無糧可攜勢已窮蹙著左宗棠飭令劉錦棠等迅將胡家堡等處攻拔盡殲醜類中路官軍疊克馬家河灣韋州堡等處金積堡南路關鍵已爲我得左宗棠務當檄飭黃鼎會同雷正綰總統中路諸軍先將峽口要隘奪回次第勦平金積堡迤西各堡寨並與劉錦棠等約期會勦迅克金積等堅巢以振全局毋稍鬆懈 八月甲辰

上諭軍機大臣等左宗棠穆圖善奏各軍勦賊獲勝情形一摺甘省駐紮鎮番金縣北山阿干鎮等處官軍分投雕勦賊股均獲勝仗尙屬得手惟回逆醜類繁多肆行竄擾必須各路一體探蹤截擊方不至伺隙奔突勢成蔓延著左宗棠穆圖善督飭各營統領勤加偵探遇賊即擊並隨時認真防範以遏賊氛河州尙有回衆十萬餘人並駐

甘肅新通志

卷首之五

十五

紮陝回二萬餘回目馬占鰲有八九月間欲與官軍打仗之說亟應先事豫防左宗棠等務當悉心布置毋爲該逆所乘其附省各營即著穆圖善妥爲調度以備不虞 十月戊午

上諭軍機大臣等穆圖善等奏陝回竄撲平番屬城勦辦情形一摺陝回禹生彥崔三兩股由河州竄擾平番屬境經駐防該處之南字左右兩營迎勦於沙溝地方接戰失利統領張萬美等均歿於陣該逆直撲縣城豫師督兵守禦賊向東北山溝遁去穆圖善親率馬隊馳抵免窩督勦將賊擊敗殲斃甚多此次賊匪乘虛出擾勢頗猖獗現在雖已遁回河州老巢惟賊蹤出沒無常必須隨時加意防範南字營現已併歸叅將李正魯統帶而兵力尙單豫師駐紮平番務當督率在城文武妥籌防守該辦事大臣新立之營亦當認真操練以資得力穆圖善擬令署莊浪協副將鍾本起招募五百名著即飭令訓

練成軍將城守事宜嚴密布置其南大通沙溝口及北十里鋪等處並著分撥官兵扼守以杜紛竄穆圖善現已回省如西路有警仍當隨時調度力籌防剿左宗棠身任欽差大臣於甘肅全省軍務均應妥籌兼顧不得以遠在西隅置爲後圖土門及武威縣屬王家臺等處有匪竄擾著左宗棠穆圖善迅飭王仁和等督軍截剿毋任蔓延

十二月己巳

上諭軍機大臣等本年十月間突有賊匪四千餘名撲陷烏里雅蘇台據張廷岳等探明係屬肅州回股該匪徒現已沿途飽掠仍回肅州若不將醜類悉數殲除大爲沿邊之患臺站遼闊賊蹤來去自如本年春夏間時有零股竄擾察哈爾庫倫烏里雅蘇台之事至冬間竟成大股竄陷烏城是肅州出邊滋事者實繁有徒肅州一帶賊巢正復不少成祿辦理肅州軍務未能一律肅清以致匪徒充斥蹂躪地方亟應趁此賊股回巢痛加剿洗及早鏟除儻任伏莽潛藏乘隙再逞必又掣動內地兵力成祿本令暫駐關外就近兼顧肅州著即振刷精神迅將該處賊巢掃除淨盡務絕根株左宗棠亦當統籌全局撥兵會剿不准稍存膜視再據張廷岳等奏探聞有賊千餘在烏喇特地方游弋圖擾甯夏糧道並著左宗棠隨時知照定安金順勤加偵探妥爲防範

甘肅新通志

卷首之五

十六

十年辛未正月壬辰

諭軍機大臣等定安金順奏攻克王瞳賊巢殲除首逆一摺河西王瞳賊巢壘堅賊悍經金順會同張曜督飭將士奮勇進攻疊敗援賊茲復於上年十二月十三日攻克堅巢先後殲斃逆酋多名悍賊八九千名於天寒餉絀之時建此偉績甚屬可嘉王瞳已下其河西附近各堡自應乘勝進攻著金順會同張曜分軍扼紮要隘一面調治受傷士卒整頓器械先籌辦東北各堡節節掃蕩至通昌通貴各堡前

據左宗棠奏馬化澂投降後籌辦撫局並著金順隨時咨商左宗棠如該堡回衆陽奉陰違仍著該署將軍督兵進剿毋稍遲回致墮奸計現在甯靈一帶已無陝回蹤跡所有招集流亡拊循瘡痍一切善後事宜必須實心任事之員認真經理甯夏道府州縣各官能否勝任著左宗棠隨時訪察並遴選賢能守令將地方應辦事務悉心籌畫止分良莠不問漢回務令彼此相安毋任尋讐啟釁左宗棠前奏余彥祿一股已繳械投誠余彥祿亦受傷垂斃並著左宗棠飭令劉錦棠等妥籌安插毋令餘燼復燃余彥祿刻下究在何處著即查明具奏甘省北路軍務得手恐敗逃餘匪乘隙肆竄或西竄甘涼或北出邊外著左宗棠穆圖善派兵分投截剿並著定安督飭纏金磴口各軍嚴密偵探遇賊即擊毋稍鬆勁 一月壬戌

上諭軍機大臣等左宗棠等奏平毀金積堡賊巢安插陝西撫回李德

甘肅新通志

卷首之五

十七

昌前赴河州諭撫回衆東西兩山捕斬要逆各摺片金積堡首要各逆馬化澂等均已伏誅甯靈肅清本日已明降諭旨將左宗棠等及出力各員分別加恩獎勵矣化平川安插陝回各事宜左宗棠所籌均臻周妥惟回俗素畏頭目而誦經祈福之阿渾尤易蠱惑愚蒙著該大臣慎選地方官隨時化導加意拊循務令各安生業以免再滋事端東西兩山及會甯安定等處最爲藏奸除已擒斬要逆多名外其未獲逆目狗齒牙子等該大臣卽嚴飭魏光燾等認真搜捕毋任一名漏網李德昌求赴河州諭撫馬占鰲馬尕大及崔禹等逆左宗棠現令李德昌前往但聽其自投不許招致該大臣總當察看該逆等虛實情形穩慎以圖如該逆仍怙惡不悛務當嚴飭各將領乘此軍威進剿河狄西甯各逆巢以次蕩平毋得一意主撫致爲該逆所給穆圖善亦當檄飭近省各軍聯絡聲威俾得膚公早奏近聞周開

錫在南路勦匪辦理一切輿論未協且與甘省各勇營不相輯睦恐激事端左宗棠當隨時查察不可信任過專致誤事機現在鞏秦各屬有無大股賊匪北路旣已肅清該大臣應進紮何處抑赴省垣居中調度如統師前進後路尤當妥爲布置並著蔣志章會同劉銘傳將陝甘毗連各要隘嚴密扼堵毋稍疏虞 乙丑

上諭軍機大臣等前因周開錫辦理甘南軍務恐不得力諭令左宗棠隨時查察毋誤事機並令查明鞏秦各屬有無大股賊匪當此北路肅清南路防勦事宜甚關緊要朝廷實深廛繫近聞河州賊匪三千有 已於去臘潛越洮河竄至岷州與官軍接仗復竄鞏昌阜陽川一路向東分股肆擾距秦州數十里之平南川娘娘壩鹽關李子園等處時有賊馬搶劫殺傷百姓岷州叛勇仍與官軍相持抗未就撫似此情形軍務尙無了日鞏秦爲甘省完善之區前此並未大遭蹂

躡乃自周開錫總統南路諸軍旣不能禦外來之匪任其奔突又激變范銘之勇致與官軍爲仇長賊勢燄若不及早廓清又成燎原之患著該大臣乘此北路肅清迅將南路鞏秦一帶悉力布置盡殲醜類范銘現在何處其所帶勇丁有不法者亟應嚴懲有可用者即應留以勦賊並非楚勇之外皆爲不可用之勇且楚勇中亦未必無他省之勇丁參雜其間所有范銘營勇應如何分別措置之處該大臣當秉公辦理毋得誤聽一面之辭以致僨事 四月乙亥

上諭軍機大臣等左宗棠奏南路官軍截勦竄匪獲勝一摺河州回匪分竄鞏秦各屬疊經官軍擊敗逆首張運澂沙母驢子等均斃於陣匪黨殲除殆盡另股回匪由成縣擾及階州亦經鄧光耀等擊退此次由安定南犯之賊不過千餘而分支狂竄勢頗慍悍誠恐該逆先以小股嘗試繼將大股出竄以圖一逞左宗棠現調劉明登所部八

營進紮馬營監以向安定徐文秀撥所部四營由靜甯州延紮會甯並挽運軍糧以規進取著即妥籌布置剋日進兵以期節節掃蕩前據左宗棠奏稱撫回李德昌求赴河州曉諭近日該處情形究竟若何該大臣務當相度機宜速籌攻剿斷不可任其觀望遲回致墮緩兵之計金積堡收復後北路有無餘孽潛藏應否留兵駐紮並如何調派各營分投西進之處均著詳悉奏聞 壬午

上諭軍機大臣等豫師奏籌辦西甯軍情等語西甯回衆頻年詭託就撫勾結外匪四處焚殺豫師以兵力不足驟難進攻暫擬鎮攝羈縻解散脅從以孤賊勢所籌尙爲因時制宜之計現在金積堡賊首馬化澂等業已伏誅羣賊自必聞風喪膽左宗棠即應乘此聲威調派各軍規取河州等處兵貴拙速不貴巧遲諒該大臣全局在胸必已熟思審計迅速籌辦豫師業已函商左宗棠移軍狄河時豫爲分兵

甘肅新通志

卷首之五

十九

西進以便抽軍進紮著左宗棠斟酌情形隨時與豫師妥籌辦理刻下西甯回情漸已斂跡窩藏陝匪亦陸續西竄豫師仍當察度軍情拔隊前進相機剿撫不得徒託空言久延時日 己卯

上諭軍機大臣等穆圖善豫師奏擊退平番竄匪會商布置情形一摺甘肅平番縣境於本年二月間有肅州投誠陝回一千數百名由成祿派員護送前往米拉溝據原解委員聲稱定期十日仍由米拉溝折回赴肅乃逾期仍未折回忽報米拉溝有陝賊多人四出殺掠復於金家泉等處滋擾先後經豫師派兵擊剿斃匪甚多該匪現已分竄入山即著豫師飭令派出各營分投搜捕認真扼堵務將此股賊匪悉數殲除平番防勇無多並著左宗棠穆圖善抽調勁旅協同防剿以資厚集原赴米拉溝陝回尙未折回現在滋事之匪是否即係此項回衆且該陝回等現須在肅安插何以先送至米拉溝旣須由

米拉溝折回肅州何以原解委員又不在平番守候其辦理詳細情形何以不先期知照穆圖善等著成祿據實奏聞並一面妥爲辦理毋令貽害地方甘涼一帶該將軍等已飭楊占鼇王仁和一體防範即著隨時檄令該提督等認真扼守不可稍涉疏虞碾伯一帶賊股亦當檄令巴札果莽等處團勇合力兜捕保衛地方 五月庚寅上諭軍機大臣等前因金積堡克復後疊經諭令左宗棠將如何移營進剿之處妥籌布置近聞河州回股於四月初間竄擾兩當徽縣一帶旋向西去十六日隆德縣知縣周其俊會同馬隊遇賊於馬廠野雞峴地方接仗陣亡隆德固原一帶匪蹤出沒無定兼之叛回馬彥瀧黨衆四百餘騎潛伏其間並聞另股回匪在秦州西六十里鋪剽劫攻破管子鎮以南民堡一處經官軍追擊於初八日至禮縣所屬長道鎮地方接仗挫敗十四日又有回匪千餘騎竄擾娘娘壩高橋

甘肅新通志

卷首之五

二十

延擾牡丹園等處秦州北鄉鹽合城地方亦有賊蹤紛擾此股回匪約有三千餘衆由河州潛渡洮河長驅東下現在盤踞甯遠縣屬之馬塢新寺一帶分股四出以擾後路糧道似此情形賊勢甚爲猖獗著左宗棠將近日軍情確切查明具奏前據奏稱調派劉明登等所部分向安定靜甯等處挽運軍糧以資進取諒該大臣必已全局在胸速籌辦理第恐所部將士或因金積旣克北路掬定遽爾志驕意滿漸形懈弛甚至觀望遷延不遵調遣此等軍營惡習亦難保其必無現在河州賊勢方張正當激勵諸軍鼓行而西滅此朝食斷不可翫時愒日坐失事機仍著將如何籌辦情形迅速奏聞以慰廛念

戊申

上諭軍機大臣等金順奏甯夏回務已竣現籌分兵布置一摺甯夏爲北路巖疆刻下雖臻靜謐而西路賊氛尙熾自應分布設防以資捍

衛金順會商張曜分派各隊扼紮磴口橫城等處所籌尙屬周密金順起程後即著張曜督飭派出各軍嚴密防剿毋稍疏虞河西三縣投誠之回均已造冊交地方官編立保甲妥爲安置其附逆之徒並由受害漢民指名控告者亦經金順等搜獲正法至四百五十餘名之多該回民經此痛剿自當懷德畏威不至再生反側惟附近漢民亦不得有意尋仇致成釁隙本日明降諭旨一道著張曜刊刻謄黃徧行曉諭俾回漢永遠相安以副朝廷一視同仁至意阿拉善旗地方既有西來竄匪搶掠牲畜之事張曜務當飭令馬步隊伍迅往防剿毋任蔓延花馬池一帶亦有匪蹤出沒左宗棠當檄飭東路官軍實力剿捕張曜仍妥籌兼顧毋稍疏懈河州等處逆燄方張左宗棠總當激勵諸軍鼓行而西滅此朝食豈可頓兵不進致軍心懈弛將士思歸以勝兵而轉成暮氣該大臣自金積堡克復後久未據報進

甘肅新通志

卷首之五

二十一

兵機宜實深塵繫著懍遵疊次諭旨迅將籌辦情形據實具奏不得粉飾遷延致誤大局 六月己巳

上諭軍機大臣等左宗棠穆圖善豫師奏陝回句結西甯回族滋擾派兵堵剿一摺陝回分竄西甯攻撲高寨威遠等堡擾及高羌堡董家寨一帶經總兵黃武賢派隊堵剿疊獲勝仗惟逆首白彥虎率黨攻陷小南川漢堡踞爲巢穴崔三一股仍踞曹家堡分黨潛伏高寨禹生彥股衆與爲犄角並有金積堡敗匪竄至與西甯回民聯爲一氣河州回目馬占鰲等亦率撤回攻陷民莊西甯回族就撫本不足恃現在外匪紛至與之句結勢恐蔓延穆圖善現已檄令黃武賢率領三營會同豫師原駐威遠營勇調集西碾各路團丁相機堵擊即著督飭派出兵團認真剿辦毋任賊勢鴟張西甯地方賊股充斥豫師兵力既單穆圖善駐省各營勢又不能遠調左宗棠當統籌全局迅

即撥隊馳往助剿痛埽妖氛其應如何籌辦布置並現擬進紮何處河州回巢應如何分路進兵攻剿均著詳細具奏赴滄道路雖梗豫師仍當設法剋期進兵不得濡滯中途以重職守穆圖善另片奏未能撥兵兼顧西路等語甘省北路雖漸肅清而敗殘餘匪竄向河州西甯等處陸續由甘涼遁入肅州若左宗棠進兵規取河州賊勢窮蹙必以西路爲逋逃藪自應添撥兵勇扼守西路方足制賊死命穆圖善所部保守省城護運糧石未能移調前往自係實在情形甘涼兵力過單難資扼剿左宗棠統轄全省西路應早籌及仍著迅速撥兵協剿毋得稍涉遷延致滋貽誤穆圖善亦應督率近省各軍隨時扼剿竄匪與左宗棠和衷商辦不可稍分畛域 壬午

上諭軍機大臣等左宗棠奏南路官軍剿除竄回餘衆攻拔階州匪巢現籌進兵事宜各摺片成縣任家莊匪經總兵蘇家良搜剿投誠

甘肅新通志

卷首之五

二十一

者三十人著左宗棠飭令蘇家良妥爲安插毋令再滋事端此外有無伏莽仍著認真搜捕毋留餘孽階州縉匪經副將彭德沅等率隊圍攻疊破賊巢惟段侍才瞿煥周在逃未獲該大臣當飭彭德沅等實力查拏盡法懲治賊供既有段逆赴陝瞿逆赴川之說著左宗棠咨照吳棠蔣志章飭屬一體協緝毋任漏網中衛鹽固一帶時有游匪出沒徽兩西禮等縣亦有伏匪伺劫運道左宗棠即飭派出各軍嚴密掩捕以淨根株現在該大臣規取河州分中左右三路進兵布置尙屬周密左宗棠擬赴靜甯安定督剿即著督飭傅先宗等軍分道前進實力埽蕩毋任河州逆匪日久盤結惟河州一經進兵恐該逆被剿窮蹙勾結西甯回衆紛竄甘涼等處該大臣於西路一帶尤宜妥籌兼顧以免匪勢蔓延 八月己未

上諭軍機大臣等左宗棠穆圖善豫師奏碾伯剿匪獲勝南川被匪竄

擾左宗棠穆圖善奏堵擊西甯賊匪各摺片陝匪崔三等竄擾碾伯之勝番溝等處並撲碾城經官軍連日進剿將賊擊退平戎一帶肅清剿辦尙爲得手該逆全股焚壘而遁究竟竄往何處著左宗棠穆圖善豫師嚴飭各軍探明賊蹤合力搜捕務絕根株逆首崔二是否實係擊斃該大臣等確查具奏西甯竄匪四出竄擾窯洞等處雖疊經擒斬匪勢仍屬蔓延左宗棠等務飭派出官軍分投剿辦迅掃逆氛並檄飭總兵黃武賢嚴密布置務將威遠一帶完善之地妥籌保全至金縣平番及省城附近各隘著穆圖善飭令帶兵將弁實力巡防毋稍大意成祿在肅州收撫陝回潰叛東下甘涼二府戒嚴著左宗棠穆圖善卽飭王仁和等加意防剿如兵力尙屬不敷並著左宗棠酌量撥兵策應西甯南川一帶村莊時被賊匪焚掠豫師以兵力難分已函商左宗棠撥軍助剿卽著該大臣酌撥得力隊伍前往協

助豫師卽飭練總張煥奎先行派隊救援以資保衛甯靈一帶雖經肅清惟聞甘涼回匪勾結西甯漢回屢擾平番古浪等處日久無可掠食或由古浪之大靖土門越中衛而出邊或由鎮番竄出邊外肅州之回亦時由金塔寺出邊竄擾若不豫籌堵剿恐各匪紛紛北竄必至滋蔓難圖刻下大軍進規河州若以一軍分紮鎮番金塔寺等處斷賊出邊之路以一軍駐紮平番扼西甯賊匪出竄兼顧秦旺川糧道俾大兵專力河州免致牽掣似於局勢較爲周密著左宗棠酌量情形妥籌辦理 丙寅

上諭軍機大臣等左宗棠覆奏遵派提督徐占彪所部十二營由靖遠取道蘭州前赴肅州實能力顧大局該軍旣堪當一路之寄著卽飭令迅速前進不得因有劉銘傳屯紮肅州之旨稍涉遷延一面咨催成祿先行部署一俟徐占彪到後卽令成祿拔隊出關並將起程日

期奏聞肅州防勦事宜即責成徐占彪妥爲籌辦將來劉銘傳到肅後亦可商同布置本年正月閒據奎昌等奏稱綏來等處民團可用當諭左宗棠或派員出關或飭口外鎮道妥籌安撫該大臣究竟如何籌辦儻所派之員因道路梗阻未能西行即可隨同徐占彪大隊赴肅並與成祿一同出關將該處民人加意撫綏務使各團樂爲我用以收指臂之效 九月庚子

上諭軍機大臣等豫師奏籌防甘涼肅一帶情形等語豫師接奉前旨籌防要隘所稱自平番至武威縣各隘口分投防堵賊匪不能由此出竄是已確有把握即著責成豫師妥爲布置不得徒託空言至由巴燕戎格山後可達西甯之大通出扁渡口即係永昌山丹鎮番地界賊如繞竄此路則甘涼轄境均被騷擾亟應加意嚴防豫師已知照王仁和楊占鼇等力扼要紮以備不虞仍著會商瑞雲隨時防範

甘肅新通志

卷首之五

二十四

務臻周密不可稍有疏懈肅州收撫陝回潰叛東下甘涼戒嚴西甯匪徒亦四出竄擾西路幾成賊藪豫師未可以屢挫賊鋒稍存大意尤宜相機戒備以衛地方左宗棠仍當懍遵前旨撥兵助勦並著穆圖善妥籌兼顧 辛丑

上諭軍機大臣等張曜奏遵辦甯夏沿邊及阿拉善旗防勦情形一摺阿拉善旗西界紅柳園等處地方時有馬賊竄入搶奪牲畜另股賊騎復突竄胡莫克巴音諾爾根等處肆擾雖經官軍迎勦擒斬多名惟該旗地方遼闊平坦無險深恐防範難周張曜已添派李葆珠帶隊前往即著飭令該提督將竄入該旗匪股迅速勦捕淨盡毋任滋蔓至甯夏河西三縣投誠回衆與漢民雜處尤慮藉端尋釁復滋事端張曜業經酌擬章程咨商左宗棠督飭地方官覈辦所有撫綏彈壓各事宜仍著該提督隨時相機辦理毋稍大意左宗棠現在進勦

河州難保該逆不伺竄北路並著該提督先事豫防隨時與定安籌商布置以期周密自甯夏沿邊迤北一帶道路縣長如平羅中衛靖遠平番古浪鎮番之大靖土門金塔等處匪徒處處可以出邊滋擾亟應設法嚴防著該提督遴派明幹員弁將甯夏至肅州沿邊一帶口隘由近而遠確切查明何處賊匪可以出竄何處可以扼要設防繪圖貼說詳細奏聞 丙辰

上諭軍機大臣等成祿奏肅逆東竄官軍堵截獲勝並該逆分股出關情形一摺肅回東竄高臺撫彝一帶經成祿派兵堵截斃賊百餘人復密飭兵勇遏其歸路又斃賊數十名該逆遁歸肅巢分股出關一向西竄往安敦玉等處一由北套竄去成祿現咨綏遠城將軍檄飭各臺豫爲堵禦一面飛飭關外三營相機截剿即著該提督嚴飭各軍勤加偵探遇賊即擊保衛民生毋稍疏懈逆股旣竄向北套深慮

擾及草地復肆蔓延著定安檄飭在防兵勇實力堵遏並將阿拉善旗各臺站妥籌防範毋稍疏虞張曜現駐甯夏並著分撥隊伍確探賊蹤攔頭截擊盡殄逆氛左宗棠仍催徐占彪迅赴肅州將該處賊巢一律掃蕩淨絕根株庶關外地方不至再遭蹂躪於大局實有裨益 十月戊午

上諭軍機大臣等文麟景廉奏肅州回匪撲進安西州城立時擊退並賊擾敦煌縣境各摺片肅州回逆屢竄出關七月初二日撲入安西州城當經該城文武及駐防該處之提督張玉春等督率弁勇登時擊退該逆雖經東竄難保不去而復來著文麟景廉督飭該城文武實力防剿以杜窺伺其竄擾敦煌之賊經李天和等於秦安坊地方擊敗該縣四鄉被賊蹂躪情形可憫著文麟等妥爲撫恤毋使失所並著飭令在防官軍遇有賊蹤竄近迅速堵剿力遏狂氛現在賊匪

紛竄關外安敦玉等處均形喫緊若不速籌掃蕩恐哈密後路漸致梗阻成祿一軍本應出關著即先派數營前赴嘉峪關扼紮以防賊匪出竄一路一而飭令關外二營隨時截剿力保完區 壬申

上諭軍機大臣等據景廉奏遵旨籌畫進兵一摺景廉進規烏魯木齊因哈密僅有馬步隊三營將後路駐防三營調赴哈密由巴里坤向西進發其安西敦煌兩處即由文麟分兵駐紮以資防守安敦玉等處爲巴哈東路聲援現在屢被肅回竄擾茲又將駐防三營拔赴前敵文麟亦未必有兵可撥後路益形空虛殊屬可慮本日已諭令成祿剋日帶兵出關以資厚集第念肅州一帶必須有兵填紮方足截回氛之西竄壯關外之聲威著左宗棠懍遵疊次諭旨檄催徐占彪一軍迅赴肅州將該處賊股力籌剿辦毋任紛竄烏魯木齊爲逆回老巢醜類甚衆阜康亦爲賊踞勢成犄角景廉所部僅三千人益以

甘肅新通志

卷首之五

二十六

成祿一軍兵力仍形單薄必須另添勁旅扼紮關外庶可聯絡聲勢前經諭令曹克忠接統劉銘傳所部淮軍拔赴肅州將來此軍抵肅若令徐占彪率隊出關分紮安敦玉等處足爲景廉等後勁並著左宗棠斟酌情形豫爲籌畫毋誤事機 十一月癸巳

上諭軍機大臣等左宗棠穆圖善奏官軍攻破賊壘疊獲勝仗一摺覽奏欣慰此次左宗棠等督軍渡洮連戰大捷蹋毀高家集等處賊堡斬馘萬餘並將三甲集巨巢攻拔軍威丕振賊膽已寒辦理極爲得手惟由三甲集以西至泰子寺賊壘林立其眷屬死黨均聚集大東鄉負嵎抗拒亟宜乘此聲威節節掃蕩左宗棠已飭令傅先宗等先攻七甲集各壘卡直擣泰子寺再回攻大東鄉與諸軍分道並進調度甚合機宜著即激勵各軍剋期前進盡殄逆氛以竟全功另片奏中南兩路官軍剿賊情形亦均得手現在中路平慶鹽固一帶已就

肅清馬彥濬等逆竄併河州大東鄉一帶正可乘勢兜圍聚殲醜類毋令四出蔓延另片奏回目具稟投誠等語崔三禹得彥等悔罪投誠原可網開一面惟必須責令直擣河州與賊接仗立功方准收撫此中操縱機宜該大臣等務當妥爲籌畫毋稍疏虞其投誠之陝回楊文彥及葑臺堡回目馬應林等應如何妥爲安插之處並著察看誠僞相機辦理 己亥

上諭軍機大臣等張曜奏查明沿邊一帶口隘繪圖呈覽一摺據稱肅州之金塔一帶邊牆間有坍塌平番之裴家營古浪之大靖土門及甘涼南山各口均可通達邊外陝回崔三等股勾串西甯肅州土回分股竄擾人數頗衆是甘省西北一帶賊蹤出没靡定實爲沿邊之害現在大軍由三甲集等處進剿恐河州之賊勢窮紛竄西北一帶愈形喫重左宗棠務當通籌大局豫爲防範肅州回衆時竄玉門安

甘肅新通志

卷首之五

二十七

西等處著檄令徐占彪抵肅後將該處防剿事宜速籌布置以通出關之路阿拉善旗紅柳園等處現在無有竄匪著張曜飭令李葆珠等認真截剿以清餘孽北路沿邊口隘並著隨時偵探嚴防毋稍疏懈 十一年壬申三月丙戌

諭軍機大臣等左宗棠穆圖善奏官軍疊攻泰子寺情形並西甯土客各回求撫現籌辦理各摺片甘南官軍進攻泰子寺賊巢兩次失挫傷亡將士多至二百餘人覽奏曷勝憤懣辦回之法原應剿撫兼施惟須大加懲創後網開一面使知畏威懷德方爲一勞永逸之計此次官軍疊次失挫賊勢方張忽復遣黨投誠難保不首鼠兩端陰懷詭計現在雖已陸續呈繳馬械左宗棠仍當察看情形妥慎籌辦以免後患所有新調各軍著飭與前敵諸營聯絡一氣嚴爲戒備毋爲奸回所乘西甯土客各回及陝回崔三等均各乞撫是否出自真心

並著左宗棠穆圖善豫師督飭道員馮邦棟前往察看相機妥辦毋稍遷就 辛丑

諭軍機大臣等張廷岳阿爾塔什達奏口外竄匪不靖敬陳管見一摺邊外地方遼闊賊匪不時出竄避兵而行屢次飽掠遠颺均未能跟追兜剿蠢茲小醜竟至來去自如若不先事圖維制其死命勢必乘虛再犯迄無了期張廷岳等請於土爾扈特貝勒遊牧等處駐紮馬步精兵二三千名扼要設防遏其竄路烏科庫倫等處可保無虞於地勢賊情是否可操勝算杜嘎爾帶兵出口剿賊自必熟悉情形即著酌度機宜會商張廷岳等妥籌辦法迅速奏聞至賊匪老巢多在肅州甘州一帶根株不淨則滋蔓難圖著左宗棠嚴檄徐占彪迅將肅州賊匪盡數蕩平並另派得力將領酌帶勁旅前赴甘州殄滅賊股總須犁其巢穴就地殲除斷不可任其敗竄出邊致滋紛擾

甘肅新通志

卷首之五

二十八

四月戊午

上諭軍機大臣等景廉奏二起官兵拔隊西進肅逆竄陷瓜州援軍失利各摺片景廉所部靖邊前營現已拔赴古城所有駐紮哈密各營仍著督催前進以資厚集金順尚在包頭一帶未據奏報起程其吉爾洪額所帶馬隊早經拔隊現已行抵何處仍著奎昌志剛多布沁扎木楚常順保英查明飭催速赴奇古一帶聽候調遣孔才所統各營本係烏合之衆人心不無參差惟刻下西路軍務與其遠調官兵難期應手不若就地取材較爲便捷景廉務當曉以大義妥爲駕馭俾其踴躍用命以壯聲威回匪與安集延旣構釁未已亟應整頓隊伍設法進取榮全前議挑選索倫等項人衆會合鄉團規取瑪納斯等處不爲無見仍著榮全察看情形妥籌辦理肅州回匪竄陷瓜州署安西協副將柳致勝援剿失利爲賊所掠用銀贖回殊堪痛恨著

交部嚴加議處近時關外賊勢若何安西等處城防緊要文麟當隨時兼顧派兵援剿毋稍疏虞 庚申

上諭軍機大臣等左宗棠奏河州撫局漸可就緒並現在辦理大概情形等語河州回目馬占鰲等已呈繳馬匹器械自限半月悉數完繳再請委員察驗米拉溝回衆亦思就撫昨據豫師奏報已諭令該大臣等妥慎籌辦甘省回族衆多情形狡譎現雖乞撫是否真心悔罪尙不可知且議撫後必須措置咸宜使彼族輸誠悅服方免滋生事端該大臣總當籌畫萬全慎益加慎斷不可掉以輕心遷就了事致異日重煩兵力該回等每以乞撫緩師悉力東作俟春耕事畢仍圖抗拒官軍此等詭計尤應嚴防是在該大臣酌度機宜妥爲籌辦免致爲其所給西甯撫局應飭馮邦棟詳慎辦理肅回雖有投誠之說並未大受懲創仍應嚴飭徐占彪實力剿洗均毋墮逆回狡計其狗

甘肅新通志

卷首之五

二十九

齒牙一股及零星回騎左宗棠當督飭各營迅圖撲滅掃蕩逆氛以靖疆圉 五月癸巳

上諭軍機大臣等左宗棠穆圖善奏官軍偪攻肅州大獲勝仗左宗棠奏截剿北路竄匪殲滅殆盡暨階州白馬關被匪闖入旋經擊退各摺片肅州踞逆經徐占彪督隊痛剿連戰皆捷殺斃悍賊死黨甚多城賊洶懼左宗棠等即飭令該提督乘此聲威迅拔堅城盡殲醜類惟該逆負固有年仍當穩慎進攻不可稍涉大意甘肅北路零匪經官軍節次截剿殲滅殆盡惟狗齒牙及馬二利木尙在脫逃該逆皆百戰之餘熟諳地勢亡命鋌走自在意中左宗棠等仍當檄飭各防營分道搜捕務將狗齒牙等逆悉數弋獲淨絕根株甘南階城一帶竄匪闖入白馬關經官軍截剿竄逸餘黨無多該督等仍嚴飭各將領聯絡一氣探蹤搜剿以靖地方 七月己丑

上諭軍機大臣等左宗棠穆圖善奏收復河州城池辦理善後事宜肅州官軍獲勝並甘涼防軍截剿援賊情形邵亨豫奏疊剿竄陝零匪肅清各摺河州土回馬占鼉馬尕大等懃誠求撫經左宗棠等宣布朝廷威德責令盡繳馬械准其投誠一面編審戶口將遷徙客回安輯土回各事次第籌辦又於安定會甯平涼隆德靜甯各屬度地廣狹分起安插陝回及漢民之無歸者並皆給以賑糧所籌均合機宜河州文武員弁現已分駐任所即著左宗棠督飭沈玉遂等加意拊循俾悔過自新之人咸至感愧庶可日久相安不至再生反側其泰子寺等處要隘並著飭令張仲春等軍照常聯絡布置毋稍疏懈撒拉回目畏威求撫並著該大臣相度機宜一併妥爲籌辦西甯回目馬泳幅乞降而陝回禹得彥白彥虎等自知稔惡疑畏殊深且有官軍速進即當竄蜀竄滇以延殘喘之議不可不嚴爲之防左宗棠現

甘肅新通志

卷首之五

三十

飭馮邦棟一面諭令悉繳馬械一面密飭降回截其去路並分派各軍會師碾伯進規大小南川老巢所籌深協兵機即著督飭官兵密速剿捕毋令他竄肅州城堅濠深徐占彪一軍雖屢攻獲勝仍當飭令穩慎進取不得稍涉疏虞竄陝零匪經陝防各軍截剿追至靖邊保安所屬該逆竄向草地而去邵亨豫當督飭譚仁芳等扼要駐紮嚴密布置以靖疆圉北山一路開墾漸多民食稍資接濟並著該署撫督率牧令勤求民瘼加意撫綏以副軫念災黎至意 丁酉

上諭軍機大臣等左宗棠穆圖善奏涼州兵勇分剿竄回情形一摺鎮番縣屬有大通一帶竄來陝回並南山等處土回沿途裹脅居民肆行搶掠經在防各軍隨處截剿餘匪向西沙窩遁去其古浪縣屬賊匪及竄擾永昌縣屬之陝回亦經各軍迎剿獲勝餘賊遠颺即著左宗棠穆圖善飭令王仁和督率兵勇併力搜捕務絕根株穆圖善另

片奏交卸省防後應否帶隊赴任抑或移紮西安請旨遵行等語河州撫事漸次就緒西甯一帶劉錦棠現統各營前往相機剿撫左宗棠自可進駐省垣居中調度穆圖善交卸省防原應即赴本任以重職守第甯夏現尙安謐且有張曜所部駐紮足資鎮攝陝西爲甘軍後路糧餉所關此時南北兩路時虞零匪竄擾且新撫回衆分別安插之處均距陝界非遙非得力隊伍扼紮要隘攝以聲威不足戢犬羊反覆之性著該將軍於左宗棠進省將現辦防務分析移交後統帶所部馬隊並挑選步隊率以東行在陝西乾邠一帶擇要扼紮妥籌防剿以副委任穆圖善所部分布近省各要隘尙稱得力左宗棠到省後派兵接防是否足敷分布儻不敷扼紮即可將該將軍所部酌量留防著與穆圖善妥籌辦理穆圖善應俟該大臣布置妥協後再行拔隊東進 丙午

甘肅新通志

卷首之五

三十一

上諭軍機大臣等左宗棠等奏官軍偪剿肅州踞匪並中衛一帶截擊竄匪情形各摺片逆匪久踞肅州負隅抗拒現經徐占彪一軍疊次偪剿攻拔近城之塔爾灣堅巢並埽蕩城西賊壘百餘座擒斬著名逆目多名剿辦甚爲得手逆匪經此懲創兇焰稍衰自應乘此聲威力圖攻克該逆前次降而復叛現又哀詞乞撫難保非因攻剿緊急暫爲緩兵之計左宗棠現已進紮省城著即酌度情形妥籌調度檄飭徐占彪督率各營迅速圍攻並將關內外援賊隨時相機截剿則孤城自不難力拔陝回由涼州屬境竄出邊外復由阿拉善旗入邊肆擾雖經防軍擊退惟賊蹤飄忽去來無定且蒙古地方亦恐被其蹂躪著左宗棠飭令譚拔萃會同黃鼎所部各營探蹤截剿並知會張曜派兵合力兜擊悉數殲除毋任紛竄 丁未

上諭軍機大臣等左宗棠穆圖善奏馬隊官兵擊剿陝回獲勝一摺據

稱陝回奔竄平番所屬之柳川口一帶經副都統常明督帶馬隊追擊斃賊四百餘名餘匪入山逃逸等語此股陝回由西甯逃出欲赴甘涼一帶搶掠雖經官軍中途截剿其竄逸之匪仍恐四處滋擾著左宗棠等飭令在防各軍隨時偵探遇賊即擊以清餘孽前據左宗棠奏崔禹等逆盤踞大小南川已令劉錦棠何作霖等由碾伯進剿刻下該逆曾否他竄該大臣務當飭劉錦棠等迅速進兵乘土客交訖之時痛加剿洗就地殲除毋任遠竄甘涼致西路又被蹂躪其西甯土回如果真心就撫仍當督飭馮邦棟妥慎辦理毋稍苟且

九月己亥

上諭軍機大臣等穆圖善奏移師入陝籌辦情形請將銘軍馬步八營暫緩議撤邵亨豫奏甘省潰勇竄近陝邊並續探情形撥兵迎擊穆圖善已抵涇州各摺片據穆圖善奏楊世俊所統馬隊潰變意圖竄

甘肅新通志

卷首之五

三十一

入陝境現經銘軍副將潘萬才收撫等語惟覽邵亨豫所奏潰勇下竄通渭駐紮該處之藍旗馬隊隨同潰散兩哨駐紮直道鎮之副白旗旋亦潰變裹脅不下二三千人九月初五日夜間全數竄過汧陽直向東下是該匪業已竄入陝境是否潘萬才收撫之外另有東竄匪股著穆圖善邵亨豫曹克忠確切查明將已撫各勇妥籌安置其東竄之匪迅速派隊截剿毋任滋蔓聞西甯撫事現又變更句引陝回抗拒官軍河州回衆亦有蠢動情形儻該降衆再有反覆則是前功盡棄大局殊屬可虞左宗棠進省以後自己熟籌布置現在西甯回匪既不就撫自當督飭官軍實力剿辦迅速殲除其河州降衆仍當隨時察看密爲防範以免他虞此時甘省防剿正當緊要穆圖善所部駐紮北山之馬隊六起步隊四營尙資得力未便遽行撤動著該將軍飭令仍紮原處妥爲防剿左宗棠一面揀派勁旅前往接防

儻左宗棠所派之隊未到或到後布置尙未周妥穆圖善遽將此軍撤赴陝境致有疏虞惟穆圖善是問甘省轄地縣長需兵較多現在大局未穩全在羣策羣力共濟艱難左宗棠務當和衷虛已聯絡衆心以期維持全局迅奏膚公金順著仍遵前旨迅由甘涼一帶馳抵肅州即行具奏並將後路甘涼鎮番一帶妥籌布置與各軍互相聯絡不准再涉遷延亦不得稍分畛域 辛亥

上諭軍機大臣等左宗棠奏攻剿西甯肅州回匪獲勝統籌甘省全局請調宋慶一軍助剿請飭張曜分營駐紮靈州花馬池密陳西甯情形各摺片西甯回匪始以乞撫爲緩兵之計旋結陝回抗拒官軍經劉錦棠等督軍進剿疊挫兇鋒惟逆首白彥虎等皆積年悍賊詭譎多端必須厚集兵力方能制其死命著左宗棠一面飭令劉錦棠等實力進剿一面添派勁旅繼進以期早日蕙功西甯城內漢民閉門

甘肅新通志

卷首之五

三十三

防守亦當設法援應內外聯絡俾免疏虞馬桂源旣爲府城官民所拒即著令其不必入城以釋羣疑左宗棠仍當隨時察看情形相機辦理肅州官軍雖屢次攻剿獲勝而該逆負隅如故著左宗棠飭令徐占彪穩慎進攻力圖克拔並酌量添兵合圖毋任鋌走甘省被兵日久亟應速籌戡定刻下西甯肅州均須增兵攻剿省北一帶亦須派營填紮兵力不敷分布宋慶一軍素稱得力現在陝省北路邊境尙屬安謐著定安即令該提督統帶全軍赴甘助剿該軍由榆林綏德一帶取道慶陽平涼以抵蘭州左宗棠擬飭沿途各局豫辦糧草軍行當不至遲滯宋慶接奉諭旨即著剋期拔隊起程迅赴神機木一帶如尙須添兵填紮即著定安酌度布置左宗棠現擬將譚拔萃所部官軍調赴西甯所有靈州花馬池一帶即著張曜就近分營駐紮以資穩固穆圖善仍當飭令駐紮甘省城北之馬步各隊照舊駐

紮認真防勦毋遽裁撤 十一月庚子

上諭軍機大臣等張曜奏派隊分紮鎮番等處防勦情形一摺鎮番縣屬及阿拉善旗一帶地方遼闊時有賊匪竄擾現經張曜派令提督李葆珠管帶三營前赴柳林湖紅沙梁各處協同郝永剛擇要分紮兼顧金順運道靈州花馬池一帶亦派提督王連三管帶親兵兩營前往俟 拔萃各營拔赴西甯即行填紮著張曜飭令派出各軍認真防勦遇賊即擊毋稍疏虞該提督仍當親率馬步隊隨時偵探實力勦擊竄匪率多騎賊飄忽異常張曜所部馬隊僅有兩營不敷追勦著定安迅即籌撥馬隊數百名協同追勦盡掃逆氛鎮番縣東西灣竄匪雖經郝永剛等勦敗擒斬多名賊匪現向永昌縣一路遁逃仍當跟蹤追勦並著張曜知會涼州官軍一同截擊就地殲除以清

邊患 辛丑

甘肅新通志

卷首之五

三十四

上諭軍機大臣等左宗棠豫師奏西甯解圍現籌辦理情形一摺西甯被圍日久此次劉錦棠督軍深入立解城圍並分別安插難民降衆辦理甚妥該處久爲賊擾民不聊生一切善後事宜即著豫師會商左宗棠悉心布置毋令失所回族結黨甚固醜類繁多仍恐有不逞之徒暗中勾結別滋事端亟應將伏莽一律掃除毋貽後患並著左宗棠豫師隨時加意防範以期綏靖地方至叛逆馬本源等帶同土匪挈眷逃遁已抵巴燕戎格豈可任其遠颺仍當設法按名弋獲明正典刑以示懲儆陝回是否仍踞西川如其逃向甘州左宗棠當飭令各軍跟蹤追勦並檄甘涼各隊迎頭兜擊就地殲除毋聽其乞撫緩師致墮賊計 十二月乙卯

上諭軍機大臣等前經疊諭穆圖善移紮平涼固原一帶爲甘省後路聲援茲據穆圖善等奏稱劉盛藻現已抵陝接統銘軍邠乾一帶足

資控禦其固原平涼地方現有雷正綰魏光燾各營駐紮該將軍一軍擬即移紮涇州等語穆圖善現已回邠著即趕緊部署統率所部各營移紮涇州與雷正綰魏光燾兩軍聯絡聲勢互相應援涇州與長武汧隴等處接壤時有潰勇游匪出沒該將軍當隨時查拏認真勦辦以靖地方左宗棠邵亨豫亦當飭令各路官軍協力防勦毋稍疏虞劉盛藻接統銘軍自應妥籌布置著邵亨豫飭令該臬司於邠乾一帶嚴密設防以資捍衛並將所統各營勇丁妥爲駕馭毋任滋生事端 丙子

上諭軍機大臣等左宗棠奏官軍勦擊肅逆疊獲勝仗暨西甯土客回目乞撫現在辦理情形各摺片肅州逆回困踞孤城疊次出撲官軍營盤經徐占彪等奮勇擊退惟城中悍賊尙多困獸猶鬪允宜穩慎進取迅拔堅城該大臣現已添派陶生林等營前赴肅州交徐占彪

甘肅新通志

卷首之五

三十五

節制調遣金順一軍計期亦應到肅即著左宗棠飭令徐占彪會同金順乘此聲威迅圖攻拔以竟全功西甯土客各回呈繳馬匹槍械紛紛乞撫並著飭令劉錦棠等妥爲辦理毋稍疏虞逆回馬本源馬桂源逃遁巴燕戎格因黨與已離亦思投誠免罪該逆等狡詐性成恐以乞撫懈我軍心萬一逃入番地則捕獲尤難仍著飭令劉明登陳湜劉錦棠等妥慎籌辦無論是否就撫總以捕獲爲要不可稍涉迂緩致誤事機 十一年癸酉二月戊午

上諭軍機大臣等左宗棠豫師奏官軍攻拔大通逆巢左宗棠奏肅州官軍攻破城西賊堡各摺片大通逆目馬進祿等鼓惑叛弁馬壽詭謀煽變經劉錦棠督軍進勦攻破向陽堡逆巢並將著名逆酋悉數擒斬勦辦尙屬得手叛員馬本源等久踞巴燕戎格徧詣各軍求撫仍持兩端暗行勾結必須迅速勦辦左宗棠已派陳湜等軍由河州

前進著即飭令實力攻剿並嚴扼米拉溝等處竄路以期一鼓殲除大通一帶回匪仍著飭令劉錦棠等乘勝進兵剿撫兼施速籌戡定平番碾伯一帶防剿事宜著豫師督飭所部與左宗棠派出各營聯絡策應毋稍鬆懈肅州城西賊堡經官軍用地雷轟破城內賊勢已蹙惟回情狡詐未可輕聽乞撫之詞致墮詭計現在陶生林等軍計已抵肅兵力較厚著左宗棠飭令徐占彪激勵將士奮力圍剿迅拔堅城毋任日久盤踞 三月丙申

上諭軍機大臣等金順奏會攻肅州獲勝請飭張曜前赴甘涼催山西撥解軍餉各摺片金順抵肅州後會同徐占彪攻剿獲勝賊勢已蹙著左宗棠責成徐占彪乘此機會認真攻剿以期早竟全功金順仍慎遵前旨剋期出關接統成祿所部能否酌留隊伍會攻肅城著該前將軍妥籌布置務臻周密白彥虎糾黨六七千人出竄甘州漸近

甘肅新通志

卷首之五

三十六

撫彝地方意圖應援肅逆牽掣官軍甘撫一帶關繫糧運後路金順現須出關未能兼顧徐占彪所部攻剿喫緊若抽撥隊伍前往必至兵分力單甯夏防務現尙安謐張曜平日剿賊勇往著即親率大隊由甘涼一路節節掃蕩而前殲除白彥虎等股以維全局張曜拔隊後著定安飭令金運昌酌撥數營由纏金迅赴甯夏扼要填紮聯絡聲勢毋得稍有遲延 四月乙丑

上諭軍機大臣等定安奏籌布防剿事宜請飭各專責成暨阿拉善旗有賊竄擾各摺片定安以甯夏及阿拉善旗一帶不可無重兵鎮攝甘涼地方現有宋慶一軍防剿足敷分布似可移緩就急酌留張曜所部各軍就近扼紮以期兼顧擬自甯夏至涼州防剿事宜責成張曜辦理其甘涼迤西請責成宋慶剿辦等語前據左宗棠奏宋慶所部擬令先赴涼州已有旨諭知左宗棠即飭宋慶統率全軍剋日赴

肅會商徐占彪攻剿以便金順出關是甘涼一帶兵力甚單亟須張曜等督隊前往迅埽逆氛當此事機緊要之時豈可朝令夕更致涉鬆勁仍著定安知照張曜懍遵前旨迅赴甘涼將白彥虎等股盡數埽除毋得遷延貽誤張曜等啟行後甯夏需兵填紮定安既奏稱金運昌一軍難以輕動應如何派隊扼紮俾免疏虞之處著該將軍妥籌具奏阿拉善旗有賊匪竄擾是否白彥虎一股現既竄向阿畢爾米特地方著定安督飭防軍會同蒙兵認真截擊並著知照張曜撥隊協力兜剿以免蔓延 己巳

上諭軍機大臣等左宗棠豫師奏官軍克復巴燕戎城後剿辦逆回進規循化左宗棠奏追剿竄回並肅州疊獲勝仗情形各一摺巴燕戎城克復後陳湜飭令該處回族呈繳馬械並將青科莊悍回懲創以次戡定卡勒等莊現駐甘都工河岸俟循化上四工回族縛獻醜類

甘肅新通志

卷首之五

三十七

呈繳馬械諸事辦妥再赴循化次第辦理即著左宗棠等督飭陳湜認真籌畫懾以兵威撫其馴順以期一勞永逸綏靖邊陲白彥虎等逆由西甯出竄圖援肅州經楊世俊等軍探蹤截擊疊挫賊鋒該逆復與肅城踞賊夾撲圍城營壘經徐占彪等督軍擊退並襲破塔爾灣賊巢賊膽益寒紛紛潰竄現在白彥虎已被槍傷亟應乘此機勢迅速殲除其散竄南山各岔口者左宗棠已飭甘州各防營搜緝並咨商宋慶飭令分駐各營就近捕斬想可淨絕根株至竄向大羣灘黑山峽之賊人數雖不甚多亦應一律追捕仍著該督飭派官軍探蹤剿擊悉數殲擒毋留餘孽肅賊無援必形窮蹙左宗棠當飭令徐占彪等盡力攻剿速拔孤城不得久稽時日 六月壬子

上諭軍機大臣等金順奏酌抽馬步各營親統出關請飭左宗棠籌濟軍食文麟奏肅州回匪西竄出關派兵防守哈密隘口各一摺現在

肅州回匪陸續竄出關外玉門安西俱有大股攻撲屯莊哈密亦復喫重金順自應懍遵前旨迅速統帶馬步各隊並成祿關外之軍確探賊蹤實力追剿毋任紛竄文麟所部兵力雖單亦當酌派隊伍與金順之軍分投夾擊俾賊不至任意西竄哈密各隘口防務亦可鬆動該前將軍等務當協力同心剿除此股竄匪以靖關外門戶現在安西玉門蹂躪徧地金順所需每月糧一千石料三百石自應於關內籌辦左宗棠身任地方呼應較靈即著嚴飭甘郡肅州兩處地方官先籌辦四箇月軍食並協濟車馬運赴玉門屯儲毋得稍有短絀該前將軍亦不得專候軍食辦齊方行出關致誤戎機肅州合圍日久諒可不日攻拔金順留防各軍即著傳諭宋慶於抵肅城後代爲統攝免致他虞 七月丁未

上諭軍機大臣等本日據金順奏肅州兵勇圍攻甚密指日可期克復

甘肅新通志

卷首之五

三十八

是甘省軍務漸就肅清因思現在各營勇丁固多他省客勇而本地募勇亦復不少此項勇丁招自田閒半係無業游民以之衝鋒禦寇不過一時權宜之計無事時恐未必能安耕作若任其游蕩不爲鈐束致令流爲匪徒不但無以示矜恤亦非綏靖地方之道甘肅各營兵丁缺額甚多凱撤以後應如何將本地募勇調補訓練以資安插之處著左宗棠悉心酌度情形奏明辦理其各省亦當分別撤留其得力者飭各營官實力整頓不得力者妥爲貲遣俾免滋事並着先事豫籌以遏亂萌 十月己亥

上諭軍機大臣等左宗棠金順奏克復肅州首要各逆及土客悍賊殲滅淨盡左宗棠奏籌畫出關情形各摺片肅州逆匪經左宗棠與金順分督各軍會合密攻並各掘地道進擊逆首馬四以勢蹙詣營乞撫經左宗棠等飭令呈繳馬械點驗冊籍九月二十三日該大臣將

逆首及各起兇悍客回悉數誅戮即於是夜克復肅城覽奏實深欣慰所有肅城善後及甘省一切事宜應如何次第興辦撫輯地方以資培養之處著該大臣通盤籌畫妥爲布置前因關外軍情緊迫疊諭金順統率所部出關左宗棠揀派得力將弁前往助剿茲據該大臣奏稱提督張曜夙嫻韜略副都統額爾慶額勇幹有爲均堪派令出關會同剿辦即著知會張曜統帶嵩武全軍額爾慶額統帶吉林黑龍江馬隊會同金順馳往關外迅掃賊氛金順一軍勞乏過甚自應略加整理仍著該前將軍趕緊部署即率得勝之師早日西進不可過於延緩左宗棠務將各軍糧運妥爲籌備俾利師行安設轉運糧臺一節該大臣請於戶部堂官內揀員總司其事並令選派廉幹司員攜帶帑銀出關辦理著候旨遵行惟糧運事宜必須地方大吏督率呼應方靈即使派員前往仍須該大臣會同籌辦方能有濟也

甘肅新通志

卷首之五

三十九

庚子

諭內閣昨因肅州克復降旨將在事出力之徐占彪等分別優獎因思陝甘逆回擾亂十有餘載勢極猖獗自簡任左宗棠總督陝甘數年以來不辭艱苦次第剿除此次親臨前敵督飭將士克復堅城關內一律肅清朕心實深嘉悅自應特沛殊恩用昭懋賞左宗棠著以陝甘總督協辦大學士該大臣前經賞給騎都尉世職並著改爲一等輕車都尉世職將軍金順督軍助剿共奏膚公洵爲奮勉著開復革職處分以彰勞勩

諭軍機大臣等昨據左宗棠奏餉項奇絀請撥四成洋稅以資接濟當經降旨交戶部速議具奏第思甘肅地方瘠苦現又時屆隆冬該將士荷戈關隘寒冽異常朕心深爲軫念本日已諭知戶部於庫存項下撥銀一百萬兩陸續解往左宗棠於此項銀兩解到後即可酌放

月餉俾資飽騰至該大臣軍營餉需亦諄諭戶部嗣後務撥有著之款不得以空言搪塞該大臣所請簡派戶部堂官辦理糧臺事宜自爲慎重起見但轉運採買非得地方大吏辦理則呼應不靈該大臣素顧大局朕所倚畀不必再派部院大員以期事權歸一甘境甫經戡定亟須有兵勇擇要分割以資鎮撫該大臣所部各營官兵數年來隴右馳驅勞苦已久自應一面量加休息一面設法裁併庶一兵可得一兵之用而餉亦不至虛糜至將來關外用兵籌餉固難籌糧尤屬不易應如何先事豫籌該大臣諒早計及著將兵事餉事統籌全局悉心經理與關內外現在地方情形一併詳細奏聞張曜額爾慶額馬步各隊何時可以出關金順昨亦諭令將兵勇略加休憩即率得勝之師西進所有出關官兵糧餉轉輸及採買一切事宜該大臣自無不引爲己任不待朕之諄諄訓諭也

甘肅新通志

卷首之五

四十

十三年甲戌三月壬子

諭內閣左宗棠奏甘肅農業久荒請將積欠錢糧概予豁免一摺甘肅地方被賊蹂躪多年田畝久荒糧租無出閭閻情形困苦加恩著將甘肅省同治十三年以前實欠在民地丁正耗等項錢糧草束以及番糧番草並向隨地丁額徵課程等項雜賦概予豁免以紓民力

光緒五年七月初六日

上諭甘肅階州等州縣於本年五月初十日地震至二十二日始定其間或隔日微震或連日稍震即止惟十二日階州文縣西和等處大震有聲城堡廟宇官署民房率多傾壞傷斃多人覽奏實深矜憫著左宗棠委員詳加查勘將被災戶口妥爲撫恤毋任失所

十月初三日

上諭甘肅陝西階州潼關等處地震陝西甘肅等省間有蝗蝻萌生均

經該督委員查勘即著迅速辦理並將來春應否接濟之處一並查明於封印前奏到候旨施恩 七年七月十六日陝甘總督楊

昌濬片奏甘南各州縣地震情形奉

旨知道了著即督飭地方官將被害居民妥爲撫恤毋任失所

八月二十七日陝甘總督楊昌濬片奏階禮地震成災籌款分

別賑撫奉

旨覽奏階州等處被災情形殊堪憫惻著即遵前旨妥爲撫恤務使災

民均沾實惠 十月十二日奉

上諭本年甘肅階州等處地震固原州西甯等處被雹均經該督委員查勘即著迅速辦理並將來春應否接濟之處一並查明於封印前奏到此外有無被災地方應行調劑撫恤之處著一並查奏候旨施恩將此諭令知之 九年二月十七日

甘肅新通志

卷首之五

四十一

上諭前因甘肅地方自遭兵燹民多流亡曾將同治十三年以前民欠錢糧概予豁免因念該省田地荒蕪已久甫經開墾之田收成減少近年復疊被災歉閭閻困苦民氣尙難復元若將積欠錢糧概行徵收民力實有未逮所有甘肅省光緒七年以前民欠地丁正耗錢糧草束以及番糧番草並向隨地丁額徵地丁課程等項雜賦加恩著全行豁免以紓民困該督即將所屬民欠實數分年分縣詳細刊刻謄黃遍行曉諭務使實惠均沾毋任吏胥舞弊用副軫念民艱至意該部知道 十一年正月二十二日陝甘總督譚鍾麟片奏秦州等處地震情形奉

旨覽奏秦州被災情形深堪憫惻著該督飭屬查明妥爲撫恤毋任一夫失所

上諭因甘肅地方自遭兵燹民多流亡復因該省甫墾荒田收成少減

先後將同治十三年以前暨光緒七年以前民欠錢糧均予豁免近年該省田地已墾復荒者不少本年夏閒各屬復多被水被雹若將積欠錢糧照常帶徵民力實有未逮所有甘肅省帶徵光緒八十九十一年等年民欠地丁正耗錢糧草束及各項雜賦加恩著概予豁免以紓民困該督即將各屬民欠實數分年分縣詳細刊刻謄黃遍行曉諭務使實惠均沾毋任吏胥舞弊用副軫念民艱至意該部知道

二十一年正月二十四日

上諭有人奏甘肅逆回煽亂實由提臣首禍請飭查辦一摺據稱循化爭教之始楊昌濬咨請雷正綰統帶所部前赴河州駐紮逮循化告急該提督並不出河州一步以爲聲援任聽兵丁在城騷擾回目馬彪派人赴雷營求示曉諭以安衆心雷正綰即將所派頭目二人斬首回民因而大噪當河回事發該提督就地募勇回民之黠者冒名甘肅新通志

卷首之五

四十二

入伍甫經招募旋即叛去軍械反爲賊用雷正綰年逾七十嗜好甚深任聽所部虛冒缺額該提督從中分潤各等語著陶模按照所叅各節確切查明據實具奏毋稍徇隱原摺著抄給閱看將此諭令知之
六月初七日軍機大臣面奉

諭旨甘肅新疆喀什噶爾提督董福祥此次統軍回甘遇有緊要事件著准其專摺具奏

諭旨董福祥一軍計已抵陝著迅速前進牛師韓馬心勝著統歸該提督節制董福祥立功西陲舊部將卒有聞風投効者着廣爲收募剋日成軍所有餉需當飭戶部源源籌濟惟回衆不可招募入營是爲至要
七月十六日

上諭楊昌濬奏總兵援剿不力請旨懲處一摺甘肅逆回滋事日益蔓延自海城收復後循化解圍後河狄西甯又復聚衆猖獗總兵湯彥

和奉調赴援遷延日久迨行抵河州又不偵探虛實冒昧進攻以致全軍潰退貽誤戎機湯彥和著革職留營待罪圖功以觀後效楊昌濬在甘有年於回衆情形豈未深悉乃忽勦忽撫迄無定見以致湟中河狄遍地皆賊實屬措置乖方雷正綰受賊愚弄發給槍械轉資寇兵亦屬庸憤不職楊昌濬雷正綰均着交部議處此後務當振刷精神破除壅蔽董福祥等軍到後合力同心將回氛迅速掃蕩庶可稍贖前愆懍之

八月初八日奉

旨楊昌濬等奏循化解圍情形並河州擊賊獲勝各一摺覽奏均悉所有出力員弁著查明暫行存記陣亡之記名提督廣東補用總兵李日新補用總兵劉潤山把總羅俊儒從九譚楚生文童王少卿都司李振元均著交部議卹嗣後勦辦情形該督務遵前旨隨時電奏毋稍遲延 又奉

甘肅新通志

卷首之五

四十三

諭旨西甯告急著董福祥迅速前進派隊往援所募馬隊已成軍否此旨著張汝梅轉遞董福祥知之

諭旨楊昌濬電悉西甯道路梗塞情形喫緊著責成李培榮節節掃蕩前進董福祥到甘著即迅赴前敵相機進勦毋庸進省以免濡滯葉占魁何建威均歸董福祥節制調遣如不聽令即行嚴叅

諭旨董福祥電奏悉該軍到甘當確探賊情休養兵力察看何路緊要即由何路進勦朝廷不爲遙制甘省新募各營著統歸該提督節制調遣以一事權

諭旨前令董福祥將甘肅所募各軍節制調遣該提督諒已接到前次援勦河狄諸將中有退衄者著查明叅奏地方大吏有無諱飾因循等弊並著據實奏聞此旨著張汝梅迅寄董福祥知之

諭旨楊昌濬董福祥電均悉平涇布置尙妥董福祥著先解河圍其救

援西甯著牛師韓李培榮合力進攻小峽口以通道路至甘涼等處亦當設法防剿著楊昌濬隨時接濟所需軍火已飭王文韶酌撥解往矣
九月十一日軍機處奉

上諭楊昌濬等奏西甯河州近日戰守情形一摺所有陣亡之總兵銜副將周萬生遊擊曾仁和黃雨亭把總賀國貴團總軍功楊巨海均著照所請交部議卹又奉

諭旨董福祥電悉進紮狄道將次渡洮此後須步步爲營謀定後動回衆槍礮尙少我軍輜重軍火均在後路尤防抄截牛師韓吳雲伍各營著陸續催令前進毋得逗留昨已有旨令陳湜留紮裏關改派魏光燾挑選所部精銳迅速赴甘援剿矣

諭旨據奎順報西甯危急大通營城失守大通縣亦朝不保夕李培榮阻於平戎驛等語西甯待援孔急牛師韓一軍現留安定此外如何

甘肅新通志

卷首之五

四十四

得彪等營如有可以酌撥者著董福祥抽調數營迅速派往援應欽奉

諭旨董福祥所奏均悉現在河州悍賊麴聚該提督所部究嫌單薄後路堪虞牛師韓一軍應否仍留安定以資援應著斟酌情形辦理本日已派程文炳統率所部赴甘會剿矣
十月十五日奉

旨楊昌濬電奏初三初八剿賊獲勝本日復據董福祥電續得大捷河州之路已通董福祥電洮東西布置甚爲周妥所需軍械著楊昌濬源源勻撥接濟頃又據劉世安所陳甘省將領情形內稱王正堃棄積石關湯彥和失雙城集並稱李良穆勇不足恃陳宗蕃臨敵納妾及李培榮嗜好甚深逗留不進等語著楊昌濬再加詳訪據實參奏不准回護徇隱
十七日

上諭有人奏甘省軍務積習甚深請飭嚴查參奏一摺據稱管帶涼州

練軍王正堃駐紮積石關移紮白塔寺八月二十日團日康達與賊接仗獲勝王正堃攘爲己功副將朱祥興委帶練軍屢次推故不去署河州鎮李良穆帶營駐防中部惟日請回日宴飲提督李培榮往援西甯行至峽口遇賊大挫其餘營官無不任意遷延未聞一爲參奏等語此次甘省逆回變亂猝致燎原總由諸將領違令藐法毫無顧忌以致遷延日久軍務愈形棘手現在董福祥督軍渡洮親臨前敵著按照摺內所指破除情面嚴查叅奏毋稍瞻徇總期賞罰嚴明功罪悉當俾士氣爲之一振逆回屢經敗衄自不難剋日掃除也原摺著抄給閱看將此由五百里諭令知之 二十一日

密旨又有人奏管帶陝軍葉占魁見賊即逃軍械皆爲賊有著董福祥與其交查各員一並覆奏河州團目潔克康姓有無戰功並著查明辦理 二十四日奉電

甘肅新通志

卷首之五

四十五

旨楊昌濬董福祥先後電奏河州解圍軍威頗振覽奏欣慰俟奏到詳細情形再降諭旨河州本係賊巢忽起忽伏最爲狡譎宜慎重進取勿隳其計省路想已疏通西甯尙在圍困著董福祥分兵速援甘涼一路楊昌濬亦應派兵兼顧 二十九日

密旨董福祥電悉搜斬逆首勒繳軍械辦理悉合機宜分紮各營以顧後路亦甚中肯至西甯能否解圍牛師韓李培榮是否得力著據實查奏不准一字諱飾雷正綰著飭令回固原本任董福祥迭次勦賊情形即著具摺馳奏 十一月初四日

密旨董福祥電悉搜斬逆目彈壓地方自是正辦惟河州不可遽離西甯亦當急救斷非持示曉諭所能了事著即設法派隊進援該提督受恩深重交查各件當據所聞入告只須還一實字不必多費浮詞

十九日

諭旨董福祥電悉四路搜剿覆其巢穴辦理甚合西甯尙未解圍所派五營能否得力仍著妥籌兼顧至逃亡難民如何安插已諭令楊昌濬派員前往並著該提督飭令作速辦理交查各件即著據實覆奏

二十六日

上諭楊昌濬電悉西甯解圍剿撫事宜最關緊要李培榮前在平戎坐困累月其恇怯已可概見恐難任剿賊之責楊昌濬揀派得力之員四路搜捕務盡餘孽甘涼道路難通永昌入山之賊應分別剿辦又奉

諭旨楊昌濬電悉甘涼一路雖派十營前往而永昌賊勢猖狂現在擾及撫彝恐阻玉關之路西甯一路牛師韓亦不甚得力至李培榮坐困平戎尤爲怯懦此兩路皆該督所應速援著通盤籌算嚴飭諸將剋日圖功若再遷延即著叅奏 一十九日

甘肅新通志

卷首之五

四十六

諭旨董福祥已調補甘肅提督仍著節制諸軍現在巴燕戎之匪未降大通圍未解防其四散蔓延河州搜淨後著節節掃蕩前敵各軍如不聽令即嚴叅重辦將甘營積習一舉廓清

十二月初十日內閣奉

上諭董福祥奏遵旨查明被叅各員據實直陳一摺補用副將王正埜管帶涼州練軍駐守積石關拋棄餉械旋經移紮白塔寺團目康達在西南川被圍坐視不救記名提督洮岷協副將署河州鎮總兵李良穆駐營白塔寺迭經董福祥咨商楊昌濬飭令進兵合圍該副將一味遷延直至河州圍解始行赴任王正埜李良穆均著即行革職甯夏鎮總兵牛師韓治軍漫無紀律所過騷擾管帶練軍馬隊楊寶林前在峽口失利牛師韓楊寶林均著交部議處牛師韓現在移紮平戎如始終不能得力即著董福祥嚴叅懲辦副將朱祥興既據查

無藐法違抗情事毋庸置議該部知道 又奉

諭旨聞何得彪四營到湟後有恣意焚殺之事著董福祥查明具奏毋稍回護撫回之法固不可輕信亦不可濫殺總以勒獻逆首訊明正法爲要諒董福祥必能操縱合宜也 十四日

諭旨董福祥電悉西甯招撫辦理未協該提督自應帶隊前往惟大峽一帶沿路皆賊須防抄襲昨諭魏光燾馳赴河州該提督俟魏光燾到後再行拔隊方妥至剿撫機宜著照河州辦法此事責成該提督力持定見切勿受人牽制 十七日內閣奉

上諭楊昌濬奏查明帶兵各員叅款據實覆陳一摺除王正堃李良穆業經降旨革職外補用副將陳宗蕃當軍務倥傯之時不知檢束先顧其私著即行革職以肅戎行該部知道 二十六日

上諭楊昌濬奏官軍攻克大峽西甯解圍請將出力陣亡員弁分

甘肅新通志

卷首之五

四十七

別獎卹一摺所有此次陣亡之副將楊宗賢知府李俊生均著交部從優議卹出力文武各員著陶模於到任後查明具奏再降諭旨 二十二年正月二十一日

旨董福祥電悉兩川堅巢次第掃蕩大通解圍皆前敵諸軍之力深堪嘉尙張成基何得彪及鄧增等著董福祥查明戰績據實保奏出力員弁一並擇尤請獎 三月十八日

旨據奎順等奏賊竄青海台吉洛地方並稱湘軍湟軍馬隊無多不敷調遣等語逸匪西奔正恐蔓延關外魏光燾所部較多何得任湯秀齋逗留不進奎順於青海蒙番是其專轄著妥爲調遣董福祥計抵西甯著添派馬隊並飭張成基等迅速追剿頃已授鄧增固原提督該員現在前敵著歸董福祥節制又奉

諭旨魏光燾電悉著即迅赴本任毋庸在碾伯候旨董福祥現駐西甯

著將魏光燾所留各軍統歸節制調遣以一事權

十九日

旨前因賊竄青海已飭奎順等添隊追剿茲據奏貝子陣亡旂族被搶情形更重著奎順董福祥魏光燾各派得力將弁星速前往隨同鄧增等窮追兜剿務將此股就地殄除倘再西竄定將帶兵各員嚴懲不貸

十月十八日

旨董福祥奏已悉前諭留兵二十營原爲鎮壓地方起見著陶模等通盤籌計裁一營冗勇即補一營精兵務期迅速添足二十營不可各分畛域

上諭陶模董福祥奎順奏甘肅關內外及青海回匪一律肅清由五百里馳奏一摺上年三月閒甘肅循化撤回滋事河州逆回馬永琳等乘機煽亂海城逆首復有聚衆戕官之事由是碾伯巴燕戎格各屬回匪聞風響應全隍騷動特派董福祥魏光燾督師入甘認真剿辦

甘肅新通志

卷首之五

四十八

董福祥總統各營尤爲得力九月閒馳抵狄道六戰皆捷遂解河州之圍誅逆回馬永琳等旋由循化米拉溝一帶進援西甯彼時魏光燾已提師抵隍與奎順會商先剿西甯東三關踞逆遂誅逆首韓文秀等復蕩平北川進攻哆巴連解大通縣及喇課汎城圍董福祥復派隊渡大通河出達坂山會同陶模所派副將焦大聚等軍先後進攻北大通之賊本年二月克上下五莊復北大通城哆巴之賊斬其酋馬大頭三三詣湘軍乞降維時巴燕戎格之撤回馬成林等句串米拉溝逆目冶諸麻糾合回衆擾及南川逆目劉四伏等從水峽竄出由青海柴達木蔓延關外董福祥等各派馬隊跟追並由奎順飭青海蒙番各兵合力堵擊先後攻打諸賊巢捕誅馬成林冶諸麻等朝廷諭令將鄧增一軍移紮肅州復電飭饒應祺派道員潘效蘇各軍嚴堵安西敦煌玉門南山各隘路分投截擊擒劉四伏於羅布淖

爾東南之和爾昂地方於是關內外及青海全境一律肅清此次回逆搆亂嘯聚數十萬人蹂躪地方數千里在事將帥督飭諸軍擒渠掃穴次第削平實屬異常出力董福祥運籌決策調度有方迅奏膚功勳勞懋著著賞加太子少保銜並賞給騎都尉世職奎順防守西甯並會剿青海等處竄匪辦理迅速著賞穿黃馬褂並交部從優議敘陶模徵兵籌餉不遺餘力著補授陝甘總督饒應祺剿辦關外逸匪不致蔓延著補授新疆巡撫魏光燾攻克蘇家堡哆巴等處賊巢迭挫兇鋒亦屬著有勳勞著交部從優議敘用示朝廷論功行賞之至意

二十三年四月二十四日

上諭陶模奏提督捐款濟賑請旨嘉獎等語甘肅海城平遠一帶兵燹後難民流離失所提督董福祥捐銀一萬兩賑濟鄉間洵屬好義急公深堪嘉尚董福祥著交部從優議敘

十二月十一日

甘肅新通志

卷首之五

四十九

上諭督辦軍務王大臣奏請移紮甘軍以資捍衛一摺山陝地方東近畿疆西控關隴形勢最爲扼要董福祥聲望素著即著迅速添足二十營之數分紮大慶關平陽府一帶認真督練務成勁旅以後甘省防務著陶模實力整頓刻下關內外一律肅清果能就現有之營扼要駐紮足資鎮懾不得藉口兵力單薄稍涉疏虞將此各諭令知之

二十四年七月

上諭董福祥所部全軍經奕劻認真校閱各營弁勇一律精壯隊伍亦甚整齊一切分合進止均能嫻熟該提督治軍嚴整教練有方深堪嘉尚著賞給白玉翎管一枝白玉搬指一箇白玉柄小刀一把火鏢一箇交董福祥祇領以示優眷並賞給該軍兵勇銀一萬兩由戶部給發並發去小卷袍鞋料二百卷著董福祥分別賞給營哨各官所有該提督所部甘軍著休息數日即行移赴駐紮處所認真訓練務

期精益求精以副朝廷整軍經武之至意 八月十一日

上諭董福祥奏恭遇鑾輿巡幸請選派隊伍親赴宿衛一摺該提督應將所帶隊伍選派在營預備聽候諭旨遵行將此諭令知之

二十五年二月

上諭甘肅提督董福祥自調紮近畿以來訓練隊伍具有條理因念該提督從前在甘肅關外征勦回匪無役不從戰功威望尤爲諸將之冠朝廷眷念成勞深資倚畀着賞穿帶膝貂大褂以示優異欽此
二十六年十月陝西

行在

硃筆諭旨一道交甘肅提督董福祥

手諭董福祥知悉爾忠勇性成英資天挺削平大難功在西陲近以國步艱難事多掣肘朝廷不得已之苦衷諒爾自能曲體現在朕方屈

甘肅新通志

卷首之五

五十

已以應變爾亦當降志以待時決不可以暫時屈抑灰卻初心他日國運中興聽鼓鼙而思舊不朽之功非爾又將誰屬也尙其勉旃

宣統元年四月十八日

上諭升允電奏甘肅連年旱歉蘭州涼州鞏昌各屬前歲被災去秋尤甚入春雪雨愆期迄今尙未得有透雨碾伯會甯及各土司先後報災現在糧少價昂飢民哀號乞命牲畜多致餓仆等語覽奏殊堪憫惻加恩著賞給帑銀六萬兩由度支部給發著該督派委妥員按照所屬災區查明戶口災情輕重分往散放務使實惠均霑毋任失所用副朝廷軫念災黎至意該部知道

甘肅居天下西北形勝之區地瘠民貧撫綏不易我

朝深仁厚澤累洽重熙二百六十餘年中凡用兵機宜水旱蠲恤

列聖綸音特沛兆民允懷

宸翰勒諸貞珉山河同壽

今上敬

天法

祖勤政愛民

御極之初

軫念甘肅災黎發帑賑濟蓋猶是

列祖

列宗覆載生成之量凡身受者何幸如之謹自

開國以來按年恭錄冠諸卷首紀

恩也視舊志

天章列於藝文蠲恤別爲目錄於義較安云

甘肅新通志

卷首之五

五十一

